

**ANTONII THISII JC.
HISTORIA NAVALIS,
SIVE
CELEBERRIMORUM
PRAELIORUM, QUAE...**

Antonius Thysius

10

6-B
29

XVII 2 25.

C.S.

10 - 1 718
A. 4955



20210

a/a:

ANTONII THYSII JC.
HISTORIA NAVALIS,
Sive
 CELEBERRIMORUM
P R Æ L I O R U M.

2 V Æ

Mari ab antiquissimis temporibus usque ad Pacem Hispanicam Batavi, Foederatq; Belgæ, ut plurimum victores gesserunt, luculenta descriptio.



LUGDUNI BATAVORUM,
 Ex Officina **JOANNIS MAIRE**, clodclvii.

Sum Arnoldi de Boel respectando

C&P

100. 1013

50. 1

CELSISSIMIS FOEDERATI
BELGII PATRIBUS,
NEC NON

Præpotentibus & Illustrissimis

HOLLANDIÆ PROCERIBUS,
DOMINIS SUIS,

Submisse dicat, consecratque

ANTONIUS THYSIUS.



IRCUMFLUUM Oceanum, libertatis Vestrae primum vindicem, indomiti Martis cruentorumque præliorum vastum cubile, divitiarum largitorem, commerciorum tutorem, Reip. Vestrae statorem vobis exhibeo, PATRES AUGUSTI, imo ipse se totum Vestrae Potentiæ offert, atq; triumphos innumeros, continuosque & undique tinta hostili sanguine sua æquora heic ostendat. Nimirum quam late patent maria, virtus

* 2

Vestra



D E D I C A T I O.

Vestrapatuit, imò quàm immoto & pigro frigore non aquarum vortices, sed glaciales & horridæ rupes eriguntur, Fortitudo Vestra naturam deficientem fatigavit. Uti illa, quæ illustria antiquis contingere temporibus, silentio prætermittam, attonitus adhuc hæret orbis, in hoc angulo terre concussam potissimum mari Hispanicæ dominationis potentiam, Orientis atque Occidentis opes flagellatas, totam ferme Europam in belli partes tractam, quasi de imperio universi ageretur, neque minus Fœderatos domesticis victoriis nobiles, sui securos, in ipsam Hispaniam, in Asiam, Africam, & Americam belli tempestatem classibus suis effudisse. Exiguis limitibus Batavi sociique arctantur, majestas, virtus, gloria nullum terminum habet. Batavia hodie etiam extra Bataviam colitur, atque Orienti formidabilis est. Quinimo per totum terrarum orbem, quem non semel tanquam insulam circum

D E D I C A T I O.

circumnavigarunt, Batavorum nomen latissime se diffudit, atque venerationem cunctis admodum populis intendit. Qua sol oritur, caditque, arces, castella, oppida, imo ipsa regna constituta sunt. Legationes remotissimarum gentium, Indorum, Persarum, Turcarum, liberaliter susceptæ, auditæ, foedera percussa, quasi in nostra fortuna omnium fortuna sita esset. Iactent Phœnices, Carthaginienfes, Græci, & rerum domini Romani maritimam potentiam, longe inferiora sunt Nostratium expeditionibus. Magnitudo rerum mari gestarum omnium admirationem excedit. Erunt aliquando illa tempora, cum posterî fidem non adhibebunt, neque nos crederemus, nisi nostris ea contigissent temporibus. Victor ubique nobis Oceanus non simpliciter indulfit, victorias victoriis cumulavit, denique incremento amplius non reliquit locum. Illa nunc demum magna est felicitas, felici-

DEDICATIO.

tate sua posse continuò uti. Ingentium sæpe imperiorum nutarunt fastigia, quod Proceres iisdem artibus non conservarent imperia, atque peperissent. Mari vindicata primum libertas, mari in immensum crevit, mari conservanda, tutanda. Vos autem, PATRES AUGUSTI, in id semper incubuistis, & adhuc incumbitis, uti vasta æquora commerciis pateant; neque violentia hostium, vel insidiis prædonum intercipientur. Notis nimirum in Oceano nostras opes sitas, & mercaturam animam esse nostræ Reip. Fuit hæcenus (absit invidia dicto) hæc spithama terræ, quæ mari passim cingitur exediturque, horreum publicum totius Europæ. Effundit etiam extremus Ganges in Rhenum suas divitias, imo quicquid uspiam locorum est, hic emitur venditurque, dum ad ultimas oras vela nostra dimittimus, colonias erigimus. Tantum est mare sibi obnoxium habuisse, ut qui illi leges ponere potuit,

D E D I C A T I O.

potuit,etiam universo possit. Accedit quod
 maritimæ Respublicæ æternitatem quan-
 dam sibi polliceri queant, terrestres ut plu-
 rimum velut senio paulatim & languore
 consumantur. Dum itaque bello animosi,
 pace quieti, maria movetis, secure navigia
 deducitis, media pace nos bellum inchoa-
 mus literarium non cruentum, sed inno-
 xium, à quo ne ipsæ quidem pacatæ Musæ
 oculos avortant. Etsi autem verba factis ex-
 æquari nequeant, diu tamen mecum luctan-
 do honesta tandem me cepit ambitio, ne-
 que me quietum esse sivit, donec in inque-
 to Oceano fluctuantem calamum ponerem.
 Dirigimus heic aciem in mediis fluctibus;
 in ipsis aquis excitatos igneis, incensisque
 navibus ardentis veluti cæli, trucem &
 horrendam faciem securi aspicimus, ho-
 stem vincimus, triumphamus; denique
 si iniquior fors obtigerit, mortem atque
 vitam juxta æstimamus. Hæc mea prælia,
 imo

DEDICATIO.

imo vestra , & quidem celeberrima , usque ad Pacem Hispanicam , Nomini Vestro submissee inscribimus , PATRES AUGUSTI , qui bello , pace nobiles , ita Reip. vestræ potentiam auxistis , ut , sicuti pleraque mortalium habentur , invidia ex opulentia orta sit. Infita est ea mortalibus , imprimis iis , qui ætatem in excelsis agunt , natura , recentem aliorum potentiam ægris oculis aspicere , & quos vel pares vel inferiores viderunt , nolle ferre superiores. Sed iusto imperio , æqua & tranquilla moderatione Vobis hæc contigit felicitas , ut felicitatem Vestram tueri velitis , possitisque. Quæ uti perpetua sit , Deum immortalem , rogo , & obtestor. Datæ Lugduni Batavorum , mense Ianuario , Anno c I O I O C LVII.

HISTO-

HISTORIA NAVALIS
BATAVORUM,
Sive
CELEBERRIMORUM
PRÆLIORUM
QVÆ

Mari ab antiquissimis temporibus usque ad Pacem.
Hispanicam, Batavi ut plurimum victores gesserunt, luculenta descriptio.

PROOEMIUM.

DUM totiens inter Batavos aliasque Nationes horrendum in ipsis aquis belli maritimi exarsit incendium, & sanguine humano tinctus Oceanus cadavera volvit, nobis etiam inhorruit calamus, & ad prælia securam se accinxit. Batavorum olim, & nunc sociarum gentium prælia celeberrima navalia usque ad Pacem Hispanicam describere in animum induximus nostrum. Lente properavimus, & mente bene composita diu cum nobis ipsis morati, quia & eruenda erant ex antiquis autoribus, quæ ad institutum nostrum conducunt, & publica quoque ex autoritate Procerum inspicienda fuere monumenta, quorum multitudo facile animum distrahere potest. Ubi veritas latet, diligenter nobis inquirenda fuit, quæ
A cunctan-

cunctando demum elicitur. Illa omni odio vel favore debet esse antiquior. Nonnulli ita Historiam scribunt, ut ne sibi quidem ipsis credant, nos nullis affectibus, sed sola veritate vincemur, atque interius abdita & secreta rerum perscrutabimur. Adeste vos Batavi, quorum virtus semper inconcussa fuit: qui, ut olim socii & fratres Romanorum fuistis, ita nuper admodum mari terraque victores incredibili virtute Potentissimo Regi Hispaniarum, qui utrumque veluti solis limitem suo terminabat imperio, non tantum libertatis nostrae confessionem, sed & ipsam pacem extorsistis. Ecce, ecce, etiam adhuc vobis maria aperta sunt, nisi focordia vestra ea claudat. Vos virtutem iterum antiquam exerite, qui mare haecenus pro domicilio vestro habuistis. Turpe est domus propriae desertorem esse.

CAPUT I.

DE

EXPEDITIONIBVS ANTIQVIS

TEMPORE ROMANORVM.



ATAVORUM inclytam virtutem & terra & aqua celebrant veterum monumenta. Magis autem incurrerent in omnium oculos, si decora Nostri Scriptorum ingenia suppetiissent, quorum tum omnis vita procul ab otio literato in negotio militari versabatur: non quod illis ingenia deessent, sed quod Marti suo devoti rebus agendis, & bonae tantum famae incumberent, cetera verò negligerent. Vicere aliquo-

aliquotiens Romani ; quia Batavi vincere potuerunt. Ipse Julius Cæsar, qui cælo & sideribus famam terminavit, in plerisque expeditionibus fortissimum militem Germanum, præcipuumque virtute Batavum habuit, in quo magnum semper momentum victoriæ fuit. In Bello utique Alexandrino cum transgressum fluminis Nili Rex Ptolemæus impediret, Equites nostrates vada fluminis quærentes, demissioribus ripis primi transnatarunt, & conjunctâ cum legionario milite operâ magnam hominum multitudinem cecidère, qui repentino impetu perterriti frustra in fuga spem salutis collocaverant. Sub Augusto Prætoria cohors fortissimos, & fide primos Batavos habuit, quos Drusianæ expeditionis comites fuisse, cum secundo Rheno in Oceanum veheretur, populosque vicinos subigeret, vix dubitandum arbitror. Sub Tiberio Imperatore Germanicus, fabricata classe mille navium, in Insula Batavorum moratus, Oceano ad Amisiam flumen exercitum movit. Quis & Batavi aquis assueti, & natandi periti se immiscuere. Cum ad Amisiæ levam partem ventum esset, plures dies transeundo in dexteram consumpti. Et equites quidem cum legionibus intrepidi prima æstuarium, nondum accrescente unda transire : postremum auxilium agmen, & inter eos virtute primi Batavi, æstuarium non morantes, temerario ausu aquis ipsis insultarunt, & dum artem natandi ostentant, præcipiti aqua turbati, nonnulli hausti abreptique sunt. Generosis nimirum spiritibus omnis mora adversatur. Et quandoquidem eos aqua ab hostibus dirimebat, primò cum aquis certarunt, ut validiore postea impetu in hostes irruerent. Sed flumen iterum Visurgis Romanos Cheruscisque

H I S T O R I A

interfluebat. Ibi, qua celerrimus amnis, Cariovalda Dux Batavorum erupit in Cheruscos: atque per insidias hostibus cinctus, prævalido robore in medium agmen se proripuit, atque, uti virtus laceffita extrema tentat, tamdiu fortiter pugnavit, donec congestis telis & suffosso equo laberetur, atque ita corpore saucius, animo integer succumberet. Secuta terrestri prælio ingens de Arminio victoria. In qua expeditione Germani Batavique in fronte aciei consistere. Sed terrestria prælia prætermittere visum fuit, fluctuantem Oceanum, & flumina præliis sanguinolenta non ster calamus sequitur. Sub Claudio Ganascum, qui natione Caninefas erat (Caninefates autem inter Batavos censentur) navigiis suis Gallorū oram maxime vastasse memoriæ traditum est. Eodē imperante, Britannicis expeditionibus incredibilis virtutis experimenta Batavi dedere. Bellum deinde sub Vitellio grave inter Romanos Batavosque exarsit. Namq; Civilis contumeliarum impatiens, maxima cura ultum ire injurias festinabat, quas concoquere generosus ejus spiritus nequibat. Vindictæ laceffiti aculei quocunq; modo conceptum dolorem pensare cupiunt. Julium Paullum Regia Batavorum stirpe satum Frontei Capito falso rebellionis reum obtruncari jusserat. Injuncta Civili vincula, grandi libertatis opprobrio, animum sublimem, injuriarum impatientem, supra modum exasperaverant. Accusatus sub Nerone, & à Galba absolutus, sub Vitellio ad supplicium iterū ab exercitu postulatus fuerat. Erat Civili ad simulanda negotia altitudo ingenii inaccessa, prompta audacia, atque inter suos magna autoritas. Dum itaque suis consiliis velificatur, Vespasiani amicitiam studiumque partium nota Prin-

Principum arte prætendit. Cæterum Batavi, quorum libertas aspero delectu non tantum minuebatur, verum, quod minime ingenuis ferendum erat, etiam adolescentes ad nefaria stuprà trahebantur, facile ad res novas incitabantur, & Duce Brinione junctis Caninefatibus, Frisiiisque, proximo occupato Oceano, castra Romanorum ex improvviso invadunt, obvios palanteisque promiscue cædunt, castellis exitium quoque minantur, nisi Præfecti Romanorum, incensis iisdem, quod defendi nequirent, calamitatem hostilem antevortissent. Interea Civilis, omnia alia simulare, aliud vultu ostentare, aliud pectore clausum premere, ultro Præfectos reprehendere, quod castella deseruissent, cum sua cohorte Caninefatium tumultum comprimere proclive fuisset. Detectis consiliis, quod multitudo militaris, quæ studio aut ira præceps agitur, sua occultare facinora impotens est, Civilis Caninefates, Frisios, Batavosque in aciem protrahit. Haud procul à flumine Rheno directæ acies Romanorum stetit. Simul naveis adversæ victoriam animo volvebant. Post modici temporis certamen, Tungrorum cohors ad Batavos profugit, consternati milites à sociis hostibusque passim cæsi. Neque minor classis calamitas, cum Batavi nonnulli, qui classiariis Romanorum immixti, remigia torquebant, tanquam ex imperitia eorundem munia impedirent, mox contra nitendo Fortunam corrumpere, naveis hostili ripæ objicere, Præfectos centurionesque alia imperantes confodere, cæteros armis territare, donec universa quatuor & viginti navium classis, aut ultro in adversas partes iret; vel summo opprobrio caperetur. Ita Batavi navium armorumque, quibus indigebant, potiti non tan-

tum necessitatibus suis, verum etiā glorioſæ famæ conſulvère, cum per Germanias Galliasq; libertatis priſtinæ vindices auctoresque celebrarentur. Sub Veſpaſiano eodem bello Belgico, Canineſates claſſem hoſtilem Britannicam, quæ Batavis imminēbat, qua Oceano ambiuntur, ultro aggreſſi, majorem partē navium depreſſerunt, aut ſuperarunt. Addiderat quoq; poſtmodum Civilis obliquam in Rhenum molem, cujus objectu retortis violenter aquis, campis etiam ſuopte ante ingenio humentibus flumen ſuperfundebatur. Batavi aquis aſſueti & natandi periti Romanos armis gravis, & aquarū inſolentes in proprio veluti fatigabant elemento. A Romanorum ferociſſimo quoque cæptum certamen, ſed impari conatu. Cæterum ſubito ingens illos abripuit conſternatio, cum profundis paludibus arma equique haurirentur. Ipi fluctuantes, vel paludibus immerſi certa pernicie, à Batavis, qui notis vadis inſultabant, tanquam navali pugna inter aquas impetebantur. Alio iterum prælio Romanorum claſſis, quæ circa Novesium Bonnamque ſteterat, injectis vinclis una cum prætoria navi à Batavis turbata, ingentique abrepta infamia. Et niſi Cerealis Romanorum Dux alibi noctem egiſſet, vivus in poteſtatem veniſſet Batavorum: qui prono amne veſti nocte caliginofa, nullo prohibente, caſtra ſuperarunt. Plures ſomno ſe reficientes, alto Noſtrorum ſilentio, tabernaculorum funibus incifis, ſuis cubilibus preſſi facilè trucidabantur. Alii inſolito tumultu excitati ſubito arma quærere, ſtrictis mucronibus, veſte nondum compoſita, per vias ruerē, ægre tamen ſe ſuosque defendere. Ipſe Imperator adhuc ſemisomnis & propemodum nudus evaſit. Civilis Fortunā ferox,

ferox, vasto animo, uti in rebus secundis fieri solet, majora tentat. Biremes, reliquasque quæ simplici ordine agebantur, & ingentem lintrium multitudinē colligit, captivas navis verlicoloribus sagis pro velis instructas in opprobriū & contumeliam hostium, simulque totam navalem aciem ostentat, qua Mosæ Rheno auctus vastum alveum in mare Oceanum præcipitat. Caterum Cerealis cum Civilem promptum audacia tumultum ex tumultu, bellum ex bello ferere videret, adeoque summa ope eniti, uti mari leges poneret, adventantesque commeatus ex Galliâ interciperet, classē contra direxit, magnitudine navium & classiariorum peritia potiore, verum numero longe inferiorem. Neque animus utrique incepta patrandi deesse videbatur. Civilis victoriā immodicus animi, ulteriora tentandi cupidine flagrabat: Cerealis metuebat, ne in conspectu novam contumeliam acciperet. Batavi prospero vento, Romani secundo flumine promovebantur. Ubi utrinque in propinquo classis stetit, mutuo telorū jactu velitationes gliscebant: præliū justum confectū non est, forsan quod terror & formidolosa Batavorū manus mentē consiliumque hostibus eripuisset. Mirabile porro est, quod in Agricolæ vita memoriæ prodidit Tacitus, (Batavorum) auxiliarium ope Iuliū Agricolam, tentatam antea, sed infelicitè, Monam Britanniae insulam in deditionem accepisse, quando non classē aut navibus insulam ingressi, sed depositis in litore sarcinis patrio nandi usu, quo se pariter, & equos atque arma regunt difficultatem omnem superavere, quum obstupefacti hostes, qui mentem oculosque in classē navesque intenderant, nihil invictū ita præliantibus crederent. Sub Adriano
Equi-

Equites Batavos armatos Istrum tranataſſe , magno ob id terrore conſternatis barbaris Dacis , qui ſe arbitrio victorum permiſerunt, Dion Caſſius autor eſt. Ab his temporibus uſque ad Comitum tempora , fatalibus ſilentii tenebris cuncta ferme involuta latitant, niſi quod inter Francos , qui ad Rhenum juxta Oceanum ſedem poſuerant, vicinosque Batavos à Valeriani imperio , uſque ad Juliani Principatum acerrima exarſere bellorum incendia , donec mutuo attritis viribus Franci in corpus nomenque Batavorum coaleſcerent. Quorum incredibilis maritima virtus, atque audacia Europæque, Aſiæque, atque ipſi Africæ ingentem horrorem incuſſit. Quippe ſub Probo Imperatore, anno cclxxx ſedecim millium armatorum hominum multitudo in Pontum Euxinum ſe effudit, cunctas naves, quæ mare conſtratam, repentino impetu invaſit, diripuit. Neque interea viri fortiffimi tempus trahere, verum inſtar fulminis cuncta proſternere, mare internum ſub jugum mittere , Aſiæ Græciæque oram populari, Lybiam, infeſtare , Siciliam nobileisque illas Syracuſas deprædari, denique aucti immenſis opibus per fretum Gaditanum circumnavigata Hiſpania in Bataviâ reverti. Trajeciſſe aliquotiens Batavos in Britanniam , ſub Valentiniano etiam Londinum cepiſſe, Britanniaq; rectorem Civilem datum Ammianus commemorat. Poſterioribus temporibus , antequam Comitum virtus Barbarorum violentiam fregit , Wilſti, Slavi , & inprimis ferociſſimi Normanni, qui infeſtam ſui pelagi rabiem imitabantur, modo maria pyratice fatigabant, modo Bataviam, quæ tum Friſia dicebatur, ſædis populationibus vexabant : & quanquam ſummopere contra enitebantur Batavi,

Batavi, nihil tamen profuit virtus, dum fatalis calamitas cuncta turbaret, atque horrida illa tempestas prædonum, instar rapidissimi fulminis obvia quæque concuteret. Sub imperio Caroli Magni anno *DCCCX* Danorum Rex Godefridus classe ducentarum navium Frisiam populatus, furiosos impetus non tantum mari strinxit, verum & advorso ignium furore, truculentisque cædibus cuncta implevit. Quæis occurrendum ratus Imperator, Flandros ad expediendam classem, incitaverat. Cæterum dum res nostræ in summo versabantur discrimine, Godefridum opportuno tempore violenta facti necessitas abripuit, quem alii à satellite, alii à proprio filio, cujus matrem superinductâ aliâ thalamo ejecerat, obtruncatum referunt. Hinc pro tempore secuta quies deposito armorum furore. verû sub Ludovico & Lothario non minor clades, ita ut hæc regio continua calamitate nobilis esset. Incensa aliquotiens oppida, pagi, arcesque; promiscue in omneis cædibus sævitum, ipsi sacerdotes pro victimis ante aras jugulati, vastities ubique incolarum, maria impedita, facies rerum ubique miserabilis, donec primus Comitum Didericus Normannorum truculentam ferociam contunderet, frangeretq;.

C A P U T II.

D E

*PUGNA CIRCA DAMIATAM**ÆGYPTI VRBEM. ANNO MCCXVIII.*

AD bellum sacrum jam ante Principes Christianos religiosa pietas concitaverat: cui Fredericus Barbarossa Impera-

B

pera-

perator, Philippus Flandriæ, Florentius Hollandiæ, & Otho Geldriæ Comites nomina dederant. Verum ubi Cæsar aquis hauſtus mortalitatem implevit, Florentiusq; item fato ceſſit, in pejus labi res Chriſtianorum cœpère. Anno demum millesimo ducentesimo decimo & septimo iterum præter alios plures Gulielmus Florentii filius sacræ se militiæ dedit. Vlardinga, antiquum & nobile Hollandorum olim oppidum, Mosæ flumini incumbit, aquarum violentia detrita, dum ad se cuncta trahit Neptunius amnis. Trecentarum navium classis ibi in anchoris stetit, quæ ubi ventis secundis vela intendit, Galliæ Hispaniæq; oras prætervecta, Olyſſiponem Principē Lusitaniæ urbem appulsa est, ubi cum Comes Alchaciam castellū Saracenorum, qui totā Hispaniam infestabant, vi domuiſſet, sequenti vere in Syriā devectus, Damiatæ urbis, quæ Nili ostio Tanaitico incumbit, obsidionē, collatis cum aliis Chriſtianis Principibus consiliis, decrevit. Oppidum illud Ægypti tum clauſtrum censebatur, & maritima potentia nobile. Tamiatini etiam prædicat Stephanus de Urbibus. Non esse Pelusium antiquorum juxta cum eruditis censeo, cum ad Tanaiticum ostium se expandat. Turris immensi operis, & multi militis capax, aditum urbis præcludebat, atque interius catenæ veluti fluctibus injectæ ingressum navium prohibebant. Neque obsidione urbem premere facile, nisi munitissimo illo propugnaculo superato. Diu ibi laboratum, vincendi tandem perſtinacia novam artem invenit: sicuti ingenium mortalium tum valet, cum neceſſitas & gloria urget. Quinet dum dubius animus huc atque illuc fluctuat, in præcipiti malo incerta consilia non imperite adhibentur. Auctores erant Kenemarii, ut ferratis in prora navibus vento secundo catenas per-

perrumperent. Difficile hoc factu videbatur, cum crassitiem quinque pedum æquasse strictas catenas traditum sit. Verum multa experiundo eveniunt, quæ nemo mortalium contingere posse, sibi persuadere potuit. Quippe ferratæ naves, tumido & secundo vento delatæ, perruperunt crassos illos obices, tela & lapides desuper jactantibus Saracenis. Cruentum ibi nostris certamen fuit, quia tuti & securi hostes ex alto certos & lethales ictus in inferiores intentabant. Tollenonibus & sambucis demum in sublime attractis, quæ jam fastigio turris æquales erant, æquali certamine dimicatum est. Verum ubi emissum machina incredibili impetu saxum tabulata frangeret collideretque, infractus tamen & intrepidus nostris animus sterit. Quippe dilapsis propugnatoribus in inferiora, spiritus tamen in sublime se erexit. Ille solet esse Batavorum genius, ut assiduâ industriâ & celeritate omnes labores superent. Uti enim in otio luxui & desidii propiores sunt, ita in negotio assidui, temporis parci, continuis laboribus robustum, strictumque corpus sibi parant, quibus veluti nutriuntur. Nulla iis quies vel tranquillitas, nisi prava Fortunæ correxerint. Præcipue nautica pubes in contrario & frigido elemento ignibus suis plus satis incalescit. Tollenone itaque dilapso, novum opus incredibili celeritate fabricarunt, ut veluti munere divino transposita illic machina videretur. Junctis duobus navigiis quatuor mali, totidemq; antennæ erectæ, fastigioq; eorum instrata tigna, cum lorica coriis obducta, quorum ea natura, ut impetum lapidum telorumq; sistant, comprimantque, non incerto in nostra quoque militia experimento. Ab imo scalæ suspensæ validissimis funibus, triginta pedes ultra proram subli-

mes prominebant. Inusitatum hoc Barbaris machinamentum (Sambucam tamen non dissimili modo describit Polybius) horrorem incussit, Saraceni tamen acriter resistere, audacia certare, rigido lapidum ictu impetere, horrido igne pice & vivaci sulfure incenso affligere, ita ut haustus ignis visceribus, nonnullis spiritum intercluderet. Verum Nostri animi igne superiores hac ferali flamma, tam densis telorum imbris Barbaros obruunt, ut compulsis ad interiora turris hostibus tabulatum superius tenerent. Plures, dum per fenestras se in aquas præcipitant, vitando mortem, incertam incidere. Verum Saraceni interius pressi superiores nostros acri & mordaci fumo abegerunt. Hæc autem calamitas occasio fuit majoris virtutis, quæ laceßita omnem patientiam superavit. Ambitus turris modica terra cingebatur. In hanc insultans magno impetu noster miles, dolabris portas perrupit. Ita cessere certis conditionibus validissima claustra, sicut nihil fortitudini & labori invium est, Nostrorum sociorumq; violentiæ. Turri superata, novus & immensus labor urbem ad deditionem cogere, quæ tribus munitissimis muris cincta inexpugnabilis erat. Itaque lenta potius fame premere cives, quam irritò nixu armorum visum fuit. Interea Corradinus, qui Saladino mortuo apud Saracenos summum imperium obtinebat, enixe cuncta procurare, quæ ad tantæ urbis liberationem excogitari poterant. Quippe necessitas cum utilitate juncta cum urgebat, quæ magna sunt virtutis incitamenta. Aliquotiens castra nostra non sine clade adortus, aliter fortunam tentandam ratus, eliciendo Nostros, qui campestri huic prælio parum assueti erant, pene ad extremâ eos calamitatem rede-

gisset,

gisset, nisi rex Hierosolymorum Ioannes Barbaros singulari fortitudine stitisset, atque ita Nostri se in castra recepissent. Neque verò miles noster frangi animo, sed spiritum ex adverso casu sumere, & quod sublimis mentis indicium, non cedere obsidionis oneri, sed obniti. Omnia perrumpit constantia & assiduus labor. Et sapientis est cunctando vincere, ubi pugnando non licet. Potior est illa victoria, quæ certa etsi tardior, quam quæ per incerta casuum temerario acquiritur. Post annum itaque obsidionis (addunt alii septem menses) Nonis Novembribus Anno clccc xix. civitas adacta est potestati Christianorum se dedere, multis millibus sæda peste consumptis. Guilhelmus Comes re bene gesta sequenti anno domum reversus est.

C A P U T III.

PRÆLIVM INTER HOLLANDOS

ET FLANDROS, ANNO clccc xcy.

PLURES Flandrorum propter Zelandicæ insulas bellorum motus contra Hollandiæ Comites exarsere. Vicibus suis modo quies, modo turbulentus belli furor aquis atque terris incubuit. Neque sæderum ulla sanctimonia, adeò præceps dominandi libido transversos abripuerat. Guido Flandriæ Comes hac tempestate in spem occupandæ Zelandiæ adductus, quod Nobilitas ejusdem minus æqua Comiti Florentio esset, classem in adversa litora stringere meditabatur, jamq; adeo mortē, rapinas, postremo omnia, quæ hostilis animus lubet, minitari. Interea Florentius,

B 3

animi

animi acer, gloriæ militaris avidus nihil intermittere, quod ad tanti belli molem necessarium duceret, antequam ipse adventaret, per Legatos populum ad fidem adhortari, denique coacta militari juventute ipse Vlissingam contendit. Heic non morandum ratus, arma hosti opponere, quam eundem operiri potius duxit. Renessius itaq; jussu Principis Flandriam armata manu invadere, Slusam ignibus fœdare, agros quaquavorsum populari, tribus denique millibus Flandrorum cæsis vel captis in Zelandiâ revorti. Frisii quoque duce Brederodio animo feroces, ex vicinâ Flandriæ insulâ Catzandiâ prædam agere, trahere, rapere, militem contra nitentem cadere, postremò, tanquam insulâ capta, lubricini ac licentiæ victorum cuncta exponere. Flandri, quos non mediocris dolor incessebat, sibi speratam victoriam, non tantum adimi, verum contra hostes insolentes dominationem in propria regione agitare, ne viderentur socordia, vel ignavia bonam occasionem corrumpere, Beerlandiam ignobilem Zelandiæ insulam invadunt, & populantur. Florentius, qui jam ante Zirizeam profectus fuerat, mature admodum Dodinum Everingû, & Borsalium expedita classe & milite, eò contendere imperavit. Quibus hoc optimum factu visum fuit, uti alter subito concito tumultu hostem à tergo adoriretur, alter fugientem ad naves militem sisteret, & classe naveis illorum disturbareret. Et quidem consilium hoc probe cessit. Inopino enim tumultu excitis Flandris, facile oppressi, pauci virtutem armis ostentabant, reliqui, in morem pecudum fugati, sparsis armis ad naves se recipere nitebantur. Cæterum dum Nostri sua classe hostiles naves attentant, metu hostes consternati, undique circum-

cumventi, animo & corpore facile succubère. Fœda illa & miserabilis strages fuit, namque aut ferro cederebantur, aut qui natando assueverant in profundum insilientes, diu cum fluctibus luctati, magis aut minus mature, postremo tamen aquis obruebantur. Plures quam mille tam ignobili letho periere. Ex tribus millibus hominum, quos in Zelandiam trajecisse constat, trecenti modo navibus incolumes sua tetigere litora. Una quoque navium, quæ fugientes vectabat, majori Nostrorum violentiæ cessit. Captivis imperator effusus clementia parcere voluit, eò quod inconsulta multitudo huc atque illuc fluctuans Duces Factionum ut plurimum sequitur, ipsa culpæ expers ex aliena libidine vitam agit, & prout illorum, qui dominantur, simulas vel arrogantia fert, ita bonum malumque publicum existimat. Nudos tamen in patriam remitti placuit, retentis iis, quos dignitas vel opes in excelso collocaverant. Contigit hæc victoria Anno clocc xcv vicefimo & septimo Octobris die.

C A P U T IV.

PRÆLIUM INTER HOLLANDOS

ET FRISIOS ORIENTALES

ANNO. clocc xcviij.

ANNUS agebatur millesimus ducentessimus & nonagesimus octavus, cum fœdis admodum conditionibus, Frisii Occidentales victoris Comitum arbitrio se suaque omnia permetterent. Wilhelmus Trajectinorum Antistes irâ concitus & æstuans, Orientales Frisios ad arma concitat, cui, cum Pontificis Romani jussus obtenderetur, morem non gerere

gerere magna illos religio incessabat. Cum non modica hominum confluxisset multitudo, Præsul, quem pacis artes magis decebant, desiderio belli quam maxime flagrabat, & confestim milite navibus imposito, vento secundo juxta Monachodamum militem terræ exponere satagebat, cæterum incolarum & rusticorum ferocia incepto patrando obstitit. Sicuti autem maxima quæque facinora impetu valent, mora evanescunt, ita in celeritate præsidium rati vicini Kenemarii & Waterlandi, quorum animos horridos cælum & salum induraverat, expedita classe Australem sinum ingrediuntur, & primo insultu navem milite refertam à cæteris abstractam facile expugnant. Leve quidem hoc initium, sed futuræ victoriæ non incertum fuit præludium. Prout enim prima quæque cedunt, talem exitum Fortuna ut plurimum indulget; quæ ubi nutare cepit, præcipiti gradu à summo declinans ad infima prolabitur. Felicitate gliscit audacia, adversa rerum etiam fortissimum quemque dejiciunt. Diu acriter admodum certatum. Multitudini navium hostis, Nostri agilitati fidebant. Tandem, quanquam contra vim majorem pervicax hostis obniteretur, captis aut depressis pluribus navibus fœda fuga sibi consuluerunt; quis fugientibus majus periculum, major clades, quàm certantibus. Multa hominum millia cecidere, plurimi capti. Antistes clade tanta percussus, cum vix cymba evasisset, ad moderata postmodum pacis consilia flexit, quam tamen iterum perfide rupit.

CAPUT

CAPUT V.

PRÆLIVM INTER HOLLANDOS

ET FLANDROS, ANNO CLDCCCIV.

CUM Philippus Pulcher in Galliâ rerum potiretur, Regique exactores Flandros violentius premerent, atterentque, primò seditiones motæ, dein ad bellum ventum est. Tota Flandria excepto Gandavo, Gallorum nomen ejuravit. Tumultuum scintillas accenderat Petrus Coningus, artificio fullo, quem inconsulta plebes, quæ rerum novarum studio suis sæpe periculis lætatur, patronum elegerat. Accessit autoritas, dum se socium laborum periculorumq; exhibent, Guido Namurcæus, filius Comitis Guidonis, & Guilhelmus Juliacensis ejusdem ex filiâ nepos. Huic bello se quoq; involverat Hannonii gener Atrebatensium Comes. Cui cum accessissent sub imperio Osterbandii Hannoniorum auxilia, prope Cortracum fortiter dimicatum est, à Flandris victoria stetit. Cumque iidem Hannoniam infestarent, sicut post victoriam Fortuna impetu valet, Ioannes Hannonius Hollandiæ Comes, opem Batavorum implorans facile impetravit. Verum ea militandi ratio melior Proceribus sedit, ut Hollandi Zelandiq; ipsam in Flandriam irrumperent, quò relicta Hannonia propria defendere, Flandri cogerentur. Guido in Catsandiâ militem suum coëgit, unde facilis & opportunus in Zelandiam appulsus. Verum Gulielmus trajecto freto acri certamine Flandros Catsandiâ ejecit, atque Arnemudam reversus, victor per ora cunctorum volitabat. Victus fuisset hostis, nisi proditio vi-

C

cisset,

cisset, quæ lubricum adolescentiæ in transversa abripuit. Prima illa ætas facile proditorum artibus patet, dum sub specie amicitiae turò inimici imponunt. Labante Fortuna tota fere Flandro Walachria cessit, Guilielmus Medioburgo occupato Zirizeam se receperat, quæ arcta mox obsidione pressa. Adventu Comitum ex Hannonia induciæ compositæ, sed mox ejusdem senectus, cursu vitæ pene jam confecto, annis & morbo ingravescens, in præsentem contemptum incidit. Devicta tota fere Zelandia, in sola Zirizea momentum Fortunæ stabat. Tota quoque nutabat septentrionalis Hollandia, Harlema excepto, sed illa virtute & odio in hostem concitata brevi jugum excussit. Hollandia ejectus Flander Zirizeam magno molimine obsedit, sed inaudita civium virtus omnes conatus contudit. Nullo modo se dedere, pertinax illorum fuit fortitudo. Magna autem pars est victoriæ vincere velle, & morti potius quam alienæ potestati succumbere. Qui potuit mortem contemnere, omnia contempsit. Tranquillitas animi, & absoluta libertas supra omne hostium imperium est. Armis, annonâ fatigati hoste tamen superiores fuere. Ultima jam fortissimis civibus incumbere necessitas, nisi trahendo obsidionem validâ manu suppetias ferret Osterbandius. Ita inter metum atque spem dubii adversa & secunda sibi pollicebantur. Regneri Grimaldi Præfecti maris, nomine Regis Galliarum suppetiæ expectabantur. Sicut autem non ignavia & socordia, sed industria & vigilantia imperia continentur; ita Guilielmus nihil minus quam segnis, aliquoties Regnerum officii & extremæ Zirizeanorum calamitatis monuerat. Ille longas moras circa Caletum nectendo, tandem anchoris solutis

solutis in laxum Mosæ ostium feliciter appulit, atque undecim trirēmibus, aliisq; triginta & octo navibus, juncta Osterbandii classe recta Zirizeam petiit. Cuncta quidem mortaliū incerta, nihil incertius mari, quod elementum ventorum flabris agitatū ancipiti fluctu movetur. Ventis iniquis fluctibusque adversis jaētati decimo & tercio die Greveningam (quam maritimam sedem hodie Gravelingam indigent) locum non longe à Zirizea dissitum appulere. Incensis ignibus patuit civibus pulcherrimus prospectus veluti adventantis victoriæ, quam & animo ignei conceperant. Ipsi quoque excitatis ignibus beneficium agnovere, antequam peractum esset. Namque in conspectu classis nostræ certam sibi liberationem spondebant. Nulla res magis animos dubios obsessorum, & ad desperationem inclinantes erigit, quam propinquum in conspectu auxilium. Sperant ad extremum usque, & sibi secundam Fortunam pollicentur, etsi exigua evitandi pericula spes suppetat. Belli dux nihil magis timebat, quam ut illum fortissimi cives vel hostem timere, vel desperare crederent. Itaque postero die prope Zunnemariam prætervectus Scaldia insulæ oram, in hostium, & oppidanorum conspectu anchoras fixit. Nul- lum aliud avertendorum periculorum remedium erat, quā extrema pericula adire. Neq; consilia in incerto erant, quia nulla alia ratio subsistere poterat, quam navali prælio cum hoste configendi. Hostem sua veluti potentia (ducenta enim millia hominum habuisse in hac obsidione Stokius refert) & rerum successus defendebat, nostros vincendi ultima cupido urgebat. Ioannes Renessius, qui cum Flandro arma junxerat, crebris Trajecto literis Guidoni auctor fuerat, ne fortu-

nam incerto maris committeret; Regnerum archihalassum militiæ illius veterem esse, terrestri prælio magis assuetum suum militem, si uspiam in mari Fortunam dominari, nonnunquam turgidum, aliquando tacitum & quietum mare noxium esse. Verum gloriæ cupido abripuit Guidonem, qui terrestri gloriæ maritimam jungere satagebat. Parte exercitus ad Zirizeam relicta, cum cæteris classi se commisit; & navigiis & numero militum superior. Guilhelmus annonæ causa nonnullas naves emiserat, quibus præsidariæ longæ adjectæ erant. Hæ frumento onustæ in Zelandorum classem inciderunt, atque in manu victoris fuissent, nisi longæ impedissent. Acri prælio fusi hostes, prædæ tamen inhiabant, atque extremas navium tentabant. Pugnare & defendere res suas, longe difficillimum, præcipue vago & fluxu elemento. Una nostrarum, accedentibus mox aliis, ita quatuor hostium naves adorta, ut fluctuantes per adversa & extrema, ne maris & navium obsidione premerentur, relictis suis navigiis terrestri fuga sibi consuluerint. Initia belli præliorumque fama constant, victosque infortunium dejecit, raroque victis redit in præcordia virtus. Serio itaque decretoriis armis hostem aggredi Osterbandio visum. Dies illuxerat Augusti decimus, cum ingens navale inchoatum prælium. Quatuor in fronte navibus imperabat Ioannes Padrogus, militiæ maritiæ gnarus, sed vadorum in his locis imperitus in sicco arenarum hæsit. Expectare itaque tempus Guilielmus debuit, donec fixa navigia æstu maris attollerentur. Occasionem hanc nactus Guido Namurcæus, incendendi illas spem concepit. Incendiariæ navi flamma suggerebatur, quæ sulfure atque bitumine fovebatur. Hanc secundo vento pubes

pubes nautica in nostra immittebat navigia, & ubi propter ignem in scaphas defilierat, etiam. contis sed frustra promovere nitebatur. Padrogus in aquis incendium metuens, velis madidis, quantum in se erat, naves tegere, quo subita ignis vis obtunderetur. Verum dum subito ventus vortitur, suis pene ipsi flammis hostes perierunt, sociique, qui scaphæ se commiserant, ægre ad terram delati evaserunt. Sequenti nocte somno & quieti se Nostri dederant, nihil ausurum Guidonem rati: sed ille somno victos pressosque credens, subito in nostram classem invehitur, primoque assultu quatuor captis, cæteras magna vi adoritur. Vigiles militem excitare, tumultu omnia implere, miles contra excusso somno fortiter obniti, adversa suæ socordiæ imputare, turpe censere victū victori incumbere: Osterbandius verò consternatos confirmare, incitare, ad virtutem suo exemplo cogere. Neq; minus Guido suos urgere, ultimū hoc prælium laborū finem prædicare, immortalem gloriā, opima spolia, quæ militaris juvenus potissimum incitatur, ob oculos ponere. Audendum tantum, cætera in proclivi esse. Occupatis quatuor navigiis percussos hostium animos. Victoriā jam inchoatā, turpe fore si non persequantur. Ita utrinque expedita classe prælium adoriri, clamore nautico cælum implere, arma armis necere, telis tabulata navium tegere. Cruenta hæc maxime pugna, quia in angustiis certa tela figebantur. Utrinque vitæ prodigi mortem incurfabant, neq; inulti in armis moriebantur, dum furor ultimus mentē præcipitem agebat. Guido Namurcæus numero navium & denso milite potior, pluribus suis singulas Hollandorum cingere, atque opprimere tentavit. Quod unus ex præfectis



nauticis conspicatus, singulari spiritu hostium vitæque contemptor, in mediam hostilem classẽ prorumpit, hortatus cæteros, ut auxilia & suppetias ferrent. Hoc exemplum cæteros traxit, ne amicum in præsentis periculo deferre viderentur, quibusdam etiam pudor ad virtutem incitamentum fuit. Tum primum atrox & cruentum confertum prælium, adverso corpore passim tela figebantur, in cadaveribus vindictæ adhuc cupido hærebat. Guido spe potiundæ victoriæ incensus edixerat, ut nulli parcerent, atque in exorabili lege omnes ad internecionem usque delerent. Altius hæc in pectus Nostrorum descendit crudelitas, itaque in animum induxerunt suum, si se subducere ex ruina nequirent, eadem hostem involvere. Extremæ necessitati addita est extrema virtus, quæ ita in immensum creverat, ut mortem juxta atque vitam contemnerent. Horrendo clamore in hostem irruere, cædibus passim grassari, victoriam spirare. Neque minus hostis nostros premebat simul junctis viribus. Una ex Flandricis navibus, corbe superius ad mali culmẽ milite stipatâ, atrociter nostris imminerebat, quia ex alto in depressa certa tela immittebantur. Victa demum est calamitas infracto pectore, dum Fortuna vicit. Pressa forte nimia gravitate corbis, ruptis vinculis militem subito, vel in mare præcipitem egit, vel collisis membris tabulatis impexit. Ibi Batavica pubes hostili calamitate accensa audaciter in transtra hostium transilivit, atq; sanguinem suum hostili sanguini miscuit. Neque Flandro animus subsidit, cui exestuante ex imis præcordiis spiritu concitum in vindictam corpus, & assueta sanguini truculenta manus. Verum quia hosti difficilis ad salutem recursus erat, plures con-

confossi, pleræque naves in fugam actæ, aut aquis mersæ obrutæque. Interea Padrogus, qui diu in vadis hæserat, pugnandique potestatem non habuerat, tandem æstu fluitantibus navigiis, majori confidentia fessos ubique, quæ vela direxerat, pressit, devicitque. Ita ad meridiem pugnatum, ad septentrionem ægre hostis pellebatur. Neque tutum erat se subducere, ne fugientibus similes virtutem hostium accenderent. Artificio hoc usus Osterbandius, quia comminus certamen conferebatur, ut ignita in hostium naves ligna immitteret, quibus extinguendis dum occupatur miles & nautica juvenus, fumo denso in oculos converso, incertis ictibus dimicabant, dum amicos passim hostium loco trucidarent, à nostris autem pressi certo occumberent. Ita metu exterriti degeneri trepidatione fuga sibi consulunt. Dum hæc in dextera parte geruntur, dubius rumor ad aures Osterbandii venit, Nostros alterâ fugæ proximos esse. Properanti ad suppetias ferendas nunciatum, hostem quoque in ea parte debellatum. Nam consternati clade sociorum, juxta primâ victoriam alterâ veluti obtulerant. Tam bonis auspiciis Fortunam prensare, atq; hosti fugienti insistere visum fuit, ne tempus ad colligendas vires caperet. Sed Flander & terrore & necessitate victus, relictis turpiter navigiis, telluri se commisit. Naves occupare sufficiebat cordato Imperatori, ne hostes, à tergo pressi, dum extrema præ oculis, ad audaciâ accingerentur, & ultima necessitas pugnandi legem imponeret, fatali sæpe in bello rerum mutatione, ut exiguis momentis fors belli invortatur. Interea fractus Fortunâ non animo Guido, etsi dispersos passim & fugitivos suos videret, omnia experiri, & sicut magnum Imperatorem magnus animus decet,
extre-

extrema tentare, etiam aggredi Osterbandium, sed frustra ausus. Interea cives fortissimi Zirizeani inter spem metumque positi, Martis dubii eventum, negotiumque Fortunæ expectabant. Obscurum noctis prospicere non permittebat, & mendax rumor, autore Flandro, qui circa urbem vagabatur, animos perculerat, quo victum Osterbandium, classem fugatam, ferebatur. Dubia tamen fides, sive quod indices suspecti essent, sive quod firma & credula spes illud non admitteret. Verum ubi prima lux noctem abegit, hostibus victis vel pressis, gaudio tripudiare, Deo gratias agere, qui gravissimè afflictos liberasset, confusæ antea menti gaudia reddere, eo lætiores, quo majori ante dolore fracti turbatique fuerant. Juvenes, senes, pueri stipati manus ad cælum tollere, sibi invicem gratulari, & prout cuique publica lætitia verba dictabat, effundere. Guilhelmus victoriam prosequendam ratus pressos ulterius fatigare; ne hostis iterum vires colligeret, omnem occasionem præcidere, sicuti præliorum maritimorū incerta est & lubrica possessio. Guidonis Prætoriam navem quatuorq; alias cinxerat Regnerus Archithalassus, sed Guido incredibili animi magnitudine ita Gallis restitit, ut ad Nostros se recipere cogeretur. Osterbandium hoc egre ferentem pugnandi iterum præceps cupiditas rapuit, ne ille elaberetur, in cujus captivitate potissimum momentum victoriæ erat. Post grave prælium Guido victus captusque Nostris cessit, qui tanto furore & odio correpti in eum fuere, ut, nisi propere Gulielmus violentis manibus eum subduxisset, atque Regnero in Galliam deducendum obtulisset, extremam vim passus fuisset. Nihil acrius accendit mortalium pectora, quam vindictæ cupido.

Alie-

Alienis calamitatibus humana sorte ut plurimum indolescimus, propriis ad ulciscendum urgemur. Guido multarum calamitatum autor fuerat, cujus sanguine tantum crimen vindictę cupido militi expiare visum fuit. Neque multum incusari militare vulgus poterat, nisi malum exemplum Principibus esse censuisset Comes, in Principum vitam salvare. Subtractus itaque illorum ferocię Guido in Galliam ablegatus, ut honestā ibi includeretur custodiā. Hoc prælio decem millia hostium cæsi, captivorum numerus subductus non fuit. Mille & centum naves (inter quas proculdubio etiam minores) captę cum omni militari apparatu. Quo prælio gravi Flandrico bello finis impositus, undecimo die Augusti, cum à matutino tempore usque ad meridiem sequentis diei magnā utrinque fortitudine dimicatum esset. Tunc consummatum plenumque bonum habet Fortuna, cum calcato omni malo in tuto posita est. Itaque postquam Regnerus cum captivo Guidone in Gallias abiisset, Gulielmus Zirizeam contendit, partim fovendis curandisque vulneratis, partim ut hostilem militem, qui ante urbem à Guidone relictus, vi & armis subigeret. Plerique navibus conscensis vela intenderant, ut Flandrię litora pertingerent. Reliquis, quia omnes navigia capere non poterant, inter arenaceos colles Scouvanę insulę refugium fuit. Quęis, nisi extrema mortis intentaret victor Gulielmus, jugum accipere consilium erat. Noverat Osterbandius de vita desperantibus non esse nimis acriter insistendum. Sicuti ictus scorpionum tum maxime letales, cum extrema imminet: ita etiam hostes tum sæpe maxime lædunt, cum in angustias redacti, unde pedem referre nequeunt, in fu-

D

rorem

rotē rapiuntur. Sex itaque millia deditiorum in potestatem Osterbandii venēre, parati iussa facere. Carceres ubiq; captivis pleni premebantur, qui veluti pecudes in sua tenebricosa antra abigebantur, nisi quod mille in tanta captivorum frequentia facile elapsi fuerint. Ita Scouvanā insulā liberatā, ceterę civitates solo terrore victę, Middelburgenses etiam victori gratulantes occurrerunt, more mortaliū, ut ii, qui maxime adversi fuere, primi plerunque officii certent. Eversa à Flandris mœnia restitui iussit Osterbandius, ordinataque Rep. tristis nuntius venit, parentē, qui diu morbo gravi decubuerat, præ nimio gaudio tantę victorię vitam cum morte commutavisse.

C A P U T VI.

PRÆLIVM INTER MARGARITAM,
FILIVMQUE EIVS GVLIELMVm,

ANNO c15 ccc ii.

HAc tempestate, scissā in partes Hollandiā, in mutuanti civium perniciem ambitiosus Procerum populique furor gladios strinxit. Cabeliavios Houxiosque se indigebant, & cinericeo vel rubro pileo insignes distinguebantur. Illi & quidem validiores Gulielmo, hi Margaritę favebant, revera factionum Principes bonum publicum simulantes pro sua quisque potentia, vel utilitate, implacabili odio certabant, populus semel concitatus studio partium suis admodum latabatur periculis, & ferocienti mari similis; neque humani neque divini quicquam reliquum fecit.

Paren-

Parentum liberorumque diversa sacramenta, cædes promiscua, vastities urbibus & pagis, templa violata, agri cognato sanguine imbuti, & tanquam sanguinem extincturi ignes passim crepitabant. Scelera sceleribus tegebantur, & propinquos consanguineosque occidisse virtus vocabatur. Utrinque & victores & victi Patriæ libique graves. Dum ita nullo pudore flagitii inconsultus populus agitabatur, Cabeliavii, qui Margaritam imperio ejecerant, & contra nitentes hostes Reipublicæ pronunciaverant, ubi perfecto scelere magnitudinem ejus percepere, animo impuro & inquieto Deo hominibusque infesti, Gulielmo, ut contra matrem parricidalia arma stringeret, iteratâ legatione persuadere tentant, cujus licet primò obstinatum animum tandem expugnarunt. Consternati adventu Gulielmi Hocxiorem primi magnis itineribus in Hannoniam contendunt, efflietum rogant Comitē, ne laboranti & fatiscenti Reip. deesset, Cabeliavios perfido furore omnium cervicibus & fortunis imminere, eisdem impotenti dominatione matri eripuisse imperium, ut filio traderent. Sese, quia pro illius auctoritate pugnarent, crudeli illorum potentia obnoxios, Deum hominumq; fidem implorare, atq; suppetias contra vim publicā postulare. Abrepta iracundiæ oestro impotens sui scemina, acerba quæq; filio minabatur, nisi imperio recederet. Verum nullis ille territabatur minis, quibus bellum non geritur, sed robore. Margarita itaque Anglorum Regis Eduardi subsidiis militem colligit, & in Walachriam vela dirigit, Cujus audito adventu Gulielmus ad omnes imperii curas intentus, constituit certaminis copiam facere, comparataque ingenti classe extrema omnia experiri. Neque è re ju-

dicavit adventum matris opperiri, cum præsentia Principis venerationem intendat, mobilisque plebes auctoritate & veluti prælenti numine terreatur, quæ nunc illi Proceribusque obnoxia, vel novarum rerum studio præceps agebatur, vel si inceptum facinus non probaret, contra niti ex impotentia nequibat. Proceres quoque tot facinoribus cöoperati, si prospere res non cederent, omnia atrocia atque aspera sibi eventura non ignorabant. Itaque nisi victores, vitam atque mortem juxta æstimabant. Prælii utrinque copia facta inter Brilam & Gravesandam, qua vasto & præcipiti ostio in mare Oceanum Mosa aquas suas emittit. Gulielmus manu, voce, gestu, suos accendere, nullam salutis spem, nisi in victoria proponere, heic aut virtutis immensa præmia, aut moriendi fœdam conditionem præstò esse. Satiis esse pugnando occumbere, quam instar pecudum postmodum mactari. Facile fuisse novum aliquod facinus incipere, Principemque eligere, nunc eundem armis tutandum. Contrà mater supra sexum animata ita suos allocuta: Virtute vestra & probitate fretæ obviam hosti an filio ire, certamen conferere, impotentem proditorum, qui immani avaritia, cruentis manibus, intolerabili superbia omnibus probis insultant, dominationem confringere, libertatem opesque vestras armis regere, mihi consilium est. Sua nunc cuique dextra vindictam tot malorum pariet, atque iniquam omnium sortem excutiet. In manibus nunc vestris libertatem, opes, gloriam patriæ, salutem, portatis. Rogo & obtestor, ut quo animo fœdam vitæ conditionem tolerastis, eodem virtutem experiamini. Ego imperatrix, ego miles, periculorum consors, hic & animo & corpore præsentem
me sisto,

me sisto, & mox, ut spero, Comes, nunc perfidia Proce-
rum extorris, vobiscum agam. Ita accensi dissono clamo-
re, infestis utrinque navibus concurrunt tanto ardore
atque audacia, ut, nisi vincerent, mortem ipsam elegisse
viderentur. Inprimis Cabeliavii, quos fortes ipsa rei neces-
situs fecerat, tam furioso impetu pugnabant, ut victoriam
tandem extorquerent. Namque propria salus eos supra
modum effecerat, non ignaros extrema victis imminere.
Accessit & novi Principis autoritas, quem ne temere elegis-
se viderentur, tutari summa ope nitebantur. Cæsus Præfe-
ctus classis Anglicæ, plures alii, inter quos ex primâ nobili-
tate Costinus Renessius, ac Florentius Hamstedus mortem
oppetierunt. Theodericus Brederodius, expeditionis præ-
fectus manu & consilio promptus, fortiter pugnando, ma-
gnis difficultatibus circumventus, captivorum numerum
auxit. Margarita tanta calamitate oppressa, diffidens rebus
suis in Angliam profugit, cæteri periculo præsentis percussis,
mortis metu nutantes, cum nequicquam semel territi ani-
mi confirmarentur, cum totâ classe Principem suam insecu-
ti, victoriam & imperium Gulielmo reliquere. Quanta
fuerit prælii atrocitas inde liquet, quod nonnulli autores su-
pra fidem, integrum triduum Mosam sanguine decolorem
præcipites aquas egisse memoriæ tradiderint. Pax pro arbi-
trio victoris ita constituta, uti illa, quoad viveret, in Han-
nonia duntaxat rerum potiretur, cætera omnia Gulielmo
cederent.

DE PRÆLIIS TEMPORE IACOBÆ.

ANNO CLD CCCC XXVI.

NULLA admodum quies in Batavia fuit, cum inquieti ingenii Princeps Iacoba Bavara rerum potiretur. Accedebat lubrico, & impotenti animo summa in matrimoniis contrahendis dissolvendisque levitas, ambitio, & crudelitas. Quæ vitia varia Fortuna pensabat. Aliquoties terra victrix, mari semper inferior. Repudiato marito Ioanne Brabanto ad Hunfridum Glocestriæ Ducem, fratrem Henrici V. Angliæ regis, animum inclinaverat. Hinc rebus in Hannonia adversis ipsa captivitati mancipata, Hannoniæ regimen priori marito, Hollandiæ tutela Philippo Burgundo cessit, qui rebus turbulentis fortunam prenebat. Gandavo, ubi detinebatur Iacoba, assumpto virili habitu elapsa, præcipiti audacia in Hollandiam venit, atque supra promissa Fortuni generosum animum erexit. Sicuti autem præsentia & auctoritas Principis facile labantes animos fulcit, Schoonhovia primum, mox & Gouda, & Veteres Aquæ Dominam agnovere. Rerum novarum cupidi Ultrajectini etiam fœdere se obstrinxerant. Hinc cruentis admodum præliis civilia arma insonuerunt. Maritimo certamine bis pugnatum est. Dux Glocestriæ ex Britannia Brouwershaviæ versus, quod Scaldiæ oppidulum est, dominum Filuatteræ cum ingentibus copiis miserat, ut suppetias uxori ferret, quæ infelicem animum magnâ rerum potiundarum cupi-

cupiditate distenderat. Neque minori apparatu resistebat Philippus Burgundus, eo acrius, quod pro imperio & summâ potestate pugnari non ignoraret. Directæ utrinque acies in fluctibus, & milite armato tabulata navium fervebant, neque igneum fervorem Oceanus extinguere poterat. Summa cum prodigalitate sanguinis diu acriterque dimicatum, nutansque Fortuna tandem à Philippo stetit, cum Henricus Borsalius toparcha Veriensis, classis Præfectus, animo & corpore validus, incredibili virtute victoriam patrafset, & ob præclara facinora Equestrem obtinuisset dignitatem. Plures ex Britannis cæsi, nec pauci ex Nobilitate Zelandicâ, qui Iacobæ favebant. Illa tamen inconcusso animo stetit, & supra sexum, supra cladem invicta fuit. In Hollandia dubia sorte usa, classem circa Wiringam expedit, cujus miles Enchusam ipso meridie ingressus, centum ex primoribus civium à geniali mensa detractos capite multavit. Invisa hæc populo crudelitas incitamentum vindictæ fuit. Crudelitas crudelitatem parit, atque exemplo suo docet: nihilque acrius fatigat & pungit mortalium pectora, quàm vindictæ cupido. Sequens annus, qui erat cło cccc xxvii, ultimam calamitatem justumque talionis exemplum Iacobæ attulit. Ingenti illa classe ausa tentare maria, sub ductu Guilielmi Brederodii, cujus miles cuncta in ditionem Principis redacturum vane jactabat: verum contra obniti Harlemum, Amstelodamum, Horna, aliæque maritimæ civitates, quæ potentia navali pollebant. Magnâ sui confidentiâ obviam hosti itum. Iacet in ultimis fere Hollandiæ finibus Wiringa insula, quæ quondam continenti hærens, simul cum Tessalia ab Oceano divisa, cum Anno cło c lxx horrenda

renda tempestate, & violenta maris sævitia insulæ à terra avulsæ, atq; infuso stagnantes æquore campi vasti sinus speciem exhibuerunt. Prope hanc insulam stationem classis posuerat Brederodius animi acer, militiæ intrepidus. Naves Civitatum, quia multo Brederodii navigiis majores erant, propius accedere nequibant, quod aquæ minus profundæ & cæcis vadis cinctæ eas non admitterent. Neque vero confœderati desidia & socordia ibi tempus contrivēre, sed in conspectu adversariorum anchoris fixis, ita illorum naves pressere, ut nullus nisi pugnando exitus esset. Gulielmus jam ante cum Texelia insula conditionibus factis, novas quoque amicitiae leges Wiringæ parabat, probe gnarus, quantum in his insulis, quæ claustra essent Oceani, momentum positum esset. Verum ubi temporis commoditas consilium destruxerat, armis sibi viam quærere in animum induxit suum. Iussit itaque militem cum nautica pube propere se classi committere, cibo corpus & spiritus reficere, dein minoribus navigiis hostem adoriri. Iuncta virtuti sagacitas, tum demum manus conferendi, ubi incrementum maris resederat, sperans majora Civitatū navigia vadis hæsuræ, neq; proclive fore, ut fluctibus attollerentur. Ingenium duci prudentia validum, consiliumq; hoc firmis rationibus nitebatur. Quippe pluribus junctim navigiis cum paucioribus, quæ se jungere nequibant, proclive erat præliū. Consilium hoc posterior miles evertit, qui animo defectus, neque morem gerens jussis, Fortunam primum priorum navigiorum expectabat. Ita quibus junctis victoria in manu fuisset, separati facile victi. Etsi enim qui in principio stabant fortissime dimicarent, & pericula summâ virtute propellerent,

rent, à suis tamen turpiter relictī, tandem victi vel ferro, vel aquis occubuerunt, vel inter captivos numerum implevere. Prima acie victa, omnibus admodum navigiis occupatis, subsidiarius miles in fugam actus, ab adversa parte interceptus, ita ut nulli vel pauci admodum evaserint. Fœderati enim, ubi victoriam adepti sunt, nihil reliqui victis fecerunt. Brederodius cum captivis Enchusam delatus in præsentī mortis periculo versabatur. Octuaginta captivorum sanguine crudelitati in cives Enchusanos superiori autumnō exercitæ litatum est. Pluribus suffragiis propter venerationem antiquæ nobilitatis exemptus est ferali supplicio Brederodius. Hoc prælio res Iacobæ ad incitæ redactæ omnem spem dominationis exemere, neque enim vires vel copiæ ullæ suppetebant, sine quīs extrema omnia experiri dementia videbatur. Ab illa itaque tempestate otium iterum & tranquillitas Reip. incubuit, atq; ita lites compositæ, Anno dōccccxxviii, xiiii Maji, ut Philippus harum regionum tutor, & post mortem Iacobæ legitimus hæres esset.

C A P U T VIII.

*BELLUM MARITIMUM CVM**OSTERLINGIS, AN. dōccccxxxix.*

BELLUM hinc maritimum inter Batavos Osterlingosque, atque alios maris Balthici accolas grave exaruit. Belli causa insolens navigiorum direptio. Cunctis admodum mortalibus injuriæ suæ graves videntur, nullæ graviores, quam quæ cum jactura bonorum conjunctæ. Repetitio
 E postu-

postulata, surdis ad id Septentrionalium auribus. Osterlingi, inter quos Lubeca, Hamburgum, Rostochium, Wismarium, cum Erico Rege Danię, Duce Holsatię, Pomeranis, & Borussis, denique cum Hispanis, Venetisque, qui iis quoque in locis tum commerciorum commoda querebant, clanculum contra Hollandos fœdus percussêrunt. Ita rupto fœdere generis humani conglobatę gentes commercia Batavorum interpellabant, jam tum stimulante invidia, ne maritima illorum potentia nimium cresceret. Infesti hi piratę turbare ubique maria, bona diripere, naves perforare, captivos fœdis carceribus addicere. Philippus Burgundus componendis litibus diem dixerat. Accessêre urbium Vandalicarum legati, viri nobiles, Equestris ordinis duo, Henricus Rapesilverus, Dantiscanus, & Henricus Voratius, Lubecensis. Hollandi & suos miserant rerum gnaros, inter quos præcipuus ex Amstelodamensi Magistratu Everardus Iacobæus. Damnum tabulis annotatum censebatur quinquaginta millium aureorum. Restitutione à Vandalicis civitatibus denegata, apertum iis bellum indictum fuit. Interea fabriles operę fervebant, laboribus dies noctesq; continuatę, tantaque velocitate naves constructę, ut ipsę arbores in rates subito mutatę viderentur. Maximum bonum Hollandis in velocitate erat, nam tarde classem expedire, idem erat atque suas opportunitates corrumpere, hostem stabilire, atque vires suppeditare, quę postea frangi nequirent. Pluribus itaque bellicis navigiis in altum profecti horrorem Oceano intulerunt, & prima statim expeditione viginti hostium navigia cepêre, litora Hispanię infestarunt, ita ut quicquid ex portibus solveret, prædę cederet.

deret. Tres Biscajenses occupatę, una item Veneta pretiosis mercibus opulenta, bonis direptis igni tradita. Edixerat Burgundus, sicuti magna consilia sæpe impetu valent, ut cunctis admodum navigiis, quę Septentrionem petebant, manus hostiles injicerentur. Neque mora, nostris ratibus ubique mare sulcabatur, eò denique magnitudinis gloria virtutis Batavicę processit, ut potentia maritima non amplius Fortuna egeret, sed supra omnem sælicitatem posita esset, atque hostibus horrorem incuteret. Nullis nisi Hollandicis velis aquę pervię erant, & in signum purgati Oceani supremis in malo corbibus scopę constitutę. Anno cło cccc xl ingens Osterlingorum classis cum viginti tribus Borufforum navigiis sine ullo fere prælio solo terrore superata est. Borussi relictis sociis intentis velis fugę consyluerant, sed seorsim excepti primi in victorum manus venire. Secuta hinc totius classis deditio. Qua victoria flamma virtutis pubi nauticę in immensum crevit, neque prius sedari potuit, quam fortitudinem cum gloria æquaret, imo famam superaret. Magni animi proprium est neque adversā fortunā dejici, neque secundā inolescere, & in victoria sælicitati posse modum ponere. Raro victor se ipsum & affectus vincit. Utrunque victor Batavus etiam hosti pepercit, nulli sanguinolentas manus intulit, nullum vinculis & carcere clausit, sed omnes sine lytro libertati asseruit. His difficultatibus circumventus hostis per aliquod tamen tempus lacertos movit, sicuti morbo fere absumpti huc atque illuc vortere corpus solent, nullamque requiem inveniunt. Tandem Anno cło cccc xli, die S. Jacobi circa Norvegiam tria immensę mōlis bellica navigia veluti castella maris

procul se ostentabant, quæis occurrebant sex, vel ut alii referunt, tres depressæ nostrorum naviculæ, quadringentis circiter & quinquaginta viris refertæ. Illi manu prompti, mari supra modum exercitati, gloriæ militaris appetentes, prædæ cupidi, quæ etiam mediocres virtute viros transversos agit, statuerunt se objectare periculis, & fortunam tentare. Ludibrio ea res Osterlingis habita, jactatumque per facetias militares naviculas Batavorum omnes simul uno suo navigio collocari posse. Dum tam altos & superbos spiritus gerunt hostes, contemnendo nostros facile superati, quibus neque consilium, neque virtus deërat, nullumque inceptum frustra erat. Incredibili enim fortitudine hostem adorti, & in tabulata navium profluentes, passim eundem ferire, occidere, ita ut cadaveribus omnia constrata, sanguine humano tingeretur Oceanus. Nonnulli ex hostibus frustra contra nitebantur, postremo vel telis concidebant, vel in mare præcipites se agebant, atque aquis absorbebantur. Qui reliqui erant capti, atque inter eos Præfectus Petrus Brantius, cujus captivitas in causa fuit, ut tam cruento bello mirabili modo finis imponeretur. Nam dum opima inter se dividebantur spolia, forte Brantius civi Hornano admodum honesto cessit. Qui non hostilem in modum eum excepit, sed ita flexit animum, ut beneficiis novo modo hostem vincere summa ope niteretur. Novis vestimentis indutum, viatico instructum, nullo redemptionis pretio solis promissis fidens incolumem dimisit. Is ubi domum reversus, humanitatem Hollandorum in cælum extollere, captivos ibi non tanquam hostes, sed tanquam amicos & necessarios excipi, contra illorum tyrannidem acriter increpare, tenebricosis
& cz-

& cæcis carcerum antris Batavos includi, quæis vel pœdore vel fame, deformati ærumpis miseram vitam terminarent. Non mirum rebus advorsis usos. Deum tantorum scelerum vindicem esse & futurum. Et quandoquidem Batavi sola probitate tuti essent, illine sceleribus securitatem quaererent? E re publica fore, ut quocunque modo paci novæque amicitie, incumberent. Finem belli non expectandum, quo victores victis leges imponderent. His similibusque verbis, uti inter suos magnâ pollebat auctoritate, primo popularium animos ad mitiora paulatim flexit, ita ut exiguo post tempore Hafniæ de pace agi cœptum fuerit. Inter Danos Borussosque & Hollandos perpetua & solida pax percussa. Cum Vandalicis civitatibus duodecennales induciæ constitutæ, quæ finitæ iterum atque iterum prolongatæ, donec nullo amplius molimine tacito suffragio sponte otium & quies mari terræque incubuit.

C A P U T IX.

*DE MARITIMO BELLO INTER
GALLOS ET HOLLANDOS, ANNO c. l. v.
cccc lxxi. & seq. SVB CAROLO
BVRGVNDO, ET MARIA.*

ANNO admodum c. l. v. ccccc lxxi iterum turbatum mare, & cum inquieto elemento inquietas publica. Causa motuum, quod Comes Warvicensis, Eduardo IV, Regi Angliæ, cujus sororem Carolus Burgundus in uxorem duxerat, supplicias ferente Ludovico undecimo Galliarum

Rege, hostilia intentaret. Atque adeo rerum humanarum domina Fortuna sæviit, ut ipse postmodum Rex regno pulsus in Hollandiam aufugerit, atque uti inconstanter se res humanæ habent, & huc atque illuc feruntur, sequenti anno valida classe Angliam petens post atrox prælium pristinæ restitutus fuerit dignitati. Interea antequam Rex regno pelleretur, Comes Warvicensis conniventia Regis Galliæ naves Hollandicas passim diripiebat, triginta navigia sacro die Paschatis interceperat, & totum veluti mare jam animo invaserat. Sed ille cruento admodum prælio à Præfecto maris Anglico Comite Scalliæ exceptus, injuriam nostris illatam pensavit. Restituta cuncta navigia singulari Angli humanitate. Sed Warvicensis nihil minus tanquam tempestas publica mari & nostris litoribus imminebat, atque iterum, circa festum Pentecostes viginti nostratium naves occupavit, non tam in dimicando, quam in prædando momentum victoriæ ponens. Verum Henrico Borfalio Veriæ domino, Præfecto maris Batavico, non erat animus ab ignavia & sordidia corruptus, sed expedita triginta sex bellicarum navium classe xvii Kalendas Julias litora Normanniæ petiit. Atq; adeò prædones (neq; enim hostium nomen iis compete-
cebat) cruentis manibus & immani avaritia nobiles, quibus totum veluti mare quæstui erat, ad Sequanæ ostium ita excepti, ut decem nostrates naves jam ante captas ferrum restituerit, reliquas ignis consumpsit. Ex quo tempore tantus metus animos prædonis corripuit, ut sibi diffidens maria tentare ausus non fuerit. Ex his initiis anno sequenti grave bellum inter Galliæ Regem Batavosque erupit. Immen-
se molis navigia mari Rex commiserat, inter
quæ

quæ cætera omnia supereminebat, cui Columnæ nomen inditum, revera columna & fulcrum Oceani, quæ piscationibus halecum valde infesta, pluribus piscatoriis cymbis captis, mare & piscationem turbabat. Naucleris lemborum captis singulis redemptionis pretium centum aurei constituti, quos pro navigiis mercibusque quæ dimittebantur, tamdiu vinculis mancipabant, donec constituta pecunia persoluta esset. Piscatores percussi tanta clade animum despondere, ubique trepidare, periculo ancipiti fugę consulere, qui nondum mare ingressi domi mansitare, cum omnibus in locis infesta vis hostium esset, & ferro mare clausum teneret. Sed non diutina hæc fuit dominatio: rostratæ enim Batavorum naves vi atque armis claustra Oceani perruperunt, classemque Gallicam mari expulere: secutæque induciæ usque ad exitum anni cło cccc LXXIV, quantis jam tum viribus mari polleret Batavus, indicarunt. Finito quietis tempore, atrocius bellum recrudit, & clade Batavorum nobile. Galli enim nihil pensi moderatique habebant, maria invadere, direptionibus polluere, vastare omnia, sibi quisque trahere, rapere, ut commercia nostra interciderent, navigationes frustrarentur. Quapropter Amstelodamenses, qui tum appetente vere navigationem in Hispanias moliebantur, edicto Caroli quatuor præsidarias naves contra insultus prædonum instruxerunt, onerarias etiam quinquaginta majoribus minoribusque bellicis machinis, milite denique conscripto muniverunt. Ita ex sententia rebus paratis compositisque, cum Enchusanis, Hornanisque, qui suas itidem naves acriter expediverant, classis circiter octuaginta navium vela ventis dedit, quæ conjunctis

junctis copiis profundum secans hostium molimini non paruit, neque ulli insultui obnoxia fuit. Cæterum ubi saluonusta domum reverteretur, longe alia rerum facies fuit, imo fœda atque miserabilis. Contemptus hostium & sui securitas tantam calamitatem peperit. Incesserat & avaritię tabes animos mercatorum, qui forum præoccupare tentabant. Itã disperfis à se invicem nostris navigiis, dum nihil consilio atque imperio ageretur, hostis, qui prope Clasdunum occurrerat, prudenter magno impetu, in mediam classem erupit, ne vires suas Nostri conjungerent. Tum adversis navibus concurrere, implicare, perturbare undecunque Nostros, qui repentino metu perculsi se expedire nequebant. Et mox rapidos globos tormentis majoribus excutere, igneis in naves nostras jaculari, denique tantus horror nostræ classi immissus est, ut deditione singulæ naves sibi consulerent. Ita sine ullo fere certamine victoria hostibus parta, tota classis octuaginta admodum navium occupata. Plerosque itidem captos nonnulli referunt, nisi quos cymbis fugientes vicinum lîtus exceperat: alii, omnes fere ex navigiis, quæ versus Clasdunum aufugerant, in tellurẽ se recepisse, & summa cum ignominia domum reversos, commemorant. Neque tantum opum, sed gloriæ potissimum deminutio tetigit gloriosa Batavorum pectora, quibus industria militaris, victoriarum multitudo, maritimæ militiæ magna pericia, animus denique belli ingens semper abunde fuerant. Hæc clades præ cæteris Amstelodamenses & Hornanos (xxx horum naves captæ) graviter afflixit. Plurimi mercatores ad incitas redacti, & subito ex divitibus pauperes infra omnem sortem Fortunæ deprimebantur.

Non-

Nonnulli tā insolita mutatione commoti vel in amentiam impellebantur; vel igneis furoris conceperunt. Porro Carolo dein circa Nanceium occupato, mari erant Alcyonia: sed eodem mox ibidem extincto, asperrimum iterum bellum sub Maria, quæ sola tum patri hæres relicta, Oceano incubuit. Namque Gallus, cupidine prædæ, atq; superbia agitatus, solus in aquis dominabatur, exclusisque Hollandis Zelandisque passim grassabatur. Interea Batavi, quibus supra fortunam sublimis animus, parabant omnia, quæ ad justam classem expediendam necessaria, prorsusque nihil intactum relinquebant. Triginta quinque munitissimas naves obviam hosti miserant, eæque tantum terroris incussere Gallo, ut terga dare cogeretur. Anno clō cccc lxxvii mense Augusto decem iterum Nostratium naves, quas oppidum jam tum potens Amstelodamum expederat, ingentis molis corbitam (caraquam vocant) mercibus exoticis divitem compellant, imperantque, ut velum dimitteret. Illa parvitatem nostrarum navium ludibrio exponere, imperium detrectare, monere ne irritando majorem vim in exitiū suum converterent. Serum diei erat, neque per noctis tenebras certamen conferere tutum videbatur, quia incerta maris & pericula caligine augentur. Per totam itaque noctem insecti, ubi dies appeteret, summo impetu navem adorti, solo terrore, explosis aliquotiens tormentis, superarunt, atque in Zelandiam vexere. Captis dein octodecim Gallorum navibus, hostis incertus variusque formidine exagitabatur. Nostra classis, quæ circa Diepam stationem fixerat, elicere hostem sed frustra nitebatur. Ubi hoc parū Nostris processit, scaphis terrā nacti, vicinos pagos depopulati luculentam

F

præ-

prædam retulerunt. Ita inclinante autumnno domum reversi Gallos prædoneſque alios, qui profunda avaritiâ maria turbabant, expulere, incredibili Batavorum gloria, & ex ſocordia hoſtium infamia.

CAPUT X.

*BELLUM INTER FLANDROS ET**HOLLANDOS, ANNO MDCCC-**LXXXIII. & ſeq.*

VBi Maria vivis exceſſerat relicto impubere filio Philippo, tutela Maximiliano relicta fuit. Inviſus ille Flandris erat, vel quod gens inquieta novum imperium detrectaret, vel quod nimis exactionibus attereretur. Quippe Princeps inconfultus, etſi non malè indolis, ſubditorum opes graviter flagellabat, peſſimis quoque adulationum magiſtris animum & aures addixerat, quibus nihil præter avaritiam conſulti erat, & quod reliquum erat, ſumma adipiſcendi libidine ad ſe trahebant. Hinc diſcordia animos Flandrorum diviſerat, qui ſemel rupto amicitie fœdere in injurias proni auctoritatem Principis impetebant. Conſortes imperii in Flandria quatuor conſtituere, gravi admodum diſſidentie an contemptus exemplo. Dein comitiis Gandavi indiſtis tutela tantum illi pro tempore decreta, juramentoque ſulta fuit. Abdicata poſtmodum illi poteſtas, quod vocatus ad Comitum Flandrie, præſentiam dedignatus videretur, & ad Ultrajectinam obſidionem animum accinxisset ſuum. Hoc ſuperbie vortent Patres, cum inviſo ſemel imperio cuncta in pejorem partem trahe-

traherentur. Philippum itaque filium vix dum quinquennem Comitem renunciant, quatuor tutores, dum ejus ætas infirma, imperio præponunt. Hinc grave inter Flandros Hollandosque & Brabantos bellum exarsit: vastatæ regiones, turbatum mare, navigationes impeditæ, crebræ admodum velitationes, nullibi quies. Media quidem ætate anni c l o c c c c l x x x i v compositæ turbæ, post aliquot annos captivitate Maximiliani, qui Brugas, contenderat, recruduerunt. Urbes inter se discordiis divisæ, vastæ regiones igne & rapina, inprimis Flandria & Brabantia, neque minus Hannonia. Nec immunis ab hoc igne in ipsis aquis Hollandia fuit. Slusani enim, quibus se junxerant exules ex Hoexiorum partibus, rerum novarum avidi, Duce Francisco Brederodio, expedita classe Mosæ flumen ingressi, Rotterdamum oppidum Mosæ flumini incumbens interceperant. Hinc arce quoque Woerdana occupata, agri ignibus & rapinis fœdi, vel tributis obnoxii, municipia & prætoria in cinerem acta, mare quoque infestum prædonibus, commercia impedita, ubique metus & periculum incessabat. Quis recuperandis dum summam operam impendunt Amstelodamenses, Maximilianus illorum insignia corona imperiali ornavit. Præcipue non vanus timor Westfrisios agitabat, ne Texelia capta suis imminerent finibus, & tributa pendere cogerent. Imperatum, ut cives, rustici in armis essent, signis ignium & campanarum sonitu uterentur, sin hostis in propinquo, vel litori se exponeret, ut mature prospicerent Patres, ne quid detrimenti Resp. caperet. In litore quoque vigiliæ, & sinus Australis bellicis navibus stratus gravis belli imaginem præ se ferebat. Populus bello,

commerciis impeditis, exactionibus misere atterebatur. Nullum afflicto nisi in pace remedium, quorum Fortunas bellum non tantum concusserat, sed pene everterat. Anno demum c l o c c c c l x x x i x ingruente autumnus, intercedente Rege Galliarum, iuncta utrinque pacis foedera. Quae tanto gaudio excepta, ut etiam ipsi agri haecenus inculti, mare classibus turbatum laetari viderentur. Dum enim praeter spem nihil reliqui erat, insperatus huius belli exitus omnium animos mirum in modum affecit. Sed post tam saevam tempestatem non diuturna mari quies & otium. Vbi foedis procellis intumuit mare, non statim quiescit, sed fluctibus suis adhuc attollitur: ita post tempestatem belli maritimi, infesta tamen pelago incubuit praedonum rabies. Quippe anno c l o c c c c x c i Slusani, pacem detrectantes, praedae assueti, iustis bellicis navigiis fauces praecipue se stringentis Oceani premebant, ita ut nullis navigiis nequidem frumentariis aditus pateret. Eo denique abiectis scelerate insolentiae, ut duce Joanne Naeldviceno maritimum pagum Wycum nomine depradati ignibus feralibus subjecerint, indignante veluti vicinum incendium Oceano. Marsdipam inde ingressi, nihil contra molientibus Batavis, per totam aestatem hinc mari Oceano, inde sinui Australi depradationibus imminabant. Ita ignavia & socordia nostra mare a praedonibus clausum nervos potentiae nostrae succidebat. Ipsa quoque Texelia & Wiringa vicine insulae victum & annonam suppeditabant, incolaeque malarum artium insolentes facile hostibus credulas aures dederant, qui obtentui habebant, se non tanquam hostes, sed amicos venisse, ut servili tributorum onere eos liberarent.

rarent. Vetus ac pridem insita gentibus nostris est libertatis cupido. Et sequuntur facilius, qui servile putant cogi: duci volunt, non trahi. Ubi legitimus imperandi modus adest, faciles in omnia obsequio, ubi extrema imperantur, nihil non audent. Ad incitas redacti bello & nimis exactionibus, sumptibus pares non erant. Texelia & Wiringa jam diu contumax nova omnia optabant. Itaque facile credidere hostibus, ita comparata mortalium natura, ut lubentes admittant, quæ tacite mente vovent. Ita prædones etiam opitulantis Nostri ostia maris suis occlusere navigiis, occupatis pluribus mercatoriis navibus, cymbisque, quæ ad halecum capturam se expediverant, cæteris metu inhibitis profundo se committere. Hinc caritas annonæ, & ultimum rerum humanarum supplicium fames graviter Hollandiam concussit, ita ut non naturalia & fœda alimenta in usum necessitas verteret. Et cū de tributis nihil remitteretur, primo obsequii impatientia, dein seditio in ancipiti Remp. posuit, cum plerique nihil spei nisi in simultatibus haberent. Idem circa Zelandiâ prædonum furor, quos tamen oppressos, circa Slusam xl bellica navigia, minora xliii à Ioanne Egmondano capta, Historici commemorant.

C A P U T XI.

*DE GELDRO-FRISICO BELLO.**PRÆLIISQUE MARITIMIS, ANNO**cId Id IV & seq.*

BELLUM hinc Geldricum Frisicumque contra Batavos, non tantum terra, verum & mari exarsit. Inter Carolum

lum Geldrum & Philippum Burgundum contentiones eò eruperant, uti sanguinem uterque, quàm omnia mallet. Causa belli insita mortalibus habendi & dominandi cupido, Geldro avitum imperium vindicante, Burgundo sua jure emptionis retinente. Primis decem undecimve annis placidè tantum arma tentata, sed anno clō 15 iv furor belli efferbuit, ita ut postquam semel itum esset in arma, ad inter necina odia ventum sit. Ubique rapinæ agrorum, fragores tormentorum, mare sanguine imbutum, vastationes & cadavera urbium cum horrore conspiciebantur. Maritimas velitationes & prælia recensere nostri propositi est. Igitur Geldri undique regionem nostram tentabant, atque homines terræ assueti, etiam in ipsis aquis proprio veluti nostro elemento, adoriri ausi sunt. Imperatum à Principe civitatibus maritimis, ut bellicis navibus sinum Australem insiderent, quo hostis prædæ appetens, avaritia ardens passim vagabatur. Præfectus itaque Petrus Leovardus summa opemitebatur, ut mare prædonibus vacuum redderet, com meatum armorumque vecturam impediret. Sed Geldrorum animus magis magisque indies ferox omnia magna volvebat. Quorum classis cum septingentis armatis militibus Hardervico solvens, ausa in Hollandiam transmittere, oppidum Monachodamum per insidias occupare tentavit. Sed Waterlandis rerum gnaris animus federat, virtutem suam experiri, hosti aquis obviam ire, patriam & libertatem armis tegere & defendere. Acriter tum dimicatum, advorsa in pectore vulnera, acervi trucidatorum corporum, denique ipsa cadavera adhuc vindictam spirare videbantur. Sed nostris Fortunam acriter prensantibus vi-

ctoria

etoria cessit, pluribus cæsis, nonnullis captivis. Anno ejus sæculi sexto Princeps noster prosperam contra Geldros susceperat expeditionem, Arenaco enim occupato cunctæ admodum Urbes ab uno latere Rheni victori patebant: sed in medio successu ulterius progredi socrus intempestiva mors non permisit, namq; in Hispaniam profecturus pacem cum Geldro iniit, sed non diuturnam. Fortuna enim sævire, miscere, ac turbare omnia cœpit, sicut res humanæ se habent, ut prospera adversa sequantur, & nihil stabile firmumque inveniat. Postquam enim Philippus regnum Castiliæ adeptus esset, paucis post diebus non incerta veneni suspicione, Burgi in Granatensi ditione vitam cum morte commutavit. Hinc omnia in pejus labi, & dum tenera Caroli, qui postea quintus appellatus, ætas contemptui esset, fluctuaretque sine Principe Resp. Geldri occasionem nacti, qui ex commodo suo pacem bellumque æstimabant, arma sumere, & recuperatis cunctis admodum oppidis, quæ superiori ætate amiserant, insuper Wesopo & Muda captis, maria & terras infamibus rapinis vexabant, nullibi victoriæ temperabant. Sicut autem rebus secundis insollescere animus mortalium solet, atq; magna Fortuna licentiam sibi & audaciam usurpat, anno sequenti ingenti molimine Amstelodamum superare tentarunt, ut ita ubique opes patriæ lacerarent. In Tya flumine propugnaculum, quod rubrum vocabatur, palis compositum erat. Jamque eo occupato urbi imminebant. Verum Amstelodamensium ea virtus fuit, ut extremi periculi unicum remedium crederent omnia pericula superare, & ardenti animo in fœdam fugam hostem pellerent, propugnaculoque dejicerent. Depressit

pressit eos hæc calamitas, atque per aliquod tempus quietem peperit. Verum anno ejus sæculi duodecimo animus inquietus & sui impotens sedari nequibat, sed ad maturandam novam expeditionem contra Amstelodamenses eos incendit. Sed & hic Fortuna civium prævaluit, quam hostes, qui ultra mille ac centeni eò confluerant, ingens illis damnum inflixerint; cunctis navigiis, quæ extra palorum septa anchoris consistebant, incendio consumptis. Passim cum navigiis ferali igne commercia crepabant, atque ipsis veluti aquis flamma incubuit. Quod infortunium non solum Batavos, sed & Anglos, Gallosque & Vandalos, quorum ibi naves frequentes in anchoris fixæ erant, concussit. Non minor tempestas in sinu australi surrexit, qui rapinis fatigabatur, & pro lubricine victorum vicini agri fœdabantur, municipia in cinerem redigebantur. Gratum tale Geldris bellum erat, quod facile tolerabatur, dum domi rebus accisis, in externa regione ex prædâ divitias & opes cumularent. Biennio post pactæ induciæ, sed instabiles, in gravius bellum anno decimo sexto ejusdem sæculi eruperunt. Cum enim Princeps Carolus, cujus vernans ætas vix decimum & sextum annum attigerat in Hollandiam cum imperio accessisset, otii impatientes Geldri cum Alberto Saxone in Frisiâ bellum cepère. Magnis promissis imperium pollicentes nonnulli ex Frisiis, qui Saxonis per tali novas res quærebant, Geldrum incitaverant. Ita Frisia discordiis civilibus fessa suis armis peregrinum dominum accersivit. Iamque adeo Geldrus plerisque urbibus occupatis ad incitas Saxonem adegerat, qui, cum extrema omnia experiri animus non esset, omne suum jus certis conditionibus

nibus Carolo Principi cessit. Hinc ortum Geldro-Frisicum bellum, quod sola calamitate nobile. Primum & quidem prosperum cum Frisiis prælium, qui suis navigiis, quæ tamquam propugnacula eminebant, mare clausérant, adeò ut nec Flevis fluenta nec Tessalia summo nostrorû detrimento paterent. Florentius Iselsteinus, primus Burge Comes, bellicis navibus auctus, & armato milite circiter trium millium stipatus, magna virtute hostilem classem prope Worcum Frisix oppidum adoritur, vincit, plurimos occidit, cæteros captivos Enchusam mittit, qui diutino carceris pædore & illuvie pressi, dein ut prædones Prætori traditi passim infelici ligno suspensi sunt. Sequens annus, qui erat decimus septimus ejus sæculi, Hollandix clade memorabilis est. Cum enim Carolus Geldrix Dux copias ingentes militum conscripsisset (ad septem vel octo millia fuisse varie traditum) & prope Cunderam ferocissimus prædonum dux Petrus Longus suû junxisset militem, (cccc Chronicon Frisix nondum luci datum fuisse testatur) viii kalendas Quintileis classis c. l. navigiorum vento secundo prima luce cum toto exercitu aquis se dedit; & in litora Borealis Hollandix multo adhuc die vecta terrorem ingentem vicinis urbibus injecit: ubique cives trepidare, afflictare se, sibi suisque viribus diffidere, nihil pensi neque consulti habere, magnitudine classis sua pericula metiri. Atque adeò ea Enchusam, prætervecta subito impetu in Medenblicum oppidum conversa, nequicquam urbana cohorte repugnante, totum incendio delevit, ut ne domus quidem reliqua esset. Ferro plerique cives perempti, cujus neque sexus neque ætas imbellis immunis fuit. Sola arx adversus hostium furorem

G

ignium-

igniumque violentiam invicta stetit, sub præfecto Iusto Burio, qui eam magno animo tuebatur. Ita Petrus Longus divite præda onustus cum prædonibus in Frisiam revertitur. Reliqui ex Geldris cuncta ignibus & rapinis vastant. Alcmaria in prædam versa, & post septem dierum populationem igni tradita. Idem fatum Beverovicum & Sparodam habuere, Aspera tota sanguine imbuta. Sed Henrici Nassovii virtus, qui copias nomine Regis Caroli ducabat, ita eos in arctum egit, ut dispersi passim trucidarentur, vel atrocibus & infamibus suppliciis more latronum punirentur. In agros quoque Geldriæ arcesque nobilium igne & rapinis sævitum. Denique Carolus Geldriæ dux Arenaco conclusus extrema Fortunæ expectabat, nisi rex Galliarum intercessisset. Interea Petrus Longus homo multis facinoribus coöpertus, ipse inquietus & turbidus maria turbabat, & in exitium nostrum captis mercatoriis navibus commercia impediabat. Erat huic homini inveteratum in Hollandos odium atque iracundiæ æstus, profunda atque insatiabilis avaricia, quæ in immensum rerum copia augebatur, ferox & vastus animus, inconsulta audacia, quæ illi pro virtute erat, excussoque semel metu omnia dira minitabatur. Nimia quoque felicitas illum transversum tulerat, more mortaliū, qui ea qua sorte contingere, suæ attribuunt peritiæ. Accessit & nostris ingens terror, nam terra marique graviter opes cunctorum quassabantur, & damnum unum alterum sequebatur. Ubi terra quies, mari erat belli tempestas. Neque tantum profundum, sed modo hac modo illat litora pulsabantur. Itaque pro periculi varietate timor insolitus incesserat, concurrare passim, festinare, etiam fictis rumoribus

bus credere, quasi ubique hostis adesset. Interca Florentius Heltsteinus nuspian diligentia & vigilantia parcere, animos illorum, præcipue Hornanorum, qui maxime periculis expositi, erigere, suppetias promittere, piratas belli insolitos, vinci faciles, asserere. Paucis post diebus XVIII Julii indicta Delphis comitia, Patriæque Proceres prospicientes, nequid Resp. detrimenti caperet, decrevere, imposito tributo cuncta bellica præsidia contra Petrum Longum cogere, in tempore, quod omnium rerum primum, classem dispersam aucto stipendio convocandam, facile dispersos ab hoste circumveniri, conjunctas copias etiam adversæ parti formidabiles fore, cum non animus sed fortuna Batavis deesset; cavendum imprimis, ne nostris bellicis navigiis direptis, eisdem in nostrum exitium hostes uterentur, denique ad tutanda commercia conductorias naves expediendas. Ita inclinante mense Julio, Antonius Houtenus Fleteræ Dominus, qui propter adversam valetudinem Domini Sevenbergæ in sinu Australi classi jam conjunctæ imperabat, cum accessissent & alia navigia urbium nomine missa, hostem laceßere ausus, atque omnia bona in proxima spe habebat. Edicto primum regio unicuique privato libertas deprædandi concessa. Cædes, incendia, aliaque belli facinora in hostem patrare jus & fas censebatur. Ita alii prædæ cupiditate, alii vindictæ studio, sicuti in populo varia sunt ingenia, hostem terrâ marique vexabant. Plerosque lucri cupido acrius præcipites egit. Unusquisque rapere, trahere, per vim extorquere, vel per insidias hostem circumvenire, bona inter se dividere, nisi quod de bonis direptis Præfecto cum Concilio cognoscendi facultas reliqua esset.

Verum archithalassus expedita classe animo intrepido mare tentare, hostibus vim inferre, Fortunam sibi facere, cuncta horrore implere. Incense plurima naves, quæ prope Bunsicotam in statione federant, alię fugatę in Frisiorum portus se receperunt. Ita illi, quorum prompta fuerat nẽmine resistente audacia, atque opes civium nostrorum flagellaverant, per summum dedecus atq; socordiam imperium maris vix conspecto hoste amiserunt. Nostri autem quibus bona erepta, maris libertas imminuta fuerat, continuis incubuerunt victoriis, portus hostiles cinxere, atque extrema iisdem intentarunt. Cum autem diuturna hæc esset expeditio, & militiæ robur argentum deesset, primo nautica plebes, quibus atas animusque ferox erat, Præfectos exagitare, pecuniam poscere, turbas movere. Jamque præsens metuebatur seditio, nisi Franciscus Cobelius Hollandiæ senator, autoritate & prudentia pollens, ideoque Præfecto maris adjunctus, literas ad Hornanos misisset, rogatum uti unica vice nummos mitterent, quos tribus intervallis pollicitati fuerant. Incipientem & nondum adultam seditionem non verbis non melioribus consiliis mitigari posse, nisi pecunia: militem, quanto ad sustentandos labores acrior esset, tanto deficiente præmio ad seditiones propriorem fore: turpe esse victoriam sibi ipsi adimere, & cum hostem superaveris, in te ipsum militem concitare. Pecunia missa, an ab Hornanis, pro comperto dicere nequeo. Ita sopita discordia Nostri opportunitates maximas non desidia vel nihil agendo corrumpere, sed hostem mari pepulere, ita ut nullibi securus tutusque esset. Cum ita in arctum res illorum redactæ essent, ut consilii nulla amplius superesset copia, semestres inducias

inducias procuravit Rex Galliarum, cui paci promovendæ arbitrii honos concessus. Convenit ea conditione, ut Geldrus Frisiæ jure cederet, Carolus Rex centum coronatorum millia penderet, statimque arma dimitterentur. Verum ubi soluta Arenaci obsidio, de qua ante diximus, confirmato iterum animo, conditiones à Geldro spectæ. Sequenti tamen anno, qui erat decimus & octavus, induciæ prolatæ. Neque minus piraticam iterum crudelem, immoderatam, & nimis quam calamitosam Petrus Longus exercere, quibuscunque modis posset vires nostras atterere, captivorum corpora in mare projicere, nullibi misericordiæ vel gratiæ consulere, luctu & cruore omnia complere. Nostri, quamvis apud Præfectum Hollandiæ prolixæ repeterentur querelæ, jussi nihil hostile intentare, sed sua tantum tueri. Ita in immensum hostibus crevit audacia & ferocia, dum plures pauciores facile superarent, Nostri autem, si plures, aggredi hostem prohiberentur. Invisum plebi erat bellum pacis nomine involutum: fortunas, opes, gloriæ, quæ prima mortales censent, hosti tradere summum probum jure censebatur. Interea languore nostro ejus ferocia augebatur. Ut cætera relatu minora subiceam, xiv Augusti imperterritus prædo aliquot Hollandorum navigia vi adortus, juxta Hornam sortem quidem primo adversam tulit: quippe primaria navi occupata, Præfecto sociisque aqua interemptis, cedere coactus. verum idem cedendo animo non cessit, atq; iterum experi ri fortunam in animum induxit suum. Cum itaque pubem nauticam denuo accendisset, monuissetq; uti forti paratoq; animo essent, ingenti virtute Nostros in fugam egit, undecim navigia cepit, quingentos circiter vel ferro cecidit, vel

aquis submerſit. Miſerabilis ea facies fuit & cum hoſte & cum aquis colluctari, mortemque fugiendo in certam incidere. Secundæ hoſtium res continuo ſecundis tegebantur. Nam non multo poſt S. Lamberti die totam orientalem claſſem, quæ ex mari Balthico in Hollandiam vela dirigebat, intercepti, Hollandis, quorum tria erant navigia, Oceanum pro ſepulchro dedit. Idem vigefimo octavo Septembris viginti quinque navigiis cum quingentis, vel, ut aliqui referunt, mille & ducentis militibus nobilem expeditionem ſuſcepit. Inuiſa maxime Horna erat, oppidum validum & jam tum mari pollens. Neque diu hic dubitatum, cum continuo ſuſſeſſibus ſpes aleretur, victoriamque certam promitteret. Præfectus, militiæ maritimæ impiger, conſiliis tectis Hardervicum contendere ſe ſimulabat, ubi tum Carolus Geldriæ Dux agebat, nota Præfectorum arte in vulgus falſa ſpargere, abdita conſiliorum clauſa in pectore tenere. Nocte itaque intempeſta primo militem, vigilum negligentia, in aggerem impellit, dein per vicum, qui poſtmodum Geldricus nuncupatus, urbem invadere molitur. Sed quia frequentes cives ibi vigiliam agebant, facile detectus, tota ſubito civitas in armis ſtetit. Acriter diu dimicatum, urgente prædæ avido Friſio, ſua defendente Hollando. Nunquam fide minus dubia probatum, maximum ad Fortitudinem momentum, ſua cuique eſſe, & vitæ prodigos eos, qui ſi vincantur, morti jam deſtinati ſint. Extrema enim civibus, cædem, rapinam, incendia crudelitas Petri promittebat. Unde vacillat quoque annalium fides captam fuiſſe urbem, quia nihil reliqui iis prædæ feciſſet: expulſum ex monumentis Hornæ publicis conſtat. Neque enim cætera curioſi ejus

si ejus anni Consules, tantum facinus silentio præteriiissent. Ita Petrus Longus ipsis admodum induciis quaqua vorsum rapinis Hollandos vexabat, & lucri contactu ac successu ulterius depre'dandi avara spes gliscebatur. Et jam non arcana murmura civium audiebantur, quorum opes nullo resistente lacerabantur, & vindictę cupida plebes indignatione æstuabat. Finitis tamen induciis iterum novę pactę ad biennium, sublesta rursus Geldrorum fide. Anno hujus sæculi vigesimo secundo Geldro-Frisii viginti navigiis, Gallico bello implicito nostro milite, opprelis Tessaliâ Wiringaque insulis, ingens tributum extorsere. Tessalię decem Philippeorum millia, Wiringę tria millia & quingentos, sexaginta quibus igne consumptis, indixere. Et quia tanto æri solvendo impares, obsides dati qui opibus maxime præstarent. Profligatis quoque à Carolo Geldro ante Gelmudam castris, calamitas calamitatem premebat. Sed bellum in Frisios à Nostreis vorsum totam fere regionem sub jugum misit. Annus sequens latrociniis Geldrorum infamis, qui pluribus Hollandię vicis igne sedatis, Haga spoliata, instar fulminis cuncta subito prostraverant. Sed nihil memoratu dignum mari invenio, nisi quod jam tot per annos concitatis in mutuam perniciem animis, extingui belli furor nequiverit. Tandem anno vigesimo octavo, cum præfectus Frisię Georgius Scencius Tautenburgicus & Florentius Egmondanus militię summus magister, conjunctis copiis, multo labore atque acri impigraque militia pluribus urbibus captis hostem ad extrema rede-gisset, inclinante autumno Gorichemi læta pax utrinque summa latitiâ constituta.

PRÆLIA GALLICA, PRÆCIPVE

ANNO CLO IO LIV.

SUB Carolo V bello Gallico maritima virtus Nostra-
tum iterum enituit. Quippe Batavi quique acrius
salo soloque animantur Zelandi, quibus nullus labos insoli-
tus, nullum periculum formidolosum erat, anno clo IO XLIII
mense Majo, cum prædonibus Gallicis mare turbaretur,
decem armatis onerariis navibus plenis velis in portum
Burdegalensem delati, commotis facinoris & periculi no-
vitate oppidanis, septendecim naveis mercibus stipatas
occuparunt, reliquisque incensis, ex vicina tellure ingen-
tem prædam diripuerunt. Cæterum Galli anno clo IO LI
tempore pacis, levitate genti insita, ex improvise classem
nostram, quæ in Hispaniam tendebat, interceperant, mer-
ces in prædam vorterant. Inexpectatum hoc damnum
graviter omnium animos concusserat, atque exasperaverat.
Quippe immensæ divitiæ ultra duos milliones aestimaban-
tur, sive quod ita se revera habuerit, sive quod damna sua
in majus augere mortalium conditio est. Restitutione ne-
gatâ, cruentum bellum sanguine maria & terras imbuir.
Itaque appetente vere, anno sequenti, quia mare Gallicis
prædonibus infestum erat, interdicta publice orientem &
occidentem versus navigatio. Prospiciebant enim Patres
spe lucris maxima pericula sustentare mercatores, imo alex
Fortunæ bona sua subicere; in privatorum autem opibus
publicas opes consistere. Accessit postmodum edictum,
ne ulla

ne ulla navigia mari se committerent, nisi quæ milite armato, tormentis, annona militari probe instructa essent, & juncta classe hosti resistere possent. Singulae enim naves, quæ extra numeros diffundebantur, facilius quoque hostium injuriis patebant. Interea sequentibus annis ferocia belli aucta, obsidiones frequentes, devictis vastationes & cadavera urbium horrorem incussere. Et terra & mari crebra prælia, victoria per vices acta. Cæterum longe acerrimum nobilissimumq; prælium anno cLo lO LIV, mense Augusto mare veluti lassavit. Hollandi viginti duabus mercatoriiis navibus iter ad suos moliebantur. Quo comperto Gallus maximas confestim copias armat, pubem nauticam cogit, denique instructam classem novendecim navigiis bellicis, cum sex velocibus in mare ducit, prædę potiundę avidus. Prope Douveram acerrime concursus est. Gallis erat animus ingens, potentia validus, Nostros necessitas ad fortitudinem impulit. Illos prædę cupido incendebat, hos metus ingentis damni. Hostis fretus multitudine militum, parabat injectis manicis cominus armis contendere, Nostri quia pauciores metuere, ne numero obruerentur, in tormentis bellicis, hinc atque illinc latera navium quassando, omnem spem habere, & cum artis tormentarię pericia præ Gallis pollerent, declinare, ne ullo modo rates fixę sibi invicem jungerentur. Postquam multum diuque ultro citroque tormentis se lacerassent, vecti in angustias freti, cum mari tranquillitas suda incumberet, Galli summo impetu harpagonibus manicisque ferreis injectis, quindecim navibus cum nostris totidem numero congregiuntur. Tum cruentum & horribile confertum prælium, quale illud sæ-

3793

H

culum

culum non viderat. Dum enim cominus res agebatur, profè quisque virtutem edere, ferro ferire, cadavera super cadavera volvi, fori sanguinem in mare eructare, clamor virum, vulneratorum suspiria exaudiri, denique vitam ac mortem juxta æstimare. Agilior Gallis erat classis, Nostri altior compactiorque. Illi multitudine, Nostri virtute & constantia agebant. Pubes quoque nostra nautica melius officia militaria expediebat, & ex navigiis, quæ cominus non dimicabant, certis tormentorum ictibus navigia hostium lacerabant. Ita pari fere sorte à nonâ matutina usque ad tertiam atrociter dimicatum est. Galli pugnando fessi, animo fracti, spe potiundę classis frustrati quietem ab armis pro tempore postulabant: præ fragore tormentorum, & in tanto certaminis fervore non exauditi, ad extrema consilia animum appulerunt. Ignibus enim velis injectis, (Pontus tamen Heuterus Belgas de rei summa desperantes ignem pulveri tormentario injecisse refert) ita sperabant terrore vicini incendii confestim Nostros sua navigia subducturos. Ceterum præceps hoc consilium gravem calamitatem & hostibus & Nostris inflixit. Cum enim utrinque nimis tenaciter naves connexę essent, subitus ignis magno fragore furens pleraque navigia incendit. Ita coacti utrinque desistere à pugna, hostes & amici confestim ignem extinguendo luctabantur. Novus hic hostis difficiliorque domitu, cui spatium modumque statuere non est in manu. Quamquam autem unusquisque pro se maxima operiretur, fatigaretque industriam extinguendo incendio, frustra hoc in multis navigiis tentabatur. Itaque plurimi furorem ignis declinantes in mare se præcipites agebant, & pro-

& propinquis navibus adnatabant, & sive hostes sive amici essent, passim nullo recipiebantur intuitu. Tum Fortuna militaris rerum humanarum mirum spectaculum præbuit. Nostri qui pugnando attriti non fuerant, commiseratione victi fuerunt. Hostes recepti, qui frequentiores numero erant, subito tumultu quasdam ex nostris navibus obruerunt. Ita nihil inter hostes tutum, securitasque nullis vinculis constringitur. Igitur post sex horarum prælium ignis sex Gallicas naves combussit, una tormentis nostris ita dedolata, ut fundum peteret: sex quoque nostra navigia flammis correpta, quinque à Gallis non virtute, sed sorte & dolo superata. Numerus occisorum, vel qui aquis submersi, major à Gallica parte, quam nostra. Mille enim ex Gallis, trecenti ex Nostris violento fato occubuisse feruntur.

CAPUT XIII.

DE EXPEDITIONE GEVSIORVM,
VT VOCANT, AQUATILIVM, EIVSQVE
SVCCESSV. ANNO MDLXIX.

& seqq.

CUM crudelitas, avaritia Albani nobiles Belgii Provincias conculcaret, proscriptorum capita vel maria volverent, vel dissitæ reciperent regiones; aquatiliū Geusiorum nomen primū mari terrorem incussit, præfagio certo futuræ maritimæ potentiæ. Inter eos erant plures homines nobiles, extorres, quīs relicto patrimonio bonum, & æquum divitiis carius fuerat, obstinatoque in Albanum odio

H 2

maria

maria turbabant. Primus Anno LXX piraticæ classis præfectus fuit Adrianus Bergesius, Ohaini dominus, accessere Lancelottus Brederodius, Albertus Egmondanus, Embisius, Entesius, Ruiychaverius, alique navium Duces, qui totam oram Hollandiæ Frisiæque, usque ad Amasin fluvium pluribus direptis navigiis infestabant. Etiam ipsa maris sæva tempestas, quæ per triduum classem fatigaverat, juvante Fortuna illorum conatus promovit. Cum enim se in Flevi stationem recepissent, biduo post septentrionalis classis sexaginta constans navigiis, vela eodem intendit, ex improviso in ipso fere portu direpta prædæ cessit. Postquam spatium quatuor vel quinque dierum processit, iterum Oceano veluti suppetias & opes offerente, classis quadraginta navium opportuna rapinæ fuit. Quæis & nostris animus, hostibus terror augebatur. Nam non tantum mari, sed & vicinâ tellure populationes metuebantur, quibus arcendis nonnulli Hispani missi fuere milites. Successit post Bergesium præfecturæ classis Geleinius Fiennesius Lombresii dominus, & post eum Gulielmus Comes Marcanus, qui augendæ invidiæ in odiosæ exactionis memoriam decem nummos vexillis suis inscribi iusserat. Cæterum Bossuvius, qui nomine Regis Gubernator Hollandiæ erat, ubi intelligit omnes Fortunas suas in evertenda piratica classe sitas esse, hostem infestum civium opibus sustentari, & trahendo bellum ferociorem fore, prorsus omnibus intentus militem conscribere, hortando ad virtutem erigere, expeditam denique classem duodecim bellicarum navium, anno LXX mense Februario in mare ducere, cui præerat Franciscus Boshusius militiæ maritimæ impiger. Qui ubi mare ingressus com-

peris-

perisset Geusios in Amasin Fluvium se recepisse, prope insecutus magna confidentia & libidine classis excindendæ agitabatur. Igitur ex improvise adortus duo navigia superavit, reliqua in fugam egit. Insignis hic fuit Simonis Rollii Consulis Hornani, qui uni ex bellicis præerat, virtus & industria, quem ideo charum acceptumque, Propræfecturæ dignitate Albanus ornaverat. Ubi victoriam hanc primo Fama divulgavit, confusis viribus Geusiorum, ut putabat, Albanus ingenti lætitia diffundebatur. Bella enim primo impetu valent, & læta initia victoribus animum addunt, victis modum ponunt. Sed inerat Albano contemptor hostium animus, & confectum bellum censebat, antequam fere inchoatum esset: nescius desperatis audaciam pro munimento esse, & , uti cuncta mortalium incerta, ita maxime in lubrico consistere incertam belli aleam, exiguisque viribus sæpe magnos successus vel factum vel audaciam tribuere. Quippe ex ipsa clade Nostri animos traxere, & supra Fortunam positi pressis manibus virtutem & vires exeruere. Namque non minori classe non multo post committere se mari ausi plerunque ostia portuum claudebant, nonnunquam in interiora Flevi progressi, vel oram Frisiæ infestabant. Quibus augescebat animus, quod mare ubique illis secundum esset, pluribusque direptis navigiis uno tempore viginti quatuor piscatorias cymbas, bina vero Hispanica navigia pretiosis mercibus onusta in prædam vortissent. Ita ingens Geusici nominis terror, navigatione præpedita, mare ubique obnoxium fecerat. Neque multo post Lancellottus Brederodius cum aliis Præfectis ultra viginti navigia vel diripuit, vel

ingenti vi pecunię redimi permisit. Dum ita Regię opes mari passim flagellantur, Albani industriã majori nisu clas- sis expeditur, in quam rem in maritimis civitatibus opera- rii suas operas ingenti fervore properabant. Sed Frustra Albanus nitebatur, cum difficile esset mari assuetos hospi- tio suo pellere, quin & invisa Ducis dominatione plura na- vigia ad Nostros transfugerant. Sequentibus annis, cum spe prædę plurimĩ allicerentur, multum quoque potentia Geusiorum increvit. Anno Lxxi ineunte Martio tria ma- jora bellica navigia cum viginti tribus celocibus integram classem triginta & unius navium superarunt. Idem horror terra Monachodamo direpto, ceteris pagis clanculum tri- butum pendentibus. Ceterum sequens annus, quam in in- certo fluctuent Principum consilia, ostendit. Dum enim, unius Albani arbitrio bello togaque Resp. agigaretur, cru- delitas cum avaritia certaret, terrore & metu, quę infirma sunt auctoritatis vincula, subditi stringerentur, ab Elisabe- thâ reginâ idem impetravit, uti Geussi portibus Angliæ, quo hætenus perfugium habuerant, arcerentur. Ita suis con- siliis, incredibile memoratu, seipsum præcipitavit. Quip- pe libertatis primæ vindices, sub Præfecto Lumæo Comi- te Marciano, insulâ prohibiti, quibus accesserant Embda profugi, qui iisdem artibus Hispanicis per mare vagaban- tur, vel in Tessalia liburnicas Albani profligare, vel En- chusam invadere animoolvebant. Utrique desperatio & ultimum necessitatis telum ad extrema adigebat. Nihil non audent illi, quibus persuasum est aut vincere, aut mori. Igi- tur adverso vento in Mosam flumen acti, cum ante duas Hispanicas naves superassent, exitu nullo patente, inter- spem

spem metumque dubii hærebant. (Alii diripiendæ hostili classi, quæ ad Mosæ ostia stationem obtinebat, flumen ingressos, quæ cum se recepisset expeditionem irritam fuisse, atque ita adverso vento constrictos fuisse referunt.) Auctor primus Treslongus Brilam invadendi, quod oppidum vasto ostio Mosæ, qua in Oceanum se præcipitat, incumbit. Accensis omnibus tam calido consilio conjuratis placuit deditioem urbis nomine Principis Auriaci, regii per Provinciam præsidis, expostulare. Dum cunctatur magistratus, Lumæo probe gnaro magna facinora impetu valere, Treslongus ad australem portam tendit, Robollius Borealem effringit, exurit, atque urbem metu percussam ingreditur. Ducenti admodum & quinquaginta urbem ceperant, cæteri classem servabant. Miles in sacerdotes potissimum & sacra nihil pensi neque sancti habuit, unusquisque opes ex templis trahere, rapere, in naves auferre. Lumæus enim oppidum deferere constituerat, nisi Treslongus, Entesius, alique auctores fuissent, ne tam bonam occasionem ignavia & socordia corrumperent. Ubi fama increbuit, Albanus contemnere inanes assultus, temeritatem hilari vultu externâ specie excipere, interius revera sollicitus pectore dolorem premebat. Namq; prudentibus visum ipsam Hollandiæ clavem direptam, & per hanc jugulum Hispaniæ peti. Revera hic primum libertatis vexillum erectum, nutante mox totâ fere Hollandia. Missus ab Albano Bossuvius cum decem cohortibus Hispanorum, navibusque in Bernissa relictis, in insulam Vornam, ubi Brila sita, nullo resistente exscenderat. Cum ad urbem ventum acriter manus confertæ, suburbio à Geusiis jam ante exusto. Ceterum cum

cum Rochus urbis architectus se in profluentem misisset, & perrupisset emissarium, subito infuso æquore campi stagnabant, Hispano se in aggerem recipiente. Interea Treslongus, & Robollius clanculum urbe egressi naves Bernissæ relictas ignibus subjiunt, vel perforatas mergunt, vel in flumen propellunt. Tum facies totius negotii apud Hispanos incerta, atque fœda extitit. Unusquisque trepidare, neque signa neque ordines servare, dum hinc hostis illinc aqua in immensum crescens extrema minaretur. Itaque dispersi à se invicem alii in flumen prosilire, fluctuantes reliquas naves adnatate, nihil consilio omnia metu agere, plures gurgis lutumve hausere.

CAPUT XIV.

*PRÆLIUM CVM CLASSE DVCIS
MEDINACELI, ET CVM CLASSE
LVSTITANICA. ANNO CLO ID LXXII.*

DUM invisa Belgis Albani dominatio extremam ruinam minaretur, Rex Philippus, sive quod ejus acta non probaret, sive quod Principum notæ artes sint calamitatum causas ministris tribuere, successorem statuit Ioannem Cerdam Ducem Medinaceli, qui clementiæ fama clarus animos Belgarum ad se traheret. Is classe quinquaginta quatuor navium Laredo vela ventis dedit, & in Belgium adventabat. Ex navibus viginti sex majores erant, reliquæ minores, quas Assabres Cantabri appellant. Præter pretiosas merces Julianum Romerum Præfectum militiæ

litia veterem cum bis mille (alii clo lo) Hispanorum copiis classis vectabat. Interea Blancenbergam, portum Flandriae maritimum, Cerda appulerat, ignarus Vlissinganae defectionis, & Geusiorum vires mari in immensum crevisse. Quippe hominum genus mari innutritum proprio veluti elemento, multis direptis hostium navigiis, victorias victoriis cumulaverat. Vlissingani praecipue Albani odio & insita ferocia virtutem acriter intendere, nullis periculis moveri, ubique hostem excipere, adversis navigiis concurrere, non desistere nisi victores, denique fluctuante gressu mare veluti calcare, & sibi obnoxium habere. Hi cum caeteris Geusiis conjuncti semper victores nunquam victi, quia victis extrema fati necessitas reliqua erat. Quippe ab utraque parte captivorum pedes vel mari abluebantur, vel infamibus destinabantur suppliciis. Sebastianus quidem Langius necessitati non virtuti succubuerat, qui unius navigii Praefectus commeatum regium, ne miles & annona militaris Medioburgum veheretur, impedire tentaverat. Illum quatuor regia naves circumvenire, harpagonibus injectis manus conferere, foros transilire, pro se quisque ferro ferire, Nostri propulsare, resistere, hostem loco movere: denique ubi Nostri se multitudine hostium oppressos vident, pulveri pyrio inaudita virtute ignem injicere, atque ita suo exitio hostem quoque involvere. Hoc primum illud est horrendum spectaculum, quo usi Belgae in hostem, cum nulla spes reliqua esset, sed in morte ultimum esset effugium, atque ita infamem mortem antevortebant, & extrema quoque hostibus intentabant. Ubi igitur cuncta prospere mari Geusiis succederent, clas-

sem quoq; Hispanicam Ducis Medinæceli duodecim minoribus bellicis navibus invadere constituerunt; & primo quidem ostium Slusani portus insidere, cymbis advecti signa maritima, quæ brevia & syrtes monstrantur, succidere, quomare importuosum & vadis cæcum securam navigationem in Slusanum portum præpediret. Ita majora navigia prope Blancenbergam unco anchoræ fixæ mari sustinebantur: minora, quibus eâ aquarum profunditate opus non erat, cum Duce ejusque familia Slusam appulerunt, nisi quod quatuor vadis hæsitaverint, quæ una Balduini Ewaldi Vlissingensis juncta. Tum passim publi Vlissinganæ clamor mixtus hortatione, strepitus & fragores tormentorum tonare, & sua fulmina cum globis ingentis ponderis excutere, undique terrorem circumferre: deniq; eò res processit, ut plures exHispanis cymbis vicinam terram peterent. Tum Nostri modicis navibus, majores enim vada attingere nequibant, hostes undiq; fatigare, premere, certos globorum ictus torquere, præpropera victoriæ cupidine abripi, summo ardore eniti, festinare, denique hostem in deditionem accipere. Primæ deditionis auctor Balduinus Ewaldus, qui nautica pube incitata Hispanos in suo navigio in ordinem cogerat, quæ superatis æstu navem allevante plenis velis Vlissingam tendit. Interea nautica juvenus, uti solet, prædæ avida inconsulte reliquas devictas naveis deprædatur, atque ira & vindictæ cupidine pessimis consultoribus abrepta ignem immittit, cum iis opulentæ lanæ merces stiparentur. Medinaceli convocatis Slusæ nauarchis, quibus & sicca arenarum, & profunditas maris nota erant, artium harum insolitus eos consultit, qua ratione majora illa navigia, quæ prope

prope Blancenbergam in anchoris stabant, in portum deferri possint. Illis affirmantibus nimis profunde classem aquas premere, non esse sibi copiam consilii, quo tuta inportum devehatur; Dux stomachatus, atque judicans partium studio inclinatos ita sermones ferere, severe imperat, ut quocunque modo id tentarent, qui hoc edicto territi Urbe aufugerunt. Interea pecunia & aromatibus dives classis Lusitanica procul vela ostentabat, & secura periculi, pelago ante jactata, portui vicina omnia prospera animo conceperat. Et Cantabricæ naves, quæ prope Blancenbergam hæcenus moratæ, rerum commotarum in Walachria certiores eos non fecerant, turgido & favente vento anchoris solutis Vlissingam prætervectæ, quæ tormentis frustra intonabat, Rammekenum munimentum attigerant, & hinc militem cum mercibus Medioburgi exposuerant. Lusitani cum præter Vlissingam vectarentur, specie amicitia à Vlissinganis tormento signo dato, uti ante urbem anchoras mitterent, amicos esse rati facile obtemperarunt. Ita classis magna & opulenta prædæ fuit, neque insultu sed dolo victa. Tres ex iis per Hontam, vastum Scaldis brachium, Antverpiam contendere, una ex iis à minori bellica nave intercepta. Ita rebus accisis subita felicitate Fortuna in melius vorsa, cum sine nervo opum nulla militia diu consistere possit. Auri argentique signati sexcenta millia, aromatum, unionum, pretiosorum lapidum dimidio plus repertum. Cæterum merces illæ difficulter emptorem invenire, sive quod eadem publicè rebus dubiis distrahi nequirent, sive quod mercatores cum animo suo reputarent, & periculum & damnum ingens in emptione consistere,

præsertim quia rigidus exactor Albanus edicto prohibuerat. Ingenti tamen hæc prædâ in immensum Geusiis animus crevit, &, uti fieri solet, rebus secundis promptissimi quique, spe prædæ ducti ex vicina Britannia & Gallia eodem confluebant, plureisque cupido opum quam bellum trahebat.

CAPUT XV.

*PRÆLIVM INTER SANCIVM**AVILAM ET ZELANDOS,*

ANNO clō lō LXXIII.

VRBE Mediodburgum non tantum Walachrię sed Zelandiæ principem obtinebat adhuc pro Rege tribunus Mondragonius, Zelandi obsidione premebant. Qui Fortunæ fiducia freti perruptis catenis ex ipsa Antverpiensi statione plerasque naves avexerant. Virtus virtute augebatur, & nobilis civitas commeatu defecta extrema expectabat. Sancio itaq; Avilę Præfecto arcis Antverpianę Albanus imperat, ut expedita classe obsidionem solvere, vel annonam procurare, summa ope niteretur. Propere quinquaginta majores holcades milite armatæ, minores commeatu stipatæ vela ventis dederant. Occurrerunt sibi invicem naves juxta Terneusam, & primo certamine Prætoria nostra, cui præerat vir militię maritimę vetus & impiger. Evaldus Petri Worstius, à pluribus hostium valde quassata. Nondum justa pugna, verum ubi ad Borsaliam insulam ventum, utrinque inter proptatorias naves acre certamen
con-

confertum est. Sed vento praelium dirimente nostra Borsaliam, hostium classis Terneusam se receperat. Sequenti luce flante Favonio Nostri virtutem cum velis intenderant, hostemque adoriri decreverant, sed illi omne praesidium in fuga posuerant, & perculsi Antverpiam contenderant, fugiendo tamen in primis prope Barlandiam graviter excepti. Interea Antverpiam vorsum inter Lilloam & Ordammum pluribus navibus cum rudibus disiecti monasterii in Scaldi submersis, majoribus hostium navigiis commodam navigationem praepedire Nostri tentabant. Neque id frustra fuit, cum majores naves in vado haesitantes per aliquod tempus miserum in modum colliderentur, neque flectere proras immobiles possent, leviores quae in celeritate praesidium posuerant, vel evaderent, vel in manus nostras devenirent. Paucis post diebus, ubi impetuosus amnis rudera illa in altum ejecerat, Avila instructa classe Fortunam iterum tentans inter Borsaliam terreumque Walachiae munimentum ex adverso nostrae classi stetit. Tum primum immenso clamore aer perstreperet, tormenta tonare, fumo & igne mare tegi, cadavera volvi, cadentibus alii succedere. Maximam primo hostilium navium, cui nomen Elephantis erat, adorti cum alia praesidiaria navi intrepidi duces Groenevenius & Everkitius. Ceterum hostium animus virtute accensus sub imperio strenui praefecti & primarii inter Walones nobilitatis Domini de Blicquy. Nostri tamen fortiter pugnando foras transilire, implicare se hosti, punctim cadere, avidius alteri alteros sauciare, quam semet defendere. Plures ex nostris cum ducibus trucidati. Tandem devicta navi spectaculum horribile se exeruit.

Cuncti occisi, vel submersi, nihil denique crudelitatis reliquum fuit. Alterum hostium navigium, cui terrę promissę nomen erat, cum juxta munimentum terreum Regio milite infessum se recepisset, à Iusto tamen Morio acri insultu superatum est, atque adeo ipse miles, certior factus Vlissinganum terrâ adventare, suum munimentum reliquit. Calamitas calamitatem urgebat, & quocunque hostis intenderat, res advorsę erant. Quippe ex hostilibus navibus quatuor vadis impactę non pugnando devictę sunt. Namque cum militaris & nautica juvenus se præcipites in cymbas dedissent, antequam litus tangerent velivolis nostris navibus oppressi, plerique mari vitam dederunt. Intotum sex majora navigia tormentis & commeatu probe instructa Vlissingam devecta, reliqua juxta Rammekenum munimentum salutis suę consuluerunt, nisi quod unum vadis allisum ipsi Hispani igne corruerint, & quas victi ab hostibus pœnas metuebant, ipsi antevorterint. Octingentos admodum ex hostibus vel aqua, vel ferro periisse constans fama est. Sancius tamen per ferrum & igneis commeatu urbem providit, sed magna suorum calamitate. Ubi prima secundi venti & ætus copia, Antverpiam iterum tendit, quo rebus afflictis consuleret. Verum in faucibus freti ita exceptus, ut duę naves superatę, una ægre liberata, ceterę fugiendo Antverpiam reversę fuerint.

CAPUT

CAPUT XVI.

*VELITATIONES NAVALES INTER
BOSSUVIUM ET HOLLANDOS IN
LACU HARLEMENSI,
ANNO CLIO LXXIII.*

CUM Harlemum à Frederico Toletano arctâ obsidio-
ne premeretur, lacu Harlemensi instructis navibus
infractam civium virtutem contundere, annonam interci-
pere, & cum ferro res non procederet, fame, quod ultimum
rerum humanarum supplicium est, vincere tentabat Bossu-
vius. Caterum res ardua inprimis propter obices & claustra
æquor illud tentare, atque aded paucis licet navigiis obfessi
aditus præcludebant, qui omnes labores, res dubias asperas-
que, omnia pericula metu imminentis periculi facile tolera-
vère. Perfodere primum aggerem, qua Yæ torrens lacui
vicinus cataracta coërcetur, adversè parti consilium fuit.
Pulsis fugatisque, cum dies aliquot intercessissent, multo
atrocius redintegratum fuit prælium. Harlemenses tamen,
unâ admodum triremi, pontonibusque aliquot ingenti in-
sultu hostibus ita incubuère, uti turpiter fugam corripere-
nt quorum unum navigium flammis involutum fœdum spe-
ctaculum præbuit. Miles ferme omnis ignibus fumique
tenebris cinctus vel aquis, quo se præcipitem dederat, vel
ferro misere interiit, reliquis gulâ fractâ spiritus interceptus
fuit. Cum non prospere hoc negotium cessisset, animus
Bossuvii consilio fluctuans, neque vigiliis, neque quietibus
sedari

sedari potuit, donec novi facinoris maturandi occasionem arriperet. Opportuna illi res cecidit, ut perrupto obice, qua sacra via Amstelodamo imminet, in lacum nonnullas naveis dimitteret. Pubes nautica Harlemensis incitata desiderio pugnandi, nimioque æstu flagrans, incompósito ordine hostilem classem adoritur. Cæterum inconsultus ardor pene extremam Nostris calamitatem intulit. Una triremium, longa octuaginta & quatuor pedes, longius à cæteris semota, quatuor aut quinque navibus cincta, expedire se nequibat, atque cum nihil opis aut spei reliquum haberet, victoris tandem arbitrio cessit. Gerardus Iunius Præfectus graviter sauciatus scapha ægre se recepit. Eminent in Iacobo Antonio, qui cæteras naves ducabat, excelsa fortitudo, qui omnia adversa parvi ducebat, neque fractus Fortuna, sed eadem superior, omnia sibi in sese posita iudicabat. Incerti sunt præliorum exitus, atque aliquoties jam victoria exultantes oppressi inconstantis sortis ludibrio se exposuere. Antonius itaque cum cæteris navium Præfectis plus quam virili insultu hostem iterum fatigat, triremem devictam post duarum horarum atrox prælium superat. Victa & altera eadem virtute: cæsi ferme omnes tanquam piaculars victimæ sanguine vicinas aquas imbueunt. Sparsa passim fluitabant ingloria cadavera, enses cruore imbuti, neque satiiati, adeo impotens sui vindicta mentem æstuantem conciverat. Ita penuriâ civium sublevatâ Nostri victores incredibili virtute suas veluti aquas tuebantur. Inauditum facinus prædonis Hoenii omnem admirationem excedit, qui duabus cymbis, quæ remigio agitantur, octodecim viris armatis Yam flumen infederat.

Fortè

Forte lancearii equites ad centum & quinquaginta Amstelodamo Harlemum versus iter instituerant. Pluvio cœlo (hyemis enim rigor se nonnihil remiserat) viarum glaciales crustæ, equorum ungulis perruptæ, inferius lubricas implicitasque secum aquas trahebant. Cum itaque ad aggerem ventum esset, quæ ad latera nullum effugium patebat, Hoenius, divisus tam exiguis copiis, ante principia certis telorum ictibus vibratisque hastis, quæ illorum lanceis longiores erant, ita hostem fatigavit, uti retro cedere cogeretur; ubi iterum tam furioso impetu eques impellebatur, uti neque à fronte neque à tergo ullum effugiendi; vel cominus arma conferendi, copia esset. Namque equi huc atque illic cursitando cœno ventre tenus impliciti se expedire nequibant, certoque cum infessoribus suis exitio confodiebantur. Atque adeo tam prosperè hæ insidiæ cessere, ut aspera sædaque strage ad unum omnes occumberent. Porro, ut ad institutum revortar, Bossuvius nuper lacu fugatus, tantæ contumeliæ impatiens, quo honori suo consulere, Fortunamq; restitueret, iterum navale prælium meditabatur, atque in eam rem strenuissimos quosque milites, quorum promptam cognoverat audaciam, naveis instructas, quæ ad septuaginta excreverant, & cuncta quæ prælio usui forent, quam celerrimè comparavit. Diversa nostræ classis species, quæ navibus exiguis, non probe instructis, milite, annona longe inferior, omnibus ferme ad expeditionem necessariis laborabat. Nihilominus, quod urbs nobilis non tantum milite feroci, qui jugulis illorum imminabat, verum etiam lenta fame pressa, nullam moram admitteret, Batenburgius militia, Marinus Brantius classis Præfectus ex-

trema quæque experiri, quam ancipitem occasionem corrumpere, potius judicabant. Temerarius hic impetus, neque enim periculum sine extremo periculo vinci poterat. Gratum id Bosſuvio, qui non modicis suis viribus fretus, divisis copiis à fronte & latere Nostros invadere tentabat. Atque adeo inter hostes victoriæ veluti certos clamor virum, tubarum clangor, tympanorum sonitus terribilis ita increpuit, ut utrumque Præfectum suarum virium gnaros ingens concusserit consternatio. Ubi animus timore obstupuit, consilia omnia in ancipiti fluctuant. Imperatum quidem sociis navibus, uti in adventantem hostem recta vela intenderent. Cæterum dum ipsi Imperatores cursum quam celerrime ab hoste desisterent, nonnullæ naves simili forte clavum vortunt, superstites, cum solæ hosti resistere nequirent, in fœdam fugam actæ, viginti & duæ à Boshusio captæ: reliquis Caga pagus, qui lacui incumbit, receptui fuit. Plerique ex militari & nautica pube, qui se præcipientes profundo dederant, tamdiu lassas manus in aquis jactarunt, donec ripam attingerent. Ex quo firmatæ res hostium deditionem urbis Harlemonsis maturavere, quamquam in longum tracta obsidio, neque virtute vel armis, sed fame ignobili genere vincendi fortissimi cives ad deditionem compulsi. In cives militesque quæsitissimis suppliciis sævitum, lassæ conficiendis cadaveribus carnificum manus, & donec Hispanus armis, cadaveribus, luctuque omnia complevisset, vix tam ferali spectaculo se satiavit. Quâ crudelitate id peractum est, ut cæteræ civitates extrema potius pati, quam Hispanis se permittere, decreverint.

CAPUT

CAPUT XVII.

PRÆLIVM INTER COMITEM BOSSUVIUM ET WEST-FRISIOS IN SINU

AUSTRALI, ANNO MDLXXIII.

VIDERAT Albanus non terrâ sed mari West-Frisios superandos esse, neque proclivem esse victoriam adversus eos, qui ex vicinis aquis ferociam & confidentiam contraxerant. Ingentem itaque classem propere construere jubet, uti sinus Australis imperio potiretur. Instructa hæc triginta navigiis, commeatu, milite, armis stipata. Præ cæteris eminebat Prætoria navis, cui invisum Inquisitionis nomen datum fuerat, triginta & duorum tormentorum capax, duplici tabulato impervia. Præter centum & quinquaginta socios navales, duo signa militum navem impleverant, inter quos ducenti Hispani, sub Præfectis Alfonso de Corquera, & Ferdinando Lopezio. Præfectus classi erat Maximilianus Henninius Bossuvii Comes, militiæ impiger, & Albano gratus. Primo die, quo classem solverat, vada Yæ fluminis transitum denegabant. Quippe vetustis navigiis, ingentibus lapidibus & ruderibus refertis, claudere flumentaverant West-Frisii. Proviso jam ante malo, & ferociente vento, periculo classem exponere inconsultum visum fuit Comiti. Verum postridie aquarum, quæ admodum excreverat, superficies, vento minus aspero, ostia classi aperuit. Extra Nostrorum quoque suspicionem impetuoso flumine disjecta aliò navigia fuerant. Dum classis hostilis

K 2

adven-

adventat, jussu Archithalassi Cornelii Theodori accersiti in Prætoriam reliquarum navium duces, uti decerneretur, an tutum esset ad Yam flumen hostem opperiri, an potius se profundo committerent. Concilio militari visum æquora petere, atque ibi hostem fatigare. Maxima quidem eos cum hoste manus conferendi cupido invaserat, sed cedendo vincere, & laxo æquore prælium tentare consultius visum fuit. Secessum solutis anchoris à nostra classe ad eum locum, qui Pampus appellatur. Erecti hac secessione hostium animi, & Schellincvoudanum munimentum terra marique valido impetu impugnant. Præfectus Broechius cum suis singulari virtute munimentum tutabatur, verum impar tantis copiis (neque enim ullæ suppetiæ in propinquo, & classis nostra cursum inde divorterat) Edamum & Monachodamum se recepit. Cæteræ quoque hinc arces vicinæ eodem die fidei Comitum se dederunt. Ingens hic rusticis calamitas incubuit, quibus, inconsulto mandato Broechius, ne quidem sua in urbem deferre vetitum fuerat, forsitan quod illorum robur usui sibi fore crederet, quandoquidem pro privatis facultatibus multo acrius quam pro publico bono pugnatur, atque adeo damno proprio mortalium animi magis accenduntur. Verum res longe aliter cecidit, cum enim terra marique ab hoste cinctus Broechius necessitati parere cogeretur, ubique ruri res trepidæ, metus ingens, malum improvisum, damnum grave rusticos affligebat. Relictis navibus spoliis incumberebat nautica pubes, & passim per agros diffundebatur. Pulcherrimi tum facinoris nata Nostris erat occasio, classis nimirum diripiendæ, si virtus & audacia in promptu fuisset. Edamenses opportuno

portuno tempore ejus rei classarios certiores fecerant, sed metus & diffidentia, infirma virtutis vincula, pectora pulsabant. Qui autem metuit, victo similis, qui victoriam magno animo sibi sponder, ut plurimum victor evadit. Verum integra adhuc nostrâ classe Hornani vicinique trepidi improviso metu, attamen antiquæ virtutis memores, iterum novam spem concipere, incredibili celeritate cum Enchusanis nova navigia ædificare, classi jungere, omnia expedire. Classis nostra viginti quatuor navigia numerabat, sed militaris pubes deerat. Decretum, uti dimidia pars Hornanorum civium, sive jaculatorum, se aquis mandaret. Jamque adeo sortitio facta, cum defensandæ urbi eos reservare consultius visum fuit. Præsidarius itaque miles ex dimidia parte duce Ruichavero huic expeditioni destinatus. Interea rebus secundis inolescere hostis, probra jacere, conviriâ torquere, Nostros tanquam victis insultare, quod frequentissimum initium calamitatis esse solet. Cunctando quoque Bossuvius Fortunam non prensabat, sed inspiciendis munimentis tempus trahebat, in quam rem Franciscum Verdugo ad Ducem Albæ miserat. Horrida dein tempestas per aliquot dies mare exasperaverat, & Hispani aquarum insolentes navigationes instituere nequibant. Bossuvius ipse postmodum Amstelodamum profectus moras necendo occasionem negligebat. Namque bella consternatis hostibus fama & impetu valent, intermissa integram spem spiritumque eisdem restitunt. Tercio demum Octobris Amstelodamo profectus anchoras solverat, sed quinto demum die ferociente vento superavit vada loci, qui Pampus appellatur. Nostri intrepidi ad Marcam insulam

hostem opperiebantur. Tum primum ab hora tertia usque ad extremum diei tormentorum fragores audiri, strepitu & clamore nautico omnia misceri, Nostri frustra eniti, ut se navibus hostilibus innecterent, quia celeritate mobiles facile elabebantur. Neque Bossuvio consilium erat manibus confertis dimicare, sed naves tormentis fatigare, velocitate illarum impetum eludere, & sine periculo vincere. Quæ cum Nostris deessent, virtutem in manibus ponere, modo sequi, modo cedere, omnem occasionem cominus præliandi captare. Hisce velitationibus præcedens sequensque dies tractus, donec, duobus hostiû navigiis interceptis, cominus præliandi incubuit necessitas. Uni præerat Sculenburgius, affinis Boshufii. Quem aggressus Iacobus Tillus centurio navalis tertio insultu superavit, Præfectum cum sex vel octo captivis Hornam misit, cæteri circa quinquaginta vel ferro confossi, vel aquis perierunt: tantum duo ex Nostris occubuerunt, cæterum Præfectus cum viginti aliis saucius. Itaque hosti placuit iterum Fortunam maris experiri, atque adeo successit belli alea, extortâ iterum navi, verum jam antea tormentis bellicis ademptis. Præfectus Tamesius Frederici Monachodamensis aliud aggressus fuerat navigium, sed frustra. Prætoria enim hostium navis cum duobus vel tribus aliis expeditis navigiis confestim illum insultare, atque tormentis simul omnibus explosis ita excipere, ut quadraginta viri una vice occumberent. Non minor tamen hostium strages, constrata passim navigia cadaveribus, & infecta sanguine. Neque Præfectus homo imperterritus navem hostilem, nisi cum morte reliquisset, verum hoc furore bellico, solutis ab hoste harpagonibus, ab eadem disjunctus

junctus fuit. Hoc die plurimi utrinque violento fato occubere, ipse Archithalassus Cornelius Theodori dextra faucibus. Certam sibi spoponderat victoriam hostis, ignarus rerum humanarum, quæ præter opinionem sæpe mobiles in adversa mutantur. Jussum fuerat, uti eodem die, quo hoc prælium confertum fuit, illi, qui Alcmariam obsidione urgebant, & vicina Waterlandiæ infederant, pagos ignibus subjicerent, (quod & patrarunt) ut vicino incendio classariis, inter quos & rustici, extrema metus & desperationis incuterent. Verum nullum emolumentum hosti cessit, nisi quod ventum antevorterit. Nostra quippe navigia ad inferiora versus Hornam delata prope Neccam federant, hostis nostram stationem occupaverat. Bossuvius jam antisus expeditæ classi, & militaribus copiis, Nostris animum conferendi manus defuturum crediderat. Verum cum eâ de re Ioannes Simonis Rollius cum Comite sermones fereret; sibi notam esse illorum virtutem, robore infractos esse, plerosque mari innutritos, prudentia opus esse, hostem contemnere proclive, vincere magni operis fore, Comes risu illa excepit, & in opprobrium hostium vortit. Verum post prælium invicta illorum virtus patuit, neque eos vitæ suæ pepercisse, sed mortis contemptores etiam hostibus graves fuisse. Quinque sequentibus diebus nihil ab hoste etiam propitio vento tentatum. A nostra parte, ubi nata occasio, non velitationibus, sed confestim legitimo prælio hostem adoriri ex usu esse videbatur. Deerat enim pulveris pyrii copia, neque comparandi ulla erat facultas. Monitus quoque à Proceribus West-Frisiæ Præfectus classis fuerat, ne pulverem frustra consumeret, verum valido impe-

impetu quam primum hostem adoriretur, non esse eandem hostium promptitudinem, vehementes motus post ultimum prælium subsedisse, timoremque incussum, omnia virtuti nostræ prona, non tam pro gloria, quam pro omnium salute pugnari. verum, uti Procerum voluntates subito inclinant, atque ipsæ sæpe sibi adversæ sunt, undecimo Octobris, à Præfecto Sonoio Archichalassus literas accepit, quibus cunctandum ad tempus, neque manus cum hoste conferendas scribebatur. Verum ille pugnandi desiderio flagrabat, & literas, quarum tenor clam habebatur, in ignem misit, ipse motu corporis atque animi igneus. Euronoto spirante, qui secundus erat, sublevatis anchoris recta in hostem fertur. Nulla illi utilis videbatur cunctatio, neque ex craftino pendere, consultum erat, cum confestim tutius hosti manus intentarentur. Interea hostis, cui inopinatus hic obtigerat casus, ad prælium quoque se parat. Jamq; adeo medium diei processerat, & (sicut postmodum comperit) prandio jam constrictæ mensæ erant, cum Bossuvius alio ferali & sanguinolento exceptus est convivio. Naucleus quidem Prætoriæ navis consternatus hosti propinquus clavum deflexerat, verum per vim illo excusso Iohannes Florentius, dignum virtute Batavicâ se virum præstitit, & intrepido pectore recta in hostem tendit. Sicuti autem non raro timidissimus quisq; primus occumbit, ita prior vix clavum vorterat, cum fatali telo confoditur, is autem, qui vices ejus obierat, nullo vulnere saucius evasit. Utrunque hinc tormenta tonare, igne & fumo cælum & mare obduci, classiarum horribile spectaculum edere, Nostri per medios ignes in hostem ruere, vitam ac mortem juxta æstimare. Bossuvius

vius ex Prætoriâ navi anchoram jacere satagebat, ne versus inferiora fluitaret, sed veloci impetu Nostrorum, qui harpagonibus se innectebant, intercepta anchora in medio hælit, neque dimitti in profundum maris potuit. Quod & illi præsentis exitio fuit. Nostri autem, etsi tormentis bellicis & militari pube longe inferiores essent, forti tamen paratoque animo patriæ salutem atque libertatem in dextris suis portare, summo nisu aditum in hostilem navem urgere, neque minus illi qui adverso partis occurfare, audaciam pro muro habere, plureis vulneribus acceptis concidere, neque tamen quietem pati. Verum Nostris melior erat pugnandi conditio, quod ex altiori navigio certius ignitos globos & missilia jacularentur, quod proclivior in hostilem navem descensus, quod cuncta, quæ hostes gererent, omnium oculis paterent. Quis accesserat memorabili arte lorica ex vetustis retibus in unum compacta, quæ & minoribus tormentis impervia esset. Dum hoc modo tela eluderentur, securi à metu ingentem hosti terrorem intentabant. Namq; ex corbis fastigio promptissimi quique cum ignivomis machinis calcem vivam in hostes jacere, quâ alpersis oculis officia militaria turbabantur. Adorti mox eandem navem à latere Petrus Backius, à prora Iacobus Tryntgeſius, à puppi Boërius, centuriones infractæ virtutis, quorum ultimus machinis igneis admodum impetitus, navem avortere ab hoste coactus fuit, ne extrema incendii expectaret. Interea treis Nostratium cum Prætoriâ hostium navi luctantes, atque eidem innexæ versus inferiora flutarunt, atque ex adverso Neccæ juxta Wyneſſam vadis hæſere. Emicuit inter præliandum Ioannis Harin-

gii virtus an inconsulta temeritas, qui in hostilem navem transiens, per funes nauticos mira celeritate transcurrens aplustre ademit, & jam erepto victoriæ signo ad suos reverti cupiens, pectore confossus fortissime occubuit. Neque minus fortiter à cæteris Præfectis contra hostem dimicatum est. Regia navis, cui præerat Gulielmus Vestius, summo impetu capta, quæ antea tormentorum violentis iectibus quassata, captivis ægrè, juxta cum quatuor æreis, & quinque fusilibus ferreis machinis, subductis, aquarum plena fundum petiit. Quinque aliæ minoris ponderis vadis collisæ, non difficulter expugnatae, cum illud anxie metuerent, ne vicino Martis fulmine vel conflagrarent, vel pessum irent. Reliquæ naves infami socordia trans locum, qui Pampus dicitur, aufugere, nonnullæ, ne cæcis vadis hæsitarent, etiam machinas bellicas mari dederunt. Tanta subito torpedo animos illorum oppressit, ut obliti honoris sui, quod primum esse viris bellicosis solet, obliti sacramenti militaris, Foederatorum prædæ Bosluvium reliquerint. Decretum quidem concilio fuerat, prima luce iterum se Nostris sistere, fortunam maris tentare, aut mortem oppetere, aut Prætoriam navem exitio eripere. Sed creperâ luce Simon Rollius Propræfectus cogente Hispano milite Amstelodamum recta tendit, cæteris vexillum navale sequendi necessitas incubuit. Sin primâ fugâ, hoste formidine attonito, uti nonnullis visum, insculti Nostri fuissent, totâ admodum classis fusa, profigata, sicco arenarum allisa, exitioque destinata fuisset. Hortante acriter consule Theodoro Edamensi, cui bonum publicum inprimis cordi erat, plurimum tamen suffragia contra prævaluerunt, tum quod nox tenebri-
cosa

cosa navigantibus infesta esset, tum quod vulneratorum multitudo naveis premeret. Interea Bossuvius militię impiger à tribus Fœderatorum navigiis cinctus, neq; probi militis, neque Imperatoris officium prætermittere, lorica ferrea munitus, clypeo gladioque horridus invicto animo non tantum contra hostes, verum etiam contra Fortunam subfilire, omni nisu conari necessitates effugere, quas tamen vincere nequivit. Flagrabant & micabant oculi, sanguine ex imis præcordiis exæstuante vultus ardebat, corpus nimio spiritu tumidum, & concitum, crebro & vehementi motu agitabatur. Ipse omneis voce, gestu instigare, non tantum aliis, verum etiam sibi virtutem imperare. Nostri continuis ictibus tormentorum undique hostem fatigare, ex corbita calcem vivam, lapides jacere, ita ut ad extremum nulli tabulatis insistere auderent: hostes tamen ex inferiori navis parte plurimos nostrum confodere, quęis virtus in temeritatem fere versa fuerat. Nostrum alii in foros transfilire, & vel fato occumbere, vel vulnerari, labi, iterum eniti, omnia impetu & violentia agere, nihil præter victoriam pensi habere. Cadentibus aliis vel vulneratis, novo milite continuo suppetias ferebant Hornani, sauciosq; avehebant. Tantusque pro patria tuenda ardor fuit, ut multi cives, immixtique agricolę se ferventissimo prælio sponte immiscerent, sanguinemque suum libertati consecrarent. Tandem vero Bossuvius non animo, sed necessitate victus, postquam per viginti & octo horas etiã nocturno tempore acerrime pugnatum esset, ex trecentis omnes præter quatuor decim vel quindecim milites cruenta morte cecidissent, vel vulnerati essent, duodecimo Octobris die conditionibus quibusdam

busdam Praefecto classis Cornelio Theodori, centurioni Rui-
chavero, & Ioachimo Nievindio quæsitore navali se deditit.
Omnibus vitam incolumem, sibi honestum & Comite di-
gnum carcerē stipulatus est. Conventum quoque est, uti mi-
lites, vel cum aliis captivis commutarentur, vel menstruo
stipendio, more antiquo militari, redimerentur. Hispani
tamen, inter quos Corcuera & Lopeſius Praefecti navales,
quod se plebi invilos ſcirent, conditiones recuſabant, an-
tequam à Sonoyo, Proceribusque Weſt-Friſiæ firmaren-
tur. Præter plures ex nobilitate trecentos captivos fuiſſe
à plerisque memorię relatum fuit, verum literis Weſt-Fri-
ſiæ Procerum ad Principem Auriacum ducenti tantum me-
morantur. Boſſuvius ubi Hornam adveſtus, fremere ple-
bes, probra jacere, eadē Roterodamenſem illi objectare,
cum idem advorſum ſe animus fuerit, nunc in promptu ſce-
lerum præmia eſſe. A magiſtratu tamen officioſe exceptus
eſt; ſicuti Procerum moderatiores animi, quam inconſul-
tæ plebis, atque utramque Fortunam penſare ſoliti. Aplu-
ſtri Archithalaſſi in templo Hornano ſuſpenſo, omnium
ordinum homines, læticia immodici, concurſare, gratulari
ſibi Patriæque, apertis templis Deo immortalī grates age-
re, lachrymis gaudio exilientibus ad cælum manus ten-
dere, precari uti hæc fœlicitas perpetua foret. Contra hoſtes
luctu immenſo perfundi, fugitivi culpam Boſſuvio impu-
tare, uti ſuam apud Ducem Albæ diluerent. Verum ille
imperterritus corpore & animo fortiffime dimicaverat, per
triennium tamen carceri mancipatus pace demum Ganda-
venſi ad ſuos reverſus eſt.

CAPUT

CAPUT XVIII.

*PRÆLIVM NAVALE IVXTA RO-
MERSWALIAM INTER HISPANOS ET
FÖDERATOS, ANNO CLD ID LXXIV.*

LUDOVICUS Requesenius in Belgium à Rege missus erat, uti rigorem atque invisam crudelitatem Albani clementiæ & modestiæ fama temperaret. Erat illi ingenium mite, accessus facilis, ad simulanda negotia solertia mentis profunda: quîs non tam virtutibus quam artibus trahere Belgarum populum nitebatur. Prima illi navalis fuit expeditio liberandę principi urbium Walachrię Mediodurgo, quam prope biennium ad extrema necessitatũ redactus defendebat pro Rege Mondragonius. Ipse Antverpiam profectus, quo præsentia sua expediundę classi vim & robur adderet, animosque civium accenderet. Neque minor Principi Auriaco cura, qui Delphis Vlissingam profectus, Hollandiæ Zelandiæque bellica navigia coëgerat, quo incitante immane quantum animi omnium inprimis pubis nauticę exarserant. Requesenius ubi vidit etiam immensam classẽ modicis viribus in angustiis amnium sisti posse, duabus classibus duplici quoq; cursu tentare Fortunam statuit, qua Scaldis in duos se scindit alveos, uti Föderatorum vires divideret, & hac vel illac, extrema necessitate Arnhemudâ tenus, quæ Regi adhuc erat obnoxia, obsessos liberaret. Triginta majoribus navigiis præposuerat Sancium Avilam, septuaginta minoribus defuncto Beauvosio Glimesum

mesium Belgam, inani specie imperii, quo indigenarum animos non ignotis artibus ad se traheret. Namque summum imperium, & militiæ cura Iuliano Romero tradita fuit: vel quod Glimesio etsi rerum militarium gnaro, momentum tanti operis non crederetur, vel quod insita Hispanis superbia nullum alium, quam suæ nationis Præfectum admitteret. Quindecim enim vexilla Hispani militis classibus imposita. Extremo Ianuarii Avila Antverpia, neq; multo post Glimesius & Romerus Bergâ ad Zomam vela ventis dederant. Futuri advorsi certaminis præsagium veluti dedit primum discessu Bergensium navium infortunium. Dum enim honori summi militiæ Belgicæ Imperatoris tormenta passim exploduntur, incuria igne in pulverem pyrium jacto navis collisa, plerique, qui in tabulatis forte consistebant, præcipites in aquam missi, mortique erepti, plures tamen, assensibus navium icti, misere multato corpore evasere, inter quos Præfectus Franciscus de Bovadilla vulnere saucius navigio se dare nequibat. Romero præceps & velox erat navigatio, tardior Glimesio, quem impatiens prior prope Romersvaliam expectabat, sive quod Glimesii naves navigationi non adeo commodæ essent, sive quod ejusdem cunctatio consulta esset, & propior constantiæ, alterius autem velocitas temeritati. Ludovicus Boisottus Zelandiæ archithalassus, qui summa cura hostium molimina explorabat, certior factus, octo minora navigia velitationi cum hoste conferendæ quàm mature præmittit. Ingens ipse virium atque animi concilium militare vocat. E re judicatum, vento secundo, cauro nimirum flante, contra æstum advorsum obniti, uti postmodum secundo fluxu certamen inirent.

inirent. Quatuor interea bellicę naves jussę à Gulielmo Principe copiis suis navalibus adesse, quę Sancio Avilę occurreretur. Verum ex parte Boysotti in concilio de modo hostem adoriendi contentio non levis orta inter Scottum & Nicolaum Nicolai Præfectos militareis. Ea tutissima Nicolao pugnandi ratio visa, se infra tabulata recipere, ubi simul tormenta hostium lethales globos ejacularentur. Stipatus enim miles certo mortis periculo objiciebatur. Scottus impotens & nimius animi, primo insultu in hostium foros transiliundum censebat. Omnia magna facinora primo impetu valere, cum qui quocunque modo cedit, etiam Fortunę cedere. Placuit hæc ultima sententia, uti objectu corporum prælium conficerent, & per mortes victoriam raperent. Quippe victis nihil spei reliquum, quam mare. Anchoris itaque solutis in turmas tres se dividunt, ex quibus prima sedecim majoribus, decem modicis navigiis, secunda, uti & tertia, decem majoribus, quatuordecim modicis constabat. Ita vitę juxta ac mortis contemptores plenis velis in hostem feruntur. Ingenteis hinc contentiones inter summos hostiles Præfectos coörtæ. Glimesius in maritimis præliis vento & æstu adverso se hostibus objectare insolens esse dictabat: neque enim tantum cum adversariis, sed cum aquis præcipiti fortunâ luctandum esse. Quem Romerus immodicus animi rogavit, an ignavia & timor illius pectus percelleret, respondente altero, certaminis eventus hoc indicabit. Duabus itaque divisis navium catervis Zelandis obviam itum. Juxta Lodicense ostium tormentis jam invicem peti quibant. Glimesius, ubi in tabulatis prætorię navis confertum militem cum
nauti-

nautica pube conspicit, flexo confestim clavo, ex latere tormentis duobus æneis, quæ præter globos scruto conspiciata erant, excussis, centum admodum fistulis & bombardis sua spargentibus jacula, plures è conglobatâ multitudine è medio sustulit. Volvi passim cadavera, morientum gemitus audiri, vulneratorum ingens clamor cælum rumpere. Boysotto aculeo ligni oculus effossus, quod ille dehonestamentū corporis virtuti suæ imputabat. Nicolaus pede usque ad crus ablato, Scottus adempto brachio, majoribus venis sanguinem fundentibus, glorioso fato quanquam miserabili occubuerunt. Rebus supra votum primo impetu Hispano fluentibus, imminebat Prætoricæ atque adeò jam insultabat hostilis pube, sed suppetias ferendo hostem quoque adortus Adrianus Cornelii centurio: atque adeo virtuti jam cuncta patebant, nihil socordia claudebat. Namque eodem tempore novem regiis navigiis injectæ pedicæ, atque in plures idem tentatum fuisset, nisi angustia fluminis impedivisset. Nullus amplius erat tormentorum usus, gladiis cominus res agebatur, alterum alterum confodere, vulnerare, incertâ fortitudine cadere, atque iterum eniti, vago motu & disjecto inter se luctari. Acerrimo prælii Caspar Leinsenius Zoetelandus, unus ex promptissimis inter globorum nimbos aplustre Glimésio ademit, quo involutus ad suos incolumis revorsus est. Virtuti præmium vestis nautica constituta. Romerus, signo classis dempto, metuens ne reliquæ naves sine duce vagæ fluctuarent, mali culmine novum erexit, quod sequerentur: atque adeo virtutem militis auxit, ut jam sexaginta, callide non renitente Boysotto, in nostram Prætoriam navem transilierint, quos
illâc

illâc accensus pulvis pyrius in altum certa morte adigit. Cujus horrendi spectaculi pars magna fuisset Romerus, qui in tabulata quoque se demittere tentabat, nisi paulo ante ignis feralis suas vires exeruisset. Utique peritia militiæ nauticæ, machinarum artificiosis ignibus, quâs continuo hostis quassabatur, navium magnitudine & robore, hostilis classis longe inferior erat. Romerus itaque metuens, ne à pluribus nostratium navigiis, quæ recta in illum ferebantur, cingeretur, inprimis quod plerique suorum jam ad fugam se expedirent, cuncta vela etiam ad proram intendit, uti manibus nostris elaberetur. Verum uti nihil tam fortuitarum capax quam prælium navale, & si uspiam pleraque hic ex lubricine Fortuna agitat, antennâ excusâ nullum patuit effugium; itaq; ut necessitati consuleret, præcipitem contra Tolensem ripam navem Præfectus egit, & cum sociis, qui vel cymbæ se commiserant, vel enatarunt, ad proximum litus incolumis evasit. Interea Requesenius cum prima nobilitate spectator pugnae in Scakerlœensi aggere, largo imbre perfusus eventum expectabat, cui adventans Romerus non deprecatur culpam, vel temeritatem, sed mari horridus voce aspera Imperatorem alloquitur, se non navali sed terrestri militiæ assuetum, idoneum cunctis admodum classibus perundis. Navis, quæ ante siccæ arenarum hæserat, æstu levata nullo adjutante in profundum se iterum egit, ubi sorte advorsa quinque naves nostræ occurrentes per dimidium horæ illi implicita, aliis hostilibus navigiis fugiendi occasionem dedere. Namque sole cadente, vento, æstuque secundo, ingenio loci diffusi, plenis velis Bergam ad Zomam contendere. Ozorius de Angulo subsidio classi

M

futu-

futurus postrema tenebat, atque advorso æstu ulterius progredi nequibat, neque etiam consilium fuit periculo arenarum se exponere, quâs jam cæteræ naves hæsitabant. Cruento itaque se huic certamini propius non immiscuit, sed tormentis & fistulis nostros fatigabat. Pugnando interim vadis quoque allisa Prætoria navis Glimelii, qui tamen infractus animo, contemptu summo vitæ, extrema expectabat. Ille ducis simul & militis munia obire, cuncta pericula post decus & gloriam ponere, omnibus locis adesse, festinare, per medios ignes hostiumque jacula, per strictos enses ruere, donec tandem duobus globis ictus occubuit. Navis incensa, incertum an nostra, an hostili manu. Ex aliis navibus octo occupatæ tanta ferocia, ut nulli parceretur, semianimes nonnulli in mare volverentur, neque torques aurei neque militaria ornamenta cupidam alioqui prædæ juventutem morarentur. In tormentis itaque bellicis præcipua præda, nulli admodum captivi. Plures quoque naves, quæ comiteatum vehebant, vel vadis ruptæ, vel continuis tormentorum ictibus hiscentes fundum petierunt. Mille ex hostibus hoc prælio sanguinolentâ morte succubuerunt, uti à nostris Historicis relatum est, ipsi septingentos fuisse memorant, & quidem duplo majorem cæsum à nostra parte numerum. Non insolens tamen Hispanis suas calamitates premere, alienas in majus augere; imo aliquotiens victi, arcana Regio apud suos famâ victores fuere. Interea tamen ab alia parte Sancius Avila, classe sua, syrtibus jam antea effractis duobus navigiis, inter Terneusam Vlißingamq; horrorem Principi Guilielmo intulit. Neque enim naves resistere validæ, neque militares copię, quas

quas Boysottus secum duxerat, in promptu. Et hostis jam victor, si tempore, quod omnium rerum primum est, uti scivisset. Æstu secundo Medioburgum tendere in proclivi fuisset, sin anchoris fixis juxta Breskenum non cunctatus occasionem neglexisset. Et mox nuntiata Glimesii clade, in celeritate fugę turpem fortunam posuit, & modo metuendus, nunc consternatus confestim inde Antverpiam, se corripuit, veritus ne infesta belli navalis tempestate obrueretur, victoribusque novam largiretur victoriam. Ita utraque classe vel victa vel fugata, Medioburgum opulenta Walachrię civitas pressa fame Principi Auriaco se deditit.

C A P U T XIX.

*PRÆLIUM NAVALE INTER ZE-
LANDOS, ET CLASSEM ANTVERPIA-
NAM, ANNO MDCLXXIV.*

CUM Antverpię Hispanorum militari seditione propter stipendia non persoluta cuncta flagrant, atque ferociens miles, qui nihil consulti, neque pensı habebat, neque ulla auctoritate mitigari poterat, electo duce, turbulentis consiliis, nocturnis diurnisque tumultibus, plurimum terroris atque periculi urbi opulentissimę minaretur, classem triginta majorum minorumque navium, quę juxta urbem sedem posuerat, longius remove Proceribus ex usu publico videbatur. Ingens enim metus incesserat, ne miles exuto omni Magistratus imperio rebus suis tutandis etiam propinquam classem invaderet, atque ira

M 2

conju-

conjurat[i]onis suum quisque negotium exequeretur. Verum stipendiis partim ære, partim pretiosis mercibus, postmodum persolutis, sedatis animis, simul ob Mochen[s]em victoriam festivus & triumphalis processerat dies. Triumphalibus vestibus luxuriabat miles, lætitia tota diffuebat Civitas, post dissonos tumultus summa erat tranquillitas. Cæterum mens humana futuræ sortis nescia, dum advorsa & secunda caliginosa nocte premit Deus immortalis. Ad tuendam fœlicitatem alia fœlicitate opus est. Hâc enim occasione Zelandi natura feroces, vehementes, manu prompti audaciam acuebant, & lubricine excindendę hostilis classis supra modum instigabantur. Ludovicus Boysottus archithalassus modico navium apparatu Scaldis fluentia ingressus, quod facilius tantum negotium procederet, velocissimas præmittit, quę de omnibus illum certiores redderent. Duę hostiles bellicę naves, quę longius à cæteris semotæ excubias agebant, haud difficulter occupatæ. Ex captivis cognitum, classem juxta Ordamum, Calloam, Lilloamque inter stationem posuisse. Boysottus, qui maximum bonum in celeritate putabat, ocyus eò contendit, quo imparatum hostem deprehenderet. Classis sparsim diffusa imminētis periculi secura anchorarum uncis tenebatur. Cumque adeò jam ad tertiam partem milliaris non procul hostilis classis fœderatorum oculos stringeret, subsidente subito vento consilia nutabant, nunquid non irrita expeditione cursus iterare relictos expediret. Dum animus dubius huc atque illuc impellitur, derepente motantes iterum aurę vela impleverunt, & ad conficiendum pulcherrimum facinus navalem turbam aquis indomitam incitarunt. Hostis

stis subito periculo commotus, neque diu cunctandum ratus, vela intendit, atque omne in fuga praesidium quaerens, Antverpiam proficisci maturabat. Zelandorum navis conficiundo itineri expeditiores, imprimis quod Oceani illuvie & sordibus nuper purgatæ essent, Regias, quæ Calloam prætervectæ jam erant, affecute, ita tormentorum continuis ictibus quassarunt, uti duæ bellicæ naves, præter minorem Britannicam, extrema necessitate ingruente ad deditionem compellerentur. Treis aliæ ad Brabanticum latus, una ad Flandricum vadis hæsitantes, ignibus consumptæ. Cæteræ, cum nautica hostium turba cymbis sinistro fluminis lateri appulisset, immenso labore funibus attractæ agre se receperunt. Atque hæc causa fuit, ne totam classem extrema corrumpere, quanquam etiam Historicis, qui hostium partes secuti, sedecim, ab aliis viginti naves vel concrematas, vel occupatas fuisse, memoratum invenio. Interea subito tumultu & periculi magnitudine commota Civitas, atque, uti rebus trepidis solet, festinando, agitando omnia, sibi suisque diffidebat. Iussus Hispanicus miles, uti ad latus Brabanticum infra aggerem opportuna loca obsideret, violentiam hostium virtute pulsaret, atque, sicut res & tempus monebat, patriam armis suis tegeret, defenderetque. Neque detrectavit miles in audaciam exercitatus, quod antea seditione contumacior, eo nunc obsequio promptior. Neque aqua, neque cœtum, quis stationem habere cogeantur, tardavere impetum. Atque adeo continuis fistularum explosionibus Zelandos supra modum fatigarunt, etsi & illi ancipiti malo se suaque fortissime tutarentur, hostilibusque globorum ictibus respon-

dere parati, intentique essent. Boysottus interea Justo Morio, & Martino Drogio centurionibus imperavit, uti, quantum pericula gliscebant, in tantum virtutem atque robur intenderent, quò præter hostium munimenta duas jam ante occupatas naveis, quarum una Propræfectus classis Hamstedius attinebatur, Vlissingam deducerent. Cæterum ea res inprimis ardua, cum Ordammum sclopetariis infesum, majoribusque machinis probe instructum terrorem ingentem incuteret. Dum enim adversante vento contra fluctus eniti, & obliquare cursus necesse erat, certis undique machinarum ictibus admodum naves quassabantur. Unius, cui præerat Justus Morius, vela juxta corbem lacerata præcipiti se involverunt ruina, malus antennæque gemebant, æreum tormentum, quod superiori parte positum fuerat, incredibili violentia concussum, mutilatumque. Cæterum nullibi plus potest audacia, quam cum ad defendendum minora sunt subsidia. Ipse per igneis, densosque globorum procellas evasit, erupit. Altera tamen navis ita dedolata, uti rimis fatiscens jam aquas exciperet, ventoque secundo ad Boysotti classem se recipere cogeretur. Deliberatum, an perforare navem, vel igni subicere satius tutiusque esset, cum nulla evadendi spes reliqua videretur. Non diu consulto sed festinato opus erat, antequam vicino aggeri tormenta imponerentur, quæis eo in loco contundere nostram classem, usque ad extremam perniciem proclive erat. Consilii hæc sententia sedit, ut junctis bellicis navibus, continuis machinarum verberibus munimentum quaterent, navis devicta pone sequeretur, atque ita occasionem evadendi raperet. Consilium hoc prospere cessit, & quan-

quancumque etiam ipsi fortunæ violentiam tolerarent, tamen id tandem peractum, ut horribili & continuo tormentorum fragore cuncta dissilirent, ruptisque imis compagibus cælum & terra misceri viderentur, lorica manuum præceps rueret. Tantæ veluti furie atque intemperie classarios nostros agitabant, ut hostis lorica nudatus ex vallo ad interiora abigeretur. Ita devicta jam ante navis bellica cum minore Britannica, postquam cuncta sibi prona videret, sub præsidio classis nostræ iter suum expedit. Requesenius cladem hanc non tam Zelandorum egregie virtuti, quam militarium quorundam à sua parte ducum perfidie, conspirationiq; imputabat. Neque suspicio deerat iis, qui vinci crimen censebant, Hamstedium ipsum tanti criminis reum esse. Jamque adeo, ut in reis læsæ majestatis fieri consuevit, facultates ejus annotatæ: ceterum integrum fidei scelerisque purum fuisse compertum, socordie tamen & negligentie probro vacare visus non fuit. Ipse post diuturnam captivitatem, Zirizea demum occupata certis conditionibus libertati restitutus est.

CAPUT XX.

EXPEDITIO NAVALIS LIBERANDÆ

*OBSDIONI VRBIS LVGDVNI BATAVORVM,
CVM AB HISPANIS VNDIQVE
PREMERETVR, ANNO*

CLIO LXXIV.

LUGDUNUM Batavorum duobus & sexaginta castellis erectis arcta obsidione Hispanus premebat. Exercitus erat

erat instar undecim millium, Præfectus militiæ Valdesius. Summa quidem ope nitebatur Auriacus obsessis suppetias ferre, sed incertus consilii nulla spe reliqua huc atque illuc fluctuabat. Tandem Oceanum ipsum in partes vocare Patribus visum, magis uti obsessis animum adderent, & ne nihil agendo tempus socordia atterere viderentur, quam ut spes ulla liberandæ urbis reliqua esset. Mosæ atque Iselæ perforatis aggeribus, apertisque cataractis, turgidum maris elementum in campos admissum, quò submersi agri planis navigiis insolitam viam præberent. Omne privatum damnum libertate potius censebatur, atq; Fortunæ leges ponere invicti animi indicium erat. Jactura autem septingentis florenorum millibus censebatur. Classis centum & sexaginta navium in expedito erat, quibus præerat Ludovicus Boysottus ingens animo, militiæ impiger, disciplina & auctoritate inter suos rigidus, quæ ubi paulum vacillavit, cuncta apud militarem & nauticam pubem nutant. Majora navigia densa asserum compage constructa, retibus compactis, hostium jacula comprimere quibant, inter quæ ex duabus junctis navibus moles ligni fabricata, quæ neque velo, neque remis movebatur, sed rotis interius à duodecim nautis circumactis per aquas vectabatur. Plures triremium instar carinis planis remis decem, duodecim, & pluribus agitabantur. Navales socii ex Zelandia ad octingentos erant, animo præferoces, vultu truces, multi vulneribus & cicatricibus nobiles, nonnulli brachio vel crure mutili, conjurati vel vincere, vel pulchræ occumbere morti. Quidam ex argento laminas pileis insertas gestabant, quibus inscriptum, POTIUS TURCÆ QUAM PONTIFICI. Illi aquis in-

nutriti

nutriti ferociam quoque ex mari contraxerant, atq; Hispanici nominis infesti hostes bellis intestinis inter cædes, & rapinas juventutem suam exercuerant. Animus vastus, vindictâ ardens, audax, corpus, supra quam credibile erat, laborum patiens, velox, cedere nescium. His promptissimi quique milites immixti, sclopetis cincti, ad mille ducentos. Naves maximæ tormentum majus unum aut alterum admittebant in prora, sex minora (bassas vocant) in lateribus. Æræ ferreæq; machinæ in universum centum erant, præter multiplices bombardas, ex quæis nonnullæ plurimos simul globos eieciabant, certa hostium pernicie, nec minori metu. Iuxta erant conti, harpagones, dimidiatæ hastæ, cæteraque instrumenta, quibus cominus pugnatur. Ad undecimum Septembris Rota amne ad aggerem limitaneum vectis, eodem perfosso ad pagum Zoetermeram, ubi stationem tenebat Martinus Aiala, non leves cum Hispano incidere velitationes. Batavi, quique acrius cælo suo animantur, Mattiaci, festinare, periculo occurrere, alius alium hortari, salutem in armis ponere, nulli parcere, ipsi adversis vulneribus mortem contemnere, si occumberent, etiam vindictam adhuc in vultu ostentare. Tanto autem odio flagrabant Hispanici nominis, ut cor intimis evulsum penetratibus dentibus primo morsum, dein ut amarum canibus projectum fuerit. Quod tamen exceptum, Delphosq; delatum, compluribus, vel abominatione tantæ crudelitatis, vel in ludibrium & opprobrium Hispanorum, ostentui fuit; manifesto indicio, quo non se præcipitem agat mortaliū animus, ubi odium & vindictæ dira cupido eos intransvorsum rapuit. Neque postmodum minus acriter ad

N

pon-

pontem Soetermeræ pugnatum , & quanquam Nostri summo opere hostem fatigarent , tamen neque illi animo frangebantur , sed virtutis gloriæque maximum utrimque certamen erat. Triginta signa Hispanorum sub Ludovico Pimentello sedem ibi fixerant, neque ullo etsi valido & feroci insultu inde turbari poterant. Cum hic Fortuna ex voto non cederet , atque una ex majoribus navibus violenta tormentorum explosione disrupta esset , alia via eniti visum fuit. Neque ventus commodus aquas ciebat , quæ & ipsæ arte hostili à latere in avia derivabantur , adeo ut intumescere vasta illa agrorum planicies aquis procul distantibus nequiret. Segwartenfi itaque via , ad duodecimum sequentesque dies Septembris cauro aquas promovente , sæliciter transitus tentatus. Soetermerâ atque Benthusâ fugato milite , ad modicum lacum , qui Norta dicitur , ventum. Post acres illic velitationes à meridie usque ad serum diei , miles hostilis opportuno loco cessit , ubi nostras copias sistere in proclivi erat , Fæderatis autem superare arduum asperumque fuisset. Interea miserabilis fames in Urbe gliscebatur , ita ut absumptis naturalibus alimentis ad fœda & inaudita se vorteret necessitas. In pampinis vitium , arborumque , præcipue pyrorum foliis , amylo & sale condiendis , ingeniola erat penuria. Canes , feles , glires in deliciis erant : ossa è fimetis protracta , jam ante à canibus rosa iterum rodebantur : coagulatus sanguis ex fœtidis canalibus hauriebatur : gravidis in utero fœtus liquecebat , puerperis infantes ad exuëca ubera moriebantur. Corpus itaque multorum macie confectum , nutantibus genibus ægre admodum sustentabatur , pallor in ore , cava lumina , diffusa genæ.

Neque

Neque fames, quam pestilentia tristior, quæ sex millia hominum subito in Libitinæ numerum recepit. Adedò quidem, ut dimidia fere pars civium (quatuordecim enim millia numerabantur) ferali fato occubuerint. Discordia quoque intus, extra hostium promissa minis conjuncta, miserum in modum civitatem vexabant. Quibusdam deditionem acrius poscentibus, quod fame & peste tot millia hominum occubuissent, cordate respondit Petrus Adrianus Werivius Consul, se sacramento Deo Patriæque obstrictum; si ita visum, corpus in partes secarent, distribuerent: mortem omnibus à naturæ lege semel indictam, nullum discrimen fore an hostes, an cives illam sibi intentarent. Quâ constantia rubore cuncti suffusi recessere. Nimirum exemplum sapientis magistratus arcano motu trahit, rapit ad obsequium subditorum animos, inprimis ubi eadem mala & bona simul ipsis esse intellexere. Quæis accensi cives, objectantibus hostibus nihil præ fame eos reliqui habere præter miseram animam, gloriose responderunt, consumptis omnibus alimentis sinistram manum in cibum, dextram in usum Patriæ fore. Quod si extrema moriendi incumbat necessitas, incensâ Urbe, dimicando pro libertate, pro religione, Deo immortalī vitam lubentes oblaturus esse. Interea tamen aquæ deerant, quæ vix novem pollices altæ, imo flante aquilone retrò fluere, & res sublapsa referri. Fluctuantibus consiliis consultum visum, templarem viam perfodere, & ni æstuante Oceano aquæ crescerent, triginta vel quadraginta navibus transmissis, obsessis suppetias ferre. Caterum violento cauro asperum mare & pleno lunæ orbe exæstuans, undas magno impetu campis infudit apertis, &

tis, & ingenti miraculo aquilone iterum concitata æquora Lugdunum versus rapiebat. Jamque adeo ad viginti octo pollices increverant aquæ, cum secundo Octobris Boysfortus intempestâ nocte templarem viam adoritur, & quamvis hostis ad tempus resisteret, atque excussis globis feralibus ignibus nox illucesceret, stetit tamen hostium flammarumque contemptor, donec vinceret. Nihil est quod non expugnet pertinax fortitudo, & virtus imperterrita. Victor itaque munito loco murices passim sparsit, ut illorum aculeis pedes hostium premerentur, si invadere iterum tentarent. Tribus admodum locis perforatis, centum frumentariæ naves immissæ, atque ubi vada cursum sistebant, etiam humeris ab exilientibus nautis vectæ. Interea qui circa pagum Souterwoudam præsidia tenebant, partim igne vicino incensarum ædium, quammaxime autem subito aquarum incremento territi receptui se dederunt, atque inter eos Valdesius militiæ Imperator, quem Alphonsus Lopezius sequebatur. Inter postremos fugientes (serius enim fuga animadversa fuit) plures aquis incilibusque hausti, alii vel ferro, vel contis interfecti ingloriam mortem obibant. Facies totius negotii fœda, miserabilis, dispersi à suis nullos ordines observare, aquæ, tela, harpagones, hostes undique premebant, & si qui evaderent, insolentia loci, aquarumque retinebantur, ita ut varia & dubia mors illis incumberet. Memorabile hic eluxit Petri Ciacconii Borgiæ subcenturionis facinus, qui unco à nostratibus attractus, faucibusque pro mortuo in cymbam conjectus, dū ceteri expiscandis aliis se inclinant, à tergo securi arrepta tres confecit, reliqui perculsi in aquas defiliunt, ille victor cū spoliis & cymba ad suos

ad suos revortitur. Interea & cives calamitatibus misere afflicti, & foederati in superando castello munitissimo, quod Lammum appellabatur, summopere angebantur, & more mortalis ingenii, ubi metus spe potior est, adversa ex adversis pensabant. Verum hostis omnis intempesta nocte cesserat. Et (mirum dictu) manium urbis subita ruina prope vaccariam portam, eruptionisque imago hostem quoque terruit, decepitque. Tardius, indicante primum puero, hoc creditum ab iis, quibus mala abunde omnia erant, sed neque res neque spes bona ulla. Ita Urbs liberata, quæ cum extrema inopia, mortalitate, dissidiis intus luctata, extra tamen fortissime hosti restitit. Et summo miraculo, aquas, quæ se in campos late effuderant, quasi perfecto opere iterum in mare Oceanum advorsa tempestas agitavit. Dum ita nobilis extorta fuit victoria, eadem tempestate in Hollandia boreali Hispanis aquarum insolentibus ab indigenis magna incubuit calamitas, quippe locorum gnari cymbis ubiq; iis insultabant, ita ut Præfectus Chevreauxius ad duo millia militum, vel ferro vel aquis perdidit, ducenti & quinquaginta capti, Hornamque delati in carcerem compacti fuerint.

C A P U T XXI.

DE CLASSE HISPANICA PROFLIGATA, VEL TEMPESTATE PERDITA,

ANNO CLIO LXXXVIII.

CUM immensa Hispanorum classis, quæ centum & quadraginta quinque non navibus, sed maris veluti

N 3

castel-

castellis constabat, quarum alię octingentos, alię millenos, tormenta autem quadraginta vel quinquaginta vectabant, cum ipso horrore Oceani Britannię regno immineret, Batavi quoque gloriose partes suas tutati sunt. Vicere quidem aliquotiens Angli, vicit quoque fœda tempestas, sed non minor victoria Parmensem classem, quę jungere suas vires Hispanicę tentabat, propriis clausisse portibus. Cæterum, ut hanc expeditionem longius repetam, existimabat Hispanus Britanniam occupatu haud difficilem, cum & potentiores ex nobilitate Romanę religioni faverent, & res novas quærerent, quę Bernardinus Mendosa, qui nomine Regis non tam legatum quam speculatorem per aliquot annos illic egerat, in majus augebat. Anglia occupata, Scotiam Daniamque, imo Galliam dissidiis fluctuantem, Belgii servitutem, dein totius Europę imperium ambitiosus Regis animus meditabatur. Et Pontifex Romanus (erat is Sixtus nomine,) quod quondam, cum Romanis cæremoniis imbuta esset, Anglia fuisset illi Sacerdotio tributaria, tanquam vacuum occupanti exposuerat, indigenis sacramenti religionem, qua Reginę tenebantur, remiserat, etiam in necem Elisabethę homines nefarios & facinoribus coöperatos præmio illexerat. Magnis itaque impensis nobilem classem, quã tanquam alter Xerxes maria tegeret, per quadriennium construi Rex curaverat. Per omneis Hispanię Regis ditiones coactus miles ad viginti millia hominum, nautica pubes ad duodecim millia ex variis gentibus cõempta, commeatus semestris, pecunię stipatę ingens vis, & tormenta vicies quinquies centena vectabantur. Classi præerat Alphonsus Peresius Gusmannus, Medinæsidonię Dux, dignitate

gnitate familiæ illustri, opibus potens, cæterum artium maritimarum rudis, atque adeò inconsultus. Sequebantur quoque proprio ære militiam complures homines nobiles, tanta victoriæ fiducia elati, uti honores, fundos, regias opes inter se divisissent, antequam victores essent. Accesserant & laquei, uti ex devictis navibus postmodum compertum, aliaque necis crudelia instrumenta, quæ vel gulam adversantibus, imprimis aliter de religione sentientibus frangerent, vel alio modo mortem approperarent. Nonnulli impatientes victoriam, uti rebantur, tardari, ad Tamesin statim exponendum militem, regiam Urbem Londinum occupandum censebant, alii Batavicum portum (Marchionis Sancticrucii & Parmensis salubre illud consilium, verum improbatum fuerat) præripiendum judicabant. Immanis illa classis, terror Oceani, quæ malis tanquam edictis turribus, levatisque tabulatis instar propugnaculorum eminebat, cum vere adulto Olyssipone solvisset, in Galæciæ portum abrepta, partim fœda tempestate concita, partim remigum, qui libertatem affectabant, perfidia, treis naves ad Galliæ litora allisit. Parmensi ingentes erant militum copiæ in procinctu, (namque ad triginta millia numerabantur) fossasque idem duxerat, quæ præsidarius miles in maritima oppida commodè transferri posset. Ad erant eidem viginti & octo præsidiariæ naves, quadringentæ planis carinis, ne incertis vadis litorum alliderentur. Regina, quæ fallaci pacis nomine circumveniebatur, angustias freti, Britanniamque peti non credula, tandem tumultuariis militum cohortibus obsideri litora, quâ exscensus Hispanorum opportunus videbatur, imperavit. Minoribus navi-
giis

giis, quæ ipso in freto vel propter Tameſis oſtium uſui eſſe poſſent, Seimorum præfecit, centum alias in ſtatione Pleimuthæ hoſtium inſultus opperiri juſſit, quæis præfectus Carolus Howardus, ſecunda Franciſco Draco poteſtas, qui totum terrarum orbem maritimis navigationibus luſtraverat, obtigerat. Caterum Reginę iterum juſſu ingenti ſocordia præcipuis navium exarmatis, quod ſubdolis nuntiis decepta nondum venturam claſſem crederet, illa ſubito adventante, magna cunctos inceſſit conſternatio, conſilia in incerto fluctuabant, vix coactus miles, qui licentius vagabatur. Nata tum erat occaſio debellandi Britanniam, niſi Præfectus obtendiſſet, ſe mandato Regio ſtringi, non prius expeditionem moliri, antequam Parmenſis ſuas junxiſſet copias. At illum Dunqueræ incluſum Batavus premebat, omneſque exitus obſidebat, neq; Hispanica claſſis mole ſua laborans Flandricum littus, ſyrtibus & cæco arenarum horridum, attingere quibat. Non procul à Pleimutha Franciſcus Dracus modicis viribus experiri pelagi Fortunam auſus, mobilitate ſuarum navium immenſas hoſtium moles, quæ pigro inceſſu mare ſecabant, ſupra modum fatigabat. Junctim quoque lunatam in ſpeciem claſſis procedebat, ideoque certiora vulnera, vel pericula, ne ſibi invicem colliderentur. Quod & propratorię contigit, quæ impacta aliis arbore mutila rapinæ opportuna fuit. Provecta itaque claſſis (ut hæc breviter perſtringam, quæ virtuti Anglorum debentur) poſt variam Fortunam propratoria nave à Franciſco Draco expugnata, Cantabrica incenſa à proprio jaculatore, & deinceps Auguſti inter Britannos & Hiſpanos acri admodum conſicto prælio, quo continuis octo horis mare ignibus &

bus & fumo obductum erat, globis tormentorum instar grandinis volitantibus, unâ Hispanicarum rimis fatigente & Galeti litoribus allisâ) dein, quantum altitudo navium permittebat, circa Caletum in anchoris stetit. Omnis jam labor in eo vortebatur, ut dux Medinæsidoniæ, qui summum in classem, etsi maritimæ militiæ rudis, imperium tenebat, cum Parmensi vires jungeret. Patres non vano metu percussi sub præfecturâ Justinî Nassovii ingentibus impensis classem in præcinctu per totum annum habuerunt, semper illis locis imminentem, quâs hostiles naves constiterant, ne qua parte in Oceanum erumperent. Medina nuncios ad Parmensem mittere, se gravi necessitate circumventum, expeditionem frustra fore, nisi properaret copias jungere; contra Parmensis, neque suppetias satis expeditas, atque adeo Duinkerckæ portum Hollandica classe constringi. Interea ille, sicut consilii inopes solent, templa circumcursare, cælites passim precibus fatigare, nihil pensi habere. Neque vero Britanni occasionem intermittere, verum ad hostilem vim pulsandam omnia tentare. Nocte itaque intempesta, vento & æstu secundo, octo incendiariis navibus immissis, tormentis, pulvere, ferro & lapidibus refertis, tanta hostem incessit consternatio, ut subito consilii expertes anchorarios funes præciderent. Hinc ad decem horas ita pugnatum acriter, ut plures hostiles naves, laceratæ, submersæque fuerint, una maximarum (galeonem vocant) quæ octingentos homines vectabat, alteraque Cantabrica, rimis fatigentes, & fluctibus Wilingam versus actæ; quarum una à Vlissinganis, cum præfectus Fredericus Toletanus reliquique primores scapha se recepissent, non-

difficulter superata, altera, cui præerat Pimentellus, cum diu contra extrema Fortunæ se defendisset, tandem Petri Doufæ masculæ virtuti cessit, qui & vexillum inusitatæ magnitudinis in templo Lugduni Batavorum suspendit. Navis, exemptis iis quæ ului esse possent, urgentibus aquis Oceanus depressit. Plurimi interfecti, vulnerati gratis Antverpiam missi. Nonnulli quoque illustis dignationis in Hollandiam abducti: inter quos primi Didacus Pimentellus, Marchionis Taverani frater, Didacus Velascius, Alphonsus Vargas, Marchio Ulyssiponensis, pluresque alii præcipuè inter populares nobilitatis. Superata hostium navis, vino cæteroq; commeatu onusta, cum sociis admodum navalibus xxv, qui vino graves sentinam ingenti socordia haurire oblitæ fuerant, aquis obruta. Alia quoque actuaria vastæ molis (galeassam appellant) cui præerat Hugo Moncada, sub idem tempus (nonnulli tamen antevortunt) alterius navigii rudentibus implicita, gubernaculo excusso, vento æstuque violento vado Gallici litoris impulsæ, Duce pluribusque aliis, qui fortissime navem tutabantur, cæsis, tandem Britannis cessit. Quinquagies mille ducatorum præda, remiges trecenti in libertatem asserti, classiarios quadringentos infestum pelagus absorbit: pauci admodum fessa jactantes salo brachia evaserunt, primi in Hispania tantæ calamitatis nuncii. Anglis ad tormenti ictum insequentibus, fœda strages Hispanis incubuisset, nisi pulveris pyrii penuria consilia impedivisset. Tanta eâ tempestate formido Medinæ cæterorumque Præfectorum animos concusserat, ut, fœdum dictu, de tradenda classe & vita paciscenda agita-verint. Sed avorsis necessitate Britannis
spes

spes nova gliscebant classē cum Parmensē jungendī. Neque vero Parmensis ullam operam intermittere, militem suum, ut in Hollandorum classē irrueret, & loco moveret, compellere, postremo ferocius agitare, quam solitus erat, Quippe nonnullos centurionum propriā manu confossos fuisse, qui mare aperiri non posse affirmaverant, rumor sparserat. Tandem tum præmiis, tum minis lēctissimi mille jaculatores conditionem accepere, quorum animus pulsan- dæ classis hostilis victoriæque cupidine æstuabat, facinusque egregium super virilem audaciam committere, dum ferro viam aperire tentabant. Et quidem ingenti impetu Nostros adorti non levia damna inflixerant, ad extremum tamen misere omnes fere trucidati sunt. Hinc Medinæ Dux animo dejectus spem omnem jungendarum virium deponere, consiliis fluctuare, timide & ignave omnia administrare, denique neque famę parcere, neque quicquam consulti habere. Re itaq; desperata (cum retro angustię freti obsessę essent) Hiberniam & Orcades circum, quā indomitus & procellis infamis debacchatur Oceanus, neque sine periculo navigatur, in Hispaniam reverti in animum induxit suum. Placidus primum ventus naveis mole sua laborantes & laceras ægre promovebat. Tertio demum Septembris die fœda admodum tempestas mare exasperavit, atque ita classē disjecit, uti intra eundem mensem triginta duæ naves vel mari haustę, vel ab Hibernis superatę fuerint. Ad decem millia hominum perierunt. Aliæ in Norvegiam actę, quædam quò pertigerint, ne fama quidem vulgavit. Unam tantum bellicam cum xxx onerariis incolumes in Hispaniæ portum Medina deduxit. Latus hic & festivus

dies Britannis Batavisq;, eò latior, quod nulla alicujus pretii navis eorum desiderata, centum viri tantum cecidissent; concurrere omnis ordinis homines, Proceres omnia lætitię signa edere, quīs plebs captari solet, imprimis autē Deo immortalī supplicationes decernere. Contra apud Hispanos ingens consternatio, alii fortunam Regis, alii patrem, vel fratrem, vel maritum, vel necessarium & propinquum deplorare, adeò ut luctus tempora Rex contraxerit, uti magnitudo damni, quæ omneis ferme nobiles domos funestaverat, oculis subtraheretur. Complures domum reversos, vel ex maris jactatione languor, vel formido; ne more dominantium fortuna culpę imputaretur, confecit. In Parmensem torta tantę cladis invidia, uti suam ignominiam, notis in aula artibus, criminationibus apud Regem magnates Hispanię diluerent.

CAPUT XXII.

*DE EXPEDITIONE BRITANNICA**HISPANIAM VERSUS, QUIBUS JUN-**CTÆ XXIV FŒDERATORVM**NAVES, Anno cId Idxcvi.*

CUM de novo apparatu classis Hispanicę rumores iterum sererentur, quanquam nuntio vanescente, constituit tamen Regina classe Hispanias ipsas invadere, atque in propriis hostium visceribus bellum & fortunam experiri. Autor tanti facinoris erat Robertus Essexiæ Comes, magni excelsiq; animi, immodica & vasta cupiens, potens

tens opibus, plurimę apud Reginam auctoritatis. Ipse nullis impensis parcere, complures nobiles ad eisdem sumptus impellere, hortari, festinare, nullis laboribus fatigari. Carolus interim Houwartus maris apud Britannos præfectus, qui consiliis illius multum adversabatur, cum Caletio victo in propinquo hostis esset, necessaria classis tarde suppeditare, moram necere, trahendoque negotio nihil omittere. Atque adeò Regina mox aliena à periculosa expeditione, cum jam classis Pleimuthi in procinctu esset, sergio per literas Essexium monuit, ut eam intermitteret, se sumptus restitutam. Ille, si Regina juberet, obtemperaturum, sin secus, expeditioni non defuturum respondit. Classis constabat ex centum & L navigiis, quorum quatuor & viginti Federati miserant, octodecim nimirum bellica, sex quę com meatum vectabant, sub præfectura Ioannis Duvendordii, Warmondæ domini. Pleraque Essexius suo & propinquorum are armaverat. Quę quidem expeditio ut propria Britannorum fuit, ita neque minor Batavorum eluxit gloria. Pridie calendas Julias ante portum Gaditanum in anchoris classis stetit. Bellicę Regis naves una & viginti eadem in statione morabantur, onerarię totidem machinis vicinis: galeones quatuor vastissimę magnitudinis à sanctis nomen acceperant, hæ tormenta ærea quatuor & quinquaginta, homines septingentos singulę vectabant. Duę Epidaurię naves, tres Fregatę ad instruendam classem Olyssiponensem tormentis onustę. Namque Olyssipone aliisque in portibus & alię expediebantur: & tertia duntaxat pars maritimarum in Hispania virium hæc censebatur. Destinata quoque Americano itineri regia classis

ventum opperiebatur. Præter onerarias privatorum quinquaginta leviter instructas, sub mænibus urbis viginti quoque & duæ longæ naves defendendis civibus, prohibendoque hosti constiterant, quæ primo vespere cum Britannis pugnam occeperant, verum præ formidine in stationem se recepêre. Summopere flagrabat Essexius, (idemque urgebant Batavi) noctem, quæ instabat, antecapere, consternatos opprimere, ne quid compositis iterum animis & consiliis & viribus novaretur. At Houwardus vel studio partium (namque inter amulos rara concordia) vel quod Regina vetuerat, regias naves, mari ventis turgido, angustiis pelagi, quæis aquæ ferocius compressæ contra infida navigantibus vada maxime subsultant, exponere verrebatur. Kal. Quintilibus classis Hispanica prima luce Portum Regalem petit, relictis interioribus in sinu Gaditano quatuor versus Punctale galeonibus, qui locus non procul ab urbe, ubi mercatorij naves saburram exponere solite, eminebat. Longis navibus quæ ad urbem relicte, levioribus ingenti impetu horrorem incusserat Verius equitum Magister. Namque per integram horam fortiter dimicando compages illarum ita perruperat, ut quinis laceratis vel corruptis, reliquæ ægre se pone galeones reciperent. Quis dum hebescere virtus ceperat, Essexius nihil reliqui pene victis facere in animum induxerat suum, & vincla minacia transtris galeonum injicere tentaverat, sed adverso maris recessu impediabatur. Jactis tamen anchoris, per quatuor continuas horas utrinque tormentorum fragore cælum & maria misceri, donec æstus crescens in ministerium altiores aquas suppeditaret: una ex Hollandicis navibus, cui Delphinis

phinis insigne erat, cum Præfecto Gulielmo Henrici, & plerisque nauticæ pubis, proprio igne correpta, in sublime abripiébatur: passim capita, trunci artus horrendo in altum ferebantur spectaculo. Immensum hinc gaudium oppidanorum mentem excitam agitabat, spiritumq; erigebat. Verum dubiam & irritam spem, qua afflictorum animi sustentabantur, subito violentia fregit. Ubi enim mare æstu intumuerat, anchoræq; sublatæ forent, tantus repente horror hostium pectora concussit, ut non expectando pugnam galeones in vada impingerent, in cymbas frequentes se conjicerent, nonnulli natando vel evaderent, vel mari absorberentur. Essæxius confestim minores aliquot naves & pinassas immiserat, prohibitorum, ne suis navibus ultro ignem hostis injiceret, qui calamitatem suam, modo inimici præda non potirentur, in lucro reputabat. Verum incenso pulvere pyrio galeo, cui S. Philippi nomen, horrendo admodum ictu dissiluit, adeò quidem ut malus cum corbe instar rapidissimi teli in suprema æeris raperetur. Tam acri impetu cunctæ circa naves subsultare, & compages dissilire videbantur: verum una tantum ex Britannica classe pinassa igne periit, homines evasere. Hostilem S. Thomæ navim flammarum quoque violentia postmodum absumpsit. Ita turbatis rebus & tumultu fluctuantibus, Hollandi Zelandique ingenti virtute Punctale munimentum occupant, vexillumque archithalassi Warmondii figunt. Ne oppidani Nostros affligerent, imperatum, uti confestim pons, qui urbem modico æstuario à litore divulsam Hispaniæ jungit, abrumperetur. Magna omnium consternatione, dum sexcenti equites ex nobilitate Xeritana, totidemq; pedites,

pedites, ad defendendam urbem concurrunt, à Ludovico Nassovio & juxta quadringentis hastatis haud difficulter pulsi, vel intra portas urbis fugiendo se receperunt, vel in vicinum enixi propugnaculum, quod jussu Regis inchoatum, & nondum consummatum erat, viam ingrediundi oppidum monstrarunt. Urbs non difficulter capta paucis resistentibus, nisi quod ex planis adium cives Gaditani, pondera saxorum, lapides, volverent. Reliqui in arcem aufugerant, sed spe auxiliorum sublatâ, deditionem maturarunt, & centum & viginti millibus ducatorum incolumitatem pepigerunt. Obsides in Britanniam avecti, vel quod Regina gravius irritata redemptionem detrectaret, vel quod Rex Hispaniæ à propinquis & necessariis quenquam redimi prohibuisset, in custodia perierunt. Direpta urbe & arce, in qua armamentarium Regis erat, & omnis generis navalis apparatus, opulentissimam Indicam classem, quæ centies centenis ducatorum millibus æstimabatur, invadere constituerat Essexius: atq; adeo nobile & illustre facinus patratum fuisset, nisi temporis mora consilium diremisset. Adnitebatur Petrus Herrera censor militaris, pluresque mercatores, fortunas suas duobus ducatorum millionibus redimere. Atque adeo Comes secum animo reputabat, providi ducis esse certa pro incertis arripere, nihil tam capax fortuitarum quam mare, fluctuare potissimum cum aquis incertam præliorum fortunam, avidum prædæ militem & victorem nulla autoritate ab opulentis spoliis arceri posse, quis illorum animi potissimum accenduntur. Pactio ita instituta, uti Regiæ naves conditionibus eximerentur. Dum ita cunctando tempus trahitur, jussu Medinæ ducis opulentissima

classis

classis triginta quinque navium incenditur. Vastum illud incendium igneis latissime fudit, flammarumque vorticem fumo immixtum nubibus inseruit, gemebant mali & antennæ, atq; nutante lapsu præcipites jactabantur, transtra & carinæ cum opibus immensis crepitabant, stridebant aquæ, & cum ignibus colluctabantur. Invisum hoc fuit mercatoribus facinus, sed Medinæ dux jussu regio divitias tantas, tertiamque partem maritimarum Regis virium subjicere ignibus maluit, quam hosti tradere. Galeones per pontem excisis columnis evaserunt. Consultatum dein, an urbem, ex qua visceribus admodum Hispaniæ ultima intentari poterat perniciēs, retineri, an deserere re esset. Inclinate eò Comes Essexius cum Magistro equitum Verio, & voluntaria nobilitate, quatuor militum millibus illic sedem figere. Hollandiæ quoque archithalassus militiæ impiger talem stationem non deferendam censebat, quæ opportuniissima esset hosti in propria regione debellando, spem magnam dominationis in manu esse, non debere per ignaviam aut sordidiam bonam fortunam atteri, Regem foras potentem, domi imbellem esse, gentes illas armis non assuetas, animos molles, & fluxos, & jam fama fere bellum confectum esse. Quamquam autem summo opere maximum pulcherrimumq; facinus incipere autor esset Essexius, & jam commeatum urbi inferre tentaret, Houwardus tamen, Præfectus classis, qui semper illius consiliis adversus fuerat, multum refragabatur, neque jussisse Reginam, atque ob dubia tempestatum annonæ militaris difficultatem obtinens. Caterum neque Warmondus audiebatur, qui menstrua alimenta pollicitabatur, posse interea ex Italia, vel

Britannia, prout ventus incidisset, commeatum peti, neque Mauros, quæis continua cum Hispanis bella, denegaturos. Gadibus itaq; dilapsa classis, Pharo urbe ab Hollandis incensâ, cum Olyssiponem, Bajonam, Coronam, aliosque Hispaniæ portus impetere, navesque diripere vel corrumpere pro clive esset, urgeretque Essexius, (quo & vota Belgarum abibant) quamdiu alimenta suppeterent, Hispanicam classem, quæ ex Indiâ septuagies centena ducatorum millia advectabat, juxta Azores, sive Flandricas insulas, expectandam esse, & prævorsis celeritate famæ nuntiis auxiliisque, facile intercipi posse: verum iterum contra tendebat Houwardus, atque invisa æmulatione omnia præclara Essexii consilia suppresserat. Propere itaque relicto Essexio, qui per horas xx & iv solus in mari Oceano agitabatur, domum contendit. Sed Warmondus vago per maria cursu tandem illum invenit, & Pleimuthum usque comitatus ingentes à Regina accepit gratias. Namque eadem officiosis admodum literis Warmondæ Domino Hollandiæ archichalasso retulit, se ex classis Præfectis intellexisse, augustissimam victoriam magna ex parte virtuti, solertiæ & industriæ illius, Belgarumquetribuendam, se multis magnisque tempestatibus fideles socios expertam, jamque antea Procerum in auxiliis suppeditandis alacritatem & liberalitatem sensisse, qui conficiundæ tali expeditioni imensos sumptus toleraverant, nunc vero subditorum tam prolixam fuisse voluntatem, uti pro Regina nullis laboribus, atque adeo ne quidem ipsi vitæ pepercerint. Ingentes quoque gratias agere Præfecto classis Bataviæ, quod prætoriâ navi solum reliquisque destitutum Essexium per maria fluctuantem, cum cursum flecten-

flectendo illum tandem repperisset, incolumem portui restituisset. Tantorum beneficiorum opportuno tempore non immemorem fore. Sub finem anni nonagesimi sexti Hispanus, qui concoquere Gaditanam injuriam nequibat, indignationis impotens, navibus centum octo & viginti, militum quatuordecim millibus, classiariorum ingenti copia, inter quos complures Belgæ ad sacramentum militare coacti, instructam classem sub Martino Padilla mari iterum immittit. Mensis erat November, fœdis ut plurimum tempestatibus hyemans, quo tempore turbidum & vorticosum mare non impune tentatur. Verum tantus fervor erat novi patrandi facinoris, uti æstatem opperiri nimis quam longum videretur. Fama erat Cornubiam Angliæ provinciam peti, quo Hibernis, qui sacra Romana sequebantur, suppetias ferrent, & simul junctis viribus in Britannia rerum potirentur. Alios metus incessebat, ne naveis, quæ modica mole profundum non fatigabant, portibus Belgicis imminerent. Cæterum Angliam peti non dubia fama fuit. Tanta erat victoriæ fiducia, uti Regnum illud in filiæ dotem destinavisse Hispanus referatur. Cæterum quam facile collabescant improba mortalium consilia, maximèque vires, quæ divinâ ope non sustentantur, subito lapsu graviore corruant, summus rerum arbiter ostendit. Sæva enim tempestas, quæ supra modum turgidum mare conciverat, unâ nocte quadraginta naves in brevia, infamesque scopulos ita compegit, ut fractæ super urgentibus aquis cederent. Ignobili morte ad quinque hominum millia perierunt. Vicies quinque centena ducatorum millia hausta memorantur. Diffidentia Hispanorum hanc calamitatem properavit, cum

imminentia pericula Belgæ vadorum circa hæc loca gnari mature prævidissent, & incassum monuissent, quod in avia & syrtes vectarentur. Sero creditum illis, cum clades superasset. Tota admodum periisset classis, nisi nauta Batavus complures præsentem exemisset periculo, quod idem anno octuagesimo octavo solerter factitaverat. Ita nobili classe non ab hostibus, sed à calamitate victa, frustra eam Duinkerquani, ut suas conjungerent copias, expectabant. Nostri autem, ne opportunitatem temporis corrumperent, fortunam experiri ausi, duas naves, quæ ad Neoportum oppidum struebantur, igni subjecere. Anno quoque sequenti non prospere cessit Britannis, Batavisque nova expeditionis, qua circa Azores opulentas insulas, maria rapinis fatigare, imprimis classem Americanam opperiri consilium erat. Navis Regiæ Anglicanæ erant sedecim, viginti Batavicæ sub præfectura Warmondii: sexaginta minores militi & comæatui vectando. Militum sex erant millia sustentandæ terrestri militiæ. Toti classi supremo imperio Essexius præerat, comperto parem potestatem magnis patrandis facinoribus inutilem esse. Cæterum fœda admodum atque horribilis tempestas consilia fregit. Prætoria navis arboribus mutilis, furore fluctuum compagibus solutis, exitio propinquæ erat, tota classis ita lacera, ut vix summa ope aquis exhaustis super fluctus attolleretur, salva tamen post decimum diem in Angliam reversa est. Milite languore morbisque afflictio dimissoque, majoribus navigiis fortunam tamen tentare placuit. Verum iterum tempestate adversisque ventis agitata classis, invadere opulentissimam classem Hispanicam, quæ in Azorum unam se rece-

receperat, non potuit. Treis tantum, quæ devîæ oberrabant interceptæ, quarum una à Batavis occupatâ, dum alteram prædę avidi persequuntur, superatam sibi retinebat Ralegus Anglicanæ classis parti præpositus. Hinc jurgia & contentiones in nervum eruperunt. Caracca ex India veniens propriis ignibus absumpta, ne prædę cederet. Oppidis exiguis, quæ nulla prætexebantur munimenta, incensis, in cæterum improspera hæc fuit expeditio, & virtuti adversabatur fortuna. Gravior fuit Padillę calamitas, qui foedam cladem corrigere cupiens in graviolem incidit. Horridus septentrio totam classem, quæ centum & octo navibus, præter classiarios militum octo constabat millibus, disjecit, dissipavit, galeones tres & sex alias naves, virumque & auri immensam vim profundo merfit. Reversus domum præfectura movetur, atque in ejus locum suffectus Didacus Brocurus. Incerta casuum non tantum infortunio, verum & culpę imprudentiæque, imputata fuere.

C A P U T XXIII.

DE PRIMA VERSVS INDIAM NAVIGATIONE, PRÆLIISQUE NAVALIBUS CVM LVSITANIS ET BARBARIS, ANNO MDLXCV. & duobus seqq.

CUM per rigidam arcton anno MDLXCV & duobus sequentibus, tertium infeliciter successisset Sinas, Moluccas insulas, Indiamque versus Batavorum me-

memorabilis expeditio, ubi non tam cum hominibus, qui nulli reperiebantur, sed cum immanibus belluis ursisque, atque mari congelato, quod glaciali compage veluti edita montium attollebat, pugnatum fuit, eadem tempestate nimirum anno 1610 xcv mercatores nonnulli quatuor naveis instruxerant, ut austrum versus navigando fortunam ancipitem, & longe difficillimam in Indiis experirentur. Maxima illarum erat trecentarum velium, tormenta in universum centum. Quadringentis florenorum millibus classis aestimabatur. Nimirum fata viam invenerunt, & iis quos Rex Hispanica negotiatione interdixerat, penetralia Indiæ divitiasque aperuit. Jam ante quaquavorsum maria navigationibus, commerciiisque Batavorum, Zelandorumque fervere ceperant, & quos Principum iniquitas vel metus opprefferat, ne potentiam suam pelago inprimis utraque India experirentur, nunc lucri inprimis & libertatis avidi, totum terrarum orbem, incognitaque litora lustrabant. Neque frigus, neque incendium æstuantis solis eos territabat. Et, quis credat, hominum septuaginta perpetuo millia in mari habitabant, cumq; illis regionis suæ obtrigisset angustia, animum terrarum mariumque omnium finibus vix terminabant. Præter Europæas regiones etiam in Mauritaniam itum, qua mari Oceano & interiori alluitur. Guineam auri eborisque feracem eadem cupido invasit. Neque America vota interruptit. Nunc in Indico Oceano biennii spatio lustratæ insule, aromatum feraces. Mira autem illorum, qui in Indiam primi navigarunt, abstinencia, & fidei cura. Quandoquidem mandata exceperant, ne primi hostibus vim intentarent, verum sua tantum tuerentur, aperto

aperto mari, quod Africam & Americam interluit, Hispanicam navem opulentam mercibus, à reliquis distractam, quæ extrema expectabat, intactam dimisere. Quoniam autem Lusitanorum insidiis plures asperè nobis difficultates obtigere, velitationes & prælia maritima hic ex ordine proponemus. Prolixis itineribus à Nostreis ad Javam ventum, quæ à Sumatra, quæ veterum Taprobane fuisse creditur, viginti circiter milliaria maritimo itinere distat. Urbium Princeps Banta, commerciis Orientis nobilis. Ubi cum frequentes Lusitani commerciorum causâ ætatem agerent, tum Cæsarem Javanum, tum proregem quotidie precibus fatigare, donis, quibus barbari maxime capiuntur, tentare, invidia & odio pessimis consultoribus perniciem nostris machinari, criminari Nostros, esse illos totius generis humani hostes, omnia maria & terras lucri cupidine infestare, quicquid obvium, haud secus atque avitum, inter se partiri, rapere aliena jus belli vocare. Si nunc ipso initio non cohibeantur, fieri mox posse, ut illo incendio omnia Orientis regna conflagent. His similibusque verbis Cæsarem Javanum, Proregem Bantensem, & Sabandarium, qui à primis consiliis erat, ad nefanda facinora incitabant. Cæsarem promissis eò impulerant, ut sub amicitiae velo Præfectos classis, cum iis qui aliquo munere insignes essent, ad geniales epulas invitaret, &, dum vinum securitatem suaderet, ipsi classem ducibus vacuum armato milite invaderent, præda & merces cunctæ Cæsari cederent, pro navibus tria ducatorum millia persolverent. Cæterum cum insidiæ, quas occulte tentaverat, non procederent, Prorex iusto fœdere commerciorum specie iterum allexit. Verumcum

cum dolis hic omnia componerentur, Præfectusque Houtmannus aliquæ nonnulli detinerentur, post varias expostulationes frustraneas, placuit tandem extrema omnia experiri. Captato itaque à meridie maritimo vento, qui stato indies illic attollere se solet tempore, plenæ velis, explicatis vexillis, litori, quam proxime potuit, propinquantes, tormentis urbem concutere, tecta lacerare, tumultu & metu omnia miscere, rapinis litus infestare, myoparones treis aromatis refertas abducere: altera à Lusitanis incensâ flagrantibus ad urbem ignibus delata fuerat. Prorex ex eo tempore ira & metu anxius insidias tendere, atque ea modo in animo habere, quibus classi extrema intentaret. Houtmanno reliquisque captivis implicitis laqueis gulam frangere minabatur, nisi explosione machinarum nostri desisterent, ab urbe ad stationem suam recederent, prædam restituerent. Perlectis Houtmanni literis cordatè senatus nauticus Proregi rescriptit. Fide, industria, aliisque bonis artibus se nullis unquam mortalium celsisse, cæterum qui nunquam injuriis laceßere alios consueverant, nihil gravius atque injurias ferre. Circumventos se dolis, retentòs popularis contra jura gentium. Ubi omnis fidei religio excessit animis, naturæ ratio dictat, ut vim vi repellamus. Credidimus vos popularium sanguine cruentasse manus vestras, quod ad literas nostras nihil responsum foret. Tacentibus vobis sanguinem expiaturi venimus. Modò intelleximus implicitis collo laqueis extrema captivis vos minari, nisi tormenta cohibeamus, & confestim in stationem veterem recedamus. Sin captivi & merces restituantur, sanctè omnia amicitiae officia pollicemur, sin secus, periculum virium

virium experiemur. Neque verò hæc tam vobis, quam calumniis Lusitanorum tribuimus. Haud facile animus verum providet, ubi alterius partis gratia dominatur. Eligas nunc, an pacem, an arma velis; salubre consilium, ne certa incertis mutes; impone felicitati tuæ frenos, facilius illam reges. Cum ad illas literas iterum Prorex non respondisset, maritimo vento prope ipsam urbem acceperunt, ita ut fundo propemodum ac vado carinæ hæserint. Utrique liburnica quodammodo arenarum syrtibus involvi ceperat. Interea continuus tormentorum furor mœnia & tecta urbis undiq; quassabat. Quibus rebus permota civitas trepidare, festinare, militem cogere, insolito tumultu cuncta miscere, majoribus pilis territi non amplius loco cuiquam satis fidere. Tandem oppidani cum Lusitanis ad arma convolant, celocibusque viginti quatuor, armatoque milite, liburnicam, quam arenæ impactam credebant, invadere tentant. Acie instructa sex à tergo, octodecim à fronte immitunt, certam sibi spondentes victoriam, quod paucio milite insideri navem non ignorarent. Cum iis, qui subsidio venerant, viginti quatuor viri liburnicam contra confertam undiq; multitudinē defensabant. Summo nisu ex arenâ navem eduxerant, quæ fluitans in propinquos & confertim irruentes certos ictus jaculabatur. Depressis aliquot celocibus, hinc ab aquis, illinc ab ignibus, miserabilis mortis imago apparerat. Reliquæ metu territæ confestim in fugam conversæ, ultra centenos partim occisi, partim saucii, nullo nostratium incommodo. Dum ita liburnica, virtute & Diis volentibus, viginti quatuor celoces in conspectu urbis summo hostium opprobrio in fugam agit, plureis cæsos tanquã purgamenta

Q

maris

maris fluctus ad vicina litora volverent, accessit & alia oppidanis calamitas, quòd ex classe nostra, quæ propter vada suppetias ferre liburnicæ nequibat, tanto horrore densissimi globi ex majoribus tormentis in urbem jacerentur, ut undique immenso fragore collisa tecta nequidem refugium fugientibus relinquerent: inprimis suburbium, in quo frequentes Lusitani cum Chinenlibus victitabant, totum pene dirutum disiectumque cum gravi infortunio luctabatur. Neque nocte quies, sed ingeminatus terror. Ponderosissimas machinas centies & ultra explosas constat. Quo negotio vehementer Prorex permotus, multa cum animo suo volvebat. Terrebat eum natura Batavorum, quæ fatigata injuriis, præceps ad implendam vindictæ cupidinem ruit, & vitam atque mortem juxta æstimat. Caterum instigantibus Lusitanis, ut ex Houtmanni literis intellectum, Javani in eo erant toti, ut artificiosis ignibus, machinisque flammæ evomentibus, quæ conficiendis ingenio pollent, classem flammis fœdarent, opprimerentque. Quo comperto, & simul quam grave periculum popularibus immineret, constituit Senatus nauticus iterum Proregem monere, ne nimium Lusitanis, qui calumniandi libidine transvorsæ agebantur, fidem adhiberet; esse hominum genus leve, perfidum, multisque vitiis coöpertum, jamdiu tentasse omnia maria, omneis portus cæteris gentibus præcludere, quinet insatiabili habendi cupiditate flagrare, adeò ut eorum aviditatem ne quidem totus orbis capiat. Altera manu Orientem, altera Occidentem premere. Magnas illi opportunitates in gente Batavorum sitas, quæ fide inclyta regno ejus magno posset esse usui. Proinde si sibi regnoque suo consulere velit, ne

res

res suas fortunasque perditis Lusitanorum rebus immisce-
ret. Ad extremum iterum petere, uti captivi restituan-
tur, neque calumniis Lusitanorum fidem adhibeat. Pa-
cem ante omnia se cupere, quam ut ipse quoque amplecte-
retur, neque incerta pro certis mutet, iplius quam maxi-
me interesse. Prorex, etsi longe alia voveret, ubi se videt
difficultatibus circumventum, neque per vim neque per in-
sidias classem opprimi posse, tandem certis conditionibus
fœdus percussit, captivos liberavit. Interea Malaccâ Lega-
tus venit, qui decem realiorum millia Proregi obtulit, ut
exploratores (ita Hollandos appellabat) vivos in potesta-
tem suam redigeret, aut commerciis, regnique sui finibus
in totum prohiberet. Ita rursus Proregi divitiæ bono ho-
nestoque potiores erant, quanquam consilium illud in-
ceptumque frustra fuerit. Nostri ubi cuncta admodum fœ-
dera ludibrio exponi vident, extensis velis lacatram petunt,
cum jam ante aliquot parones vi armata sui juris fecissent.
Ab uno tamen hostili lembo in aperto mari, antequam de-
deretur, cum Barbari toxico infectas sagittas imbrium in-
morem ejacularentur, nonnulli ita vulnerati, uti nisi carne
& cute excisa curari nequirent. Cum itaque relicta statio-
ne Bantæ, anchorisque levatis lacatram, aliud lavanorum
emporium petiissent, lavæque postmodum litora pede-
tentim legerent, tandem sub tertium Decembris diem ad
Cydaïam anchoras jaciunt. Ibi rursus Barbarorum perfî-
dia in nervum erumpit. Cum enim Sabandarius (princeps
consiliariorum ita appellatur) nomine regis officiose pe-
tiisset, uti classem oculis usurpare fas esset, cujus lustrandæ
desiderio summo opere flagrare Regem simulandi promptus

finxerat, cum revera longe aliter animo agigaret, Nostri pro tempore benigne omnia officia humanitatis obtulerunt. Cum itaque sedulo cuncta nostri paravissent, ut Regem accuratè & liberaliter exciperent, postridie multi lembi paronesque vectorum pleni partim navem Amstelodamum, partim liburnicam petunt. Præfectus Heliuss, & navarchus Scellingerus, qui Amstelodamo præerant, circa foros adventantem, uti arbitrabantur, Regem expectabant, quo solitis officiis humanitatis & blandimentis regem prensarent. Vix nobilium præcipui, cum satellitio navem intrant, quin ferrum continuo stringunt, & primo impetu duodecim conficiunt. Heliuss, cujus partes erant Regi adventanti gratulari, à Sabandario dolone confoditur, Scellingerus quoque letali accepto vulnere exanimis concidit. Nauclero, qui clavum tenebat, intestina ex vulnere aqualiculi in pedes propendebant, quod vulnus quoque Sabandarius intentaverat, cujus animus ferox in eadem promiscuam grassabatur, qui ab uno ex primipilaribus itidem saucio medius transverberatus. Interea qui in navis interiori parte erant, tam nefando facinore exciti, ipsi quoque strepitu & tumultu omnia miscere, contis hastisque occurrentes per tabulata confodere, in superiora eniti, dein gladiis sclopetisque cominus agere, hominesque omnium, quos terra sustinebat sceleratissimos, ad certam mortem adigere: alii transfixi, alii in mare præcipientes agebantur. Quorum fortuna territi cæteri, qui liburnicæ insidias tendebant, summa cum trepidatione agre se receperunt. Iavani plures, qui in litore victoriam sibi certam pollicebantur, navem Hollandiam, quæ vorfus terram ferebatur, fugerati,

rati, læti magno impetu lembis suis insultant, marique se committunt, scelere atque superbia se efferentes, proximam navem primam sui sceleris prædam facere tentabant: cæterum ubi propinquant nostris, longe alia immutata rerum facies, tormentis enim impetiti plures lembi depressi, ex insularis alium alia clades oppressit, ferrum, ignis, mare multos consumpsit. Neque enim pugnandi audacia, neque fugiendi copia erat. Ita perfidiæ pœnas Barbari, quos à Bantensibus & Lusitanis incitados postmodum comperitum fuit, justissime reddiderunt. Domum reversa classis anno 1610 post multas difficultates, damni tamen exors, lucri cupidos mercatores, Hollandos Zelandosque plures, & ex Brabantia extorres facile impulit, uti majori classe certa spe incerta casuum in India tentarent.

C A P U T XXIV.

*EXPEDITIO NAVALIS, QVA AB
ANNO 1610 USQUE AD 1611
OLIVERIUS de NOORT, TOTVM TERRARVM
ORBEM TRIENNII SPATIO CIRCVMNAVIGAVIT,
EIVSQVE CONFLICTVS CVM DVABVS
HISPANORVM CORBITIS
IUXTA MANILLAS.*

INTER Argonautas, qui totum terrarum orbem navigando lustrarunt, aliud cælum, alia suspexerunt sidera, gloriosum quoq; nomen obtinet Oliverius de Noort, Ultrajectinus, cujus vastus spiritus nullis limitibus coarctabatur,

Q 3

fed

sed vagus æquoris hospes, terrarum mariumque ambitu vota sua satiabat, quanquam aliquotiens adversus hostium vires, vel adversus fœdas tempestates eluctandum fuerit. Anno c l o l o x c v i i i Mosæ ostio tribus navigiis, unaque liburnicâ egressus, dubio secans æquora cursu, superato freto Magellanico triennio exacto domum reversus est. Principes hujus expeditionis erant Viri amplissimi, Petrus de Beveren, Hugo Busius, & Ioannes Benningus. Antequam verò Oceanum australem longis admodum itineribus attingissent, multa Nostris aspera atque adversa evenêre, & mox fœda tempestate infestoque mari duabus amissis navibus, virtus tamen omnibus calamitatibus major iisdem accendebatur. Sicut arbores, quæ continuis ventorum flabris agitantur, duriores evadunt, ita neque ventorum neque fortunæ tempestatibus frangitur inconcussus animus, sed robur accipit. Caterum neque fortuna semper nobis iniqua fuit, verum, uti omnium rerum fatalis quidem orbis est, non simpliciter postmodum nobis indulgit. Præter plureis interceptos lembos, prope insulam S. Mariæ navem Hispanicam diu insectati, facile superavimus, quod Franciscus Buarra non in armis sed in fugâ omne præsidium quæreretur, cumque nulla evadendi spes relliqua esset, arbitrio victoris se permitteret. Caterum post discessum Præfati hostilis, quem cum plerisque aliis incolumem dimiserat Imperator noster, ex captivis compertum, auri decem milia & ducenta pondo, quæ tribus cymbis in navem Hispanicam invec̃ta fuerant, in profundum jacta fuisse, idque factum nocturnis tegentibus tenebris, ne ingens vis auri nostro usui cederet. Mox Japoniam versus, atque Manil-

las

las profectis duæ ingentes Hispanorum corbitæ occurrerunt, quas Franciscus Telus, qui nomine regis insulas illas summo cum imperio obtinebat, opprimendis nostris navibus miserat. Cum iis horribilis & longe acerrimus conflictus fuit. Postquam Nostri in Prætoriam hostilem simul cuncta ejaculati essent tormenta, conferta hostium multitudo numero freta summo cum impetu in principem navem se effudit, tantoque furore manus conferuit, uti infra tabulata se noster miles reciperet. Ibi primo commoti aspera sorte, mox vindictæ lubidine incensi, divorsi agitabantur, verum postquam vitam Fortunamque suam in extremo sitam vident, ex periculo ad extrema experiunda adacti fuere. Hastis sclopetisque ex inferiori parte passim occursantes confodiunt, quorum sparsa cadavera aliis terrorem injiciebant. Dum Prætoria hostilis per integrum diem annexa nostræ divelli nequibat, post cruentum prælium fessi fatigatique spiritus utrinque cadebant. Et nostri adversis vulneribus fracti animum jam desponderant, verum Oliverius igneo spiritu extra se raptus, comminatus se pulverem bellicum incensurum, nisi ad restaurandam pugnam properarent: Nondum victores, qui foros transultaverunt, virtute & audacia pelli posse: temeritatem hostium, ubi primum impetum effudit, sibi imparem fore: concumulata cadavera ostendere etiam vinci posse. Et jam fugæ propiores monent vos, quam breves & mutabiles rerum vices sint, modo vos virtutis pristinae memores conferta robora vestra opponatis. Arma viri, ferte arma. Et simul incaluerunt in immensum Martio sanguine sociorum præcordia, secutique Imperatorem suum, qui in agmine,
in præ-

in prælio consultor, & socius omnium periculorum in confertissimam hostium turbam se dederat, tanto insultu dimicarunt, ut viri viris, arma armis innexa forent, neque prius cederent, quam victores, vel adversis vulneribus procumberent. Omnia perrumpit virtus cedere nescia. Fusi, fugati hostes magna strage, & Prætoria hostilis admodum laborabat, quæ arctius fixa divelli nequibat. Tandem densissimus machinarum verberibus quassata ægrè admodum se dimovit, & non multo post derepente aquis hausta pessum ivit, subitoque ab imo usque ad mali culmina gurgite pressa obrutaque fundum petiit. Vectores & classarii cum Duce suo propemodum quingenti præcipiti facto perierunt. Oliverius sex aut septem tantum occisos, vulneratos viginti quatuor habuit. Neque nostra navis ab ignibus immunis, nisi industria navalium extinctum illud fuisset incendium. Cæterum, liburnica nostra, quæ ad duo milliaria longius processerat, à vicaria hostili facile oppressa, cum viginti tantum quatuor viros puerosque contineret, illa autem tantæ esset magnitudinis, ut quingentis ferme armatis hominibus stipata, decemque tormentis instructissima esset.

CAPUT

CAPUT XXV.

PRÆLIA ET VELITATIONES IN-
TER NONNULLAS NAVES CLASSIS HIS-
PANICÆ, HOLLANDICÆQUE,
ANNO CLOIDXCVIII.

DUM Duinkerka prædonum domicilium, & cruentum maris nostri flagellum complures naves, etiam inermes piscatorias raperet, proluxa exaudiebantur passim querelæ, inprimis piscatorum, qui exiguo quaestu vitam tolerantes, non tantum contra incerta caluum, verum ipsam mortem navigabant. Constructis itaque novis navigiis, modica tamen classe Petro Douza viro nobili cura commissa, uti partim egressus prædonum observaret, partim obliquando vagos per mare cursus, in freto Britannico ferociam contunderet, rapinas arceret. Caterum comperto classem Hispanicam milite refertam, triginta octo navium, cujus imperium Pretendona obtinebat, adventare, magna opprimendæ ejus cupidine Douza astuabat. Verum vento acri & secundo turgidis velis ferme integra portum Caletensem tetigit: Nostros enim adversa venti violentia retinuit, quo minus virtutem experirentur. Cursibus tamen obliquis obnisi, paucas hostiles naves, antequam in portum se receperant, litori impigere. Una superata: insolitaque id temporis clementia vitæ classiariorum parci- rum fuit. Non multo post ex eodem portu furtim duæ clapsæ naves mercibus opulentis refertæ, multoque milite

R

stipatæ,

stipatę, qui militię & laborum fessus missionem flagitaverat, in Hispaniam iter moliebantur. Post acrem Batavorum insultum superatę, ingenti prædę cessere.

CAPUT XXVI.

DE NOBILI, SED NON FOELICI EX-

PEDITIONE NAVALI LXX NAVIUM,

SVB PETRO DOVZA PRÆFECTO
MARIS, A^o 1615 xcix. & seq.

Interdixerat fœderatis Belgis Hispanicam negotiationem jam ante Philippus artium politicarum vetus, verum libertas commerciorum in totum non tollebatur, cum sub nomine aliarum gentiũ Fœderati tuto fallerent. Et Rex ipse velle decipi, prudentiam censebat. Cæterum, ubi ille mortalitatem explevit, à successore filio severissima in Hispania-Belgioque edicta promulgata. Retentę naves, bona in fiscum acta, nautarum complures cruciatibus vel extremis suppliciis enecti, vel in carceribus loca humi depressa, inculta tenebris, illuvie atque odore fœda habitabant, alij ad remos damnati miseram vitam trahebant. Albertus quoque severissime edixerat, frustra renitentibus Brabantis, Flandrisque, ne ullarum mercium travectiones fierent, & piscatoribus, hominum generi innoxio, quique ex mari vitam sustentabant, adempta quoque securitas. Patres etsi non modice hâc re commoti, generose tamen consilia in asperiora vorterunt, contrariumque edictum promulgarunt, quo vetitum, non tantum Belgis, sed & aliis populis,

lis, ne ulla commercia in Hispaniam, vel Hispano obnoxias ditiones transvectarent: si qui secus faxint, hostium loco futuros. Missum ad Reges, Principes, & Civitates, quæ commerciis florebant, edicti exemplum, ne ignorantiam obtenderent. Interdictum quoque piscatoribus, ne redimerent ab hoste piscandi necessitatem, sibi præsidariiis navibus curæ fore, ne quid magna piscatio detrimenti caperet. Decretum quoq; classe ingenti ipsam Hispaniam oppugnare, uti primus Rex in suis regionibus damnum sentiret, atq; in propriis visceribus attereretur. Verum ingens pecuniæ vis in eam rem requirebatur, nam pleraque gentes Europæ commerciis illis quæstum facitabant, quibus resisti non nisi vi majori poterat. Accisæ erant ærarii vires, & patrando pulcherrimo facinori facultates deerant. Præter onera navibus imposita inventa ratio pecuniæ conflandæ. Exco- gitata fuit ducentesima, quod tributum tam prompte col- latum fuit, ut plurimi ultro, plus quam indictum erat, per- solverint. Pro tutanda patria, pro commerciis, quibus pes- sum euntibus etiam fatiscibat Resp. veluti certatim effun- debatur argentum. Instructa itaque à Patribus classis LXX navium, quibus additi sena sociorum navalium, & duo mi- litum millia. Summum classis imperium Petro Douzæ militiæ maritimæ impigro, Præfectura militum Stormio da- ta fuit. Cujus rei fama simulatque in Hispaniam pervenit, belli timor insolitus inceserat, plurimi maritimis locis dis- fidere, & in mediterranea se recipere, suo quisque metu pericula metiri. Rex Hispaniæ cunctas, quæ illac appule- rant, naves detinuit, quibus major vis arceri posset, sed mali, rudentes, cæteraque rei navalis adminicula deerant, & pro-

hibentibus Belgis, arcessi nequibant. Mense Majo egregie expedita nostra classis mari se dedit. Mandatum à Patribus, uti Hispaniam, insulasque omnes ejusdem ditionis infestarent, regias in Coronensi portu naves adorirentur, atq; in eisdem disjiciendis corrupendisque fortunam tentarent, classem Americanam investigarent, in omnibus dominationem contunderent Hispanicam. Non ex voto successit tanta expeditio, quanquam ingens damnum Regi inflictum fuerit. In portu Coronensi jaëtis anchoris, eminus tantum tormentis certatum. Classis enim Hispanica sub tutelam arcis confugerat, quò machinis undique detonantibus difficillimus erat accessus, & quanquam incendiariis navibus regias naves corrumpere in promptu esse videretur, Hispanicis tamen portibus insultasse ea tempestate sufficere Præfecto videbatur, ne occasio occurrendi Hispalitanæ classi, quæ Americam petebat, elaberetur. Verum & ea quatrIduo ante solverat. Rectà itaq; in Atlantico Oceano Canarias, quas antiqui Fortunatas insulas vocant, contendit, & primum maximam insularum adortus, ubi post acrem detonantium machinarum procellam una Hispanica navis mersa, duæ virtuti Nostrorum cessere. Exscensum quidem in terrâ minoribus machinis telisq; prohibere Barbari nitebantur: verum tormentis simul excussis, in scaphas expeditus miles cû Imperatore se receperat, atq; ubi ad impervia navigantibus vada ventum, ipse Dux imperterritus primus omnium aquis insultat, neque frigido elemento ignibus virtutis extinctis, tribus vulneribus laucius, in vicinam tellurem se corripit, & hic abrupta militari facundia, aut vincam, inquit, aut moriar, & vos commilitones sequimini, periculum nunc declinare summum

summum periculū est. In manibus nunc omne præsidium, infuga certa clades. Paucis opus erat verbis, cum & propria militum virtus vel etiam pudor idem suaderent. Tria castella insulani multum reluctantibus expugnata, urbs Allagona dedita, prædâ receptâ igni tradita est. Idem fatum Gomera insula & oppidum habuit. Parte hinc classis cum præda in Hollandiam remissa, ulteriora Præfectus petiit, & Guineæ litora legendo in itinere quatuor naves mercibus Hispanicis stipatas velitando interceptit. Exin S. Thomæ insulam sub ferventi linea sitam, quæ præter ardorem propinqui solis cum noxiis admodum colluctatur vaporibus, spe prædæ adiit, castellisque & urbe Pavoazâ potitus, incensa illa, quod non ultra decem ducatorum millia redimendæ illi cives pollicerentur, immensam prædam nactus est. Cæterum pestilens & malignus aër illi regioni incumbit, vultus quoque indigenarum luridi & veluti veneno infecti. Hæc perniciēs insuetos imminentis solis multos rapuit. Intra xiv dies, qui ibi consumpti, milleni in classe periere, qui intolerabili capitis dolore simul cum febrili incendio usque ad insaniam agitabantur, quibusdam præ calore in ipso abdomine liquefactus adeps: tertio plerique antequarto die mortalitatem implebant. Præter vehementem æstum nostratibus insuetum, etiam venenatus aër erat, antequam radiis solis excuteretur, quando domi manendum erat, quod uti neglectum Belgis, ita & intemperantia potus saccharo mixti, cum Æthiopis mulieribus consuetudo, cubile humi captando frigori nocturno, mortalitatem auxere. Imperatorem classis, cujus virtuti torridum cælum invidet, abripuit quoque eadem fatalis necessitas. Adipe lique-

facto (erat enim supra modum obesi corporis) periisse creditur. Cadaveri alte humi defosso, ne postmodum reperi-
tum ludibrio exponeretur, superjectis urbis ruinis paren-
tatum est. Commota hinc pubes nautica & militaris exe-
crari pestilentem insulam: una omnium vox, ut abitur-
mature molirentur, antequam omnes è medio tollerentur.
Neque hic navigantibus malum imminutum, sed contagio
fœdusque odor in arcto navium morbos mortesque sparsit.
Namque ubi ultra quadragesimum & sextum gradum frigi-
dius se aperiret cœlum, uti subita mutatio perniciofa mor-
talium corporibus, derepente languentia plerorumque cor-
pora violentus morbus vel attrivit, vel oppressit. Nume-
rati uno tempore ægri mille octingenti, ita ut præ infre-
quentia una navis deprimenda fuerit. Una densissimis ne-
bulis in Slusanum portum delata, ingenti cum præda in ho-
stium potestatem venit. Eadem fors obtigisset aliis qua-
tuor navibus, sed bellicæ nostræ præpediverunt, una tamen
depressa, alterâ hostis potitus est. Ex omni centurionum nu-
mero duo tantum fuere superstites, quibusdam navibus vix
sex integræ valetudinis viri numerabantur. Infelix quidem
hæc fuit expeditio, sed præda tamen sumptus fere æquavit.
Atque Hispanus, qui classe iterum Anglos Belgasque ten-
tare in animum induxerat suum, votis excidit. Audito enim
Canariam insulam à Nostreis occupatam, atque ulterius in-
Americam Belgas contendere, Rex Adelantadum, penes
quem classis imperium erat, Terceram proficisci evestigio
jubeat, uti Americanæ classi, quæ immensas vectabat opes,
obviam iret. Cæterum illi, prope Terceram fœdis jactati
tempestatibus, dispersiq; : plures navium mersæ, alię quassę
diver-

diversis temporibus Hispaniarum portus appulere. Atque ea tempestate admodum regie potentie fama deminuta est, qui cum ab ortu ad occasum late regna possideret, divitiis, quae prima mortales censent, affluerent, vix tutari domi sua poterat, atque prohibita in Hispaniis Belgarum negotiatione Remp. obstinato animo perditum iverat, atque Orientis & Occidentis invadendi cogitationes Foederatis ultro indiderat.

C A P U T XXVII.

*LEGIERII PRÆLIVM CVM SEX
SPINOLÆ LONGIS NAVIBVS, ITEM
ALIÆ VELITATIONES, AN-
NO EODEM.*

AD DUXERAT Fredericus Spinola ex Hispania in Slosanum portum sex longas naves, quae homines admodum mille & sexcentos, tum milites, tum servos remis impellendis, aliisque ministeriis suctos vectabant: quae primo adventu non modicum terrorem mercatoribus, & Zelandico litori, damni non multum intulerunt. Verum ubi fama, quae adventare classem Hispanicam operosae molis disperferat, evanuit, paucio milite contusa fuit Hispanorum confidentia. Posteriores vix credent Legierium centurionem hominem infractae virtutis, & promptae audaciae, solum sex hostilibus navibus circumventum ita dimicasse, ut per-ruperit totam aciem, hostibus insignem calamitatem inflixerit. Captato caelo, tranquillo & strato aequore cunctae admodum longae naves, praeter ordinarium militem e praesidiis

fidijs mille & ducentis assumptis, Legierii navim, qui classi
 Zelandorum vicaria potestate præerat, tanto impetu adortæ,
 ut in omnem partem retinaculis annexæ viderentur, ferali-
 bus ignibus tormenta undique quaterentur. Hostiles naves
 ultra bis mille & octingentos homines vehebant, Legierius
 septuaginta tantum homines numerabat. Propinquæ no-
 strorum bellicæ naves placido mari nullisque ventis agi-
 rato, & advorsu æstu suppetias ferre nequibant. Legierius
 itaque solus imperterritus fortissime rem gessit, atque fistu-
 lis propinquantem hostem ita excepit, ut eundem post dua-
 rum horarum certamen cæsis ccl viris in fugam infami
 dedecore egerit. Ipse vulneratos, aut interfectos xxv tan-
 tum habuit. Neque minus hostium naves quassatæ à tribus
 postmodum bellicis nostrorum navibus, quas simulantes
 se mercatorias esse, spe prædæ aggressæ fuerant. sex admo-
 dum horis in conspectu Vlissingæ nunquam vehementius
 dimicatum est. Victæ eodem anno debellatæque vel astu
 vel virtute naves aliquot, quod obiter memorare pretium
 esse operæ duxi. Mense Junio, duæ Hollandorum naves,
 quæ à Rege attinebantur, profugère, & cum tertiam par-
 tem, Hollandorum captivi facerent, singulari virtute subito
 in nautas & ministeria Hispanica insilientes pluribus con-
 fossis, reliquos in fluctus præcipites egere. Eadem tempe-
 state quinæ quoque bellicæ Hispanorum debellatæ, captivi
 omnes in patibulum acti. Unam haud procul Norvegia
 depressæ molis bellica navis, mercatoriam simulans supera-
 vit. Alteram Cloierus expugnavit admirabili fortuna, cum
 enim vixdum connexis navibus homo præcipitis audaciæ
 primus in foros hostileis transfiliisset, interea navim non-
 dum

dum harpagonibus alligatam, ventus in diversa rapuit, & centurionem in hostium potestate reliquit. Sed omnino cuncta pubes hostilis, rata cum centurione cæteros quoque socios navales eodem impetu transulasse, infra tabulata se commiserat. Interea, antequam rescirent, Nostri conversis velis suppetias tulerunt. Memorabilis quoque virtus fuit mercatorix Enchusanz navis, quæ à quinis Duinkercanorum acriter impetita, & harpagonibus retenta, hostem, qui in superiora jam se receperat tabulata, incredibili fortitudine depulit: namque singulari prudentia majorem medii mali antennam, ne præcideretur, catenz suspensam alligaverant, & cancellos acutis clavis confixerant, ne quis temere ulterius transcenderet.

C A P U T XXVIII.

*CONFLICTVS HISPANICÆ CLASSIS
CVM NOSTRIS SOCIETATIS ORIENTA-
LIS NAVIBVS, ANNO MDLXI.*

SI C U T I difficillima cunctarum ferme rerum initia sunt, Ita Nostri in Indiâ multis circumventi difficultatibus, imprimis Lusitanorum artibus, qui maxima ope nitebantur, ambiebant, fatigabant passim Reges, ne commerciis illic Nostratium nova sedes aperiretur. Verum agendo, vigilando omnes ærumnas eluctati, tandem advorsa Fortunæ superavimus. Uti cæteras expeditiones prætermittam, rebus feliciter & ex voto cedentibus, anno millesimo sexcentesimo primo tredecim instructæ naves ad Indos missæ
S
crant

erant ex tribus conflatę societatibus , quatuor Jacobus Heemskerckius , totidem Johannes Grenirius , quinque Volphardus Harminius imperabat. Invisa hac Regi Hispaniarum , qui avidus dominationis , potentię , divitiarumque , Orientem hactenus & Occidentem velut utraque manu complexus , Regibus Principibusque terrarum formidabilis erat. Cæterum ubi res mortalium ad summum fastigium venēre , dominandi impotens libido , fœda avaritia , superbixque comes crudelitas imperium tenent , exiguis momentis , etiam ab invalidis , summa imis confunduntur. Videbat Rex , nisi Batavorum navigationes præciderentur , vacillare fortunas suas , interiora viscera discerpi , sine quib; vitalia Reip. non consisterent. Classis itaq; tredecim navium , quę mole , milite , commeatu instructissima erat , mari magno nostris navigiis , quę octo tantum jūcta numerabantur , (cætera namq; inquieto pelago jactata longius aberant) occurrit , quibus virtus & audacia abunde supererat , cæterum navium mole , milite & commeatu ab hoste superabantur. Verum nostrę naveis agiles , expeditę , huc atque illuc facile vorti circumagique poterant , hostiles mole sua laborabant , & velut reluctantibus aquis pigre agitabantur. Itaq; cum Nostri viribus nequirent , velocitate freti certis ictibus tormentorum hostem verberabant , summaq; iterum celeritate hostilem impetum eludebant. Pilę hostiū grandiores vel supra minores naveis , vel præter volitabant. Ubi vires modicę , consilio & sagacitate juvandę , quibus plura sæpe perfici , quam armis , periculo & negotiis compertum est. Summa itaque celeritate sequi , atque iterum se subducere , non minus sed eminus dimicare consilium firmum stetit , ne
magni-

magnitudine hostilium navium, & multitudine armatorum hominum obruerentur. Magna utrinque virtute & alacritate dimicatum fuit. Dissonis militaris & nauticae juventutis clamoribus, continuis machinarum verberibus tremefactum inhorruit mare, strepitus permixtus hortatione, gemitus ad cælum ferri, telis, cadaveribus naveis utrinque constrate, atque inter ea horribili spectaculo sanguine fluitantia tabulata. Tandem hostium vicaria, & liburnica nostra ita dedolata, ut aquam immodicam haurirent, fatigatæque pugnando deficerent, ita receptui signo dato pari ferme sorte recedunt. Paucitas tamen Nostrorum, virtus, confidentia, quæ confertissimam hostium multitudinem aspernabatur, in immensum illorum gloriam auxit.

CAPUT XXIX.

*PRÆLIUM VOLPHARDI HARMINII,
QUI ANNO MDLXII CUM SUMMO CLASSIS
IMPERIO IN INDIAM MISSVS FVE-
RAT, CVM CLASSE LVSI-
TANORVM.*

VOLPHARDUS Harminius anno sexcentesimo & primo cum imperio navibusque aliquot in Indiam missus fuerat, uti difficultates Indicorum commerciorum perrumperet, quas inter dubia hætenus discrimina immensarum divitiarum spes pensabat. Cæterum cum ad Sundæ fretum pervenisset, ex Chinenſi parone comperit, Bantamum à Lusitanorum classe, cui imperabat Andreas

Fortado Mendoza, arête obsideri. Constabat hæc classis hostium Lusitanis militibus octingentis, Indis supra mille quingentis præter navalem pubem, octo majoribus navibus, triremibus viginti, quæ in eam rem expedita erat, ut Batavi, quorum industria in commerciis obeundis facile omnium artes superat, turbe pellerentur, cives & incolæ vel prolixis pollicitationibus, vel si id minus succederet, per vim & arma ab eorundem societate avorterentur. Interea Harminius, quanquam quinque tantum naves suppeterent, quæ ferebant homines circiter trecentos, ita ut prætoria hostilis sola plures numeraret, communicatâ cum concilio militari causâ, nihil agendo domum reverti turpe & inglorium judicabat. Ipse militiæ exactus, virtute & ingenio pollens, prorsus intentus omni modo pubem militarem accendebat. Regulus & cives Bantensium, qui ante annos aliquos Lusitanos expulerant, validâ classe triremes invaserant, omnesque internecioni dederant, se patriamque suam ad extremum armis tegere in animum induxerant suum, atque ideò ingenti diffundebantur gaudio, quod junctis nobiscum viribus obviam nunc ire tantæ potentiæ non diffiderent. Quippe insolens superbia, immanis avaritia, crudelitasque Lusitanorum invisa indigenis, qui apud illos fidem, pietatem, postremo honesta atque inhonesta omnia, quasiui esse non ignorabant. Uti autem Batavorum virtus in his oris semper Lusitanis formidolosa fuit, ita nunc iidem extremam fortunam experti. Primo aggressu continuis & certis tormentorum explosionibus, mobilitate navium fissus, classem Lusitanicam fatigare Volphardus studuit, mox etiam propius adortus duas triremes, & naveis
insu-

insuper tres , tam incredibili impetu insultavit, ut victoris lubricini cederent. Plures aliæ machinis convulsæ depressoque , aliis ipsi Lusitani violentos ignes injecerunt , ne in nostrorum vel Bantensium potestatem redigerentur. Reliquæ , quæ fœdâ fugâ se receperant, Amboynam versus vela sinuarunt , ubi plures insulanos, quod cum Nostreis commerciorum iis intercessisset necessitudo , crudeliter obtruncarunt, succisique caryophyllorum arboribus spem fructuum in posterum barbaro ritu ademerunt. Volphardo victori occursare passim cives Bantensium, immensis in cælum laudibus tollere , alii fulmen belli, alii liberatorem suum indigetare : undique lætitia permixtusque gratulantium strepitus. Ipse Rex immensas illi gratias egit, immodicisque honoribus auxit. Ille autem mortalitatis memor, animi modestus, Deo Imperatori, qui nutu suo omnia temperat, gratiam tribuendam publice decrevit.

C A P. X X X.

*VARIÆ VELITATIONES SPILBERGII
CUM LUSITANORUM NAVIBUS.*

ANNO 1610 C I. & seq.

GEORGIVS Spilbergius, virtute militari multisque bonis artibus pollens, omnem industriam intendebat, ut in India commercia Nostratum promoveret, malas artes Lusitanorum corrumperet, vires contunderet, profligaret. Pericula longi itineris, quas oras appulerit, cum

S 3

rege

rege Candesiæ, qui illum summopere suspexit, nova fœdera, multa insuper alia, quæ referre nostrum negotium non est, editis diariis continentur. Velitationes nonnullas, & diversos in Lusitanos insultus memorare, id otii atque negotii mei esse duco. In abitu quidem (anno autem sexcentesimo primo se mari dederat) cum ubique fortunam urgeret, & oblata casu consilio rationique subjiceret, primus illi circa Promontorium viride cum tribus Lusitanorum navibus, quas caravelas indigetant, conflictus fuit. In portu Dalensi stationem illæ ceperant, atque adventantibus Nostros excussis machinis ingenti turbine globorum ferme obruerant. Etsi autem militibus cupido pugnandi flagraret, Imperator tamen noster providendo, consultando, cunctando portum omnibus communem violare nefas duxit. Cæterum iterum atque iterum irritatus, ingens animus, injuriarum impatiens, memorabile incepit facinus. Namq; sine ullo militari tumultu, vel tormentorum explosione, liburnica sua unam hostilium ex improviso aggreditur, innexisque navibus prompta militum manu hostem fatigat, urget, atque extrema molitur. Cominus res gladiis telisque promiscuis agitur, pro se quisque ferit, vulnera edit, perturbatos atque alios alibi resistentes interficit. Hinc inde clamor virum, dum nostri acriter instant, hostis contra nititur, & iniquam sortem superare contendit, ad extremum victo propior ingenti terrore agitabatur. Ubi duæ reliquæ hostiles naves vident sociorum rem in extremo sitam, suppetias ferendo majori vi atque potentia bonam occasionem Nostris corrupere, quo minus victoriâ uterentur. Eodem itinere cum ad Ceilon insulam perventum esset,

esset, amicitia regis Fimalæ, qui Lusitanos regno suo ejectos propulsare animo ardebat, Nostris admodum opportuna fuit. Imperator noster, quò certo experimento Regi probaret, se quoque Lusitanorum infestum hostem esse, in gratiam ejus treis illorum naveis, quæ in propinquo morabantur, facile superavit, & Regi incensis navibus captivos tradidit. Eadem expeditione cum prope Sumatram insulam Britannorum classi, cui præerat summo cum imperio Lancestrius, Nostris se junxissent, ingenti studio adnitebantur, uti potentiam Lusitanorum contunderent: comperto autem corbitam ex S. Thomæ insulâ mercibus onustam in propinquo esse, cursu duplici maria iterabant, ne opima illa præda elaberetur. Conspecta procul vela omnium spem atque animos intenderant. Itaque ex sententia Lancestrij omnibus rebus paratis compositisque, Spilbergius Præfectus cum centurione Britanno cursum velocissimè eo properant: inprimis quia multum diei processerat, ne obscuram noctem pro præsidio hostes captarent. Reliquæ naves, ne hostibus fugiendi copia esset, diverso itinere fortunam maris experiebantur. Cumque nocte illi densæ tenebræ cuncta tegerent, à nostro Generali cymba armato milite referta investigando præmissa, signo ignibus dato ingentem corbitam esse nunciavit, interrogatosque classarios quinam essent, silentio transegisse. Imperatum Nostris fuerat, si adversa pars percunctaretur, fingerent se classem esse Andreæ de Fortado, qui circa Malaccam, Sundam, & Moluccas exterarum nationum negotiationes armata manu prohibere summopere nitebatur. Ad extremum ubi hostis extremam vim parari animadvertit, coactus

ctus rerum necessitudine, ad prælium asperrimum se accinxit. Quanquam autem per treis horas tormentorum, incerta jactarentur verbera, & obscurum noctis, horrorem ingeminaret, hostis tamen duabus navibus circumventus se suaque ingenti discrimine tutabatur. Adventantibus etiam cæteris navibus per totam noctem intonuere machinæ, multi ex hostibus confossi, vel saucii cum ultimo spiritu luctabantur, ipsa corbita admodum lacerata, amplius adversus vires nostras contendere invalida, cū sua conflabatur calamitate, ubi dies primum appetebat, versus Malaccam vecta, circa Darienses insulas fessa & nimis quam quassata animum despondit, velaque submittendo, arbitrio victoris se permisit. Sexcentis illa hominibus, inter quos pueri mulieresque, referta, mille & quadringentorum vasorum capax, merceis copiosas stipabat. Quam luculenta præda fuerit copia mercium ostendit, quæ transferendis per octiduum classiariorum impensæ fuere operæ.

CAPUT XXXI.

*DE OCTO LONGIS HOSTIVM NAVIBVS DEPRESSIS VEL CORRVP-
TIS, ANNO CLO LCCII.*

ADVEHERE in Flandriam octo longas naves infestandis Zelandorum oris tentaverat Fredericus Spinola, Ambrosii frater. Nongentos milites virtute validos qua Hispanos qua Lusitanos, mille & quingenta servitia classis numerabat. Verum ea fere tota præceps ierat, fœdis pressa cala-

calamitatibus. Duæ naves à Britannis in Lusitania prope munimentum Setubalis incensæ fuerant, reliquæ in faucibus freti Britannici gravissime exceptæ. Regina enim Elisabetha tres illic naves, uti hostiles opperirentur, locaverat: quâs accesserant quatuor Batavorum, præter eas, quæ Flandriæ oram tenebant. Manselius Eques, qui præerat Britannicæ navi, cui Spei insigne erat, & pinassam comitem habebat, maxima spe medium fretum inter Doveram & Caletum secabat, ne improvisus hostis elaberetur. Neque procul aberant duæ Hollandicæ, quæ fiducia plenè Reipubl. juxta ac sibi consulebant, neque alio animo quam cum victoria prælii eventum expectabant. Cæteræ in Dumeni statione anchoram fixerant. Tertio admodum Octobris die circa meridiem Manselio visæ hostiles naves, quæ Britannicam oram legendo silente cælo evadere tentabant, quod densior nebula ulteriorem conspectum inhiberet. Neque tamen, uti ex captivis postmodum relatum est, configere cum Nostreis hosti animus deerat, sed Reginæ sublimior navis, quæ veluti castellum mari imminebat, horrorem incusserat: retrorsum itaque remos agitando, obscuro noctis hac vel illac Neoportum vel Duinkerkam se recipere posse sperabant. Verum Manselius evestigio Nostros ad Flandricam oram adventum triremium monuerat, & binæ Hollandicæ usque ad extremum dici breves cursus obliquando, ne elaberetur hostis, providebant. Reliquæ, quæ in Dumeni statione sedem fixerant, explosis tormentis monitæ, uti vento se committerent. Hinc nocte cadente, vela iterum hostes intenderant, quos æquo cursu nostri sectabantur. Manselius ad Gallicam

T

oram

oram cursum flexerat, ut Flandriam petentes interciperet, exin audito fragore tormentorum, versus vada, quæ Goeingæ appellantur, navigavit, ut hosti occurreret. Exceptæ primum hostiles naves à Dunensibus crebris tormentorum ictibus, sed ulteriorem conflictum positis ventis tranquillum mare diremit. Interea effugio hostes remis maria torquebant, & concitatore cursu agebantur, sed surgente iterum vento nostræ velivolæ naves quantum poterant insectabantur. Juxta Goeingas Manselius unam longarum navium triginta simul explosis tormentis ita quassavit, ut rupta antenna multi è medio sublatis, plurimi saucii horribilem ediderint clamorem: jamque adeo victa, nisi propinquæ quinque triremes suppetias tulissent, cum quibus omnibus simul certamen inire non consultum videbatur, quod ingenti militum copia stipatæ essent. Interea quatuor Hollandicæ naves sequendo hosti incumbebant, & prope Grevelingam hora decima nocturna plenis velis nave quadringentorum vasorum in unam trirēmium Gerbrandus Salius fertur. Illam fractâ puppi, lacerato clavo, vasto hiati mare absorbuìt: trunca tabulata, avulsa puppis, Oceano fluitabant: juncta calamitati alia calamitas, duobus enim ante tormentis, quæ globos ferreos ad viginti quatuor pondò ejaculabantur, ita excepta, ut morientium & sauciorum gemitus & ejulatus horribilis exaudiretur, & quasi una mortis species non sufficeret, hinc ignis, illinc aqua extrema intentaret. Centurio noster, implicitus sua navi alteri hostili, metuens ne multitudo militaris propriam navim obrueret, velis ruptis ab eo cursum deflexit. Verum eadem triremis (quæ Lucera appellabatur) ab Hartmanno & postmodum

modum iterum à Salio nocturnis tenebris dure excepta, tandem dehiscens media nocte cum pleraque juventute fundum petiit, ingens clamor & planctus ad astra tollitur, unusquisque lethi fugam quærit, neque invenit, ubique mortis dira imago ante oculos versatur. Præter navarchum Johannem Enoutum, qui primo conflictu lacera puppi in Hollandicam navem transilierat, & publi nauticæ se immiscuerat, quadraginta Hartmannus centurio incolumes recepit. Nocturno hoc impetu magna hostes cepit consternatio, festinando, agitando omnia, hac atque illac se vertendo, & timorem & periculum auxerant. Idem enim fatum longæ navis, cui Padilla nomen erat, cui Johannes Cantius, qui vicarium in classe imperium habebat, extrema intulit. Præter ducentos cæteri aquis merfi: quod plures non reciperentur, periculum verabat, ne multitudine hostili obruerentur. Reliquæ virtute nostrorum centurionum ita fuere quassatæ, ut duæ in litus Flandricum actæ restaurari nequiverint; una ad Caletum naufragium fecit profugo milite, Spinolæ autem navis etsi ægre fluctuaret, bonis in mare jactis, servis libertate promissa, Duinkerkam appulit. In his autem devictis navibus longis plurimi Belgæ intolerabili servitute remigia egerant. Præcipue Cailliadus centurio, qui præerat triremi Luceræ, quæ prima à Salii naui impetita præceps fundum petierat, gubernatorem navis, quâ Salius ferebatur, captivum antea dure admodum habuerat, qui pedibus machina ablati mortalitatem misere implevit, dum paulatim dehiscentem cum militari pube navem suam conspiceret. Ita crudelitatis summus minister à Deo immortalis punitus, uti à servo

quondam suo, nunc vero gubernatore, extrema illi incumberat calamitas. Fata nimirum viam inveniunt, dum caeleste illud numen tacito impetu omnia ad se trahit, & veluti connivendo pro tempore criminibus, postremo graviori pœna moram pensat.

CAPUT XXXII.

*DE PRETIOSISSIMA LUSITANO-
RVM NAVI, QVAM CARACQVAM INDIGE-
TANT, ABATAVIS SUPERATA.*

ANNO CLIO IO CII.

DIFFICILLIMA quæque virtuti jugique industriæ cedere Indica à Fœderatis suscepta navigatio abundè ostendit. Nimirum animus ingens supra sortem positus, ubi virtutis via ad gloriam potentiamque grassatur, etsi reluctantibus mortalibus, sibi ipsi imperium constituit. Multotiens Lusitani Barbarique Batavis perfidiæ incautis specie amicitiae, qui proclivis est decipiendi modus, imposuerant, nefariis cædibus tumultibusque omnia miscuerant. Verum perniciofa lubidine paulisper usi, suis victi fuere artibus. Nostri rebus florentibus cum Regibus Principibusque Indiæ societates novas inierunt, atque adeò Rex Achemi (est hæc Sumatræ urbium facile Princeps) quo præsentè Houtmannus primus Indicarum navigationum autor anno CLIO IO XCIX à scriba transfossus fuerat, multumque sanguinis fusum, Legatos ad Fœderatos Proceres Principemque Mauritium stabiliendæ amicitiae misit. In itinere
juxta

juxta Helenę insulam occurrit ingens Caracua Lusitanica, quæ margaritas & pretiosa mercium ex Goa vectabat, quadringentis hominibus stipata, septendecim æreis machinis instructa. Nostre binę naves, quīs præerat Laurentius Bicquerus, vix centum & viginti viros numerabant. Una navium nihil hostile molita, hostilibus machinis excepta, nonnullis casis vulneratisque, quamquam virium impar concoquere talem ignominiam requibat, & integram horam suis contra nitebatur machinis, donec altera, cui Zelandia nomen, adventans suppetias ferret. Quibus prædę & vindictę cupidis, quę animi mortalium supra modum incallescunt, ingens audacia increverat. Junctis itaque viribus tanta fiducia vincendi hostilem corbitam adoriuntur, uti illa, cum effugiendi copia non esset, præsse versus insulę litora se reciperet, ne ab illo latere circumveniretur. Cæterum Zelandi, quibus nihil mari intentatum, solita solertia littus corbitamque inter se medios dedere, perfossamque & anchorariis funibus incisis fugientem insecuti, vela, rudentes, atque armamenta pertundentes, tandem ad deditionem coëgere, cum ipsa corbita ad tredecim pedes aqua hausta exitio propinqua esset. Victi ita vitę conditionem accepere, ut nihil margaritarum, pretiosarumque mercium occultarent, atque uti per triduum continuo sentinam moverent, cui negotio & Nostri, ne pretiosa navis fundum peteret, nonnullis quoque mercibus in profundum jactis, summa ope incubuerunt. Corbita ipsa ad quindecim millia florenorum æstimata fuit. Quicquid hominum erat, ad insulam, quæ Ferdinandi le Rona nomen acceperat, expositum. Extra-

bulatis lacere corbitę constructâ naviculâ, Præfectus in Brasilię continentem, quę octuaginta hinc dissita milliari-
bus, iter expedivit, quo cætera juvenus navibus eodem ab-
duceretur. Ingens hæc hostium calamitas: neq; tamen hic
subtrahenda Præfecti hostilis virtus, an ex indignatione ani-
mi ferocia, qui, ubi cognovit paucitatem victorum, ulro
mortem affectavit, rogans uti Nostri in cæteris fidem ser-
varent, ipsum fistularum globis è medio tollerent. Quip-
pe judicabat cuncta mortalium fluxa brevi dilabi, egregia
autem facinora & virtutem etiam post mortem immorta-
lia esse. Cæterum virtuti ille honos datus, ne jura gen-
tium violarentur: & ferox nautica pubes, quę extra con-
ditiones nemini parcebat, devicto quamvis ultrò petenti
extrema intentare, grave dedecus flagitiumque judicabat.
Nostri cum pretiosissima corbita incolumes in Zelandiam
appulere, Legati Regis Sumatræ liberaliter admodum ex-
cepti, adducti in castra Mauritiï, qui Graviam urbem ob-
sidione premebat, attoniti moles operum insuetas illis
gentibus spectabant. Principi Legatorum, Abdulzamat
nomine, qui mortalitatem paulo ante impleverat, hone-
stissimis exequiis publicum monumentum Medioburgi ere-
ctum fuit. Cujus honori Epitaphium ipsum hic subscri-
bere visum fuit.

HIC. SITUS. EST.

ABDUL. ZAMAT. PRINCEPS. LEGATIONIS.

A. REGE. TAPROBANÆ. SEU. SUMATRÆ.

SOLTAN. ALCIDEN. RAETRA. LILLO. LAHE. FELAUAM.

M. I. S. S. A. E.

AD.

AD. ILLUSTRISS. PRINCIPEM. MAURITIUM.

CUM. DUABUS. NAVIB. ZELAND. QUAE. IN. DEDIT.

ACCEPERE. LIBURNICAM. LUSITANICAM.

VIXIT. LXXI. OBIIT. ANNO. CLIO. I. C. II.

PRAEFECTI. SOCIETATIS. INDICAE.

H. M. P. C.

CAPUT XXXIII.

FREDERICI SPINOLÆ CVM ZE-

LANDIS NAUALE PRÆDIUM.

ANNO CLIO I. C. III.

FREDERICUS Spinola quietis ingloriæ impatiens, quæque ex virtute famam inclutam captabat, ingentemque animum incultu atque socordia torpescere non permittebat, octo longas naves, minores quatuor, populandæ Zelandicæ oræ ex portu Slusano in mare eduxerat. Obsederant portum tres bellicæ, quibus vicaria potestate imperabat Justus Morus, duxque longæ naves; qui ubicunque aliquid infesti oriebatur, illic adversus vim armatam parata habebant præsidia. Quarum quatuor (quinta vento iniquo longius aberat, tormentorumque usui tantum inserviebat) ultro obvias dissono nautico clamore, quo initia præliorum accendi solent, bipartito Spinola adoritur. Favebat patrandò facinori cælum tranquillum, constatumque sermenæqnor leniter spirantibus auris, remigiis idoneum: aderat præter nauticam turbam, hominum armatorum multitudo

titudo (mille & quingentos jactulatores nonnulli numerant) qui tubis globorum procellam confertim jaculabantur. In Batavorum classe præter classiarios triginta tantum sex milites è Vlissingano præsidio, mentis igneæ, tuborumque flammam ostentabant. Spinola igitur & navium & virorum multitudine circumvenire nostras nitebatur, & crebro insultu modò hac modò illac circumcursabat. Zelandi, qui ferocia ex mari contractâ obdurato animo contra omnia pericula obnitebantur, jam ante metum mortis, quam hostem vicerant. Illi modò propius, modò longius machinis contra niti, armis hastisque cominus vulnera intentare, furioso insultu cunctos territare. Nubes atra ex fumo cælum mariaque obduxerat. Claro die tanquam intempesta & tenebrosa nocte, incerto prælii eventum, per duas horas dimicatum. Ipse demum Fredericus, victoriæ supra modum avidus, & præceps ad explendam animi cupidinem hostili puppi insultat, plurimis vulneribus, etiam mutilo brachio, animam cum sanguine expiravit: cæsorum numerus incertus, alii enim octingentos, alii trecentos tantum numerant. Pauci admodum ex Nostris desiderati, quod densior illorum navigiis compages jactus machinarum eluderet. Cæsâ tantâ hominum multitudine, laceris trirēibus, fractis remis, ingens incēsserat hostem consternatio, ne adventantibus ex Zelandia navibus, queis summo cum imperio præerat Haultainius virtute & genere nobilis, circumveniretur, atque extrema pateretur. Itaque rectâ per aquas eluctati portum Slusarum petunt. Hac victoriâ terror longarum navium, quæ nostro mari insuetæ remigiis agitabantur, evanuit, comperto etiam

silē-

silentibus ventis, quo tempore nulla velificandi est opportunitas, vinci debellarique posse.

CAPUT XXXIV.

IACOBI HEEMSKERKII CVM LV-

SITANORVM PRETIOSISSIMA COR-

BITA PRÆLIVM, ANNO

. CLOIOCIH.

MEMORABILE quoq; illud prælium Jacobi Heemskerckii cum corbita Lusitanorum pretiosissimâ silentio transmittere nefas duco. Acceperat hæc onus Malaccæ, (quod oppidum apud Cantonem amnem in imperio Sinenfi Lusitani precario tenent) & pretiosissimis mercibus stipata carinam fatigabat. Merces omnes ultra quatuor miliones fuere æstimatæ. Ipsa navis centum & quadraginta vehium ostingentos viros, inter quos centum fœminæ, vêtabat. Cæterum quicquid magnis impensis Divûm largita fuerat indulgentia, id una dies dissipavit & potentioribus tribuit. Namq; ipsa Malaccam rectâ petens, freto inter eandem & Sumatram medio, duabus forsan modicis Heemskerckii navigiis, quæ ducentos tantum continebant milites, occurrit, atque ex suo veluti castello Nostros despectans, securâ prælii extemplo classicum canere, sanguineumq; à puppe vexillum expandere instituit. Contemptus hostium frequens initium calamitatis, & superbia ut plurimum primo impetu flaccescit. In tanta rerum humanarum volutatione, pugnæque maritime cum mari suo fluctuantis in-

certitudine, exiguis momentis summa imis vortuntur. Nostris sola fortitudo munimentum inexpugnabile erat, quam qui pectori suo circumdedit, securus in hac vitæ obsidione perdurat, & per aspera eluctatur. Atque hoc tum in aliis, tum in hoc prælio periculo rei compertum fuit, quantum valeat laecessita virtus. Quò enim minores vires, eò acrius furioso quodam impetu ipso initio incubnit nautica & militaris pubes. Et vicit quoque fortuna nostra, quæ nitenti, laboranti, ut plurimum succurrit. Continuis enim machinarum verberibus lassata hostilis corbita, tandem uno alteroque loco ingenti ruptura ita perforata, ut jam gurgitem aquarum immodicum hauriret, atque extenso candido vexillo supplex se suæque omnia potestati victoris permitteret. Ex Lusitanis septuaginta cæsi, reliqui, uti conventum fuerat, terræ expositi.

CAP. XXXV.

*STEPHANI VERHAGII PRÆFECTI
IN INDIA CVM LVSITANIS PRÆLIA.*

ANNO CLIO C IV. & seqq.

PRÆFECTUS Stephanus Verhagius, qui summo imperio classem duxabat, anno admodum millesimo sexcentesimo tertio mense Decembri in Indias ablegatus fuerat, uti crebris novisque expeditionibus hostem fatigaret, conficeretque. Quippe juxta Proceres, penes quos suprema Reip. cura, Mauritius Princeps, ingens consiliis, invictus bello, qui vincendo vitæ spatium æquaverat, quæ

quavorum mare commerciis & armis penetraverat, & cum oriente Sole famam quoque terminaverat, auctoritate sua summopere res Indicas promovebat. Ex diversis corporibus Fœderati Patres societatem fecerant, cui soli publico nomine commercia tractandi potestas data. Collata à civibus ad sexagies centena millia. Ex quo tempore ita lassatus Oriens navigationibus, uti nervi potentia Hispanice succisi, opes Regis exhaustæ fuerint, commerciisque Indicis usque ad invidiam Batavi florent. Continuo Patres successus successibus urgendos, quò à Belgis hostilia avorterentur, dissitis terrarum lacerandam regis potentiam censebant. Hinc classes classibus junctæ, maria pene ultra solis ambitum ac metas navibus constrata, continuo hostem lassabant. Inter cæteros Verhagius initio itineris sui varia & ancipiti fortuna usus. Ad insulam statim Mosambicam Lusitanis occurrens, navem ebore onustam expugnavit, vacuumque ignium furori reliquit, & mox quinque alia minora navigia instar subiti fulminis repente prostravit, cum vix hosti contra feriundi aut conferendi manum copia esset. Goam prætervectus non minimam civibus injecit consternationem, præsidarii omnes in armis, classis triremium in procinctu, cæterum se periculis objectare non ausa. Unam tamen navem mercibus probe onustam offendit, verum ubi Arabicam esse Meccâ profectam animadvertit, liberam dimisit. Hinc Cananoris pram legens, & postmodum cum Malabarum Rege ad Calicutum percusso fœdere, Sumatram, atque inde Bantamum contendit. Ibi commodum Lusitanica navis, quæ magnam vim pulveris pyrii cum annona militari vectabat,

bat, Ambonamque petebat, intercepta. Et mox Ambonæ propugnaculum, quod Lusitanus infederat, Gubernator, dum tumultu improvise, atque incertâ formidine cuncta turbarentur, nullum insultum operiens æquis conditionibus dedit. Neque verò hic trahendum tempus esse ratus Imperator, quod fama in rebus prosperis validissima esse solet, Tidoram petiit. Cumque ex advorso arcis Tidorænsis naves appulissent, per tubicinem deditionem confestim postulavit. Cæterum præfidiarii, quorum spectata virtus, fidei & obsequii in regem suum gloriosa erat constantia, ingens illud flagitium ducebant, si non usque ad extremum spiritum defensionis incumberent. Propter litus juxta castellum duæ naves Lusitanicæ magnæ stationem ceperant, quas inprimis debellandas censebat Imperator. Ablegatus eò cum duabus navibus Joannes Mollius vincendi animo, qui primus ad victoriam gradus est, ingenti impetu hostes aggreditur, neque asperitas loci aut insolentia intrepidum militem territabat. Neque hosti animus deerat sua defendendi, machinisque majoribus & minoribus acriter nostros fatigabat. Horrendo strepitu tormentorum mare vicinumque litus circumtonabat, pluribus armati cadebant, idem tamen fervor, eadem ferocia gliscbat. Igitur eò intentior Præfectus ad victoriam niti, omnibus modis hosti imminere, opportunitates omneis captare. Ad insultandum scaphas undique armaverat, quibus undique naves cingebat: Lusitani tandem oppressi, cum nullum in fugâ præsidium esset, incompoliti, quæ pedes ferebant, divorsi in mare insilientes, naves diripiendas nostris reliquerunt. Per aliquod tempus fluctuasse animo

vide-

videbantur, an ignes navibus subjicerent: inventi enim plures igniti funiculi, stupæque incendiariæ jam paratæ, uti pulveri pyrio injicerentur. Nostri tormentis inde majoribus duodecim & nitrato pulvere suas in naveis translatis, igne easdem accensas ventorum simul & aquarum ferocia commiserunt. Neq; tamen hisce consternatus præsidarius miles, qui propugnaculum obtinebat, verum eò magis contra adversa virtutem firmabat. Rex Taranatensium quatuordecim navigiis, quæ singula centum & quadraginta armatos viros continebant, in subsidium venerat, qui, ubi se terræ dederat, impediturus erat, ne Tidorensis Lusitanis suppetias ferret. Interea Johannes Mollius simulatque cum centum & quinquaginta armatis vestigia terræ pressisset, duos vicos incendere, quo late formidinem incuteret, munitione factâ tormentis arcem ferire, ipse cum duobus militibus per insidias nocturna tempestate castellum explorare. Comperto continuis machinarum ictibus quassatis manibus aditum patefactum, incitare postridie militem, uti acri in arcem insultu virtutem solitam exercent, arce patefacta Lusitanis præceps exitum imminere. Jamque adeo ipse Mollius imperterritus cum sex septemve militibus arcem superaverat. Cæterum jam intra mania erecto Auriaci vexillo, Lusitani ex editâ turre infensi ardentibus pilis nostros territare, fortunam præclari facinoris urgere, omni modo eniti, uti Nostri iterum arce expellerentur. Mollius, cum in turba cadens dextrum crus fre-gisset, vexillo quoque ignibus scædato, ad munitionem reverti coactus. Interea idem crure licet fracto, animo tamen validus & impiger, accendere iterum militum ani-

mos, hortari, urgere singulos, ut nunc forti paratoque animo essent, ferro iter aperiendum. Non virtutem, sed paucitatem obstitisse, quo minus consummarent victoriam. Nunc centum & quinquaginta armatos homines propulsare hosti fatigato grave atque iniquum certamen fore. Ita Nostri incitati, postquam majore vi hostes urgent, undique clamor ingens oritur. Cæterum præsidarios asperimur prælium non territabat, sed infensi intentique eminus tela jaculari, occurrentibus vulnerare, denique Nostros expellere. Cum non opportuna hæc res cecidisset, naveis ad machinas excutiendas reversæ, turrim potissimum, unde ardenteis pilas Lusitani torquebant, continuis ictibus verberabant. Erat in illa turri ingens vis tormentarii pulveris, qui partim incuria hostium, partim continuo machinarum impetu subito ignem concepit, horribilique spectaculo simul cum viris turrim in sublime jactavit, tanto fragore, uti dissilire terrarum compages videretur, mare & tellus late contremiscerent, & veluti per attonitas nubes lapides, arma, tela, viri, trunca capita, artusque late dispergerentur. Ita Castellani repentino metu percussi sibi suisque deditione consuluerunt, cum Batavi novum insulsum tentarent. Ipsa arx diruta & solo æquata, Tidoræ rege, qui nova cum Batavis fœdera simulabat, postulante, quam tamen servari, præsidioque augeri satius fuerat. Lusitani, quorum quingenti adhuc cum uxoribus & liberis numerabantur, naviculis tum ad alia loca, tum maxime ad Philippinas delati.

CAP.

C A P. XXXVI.

*PRÆLIVM NAVALE INTER PETRVM
CUBIARRAM PRÆFECTVM CLASSIS HI-
SPANICÆ, ET HAULTAINIVM ZELAN-
DIÆ ARCHITHALASSVM,*

ANNO CIO IO CV.

PEREGRINUM militem, qui duodecim constabat centuriis, rebus firmandis tutandisq; in Belgium transferre Regi consultum videbatur. Conductæ Olyssipone decem naveis, vectandis mercibus suetæ, celocesque aliquot, quò milite refertæ tutius imponent. Classi præerat Petrus Cubiarra, militiæ Sarmientus ejusdem prænominis, militiæ impiger & vetus tribunus. Vere adulto sub finem mensis Maii simul cum aliis compluribus onerariis navibus mare ingressus, duodecimo die Junii propter Britanniam velis impellebatur. Quo comperto Zelandiæ archithalassus Haultainius, in parteis consilii convocato Joanne Gerbrandi, qui secundam in classem potestatem obtinebat, constituit, quadripartito classem distribuere, binæ alæ Doveram & loca inter, quæ Cingula vulgo indigent, Swarttenessam & Caletanam rupem, præpedirent, ne Flandrica litora Hispanus attingeret, ceteræ juxta Britannicæ oram, si illac appelleret, hostem opperirentur. Binæ naveis hostium, quæ onerarias se dissimulabant, binis nostratium circa Cingula occurrant, jussuque, uti hostileis vela submitterent, hosteis primo surdis ad postulationes auri-

auribus, silentio cuncta transigebant, dein, ubi nullum effugium vident, ex fistulis militaribus densam glandium procellam in nostras naveis immittunt, quis & damnum modicum infixere. Nostri machinis omnibus admotis ita intonuerunt, uti navium una globis perforata, rimis fatiscens, ne aquis absorberetur, precipitem se in vicinumlitus egerit. Pluribus cæsi, cæteri nando, aut scaphis Anglorum excipientibus, evasere. Aliam navem juxta portum Doverensem cum duæ Zelandicæ premerent, sicco arenarum simul hæserunt. Cæterum hæc leviores ultro fluitantes, haud difficulter vadis emergunt, atque acerrimo insultu hostilem oppugnant, capiuntque. Cuncti, uti jussum fuerat, in profundum precipites aguntur. Prolixe milites, & quidem veterani, cum ingloriam inter aquarum vortices mortem imminentem spectarent, de Fortuna sua conquesti, dictitantes, se, quod difficillimum inter mortales, mortem aspernari, verum hoc dolere, se veteranos milites, totiens adversa & secunda ancipitis belli expertos, non ferro non acie occumbere, qua liceat etiam ante extrema vindictam sui agere, & mutuis vulneribus cadere, verum aquis gloriam militarem simul cum vitâ obrui. Cæterum nullis verbis fleæti misericordia potuit, aded uti & illi qui occultati fuerant eidem violento fato cesserint. Supraducetos miserabili sorte aquis hausti periêrunt. Postridie & aliæ naves eadem ferocia superatæ, una incensa inter aquas & igneis luctabatur. Ex captivis bini quique à tergo sibi invicem alligati in mare jactabantur. Quod cum unus indignatione æstuans oculis ardentibus conspiceret, memorabili facinore, non opus esse inquires vinculis hostilibus,

stibus, præcipiti gradu in mare sponte defiliit, & gloriæ avidus mortem sibi liberam properavit. Reliquæ naveis etsi supra modum quassatæ, plurimis cæsis faucibusque, (quippe continuè tormenta nostra fulminabant) vento ferente ægre portum Doverensem tetigere. Ex arce Britanni acriter majores globos in Nostros jaculabantur, quod juxta litus portumque suum prælium conferere illicitum dictarent. Accusantibus postmodum Anglis jura portuum violata, responsum à Batavis, impetum præliorum, quando mens concita & extra se posita hosti incumbit, cohibere non esse in manu pugnantis, hostem, se non verò vicina telluris respexisse. Hæc clades dimidiam partem virum naviumque consumpsit. Qui superstites terram tetigerant, litore tenus in tuguriis degentes, omnium inopes, miserabilem vitam tolerabant, complures vulneribus vel morbis confecti, inter quos & ipse Cubiarra, extremum diem clausurunt.

CAPUT XXXVII.

LAMBERTI PVLCHRI CVM PRÆTORIA DUINKERCAÏORUM MEMORABILIS CONFLICTVS,

ANNO CLIO ID CV.

LAMBERTI quoque centurionis, cui Pulchri nomen adhæsit, pulcherrimum & memorabile facinus hic subtrahendum non videtur. Treis naves hostiles, infestando mari & prædæ infectandæ, mense Decembri Duinkerca solverant, inter quas Prætoriæ Adrianus Theodori militiæ ma-

X

fitimæ

ritimę vetus infractęque virtutis , summo imperio præerat. Joannes Gerbrandi , qui inter Nostros vicariam mari dignitatem obtinebat , juxta cum Lamberto vestigia premens , insectandis navibus frustra ex parte operam intenderat. Duabus elapsis , Prætoriam Lambertus sero dici nactus (erat is Decembris undecimus) primo tormentis utrinque tonantibus , dein retinaculis injectis mascula virtute cominus prælium occepit : bombardis , ensibus , lanceisque , quęque alia instrumenta furor militaris ministrat , acerrime dimicatum , ita ut sanguine fluitantia tabulata tingerentur , cadavera in mare volverentur. Neque tamen hostis animum despondit , adversis vulneribus plerique cadebant , cæterum ubi & Joannes Gerbrandi adventaret , insertaque antenna anterioris veli posticę arbori , eandem frangeret , Imperator hostilis ventre tenus lancea transfossus terrorem auxisset , deditio properata fuit. Ex captivis octuaginta novem (centum & viginti sex armatis viris navis stipata fuerat , cæteri occubuerant) sexaginta infœlici ligno suspensi , cæteri vel veniam meruerant , vel ad supplicia ducti , renitente nemine , evaserant. Ex Nostreis treis tantum cæsi , duodecim cireiter vulnerati fuerunt.

C A P. XXXVIII.

*MALACCÆ OBSIDIO , ET PRÆLIVM NAVALE INTER MATELIVIVM ET
LUSITANOS , ANNO 1515 CVI.*

REx Hispaniarum , cum quaquavorsum non tantum publicis Nostratum , verum etiam privatorum opibus

bus fortunę ejus, quia sol oriturque caditque, lacerarentur, viscera ac nervos imperii, quib; universum ferme orbem territabat, præcidi summopere indignabatur. Neque enim amplius nomen regium ac splendor se sustentabant, cum Batavi, Mattiaciq; mari innutriti assiduo contactu lucri ac successu utrumque solem fatigarent, neque ultima terrarum, ipsiusque naturæ occultantis ac fugientis abdita à rapinis prohiberent. Anno itaque millesimo sexcentesimo & quinto severissimum edictum promulgat, quo Hollandis Zeländisque sub pœna capitis, atque amissione bonorum, utriusque Indiæ navigationem interdixit. Caterum frustra prohibet, qui inhibere nequit, neque bella minis sed viribus geruntur, sustentanturque. Atque aded, uti omnia fortitudo periculorum secunda perrumpit, eò acrius invictus animus atque lucri ingens cupido, quæ omnium mortalium inprimis mercatorum animos in transvorsum rapit, ad fortunam ulterius experiundam summopere stimulabant. Eodem itaque anno Curatores societatis rebus suis intenti novam classem expedire, neque sumptibus neque laboribus parcere, atque ut animo cupienti nihil satis festinatur, omni ope niti, ne cunctando bonam occasionem corrumperent. Instruētissima itaque classis navium duodecim mari committitur. Præfectus illi erat Cornelius Matelivius, militię impiger, quem societatis quoque consortem non tantum publica sed & privata commoda summopere incendebant. Et vix ea solverat classis, cum anno proximo sub imperio Pauli à Caerden octo naves iterum commeatu, & milite probe instructæ in Indiam missæ, ut in præsidiis ibi vitam agerent. Magna quippe consilia,

ubi mature perpensa, impetu valida sint, cunctatione languescunt. Caterum de Matelivio ejusque molimine, & cum Lusitanis acri prælio, nonnulla hic in medium adducere, res ipsa & locus postulat. Cum itaq; anno clō lō c vi sub finem Aprilis ad auream Chersonesum, in cujus extremitate ad maris sinum Malacca obtenditur, classem appulisset, contra hanc Lusitanosque periculum facere audax illius consilium fuit. Cum autem proxime ad urbis mœnia accedere nequiret, frustra machinarum verberibus impetebat. Rex Ihortanus, qui Nostris fœdere junctus erat, cum aliquot triremibus bis mille Æthiopes subsidio miserat. Octingenti, qui in tellurem se dederant, suburbio incenso incolas in ipsam urbem se recepisse compererunt. Nostri nihilominus cum auxiliaribus Indis oppidanis imminere; verum ubi propius accessissent, ibi verò præsidarii Lusitani virtutem ostentare, urgentes pellere, maxumâ vi cadere, ita ut plureis Nostrum fauciati, vel letaliter icti occubuerint. Pulsis tamen in urbem Lusitanis, quatuor suggestibus in ipso suburbio erectis, machinarum nostrarum strepitus ad cœlum ferri, horrendoque mugitu pilas ingentes in urbem eicere, promptis paratisque ad arma præsidariis, qui mœnia defensabant, & undique sua tela jacentes vibrabant. Ubi neque ita res procedit, & classis Lusitanica Goâ quotidie expectaretur, machinæ bellicæ cum fauciis, & ægris ad naves reductæ. Caterum trecenti in litore relictæ strato per fluvium ponte proximum cœnobium invadunt. Hinc ulterius meridiem versus, infesto per paludes itinere, centum & quinquaginta nostrates cum quadringentis Æthiopibus, derepente opportuno loco castra metati sunt,

sunt, quâ urbs minus valida invia paludum prospectabat. Oppidani, qui se locorum asperitate satis munitos credebant, insolita re perculsi nihil ex virtute militari intermittere, Nostri contra niti, namque ibi propugnaculo subito excitato tormentisque dispositis, frustra tamen deditionem postularunt. Hinc per occultos tramites nocturnis tenebris tecti loco, qui vix sexaginta passus ab urbe distabat, vallum dimidiatę Lunę formâ tanta celeritate excitarunt, uti ope diuûm aggestus illuc cespes videretur. Dum ita hostibus imminet, magnitudo tanti incepti adventu Lusitanę classis suppressa, quę robore militum & magnitudine navium ferox perniciem Nostris moliebatur. Quamquam autem militaris pubes, quę immensâ cupidine incepta patrandi exagitabatur, divelli se inde ægre pateretur, tamen & commune periculum & pugnandi iniqua necessitudo eos ad naveis reduxit. Ubi Fœderatos se recipere Lusitani animadvertunt, Civitas ingenti gaudio permota virtutem intendere, nostris tanquam victis insultare, castris direptis deprehensos cadere: verum ubi Nostri advorsa iterum corpora ostendant, turpi fuga quinquaginta plus minus cassis in urbem acti. Ita insectandi cupidine festinatum prælium pari celeritate & formidine deseruerunt. Dehinc Nostri naves ingressi, levatis die decimo & septimo Augusti anchoris, hostili classi obviam eunt, quę quatuordecim immensę horrendęque molis navigiis, totidemque minoribus, nec non triremibus quatuor, pigro motu ipsi Oceano gravis aquas pulsabat. Summum in illam imperium Prorex Goæ obtinebat. Ille, uti secura est credulitas, viribus fretus victoriam animo volutabat, ipse imperterritus, atque

imperandi in iis locis vetus. Naveis, quæ è vasto mari tanquam castella eminebant, multis tormentis graveis, continuis machinarum ictibus nostris erant terribiles. Centum & quinquaginta ictus eâdem vespërâ intremiscente Oceano numerati. Postridie, cum una ex Nostrarium navibus, cui Nassovix nomen, à cæteris foret sejunctior, cui propter malaciam maris difficulter succurri poterat, hosteis opportunum circumveniendi illam tempus rati, facibus infestisq; ignibus propemodum obruerunt, ita ut classarii, cum res suas afflictas viderent, scaphis ægre periculum effugerint. Ipsa quoque Matelivii Prætoria navis, cum aliâ, cui Medioburgum nomen, à tribus majoribus Lusitanorum navigiis circumventa, ferme cum exitio luctabatur, nisi adventantes socii ignita tela in unam Lusitanarum tam confestim ejaculati fuissent, ut exorto incendio, horribili spectaculo, ignis magna vi agitatus obvia quæque corripere. Ita imperator, qui & fortiter rem gesserat, præcis anchoralibus funibus, furori ignium se subduxit. Cæterum Medioburgum navis ita arête duabus hostium innexa erat, ut dissolvi nequireret, & simul cum hostibus violentis ignibus deflagavit. Classarii nostri pleriq; imminenti se subducere periculo, Lusitani igneis vitando, & in profundum profusientes contrario elemento perierunt. Prælio hoc usque ad medium diem prolato, reliquum tempus reparandis navibus, quæ utrinque supra modum labefactæ erant, datum fuit. Die deinde vigesimo Augusti, Imperator hosti, qui anchoris fixam classem tenebat, occurfare atque ad prælium laceffere in animum induxit suum; eò magis, quod militaris pubes eò sponte ferebatur, qui omnes labores & peri-

pericula consuetata habebat, tum quod illi, qui inferunt periculum, fortiores videantur. At Lusitani, vel quod formidine agitantur, vel quod non satis reparatis navibus magis opportunum tempus opperirentur, Malaccam vorsus tendērunt. Nostri interea apud vicinos Reges divortere, cuncta officia humanitatis intendere, providere ne quid hostis rerum novarum moliretur, reparandis navibus & com meatui operam summa vigilantia præstare, saucios & ægros reficere, denique nihil militaris exercitii intermittere. Lusitani deinceps relictis ad Malaccam septem navibus, cæteris probe expeditis mari se committere; Fortunam iterum experiri, atque extrema Nostris intentare. Nunquam enim magis impigre ad certamen itur, quam ubi pro imperio, salute, divitiis, quæ prima mortales ducunt, dimicatur. Baravi intellecto hostem in propinquo esse, expeditâ classe occursantes, ingens horridumque prælium iterant. Imperator cum duabus aliis navibus, Lusitanorum navem, quæ paululum separata à sociis iniquis fluctibus agitabatur, summo impetu adoritur, superat, in profundum protrahit, occisisque pene omnibus, sociis, qui in altera navi erant, comburendam relinquit. Ab altera parte, Præfectus qui vicarium in classe nostrâ imperium obtinebat, à duabus Lusitanicis corbitis apprehensus, non prius utramque reliquit, quam una igne corrumperetur, altera continuis machinarum ingentiumque pilularum verberibus perforata, atque armamentorum usu destituta temere per incerta fluctuum oberrans, & mox iterum comprehensa eandem sortem nacta fuerit. Et Fortuna hostibus adversa non simpliciter nobis indulgit. Namque

que & altera Dīs faventibus summa vi & virtute militari Nostratum expugnata, in potestatem nostram venit. Ita rebus afflictis, metus ingens & consternatio hosteis concussit. Interea Imperator animo fluctuans, cum ad portum Malaccensem cursum flexisset, an reliquas hostiles naves, quæ ibi sedem fixerant, adoriretur, Lusitani, qui omnia extrema metuebant, navibus suis igneis immisere, pulcherrimo Fœderatis spectaculo, qui quæ vix sperare ausi, hosteis faces propriis navibus injectantes oculis usurpabant. Ita terribilis classis, quæ viribus suis tumida & ferox extrema minabatur, funditus deleta, ingens gaudium Batavis cumulatò auxit. Primores ex captivis sex millibus coronatorum redempti, gregarii, cum Nostris, qui Malacæ in vinculis erant, permutati.

CAP. XXXIX.

*GEMINA EXPEDITIO GVLIELMI**HAUTAINII, ET PROPŒFECTI REINERI**NICOLAI MEMORABILE PRÆ-**LIVM, ANNO clō lōcvi.*

INITIO hujus anni nobilem classem viginti quatuor navium Batavi expederant, uti sub imperio Hautainii vel Americanam classem interciperent, vel Lusitanicis, quæ in Indiam iter moliebantur, exitum præcluderent. Hautainio ventis advorsantibus, & iniquo mari tardum iter, ex direptione mercatoriarum navium, & populationibus vicinorum litorum, præda haud modica suppetebat. Lusitanicæ
naves

naves mare ingredi non aufæ: de Americanis nuntii allati, unam argento stipatam funesto prælio Batavicæ implicitam simul conceptis ignibus conflagraſſe, treis fœdis tempeſtatibus depreſſas, quatuor Havanæ portu opum inanes (hoc enim ſubdole addebatur) navigandi opportuna tempora opperiri. Ita alimentis quoque deficientibus, quia vectoriæ noſtræ naves obluſtantibus ventis adferre nequibant, maturatus in Patriam abitus. Æſtate inclinante novata iterum ſub ejuſdem Hautainii imperio navalis expeditio, uti viginti quatuor navigiis, quorum ſex tempeſtas in divorſa abripuit, adventanteis ex India & America naves exciperet. Caterum ex improviſo Ludovicus Fiaſciardus octo galeonibus, quarum moles ferme invicta terrorem incuſſerat, occurrit: aderant præterea plureis longæ naves, ſed quæ propter aſperitatem venti inutiles juxta litus ſtationem elegerant. Hic erat ille Fiaſciardus, qui inermibus ſeptem navibus, quæ ſali quærendo deſtinatæ fuerant, juxta Americæ inſulas ſuperatis, crudelitate nobilis quæſitiſſimis ultimis ſuppliciis in nautas ſævieraſ. Vnam galeonum ferocia horridus ille Præfeſtus in Zelandicam vicariam, cui Regnerus Nicolai præerat, impingit, tanto vicinarum navium horrore, uti propius accedere non aufæ pugnam ex longinquo aſpectarent, & mox oborta nocte ingenti dedecore retrò cederent. Regnerus tanto periculo à ſociis relictus, quanquam extrema imminere non ignoraret, fretus tamen ſua militumque virtute, quantum poterat armis contendebat. Atque adeò ſolus per duos integros dies, arbore diſjecta, nave ſupra modum truncata, plerisque ſociorum cæſis, impiger animi, conſilioque potens hoſtilem

Y impe-

impetum sustinuit. Denique, dum ceteri suppetias ferre cunctantur, metuendumque esset, ne navis lacera fluctibus ingruentibus deprimeretur, ne ab hoste gravius in captivos consuleretur, Imperator, classariiue extremum ausi facinus, ultro horribile genus mortis, incenso nitrato pulverere, elegerunt. Primo itaque supplices Deum immortalem precati, quod mortem, ne ludibrio & crudelitati hostium se sisterent, prævorterent, tandem veluti à supremo numine impetrata venia, se suaque omnia, funiculo ignito pulveri immisso, ignibus feralibus subjiciunt. Dissiluisse immenso fragore compages & tabulata navis, mali antennæque in sublime raptæ, miserandaque fortuna truncata corpora, sparsim disiecta, ex alto iterum mari injecta fluitabant. Sexaginta homines violentia fati oppressit. Duorum semiustulata corpora in hostilem navem dimissa, horrentibus tale spectaculum ipsis hostibus, veterem in vultu ferociam, moriendique contumaciam retinuerunt. Ita neque victi ab hostibus, de ipsa morte, à qua ipsa natura cuncti admodum homines abhorrent, triumphum egere.

CAPUT XL.

DE NOBILISSIMA VICTORIA IACOBI HEEMSKERCKII IN FRETO TARTESIACO CIRCA GIBRALTARAM,

ANNO MDLXVII.

CONVENERANT Patriæ Proceres ad petitionem Archiducis, uti de pace, induciisve colloquia conferrerentur

rentur, verum jam ante classis triginta majorum minorumque navium mari commissa, uti ipsos Hispaniæ nervos peteret. Princeps classis erat Iacobus Heemskerckius, navigatione ad Polum arcticum nobilis, quique ante tres annos in India ingentem corbitam Lusitanorum, quæ ultra milliones aliquot æstimabatur, incredibili virtute duabus minoribus navibus expugnaverat. Cæteri omnes præfecti classiarii que, tanquam Argonautæ, mari & procellis innutriti, ab horrido elemento marinam fortitudinem conceperant, & periculorum consuetudine omnia pericula contemnebant. Inerat Imperatori contemptor mortis animus, præliorum maritimum sagax, victoriæ avidus, sine temeritate audax: atque adeo vultu ad civilem vitam commisso intimis pectoris penetralibus militarem virtutem occultabat. Ipse victoriam certam sibi spondens, non tam pecuniæ, quam ingenti animo aspernabatur, sed heroicæ gloriæ avidus, nullum affectaverat stipendium, nisi partem demum octavam ejus prædæ, quæ quinquaginta florenorum millia excederet. Vigesimo & quinto die Martii Tessalia classem solverat, decimo Aprilis Tagum flumen, quod ultra Ulyssiponem in mare Oceanum excurrit, penetraverat, eo animo, ut naves Lusitanorum expugnet, deprimeret, fœdaretque. Sed comperto corbitas plerasque se mari dedisse, & quæ secuturæ essent, nondum paratas, sedecim Galeones Indiam Occidentalem, decem cum pluribus aliis bellicis Fretum Tartessiacum petiisse, ut navibus mercatoriis Belgarum, quæ ex mari interno Oceano se committerent, insidias tenderent, huc continuo vela direxit, prout venti ferrent, modo Mauritaniæ, modo Hispaniæ

spaniæ oram propius accedens. In faucibus Gaditanis, concilio militari inito, visum neutiquam dies prolatando, opportunitates corrumpi oportere, primum consulto, dein mature facto opus esse. Decretum itaque, uti Præfectus Heemskerckius, & centurio Lambertus, cui Pulchri nomen adhæserat, vir natura imperterritus, vehemens, & manu promptus, simul in Prætoriam navem impetum facerent, Propræfectus Alterassius cum centurione Brassio vicariæ Hispanicæ classis se innecterent, atque ita juxta ordinem singulas bini adorirentur, præterea uti duæ celoces cum actuario navigio post principia starent, & huc atque illuc se vortent, quo hostileis naves, si elaberentur, oppugnarent, annonariæ naves extra certaminis periculum consisterent. Addidit Præfectus homo militariter facundus masculam orationem, qua singulorum centurionum, sociorumq; virtutem incendebat, uti fortitudinis pristinæ memores generosum, & nunquam antea tentatum in ipsis Hispaniæ finibus secū facinus aggredierentur: præstare emori per virtutem, quam socordia atque ignavia tam bonam occasionem corrumpere: victoriam in manu esse, si modo vincendi animus adsit. Difficile esse Batavis mari non vincere, quibus ubiq; virtus Fortuna non simpliciter indulisset. Hoc demum prælium cruento bello finem impositurum. Naviū magnitudinē ne extimescerent, quæ pigro motu exitio propiores essent, easdemq; certis tormentorum ictibus fatigari posse. Adesse hosti milites maritimis præliis insuetos, heic nautas marisq; indigenas pugnaturos. Nunc hoc agendum, ut serio Hispani, pacem, quam affectare videntur, cupiant, honestasque condiciones offerant. Non tam Imperatorem
se, quam

se, quam militem; uti Principem classis, ita principem in-
 adoriendo futurum, se modo sequerentur; timidis cuncta
 adversa, in præliis audaciam pro munimento esse, plura non
 addere, ne de virtute dubitare videretur. Assensere cuncti
 centuriones, sociiq; & sacramento se obstrinxerunt, nunquā
 se mandatis Imperatoris defuturos, pro victoria vitam &
 mortem juxta æstimantes, vel hostium vel mortis victores
 fore. Quibus peractis tormentorum præfecto impera-
 tum, ne, antequam archithalassi Hispanici lateri proxime
 adhereret, ulla tela nisi ex contiguo in hostem jacularetur,
 neque proreta prius anchoras jaceret, ut gubernator ipse
 clavum dirigeret, denique promissi Philippei centum illi,
 qui primus aplustre Imperatori classis Hispanicæ sustulisset.
 • Hinc implorata cælesti ope, cum pro more in signum fide-
 litatis & constantiæ singuli vini haustum sumpsissent, plenis in
 classem Hispanicam velis vigesimo quinto die Aprilis delati
 sunt. Consistebat illa juxta urbem Gibraltaram in Freto
 Tartessiaco, (veteres Carteiam appellabant montis Calpes
 radicibus adsitam, ubi ille se theatri in speciem cavans tu-
 tum maris recessum navibus exhibet) navium numero &
 robore, denique militum frequentia formidabilis. Na-
 ves majores viginti & tres, inter quas novem galeones, præ-
 ter negotiatorum aliquas, quæ antea prædæ cesserant. Classi
 præerat Ioannes Alvarezius Avila, militiæ maritimæ vet-
 tus, & quondam Ioannis Austriaci in Naupacteo prælio co-
 mes, cujus prætoria ingentis molis octingentorum vaso-
 rum erat, & præter classiarios quingentis stipata erat mi-
 litibus, instructa viginti & uno tormentis æneis, horror &
 propugnaculum Oceani: tota classis ultra quatuor millia

hominum numerabat. A propugnaculi quoque grandioribus machinis, ubi juxta stationem fixerat, multum solatii expectabat. Ubi Alvaresius nostros adventare vidit, illorum conatus Hispanico supercilio ridebat, sicuti regiæ potentia ministri regiones quoque sibi arrogant spiritus, ante victoriam tumidi, præferoces, atque adeò vinci posse contumeliæ ducunt. Iudicabat ille totam Batavorum classem ne quidem cum sua Prætoria comparandam: percunctatus nautam Batavum, quem forte captivum habebat, ecquid tantum facinus ausuri Nostri viderentur, responsoque, se vel populares suos non nosse, aut præliandi animo mox præsto futuros, indignans animoque æstuans, tam præceps & temerarium consilium, ut illi videbatur, ludibrio habuit. Verum arrogantia mox in metum cessit, cum enim extensis velis recta in Alvaresium ferretur Prætoria Nostrorum navis, dissectis anchorariis funibus in interiora se recepit. Prætervectus Heemskerckius proprætoria hostilem, quæ cum tribus galeonibus principia jam tenebat, maximo insultu Principem classis aggreditur. Hinc circumfuso vasto clamore nautica pubes utrinque fremere, hostis primo in Nostros globos jaculari, sed nullo fere detrimento, contra Præfectus noster tormentis, quæ ad proram posita, graviter hostilem navem quassare, denique jactis anchoris se eidem innectere. Tum horribile spectaculum unusquisque edere, plures utrinque vulneribus acceptis non tantum cum hoste, verum etiam cum morte colluctari, niti modo ac statim concidere, amputata virorum membra passim jactari, & quia recentibus & calidis vulneribus non sentiebatur dolor, mutili quoque arma non omittebant, do-

nec

nec languentes effuso sanguine corpus inclinarent, atque procumberent. Nunquam majore virtute pugnatum. Dum utrinque tela volant, secunda hostili explosione majoris tormenti globus, juvenem, qui ejaculari sclopo suo ferrum tentabat, medium secuit, Præfecto totum fere sinistrum pedem à superiori parte laceravit, ita ut subito laberetur, eodemque ictu dextra manus alteri ablata, qui tormentum fune ignito accendebat. Ita invictus animo Imperator, virtute nulli secundus, lorica indutus, gladium dextra vibrans, certus victoriæ, ne quidem à morte victus, ingenti spiritu fatali necessitati cessit, neque virtus ante, quam vita illum destituit, atque adeo, antequam mortalitatis leges imple-ret, imperandi sortem in persequenda victoria alteri reliquit. Ne autem pubis nauticæ animi fatiscerent, atque, uti fieri solet, pugnantium fervor languesceret, ultima hora gloriosissimi Herois à centurione Verhoevio clam habitafuit. Sicuti enim militaris juvenus etiam conclamatis rebus Imperatore incolumi fortitudinem crebro humanam excedit, ita ubi excessisse apud eos divulgatum est, subito confusis imperiis animi liquefunt. Interea tormenta omnia Prætoriæ nostræ navis à dextro latere in Hispanicam intonuerunt, contra Hispani sclopos confertim ejaculari, quæ densa telorum nube nostri respondebant. Clamor permixtus hortatione, lætitia & dolore, prout Nostri vel hostibus strages incubuerat. Centurio Lambertus, sicut imperatum antea fuerat, Prætoriam quoque hostilem adortus, puppim ex prora sua ita tormentis quassavit, ut ferreæ pilæ per ipsa adigerentur penetralia, dein lateri connexus tam animose cum hoste, qui acerrime resistebat, conflixit,
ut Ba-

ut Batavi, & qui solo & cælo acrius animantur Mattiaci, instar leonum, qui excandescētes obvia quæque lacerant, manus conferuerint. Plerosque vindictæ quoque privata cupido accenderat, qui captivi durius in vinculis habiti fuerant. Interea Propræfectus Alterassius, ita uti constitutum fuerat, adorso vento Proprætoriam hostilem nancisci nequibat, sed duas galeones euestigio corripit, reliquis ingens damnum incussit. Centuriones Adrianus Roestius, & Marinus Chollartus, aliique, conspecto Alterassium non posse velis proprætoriam attingere, incredibili impetu, atque præcipiti insultu in illam feruntur. Tum tormentis undique majoribus & minoribus cuncta resonabant, densa globorum tempestas navibus incumbēbat, feralibus ignibus fumo mixtis conspectus adimebatur, adeo ut medio die nocturni certaminis species videretur, aplustrique ab uno ex focis ablato, post conflictum dimidię horę proprætoria conflagravit. Verum igne concepto, fusum quoque fuit in vicinas nostras incendium. Jamq; vela quarundam exarserant, quanquam omni ope subducere naves Nostri niterentur: industria tamen & agilitate nauticę pubis ignis suppressus est. Verum hostilis navis, dum nullo renitente ignis cundo robur acquireret, tota usque ad ima tabulata exusta fuit. Nonnulli ex militari & nautica turba ignibus, alii aquis perierunt, vel natantes globis trajecti sunt. Ardente Proprætoria, Henricus Longus cum aliis quibusdam navium Præfectis galeonem adortus, tormentis undique adactis etiam extrema intentabat: verum ille humeris transossus occubuit. Ceterum & ipsa galeo, vexillo, quod nomine vicarię assumpserat, adempto, ita continuis tormentorum ictibus

iētibus contusa est, ut & ignem conciperet, eodemque penitus absumeretur. Altera non minori violentia quassata, ruptâ compage aquas hauriens depressa fuit. Interea vicaria navi Altera assius adventabat; qui, uti & alii centuriones, immissa globorum tempestate horrendum in modum intonuere, sed, secus atque ab Archithalasso constitutum fuerat, cominus non conflixēr. Peccatumque in eo fuit, ut incerta iētuum non tantum hostiles naves, verum & nostras læderent: sicut & hostilibus tormentis ex urbe & castello peractum fuit. Dum hæc ita aguntur, & Prætoria utrinque navis acerrimum iniret certamen, hostiles reliquæ acriter missilia & tela in nostros vibrabant, non tamen propinquantes se navibus implicare satagebant, quod neque Nostreis contra mandatum Heemskerckii cordi erat, sed denso globorum nimbo se invicem impetebant, donec una, incertum an nostro an hostili igne, pulvere pyrio accenso cum vicinâ, quæ flammæ proxima erat, horrendo sonitu, tanquam si cælum & maria miscerentur, in sublime rapta fuit. Idem fatum & aliæ nonnullæ habuere, quæ vel tormentorum ignibus, vel furore pulveris nitrati, quem laceræ navis reliquæ incenderant, horrendo spectaculo collisæ dissiluerunt. Reliquæ metu consternatæ in breviam & vada impigere, uti extremo se subducerent periculo. Tandem Prætoria navis, cui loco defuncti Imperatoris præerat centurio Petrus Gulielmi Verhoevius, Principem classis hostilis ita pressit, ut vexillum candidum, quod pacis & deditionis indicium esse solet, explicaret, sed nihilominus violentia tormentorum superavit, & militaris insultus sedari nequibat. Accessit & intrepidus miles centurionis

Z

Clein-

Cleinsorgii, qui, cum continuis tormentorum ignibus propinqua hostilis galeo conflagraret, in scapham se coniciens, contra Prætoriam insurgens, aplustri primum detracto, incredibili illam virtute superavit. Tum demum horribile spectaculum visum fuit, omnia constrata telis, armis, cadaveribus, alii morti occumbere, vulneribus affligi, eniti atque iterum prolabi, alii fugiendo mortem mari se præcipites dederunt, sed cum enatare luctarentur, plerique à classiariis, qui scaphis se exposuerant, confossi vel submersi sunt, adeò ut cadavera cum sanguine fretum passim summo cum horrore volveret. Fuerant immixtæ classis Hispanorum treis Gallicæ privatorum naves, quæ in prælii consortium assumptæ, noctæ occasionem, ad victores tutò se recepere. Servati & captivi, quos cum crudeli mandato centurionis Hispanici miles transfodere pararet, globo interemptus, mox & alius, qui idem tentabat, simili morte occubuit. Quin &, mirum dictu, majori telo vincula captivorum dirupta commemorantur. Vespera cadente relicta à Nostratibus Prætoria navis, admodum perforata, à paucis, qui se occultaverant, sectis anchorariis funibus, versus urbem pulsa est. Insequenti (xxvi Aprilis) die iterum à nostris scaphis impetita, verum oppidani malo dissecto ignem iniecerunt. Hic exitus celeberrimi illius prælii fuit, cujus fama totum terrarum orbem pervasit, atque ipsam timore concussit Hispaniam, docuitque in propriis penetralibus ambitionem gentem debellari posse. Damnum ingens, scædam & cruentam cladem Hispanorum luctus publicus & privatus ostendit. Compertum fuit Hispanis referentibus quatuor armatorum millia & amplius in ea classe fuisse, quorum maxima pars

pars cum summo classis Imperatore , qui eodem quo Heemskerckius fato secundo tormentorum ictu ceciderat, cum præcipuis Præfectis, plurimis nobilibus, qui fidei in Regem virtutique ostentandę crebri confluxerant, & milite veterano, qui expeditioni Joannis Austriaci interfuerat, in numerum Libitinę venit, bellicis rostratisque navibus incensis, subversis, aut funditus deletis propemodum omnibus. A parte nostratium, sicuti in præliis ut plurimum iis minimum est periculum, qui minimum timent, & audaciam pro munimento habent, præter vulneratos centum plus minus perierunt. Heemskerckii, qui strenui militis & maximi Imperatoris officium executus fuerat, cadaver unguentis medicatum Amstelodamum delatum fuit. Ibi publicis exequiis illum, qui pro Rep. novissimum spiritum effuderat, admodum magnificè terrę mandarunt Patrię Patres. Duo signa militum inversis armis funus præcedebant, tympana atro velamine induta pulsata lugubre quid sonabant, vexilla syrmate suo solo trahebantur, dein galea, lorica, denique antiquę Equestris nobilitatis insignia portabantur, à quatuordecim Præfectis funus gestabatur, post consanguineos & necessarios rerum maritimarum Curatores, Consules & senatores urbis, cum urbana nobilitate civium præfecti, & ex omni ordine spectatissimi quique atrati incedebant, circumfusa plebes inprimis nautica & verbis & vultu luctum ostentabat, alii Neptuni domitorem, fulmen belli, terrorem Hispaniæ, prout unicuique dolor verba laxaverat, appellabant. Honori & æternitati nominis ejus illustre à Patrię Patribus constitutum fuit monumentũ, sicut excelsa ejus virtus merebatur. Defunctus est in flore vi-

rilis ætatis, cum annum trigessimum ætatis & nonum ageret.

CAPUT XLI.

*EXPEDITIO INFOELIX SVB PRÆ-
FECTURA PETRI GULIELMI VERHOE-
VII VERSVS INDIAM, ANNO
c l o l o c v i i . & seqq.*

EXPEDIVERAT anno c l o l o c v i i Indica Societas classem tredecim navium, cujus summum imperium obtinebat Petrus Verhoevius, qui comes nuper Heemskerckio, illoque interempto partes Præfecti gloriose tutatus, victoriam nobilem in Calpetano sinu Hispano extorserat. Ipsa fortuna tempestatibus, sanguine, ferro atque adeo cæde Præfecti fœda ut plurimum, & calamitosa. Complures tamen naves à Nostreis interceptę prædam auxerant. Circa Mosambiquam mense julio anno c l o l o c v i i i corbita pretiosis mercibus opulenta, quanquam ex arce simul & navi, majoribus tormentis vehementer obniterentur hostes, haud difficulter superata. Eadem ærumna duas alias oppressit. Binas alias, ne eodem malo succumberent, prope arcem ejusdem Gubernator Stephanus de Attaida vadis impingi curaverat, ne injuriis opportuna essent. Insequenti mense galeonem quoque, quę procellarum turbine circa Canarias insulas à reliqua classe Ulyssiponensi (constabat illa octo ingentibus corbitis, & sex galeonibus, atque Proregem Goz vectabat) avulsa per incerta

certa fluctuum mari sævo turgidoque jactabatur, post modicam velitationem occuparunt. Mense Novembri, juxta Malaccam incensâ à Nostreis corbitâ, furor ignium eandem usque ad ima tabulata corripuit. Plures & alię capte, vel ab hostibus ultro incensæ. Hæc adhuc secunda & prospera nobis, cæterum anno sequenti fors adversa turbare res nostras cepit, & velut ex conducto opprimere. Bandenses, sub specie iciendi fœderis, Præfectum cum consiliariis ex insidiis circumventum plurimis vulneribus confodere. Neque enim ob paucitatem Nostri obniti quibant, quod jam ante Barbari impetrassent, uti remoti à præsidio jaculatorum sylvam versus fœderis negotia agitent. Milites nostri, qui vicina litoris infederant, tumultu subito perculsi, etsi omnibus locis vis magna hostium, periculum anceps esset, festinato itinere in arma prorumpere, obvios quosque tuborum glandibus cedere, fugientium ad sylvarum invia terga premere, nihil reliqui victis facere. Quæsitis nostratium cadaveribus repertum Præfecti cadaver viginti & novem vulneribus confectum, caput amputatum, ludibrio habitum, triginta alii primates eadem sorte occubuerant. Postridie quatuor centuriis militum aucti per campos cædemadentes suorum quaritabant cadavera. Inventi & juxta oppidum obsides Nicolaus Molrius & Joannes Vischerus fœde trucidati à Barbaris, qui ne quidem jura gentium noverant, sed cuncta cruenta lubricine violaverant. Neque socios abducere præ telorum ingruente tempestate Nostri poterant, sed recipere se cogebantur. Præfecto, cæterisque primoribus in arce, quam invitis jam antea insulani construxerant, parentatum, ultimo honori quinquies ex navibus

vibus tormenta explosa, ter jaculatores globos excussere. Plureis postmodum aliæ Barbarorum naviculę captę, incensę, quarum unâ (juncum ipsi appellant) cuncti ferme Æthiopes, qui deditiorem detrectaverant, & infra tabulata se receperant, aut ignibus, aut ferro perierunt. Nimirum in tanta rerum humanarum volutione, nunquā ferme scelera impunita manent. Et indigenę mox omnia jam alia optabant, supplicesq; pacem bello præferebant. Caterum ne extra institutum longius procedamus, (namq; & Paulus Cardenus præfectus alterius classis bis carceri mancipatus, Tidor, & Terenate ulterioris calamitatis testes erant) prælium horridum circa Manillas & Nostris exitiale commemorare, nunc jam ipsa res postulat. In hoc vitę fluctuantis & turbida statione ita natura comparatum est, ut adversa secunda sequantur, neque cuiquam mortalium ita Fortuna indulget, uti omnia ex voto fluant. Effugere adversa casuum nemo potest, contemnere & conculcare generoso spiritu quis potest. Quatuor naveis sub finem anni c l o l o c x cum ce-loce sub Præfectura Francisci Witterdi opperiebantur galeonem pretiosis Chinensibus mercibus opulentam, quæ ex Maccao Manillas petebat, cæterum illa ex infortunio vadis hæsitans, fluctibusque pulsata, dissoluta compage una cum centum & viginti viris, fundum petierat. Irrito hoc molimine cunctando circa hanc oram Chinenses & Japanenses naves, quæ expectabantur, excipere firmum consilium stetit. Verū ubi ex quatuor captivis, qui se telluri forte dederant, copias Nostriatium consiliumque hostis intellexit, Ioannes de Sylva Moluccarum insularum gubernator, confestim duodecim naveis, inter quas & longæ, expediri & mille

mille armatis hominibus, inter quos octingenti Hispani, insideri jussit. Duæ Nostrarum, quod sparsim à se invicem remotę anchoras fixerant, post acrem conflictum superata, tertiâ, dubium an hostilibus ignibus an ex infortunio, incensâ, Nostri projecta navis cura in mare præcipites passim agebantur, & vel ignibus, vel aquis, vel ferro plerique ceciderunt. Ex superatis navibus duabus Præfecto supremo Witterdo caput tormento ablatum, centum & viginti captivi: hostium quinquaginta tres cæsi, septuaginta sauci. Duæ alię naves, quę exploratum ierant, an alię Chineses adventarent, intellecta clade fuga sibi consuluerunt. Ita heic inducię ferrum occultaverant, sub æstivo sidere nimium quam incalescentibus animis arma crepabant, heic pro tempore amici, illic hostes furioso impetu in mutuam perniciem grassabantur.

CAPUT XLII.

*CONFLICTVS CLASSIS BATAVICÆ**CUM HISPANICA, ANNO*

CLO LCCXII.

QUANTUM per inducias belli furor paullum se remisisse videretur, idem tamen horror sub calente sole Oceano incumbibat, sive quod sub infestis ardoribus plus satis incalescant mortalium animi, sive quod prædę cupidine, vel commerciis tutandis Hispani Batavos infestare, atque in ordinem cogere niterentur. Batavi tamen, qui fide nihil potius habebant, non primi hostilia tenta-

bant,

bant, sed quieti se suaque tantum defensare, injurias manu vindicare satagebant. Cum enim anno c l o l o c x i i ex Hollandia Zelandiaque duodecim naveis probe viris, commeatu & necessariis instructę pelago se dedissent, Indiamque peterent, juxta Salarias insulas Hispanicę classi septendecim velorum occurrunt. Batavi recto itinere per aquas tendunt, ne metus vel diffidentia eos incessere videretur, neque tamen Hispanicam classẽm vorsus cursum flecebant, ne hostem lacefferent, atque ad pręlium irritarent. Non minus tamen flagrans cupido Hispano minuebatur, quippe qui pugnandi desiderio ardens totam jam classẽm nostram animo invaserat. Itaque tumidis velis vento secundo in naveis nostras invehitur, machinisque explosis acri insultu pręlium occepit. Fœderati, ubi intelligunt eo processum, uti armis se suaque vindicare necesse foret, necessario virtutem suam intendunt, atque, uti se dignum erat, pręlium grave conferunt: quippe ingens animus, eo magis quod plura mari strenue patrassent, hostilem injuriam minus tolerabat. Et prospere res ex voto cessit, ingenti hostilis classis detrimento. Prætoria namque navis post cruentam pugnam subito incendio conflagravit, cui dum galeo suppetias ferre nititur, iisdem ignibus ardens pessum ivit. Plærq; alię (quatuor enim tantum evaserant) consumptę, deletę, seroque Hispani tumidi ante, & præferoces fortunas suas in extremo sitas perceperunt. Nostri ingenti præda classiariis partita Indico itineri rursus se accinxerunt.

CAP.

CAP. XLIII.

*ACERRIMVM PRÆLIVM GEORGII
SPILBERGII CLASSIS INDICÆ PRÆ-
FECTI, CVM CLASSE RODERICI
MENDOZÆ, ANNO CLIO CXV.*

GEORGIVS Spilbergius, qui septem probe instru-
ctis navibus superiori anno ex Tessaliæ statione mari
se dederat, superato freto Magellanico, australi Oceano
anno CLIO CXV horribile cum Hispanica classe prælium
victor maris, victor hostium gessit. Decimo & sexto Julii
superata modica navi, cui cum imperio nautico præerat
Joannes Baptista Gonzales, octo naves ingentis magnitu-
dinis procul turgida vela mari ostentabant. Compertum
ex captivis Hispanis, classem hanc excindendam nostræ à
Rege Hispaniarum expeditam, & dubio procul fortunæ
mari experiundę periculum nobiscum facturam esse. Fue-
rat quidem (ut postmodum retulere Hispani) ingens in-
magno concilio Peruviano inter Proceres contentio, qui
fluctuantes consiliis huc atque illuc impellebantur. Pleri-
que enim eò abierant, in Caliovensi statione opperien-
dos Batavos esse, erigendos undique vicino telluris tor-
mentorum suggestus, sub quorum præsidio, ubi pignan-
di copia facta esset, se suaque sine periculo defensare, cer-
tisque machinarum verberibus extrema Nostris intentare
possent. Contra Rodericus Mendoza, qui Marchionem
Monteclarium Proregem sanguine attingebat, juvenili ma-

A a

gis

gis ardore, quam militari virtute vel prudentia, obnitebatur, & cupidine cæcus ad pugnandum fatiis ita volentibus rapiebatur. Meticulosi esse hostem opperiri, ubi primo impetu vincere possis. Duabus tantum suis navibus Angliam occupari posse, quid humilem depressam classem, quæ præ magnitudine Hispanicæ imbellium gallinarum vel pullo- rum instar referrent? Hostem totiens victorem mari non- tam virtute, quam temeritate, quæ ubi primum impetum effudit, obtorpescit. Suis vires integras esse, illis præ longo itinere defectas collabascere, vel morbis affligari: omnia mari vel tellure ab Hispanis cincta, ne quidem pulsæ fugæ locum fore. Denique pavore consternatos nihil molituros, verum ultro, se dedituros. Atque hæc tanto molimine ani- mi impotens urgebat, ut certam sibi spondere victoriam videretur. Ita tumidâ ambitione cæcis pejus consilium in senatu vicit. Atque adeo Prorex fastu distentus, nihil aliud, inquit, impero, quam ut perditissimos mortaleis, manibus pedibusq; ligatos, pulcherrimo spectaculo huc adducas. Eoque incitatus Mendoza juramento morti se devoverat, nisi victor hostium, navibus aliquot superatis domum revorte- retur, atque in eum finem consecratum panem assumpsit. Nimirum arrogantia calamitatem ut plurimum præcedit: atque id apprime in vitâ utile, ne homo supra humanæ superbiæ mensuram intumescat, alioquin sprete Dii im- mortales excandescunt, atque humana consilia ex alto despiciunt, castigantque. Decimo & septimo ejusdem men- sis utrinque classis oculos præstringebat. Hispanica ultra mille quingentos milites & classarios vectabat, omni ap- paratu bellico instructissima. Extremum diei processerat, atque

atque adeo nox tenebrosa mari incumbebat, cum Pro-
præfectus Petrus Alvaresius Pigarrius, maritime militiæ ve-
tus, & consilio validus, cymbam ad Mendozam misit, mo-
nens ne incerta casuum maritimo nocturno prælio com-
mitteret, periculum anceps tenebris augeri. Sin aliter illi
visum, nolle ut suæ culpæ imputaretur. Cæterum ille rigido
hæc supercilio contemnens, circa horam decimā juxta præ-
toriam nostram progreditur, & postquam utrinq; Imperato-
res sermones conferuerunt, primo fistulis militaribus, dein
majoribus machinis cælum & maria intonuere: incredibi-
lem machinarum sonitum silentium noctis supra modum
auxerat. Spilbergius continuis fistularum machinarumque
ictibus, ita Prætoriam Hispanicam impetierat, uti divor-
tere cuperet, sed sudo tranquilloque mari nequiret. Hinc
& illinc machinarum ingens fragor exaudiri, tubarum
tympanorum sonitu cælo saloque quieto undique perstre-
pere, vulneratorum horribilis clamor & ejulatus late ter-
rorem incutere. Vix evaserat Prætoria, cum alia navis ve-
lificando expeditior levi noxa præternavigavit. Tertia,
quæ à Divo Francisco nomen acceperat, cui præerat Ludo-
vicus Albedinius, cum malacia maris vorlus Prætoriam
nostram fluitaret, ita tormentis quassata, ut propinqua
exitio videretur. Verum illa, quanquam vehementer lacer-
ata, elapsa, celoci nostræ, quæ opportuna injuriæ videbatur,
se innectit: quanto autem densior hostis constiterat, tanto
magis pubes nautica in prælium exarsit, ita ut pulsa, rimis-
que perforata navis tandem subsideret, atque ingruenti-
bus fluctibus obrueretur. Hispani vel ferro cæsi, vel inglo-
rie submersi pelago jactabantur. Serius Prætoria Hispa-

nica suppetias ferebat, cæterum ubi lateri celocis & ipsa se applicuit; iniquum omnino à nostra parte certamen gliscebatur: quanquam neq; illa desponderet animum, virtute, non viribus nisa. Præfectus noster iniquam illorum sortem conspicatus, cymbam armatis viris refertam subsidio miserat, imperans Propræfecto, ut idem facitaret. Cæterum cum propius cymba adventaret, Nostri, qui celocem defendebant, hostilem rati, quanquam alta voce Auriaci nomen usurpasset pubes nautica, neque præ fragore tormentorum audiretur, majori machina everterunt. Præter unum omnes recepti vitam servarunt. Interea altera cymba propinquabat, quæ tuborum ingruentibus missilibus celocem calamitati præsentī subduxit. Dum obtenta nocte tenebrę densantur, navigia duo Nostratium, queis *Æoli* & *Luciferi* nomina erant, latitabant, neque tranquillo mari nostris se jungere copiis potuerant. Quæ à vicariâ Hispaniensi, cæterisque promiscue navibus impetita, non vanus metus incessabat. Ubi dies primum illuxerat, Prætoria, etsi à Nostris admodum fatigata, cui nondum animus neque consilia conciderant, ingenti insultu cum iis manus conserendi periculum fecit, sed perrupit violentiam virtus & audacia Batavorum. Vento postmodum increbescente, quinque hostium navigia cymbis ad Mendozam missis (uti postmodum ex captivis compertum) indicaverant, ita præcedenti nocte laceratas compages, uti animo viribusque fracti iterum præliandi copiam detrectarent. Spilbergius cum vicario, dum flaccescere Hispanorum animos vident, virtute confisi, territis insistere, atque omne fugę præsidium præcludere, consultum judicabant, & simul magno impetu in

Præto-

Prætoriam vicariamque Hispanicam ferebantur. Ille pavore attonitus, atque, uti in subitis fieri solet, consiliis fluctuantes in fugâ salutem quærebant. Cæterum Proprætoriam, quod pigro motu per æquor incederet, ne in manus nostras veniret, modicis velis Mendoza opperiebatur. Acre hinc oritur inter Prætorias Vicariasque utrinque prælium. Quis cum tertia nostra, Æolus nomine, accessit, tumido ore ingentes globos jaculando, ferventem supra modum mari movit bellicam tempestatem. Fumi nebulæ ingentes ipsum diem obduxerant, intermicantibus veluti fulminibus tonantium machinarum sonitu latè cuncta personabant. Accessit & fortuna, quippe utraque Hispanica sibi invicem impacta, cingendi illas, & undique certis machinarum ictibus quassandi facultatem dedit. Hinc magna hostes incessit consternatio, neque pugnandi iis erat animus, neque pugnam detrectare poterant, adeo ut Hispani ex vicaria, quæ exitio propinqua erat, & rimis fatiscens plurimum aquarum hauriebat, in Prætoriam insilierint, cui ex trecentis & quod excurrit hominibus vix quinquaginta supererant, quique, ut postmodum intellectum, confertum agmen in prora densaverant, ne paucitas illorum perciperetur. Jamque adedò ponere arma, & innoxiam deditionem facere, unum erat afflictis remedium. Vexillo itaque candido erecto pacem postulare videbantur, verum homines nobiles, equestris dignitatis, qui crebri huic expeditioni se dederant, iterum eodem ablato prælium mortemque gloriosam præoptabant. Itaque qui ex vicaria in Prætoriam præcipites se miserant, iterum in suam insilientes navem funestum prælium iterant. Fit via vi, telis, cadaveiribusque

cuncta cooperiebantur, reliqua prælii casu non consilio regebantur. Vicaria nostra fluctibus jactata inter medios hostes agitabatur, & undique machinis impetita extrema expectabat. Et prætorianus hostium miles tabulata illius jam transilierat, & victor per ora virum volitabat, quem modicis machinis, telis, hastisque ita excepit nostra juvenus, ut plerique asperrimo loco cæsi procumberent. Interea horrendus fragor tormentorum undique intonuebat, adeò uti duæ principes hostium naves retro cedere cogerentur, ita compagibus solutæ, ut vix fluctibus attollerentur. Spilbergius Mendozam usque ad serum diei infectatus, qui, ubi nox infausa tenebris cuncta tegeret, oculis ereptus, nunquam amplius apparuit. Ruptis tabulatis quas immodicas haurientem, onere pressam subsedisse, postmodum nuntiatum fuit. Eadem fors navigio, Mariæ nomine, obtigit, ut paulatim fatiscens fundum peteret. Pro præfectus cum Æolo navi vicariam Hispanicam fugientem, insecutus, ita machinis continuo pressit, ut confestim pelago obducenda quoq; videretur. Alvaresius Pigarrius, qui secundam in classem obtinebat potestatem, vexillo candido erecto, se suæque omnia dediturum promisit, modo vitæ parceretur. Cymbis nostris armato milite refertis postulatam, ut ipse Præfectus se arbitrio victoris permetteret, atque navi nostra in deditionem acciperetur. Quam conditionem ægerrime tandem hætenus accepit, uti aliquis centurionum, qui præsto erant, obses linqueretur. Quod cum jure negaretur, diu cunctatus, multa secum animo volvens divorfus agitabatur, ad postremum ita sermonem instituit, se non discessurum, nisi ipse Præfectus præsens il-
lum

lum abduceret. Alioquin se mortem honestam servili captivitati præferre, quam nemo generosus æquo animo toleravit. Non ita sibi ab ignavia & socordia corruptum animum, ut non & mortem contemnere possit. Omneis homines mortalitatis conditionem à summo Imperatore accepisse, serius ocysus quis ex hac vita decedat, parum referre. Hoc esse cordati hominis, super humana omnia se extollere, & ex quacunque conditione supra fortunam surgere, terroresque mortalium sub jugum mittere. His similibusque verbis ambitiose insistebat, quanquam monitus à Nostreis singulis horis compagibus solutis navem extrema minari, & pluribus in locis laxatam jam mari cedere. Dum hæc ita transiguntur, unus sociorum aplustri adempto citato gressu, mobilibus & fluitantibus artubus, hosti victoriæ confessionem extorsit. Ita Nostri cum cymba reversi, præter duodecim viros, qui spe potiundæ prædæ in dehiscentem jam navem insilierant, vitæque prodigi communi se exposuerant periculo. Interea cuncti admodum summa opæ sentinam trahere, succurrere, quantum poterant, ingentibus foraminibus fatiscenti navigio, cæterum ubi nulla salutis spes affulsit, luminibus facibusque accensis horribilem clamorem edere, denique subsidente navi aquisque obruta submersi pessum ire, alii catervatim in fluctus desilire, & frustra mari magno natando aquas pulsare, & obnitendo lassatis manibus aquis succumbere: septuaginta circiter tabulatis laceris, malisq; hærentes fluitabant, ex quibus postridie pauci à Nostreis recepti (inter quos nauarchus cum centurione) reliqui injuriæ maris relictæ, frustra opem implorantibus Hispanis. Ipse Imperator Alvaresius acri ingenio,

genio, consiliis senilibus pollens, prudentia juxta atque armis clarus, patiens laborum, firmissimus contra pericula, fortis magis quam temerarius, quique inconsulto ardori juvenili Mendozæ multum adversatus fuerat, denique mortis contemptor, ne ab hostibus vinceretur, aquis obrutus victusque fuit. Hac victoria insulani, inprimis cum ad oppidum Limam naves nostræ propius accederent, insolito metu trepidare, armati per littus discurrere, prorsus intenti nihil Nostris noxium omittere, machinas undique inprimis ex vicina tellure, quarum una triginta pondo ferro jaculabatur, excutere, ingens ubique periculum facessere, ita uti Præfecto nostro visum fuerit ad milliare unum vel alterum mare eligere, ne ulterior expeditio irrita foret.

CAPUT XLIV.

*MELCHIORIS KERCHOVII PRÆFECTI CLASSIS BATAVICÆ CVM HISPANIS
PRÆLIVM NAVALE, ANNO
CLIO ID C XVIII.*

DUM inter Neapolitanos suppetiis Hispanicis & Venetos mari Adriatico simultatum gliscunt incendia, consultum videbatur Patribus sub Præfecto classis Melchioris Kerchovio Fœderatis exercitatum militem subsidio mittere, ne libera Respublica, quæ ab Attilæ turbulentis motibus, ipsis maris æstuariis erecto imperio, invicta stetit, aliquid detrimenti caperet. Inter Tarifam & Gibraltaram vigesimo & quarto Junii octo Hispanicæ naves cum ingenti galco-

galeone occurrant, quæ impedire suppetias, classem fundere, præsidium militum pulsare, consilium steterat. Ita necessitas pugnandi, quæ prima sæpe virtutis esse occasio solet, nauticæ & militari juventuti incubuit, quæ præliis pluribus virtute & robore edurata, ipsis admodum lætabatur periculis; sicuti enim arbores, quas frequens tempestas incurfavir, duriores evadunt, ita ipsa virtus assiduitate periculorum constringitur, radicesque in ipsis cordis penetralibus altius figit. Ubi ad pugnam ventum, audax iis & minax vultus, animus contumeliarum impatiens, concitum corpus, manus inquietæ & vulneribus intentandis certæ, denique post multum sanguinis effusum victoriæ compotes evadunt. Fusi fugatique Hispani, quadringenti cæsi, ex Nostris quinquaginta circiter ceciderunt. Pauci vulnerati, qui audacter cruore inimicorum imbuti suum, quoque sanguinem spectabant, & mutuis mortibus vulneribusque satiabantur.

CAPUT XLV.

*PRAELIVM CLASSIS BATAVICÆ
CVM HISPANICA IUNCTÆ CONTRA TURCAS
PRÆDONES, SVB PRÆFECTVRA HAVTAL-
NII, ET LAMBERTI PVLCHRI VI-
CARII, ANNO clō lō c xviii.*

PRAEDONES Turcici ubiq; mare, inprimis internum, infestabant, & quanquam omnibus modis prædam traherent, præ nimia avaritia cupidinem insatiabilem vincere nequibant. Itaque mari pollentes sine modo mode-

Bb

stiaque

stiaque naveis omnes invadere, vastare omnia, nihil pensi sanctique habere. Hinc prolixę mercatorum, quorum opibus sustentatur Respublica, querele, cum non in bona tantum, verum in ipsa corpora, libertate adempta, immanis sæviret prædonum crudelitas, nisi religionem ejurarent. Inventi tamen homines, quos cælum ambit, scelera- tissimi, contemptores supremi numinis, quibus fides, probitas, & religio ludibrio habebatur, qui crudeliores in Christianos hostes erant, quam ipsi Turcæ, & sanguine popularium suorum non satiabantur, ac frontibus adversis (parentum enim liberorumque sæpe contraria erant sacramenta) cum propinquis dimicabant. Quos ego mortaleis, qui Deo ipsi patriæque infestas manus inferebant, ex finibus humanę naturę exterminandos jure existimo. Proceres itaque, qui maritimo Fœderatorum collegio præerant, expeditâ classe sub Præfectura Hautainii, Lambertique Pulchri, qui vicariam potestatem obtinebat, sicut & antefactum, (inprimis anno hujus sæculi xiv, incensis quatuor navibus, Mamorram superaverant) ita nunc de integro maria purgare decreverunt. Qui junctis cum Hispano copiis mari mediterraneo ingenti prælio classem Africanam triginta sex navium, probe instructam, virisque armatis refertam, consumpserunt, fugarunt, Christianos servituti exemerunt. Qua clade commoti prædones, qui Tuneti, & Algieræ stationes infederant, diu latebris suis se occultare cogeantur, qui magis socordia, atq; ignavia nostra, quam virtute suâ victorias cumulaverant. Quę fœlicitas; cui nulla ratio suberat, non potuit esse diuturna, cæterum ad ultimum temeritati non suffecit.

CAP.

CAP. XLVI.

PRÆLIVM HERMANNI CLEUTERI

CVM DVABVS HOSTILIBVS NAVIBVS

ANNO MDLXXII MENSE AVGVSTO: EIVS-

DEM CVM IOANNE MICHAELIS ACER-

RIVM CERTAMEN, EODEM AN-

NO, MENSE OCTOBRI.

FINITIS induciis, quæ motibus civilibus exarserant, bellum externum firmam iterum concordiam peperit, atque summo horrore terræ marique contra hostem incubuit. Prima maris tempestas contra duas naveis hostiles, quæ concubia nocte Ostendâ solverant, mari inhorruit. Signo dato à centurione Jacobo Vinckio, qui juxta Geulâm excubias agebat, Præfectus Hermannus Cleuterus anchorariis funibus sectis, Ostendam & Blancenbergam inter hostibus exeundi copiam præpediebat. Quibus, cum neque manus conferendi, neque perfringendi facultas, animusque esset, cursus iterare relictos consilium stetit. Cæterum cum & illic lunata acie classis nostræ obsiderentur, gravis illos pugnandi necessitas pressit, fatigavit. Nonnulli quidem naveis (Fregattas vocant) milite stipatæ ex urbe suppetias ferre laborantibus extremo periculo nitebantur, cæterum compluribus cæsis faucibusque recipere se cogeabantur. Et mox vitandæ calamitati binæ bellicæ, de quibus modo memoravi, præcipientes in vicina litora agebantur. A mediâ nocte hora secunda usque ad meridianam tertiam duro certamine mare inhorruit, fulmineisque machinarum ignibus undè

B b 2

exar-

exarserant. Hostis ultra centum & sexaginta quatuor cæfos, octuaginta vulneratos numerabat, quatuor tantum à nostra parte ceciderant, paucis sauciatis. Et hæc quidem minora commemorasse sufficiat, ingens enim Cleuteri animus majora volvebat, & inquires gloriæ stimulis supra modum agitabatur. Grāvior mense Octobri maritima procella hostilem classē, cui summo imperio præerat Joannes Michaëlis, exagitavit, qui noctis præsidio fretus Ostendâ tribus navigiis bellicis mari se commiserat. Singula ducentis armatis viris stipata, quibus Nostra virtus formidolosa erat, non pugnandi desiderio, sed elabendi studio ex opportunitate nocturnas tenebras elegerant. Signo dato à Ioanne Volcardo, qui juxta excubias agebat, hostem adventare; Propriæfectus Hermannus Kleuterus militiæ impiger, etsi nocturna maritima prælia in incerto sint, virtutem intendere, aleam prælii tentare, & magno insultu Prætoriæ Duinkerkanę se innectere, contra hostis acerrime niti, prorsus ab utrisque nihil reliquum fieri. Illa continuis tormentorum ictibus fatigata, expedire se amplius nequibat. Cæterum Cleuteri navis latere proræ ingenti foramine perforato, cum imperiosum æquor nullo molimine excludi posset, rebus afflictis extrema expectabat. Plerique ex focis navalibus, uti præsentī periculo se subducerent, in cymbam insultabant. Præfectus cum iis, quibus imperandi inferior fors obtigerat, paucisque navalibus, etsi fluctibus navis deprimeretur, ignibus suis super aquas attollebatur, & tam diu cum hostibus dimicavit, donec imminente naufragio, ita, ut fors tulerat, fractis tabulis irato mari unusquisque se committeret. Cleuterus

terus cum paucis aliis per integram horam profundo jactus, tenui ligno fluitans, præfenti ubique mortis imagine, ope divina incolumis à suis receptus est. Ex sociis navalibus cum Optione ultra quadraginta morte gloriosa aquis obruti sunt. Præfectus hostilis tanto periculo exemptus in graviolem Fortunam incidit. Namque ita à Præfecto Lamberto Pulchro, reliquisque nostris navibus exceptus est, ut, cum amplius sibi consulere nequiret, pulvere pyrio incenso navem in sublime egerit, ita ut horrendo mugitu cuncta contremiscerent, miseroque fato omnes occumberent. Cæteræ naves hostiles Angliam Galliamque vorsus actæ, à Nostris obsessæ, fugiente intellurem pube nautica, pessum ierunt. Captivi, tanquam prædones Oceani, gula fracta Roterodami & Enchusæ patibulo affixi. Cleuterus à Proceribus, quibus cura maris incumbit, aurea torque decoratus, classiariis, qui tanti periculi virtutisque consortes fuerant, præmia partita.

C A P. XLVII.

*PRÆLIUM ACRE PROPE GADES,
INTER HISPANICAM CLASSEM ET NOSTRAM,
CUI PRÆERAT SUMMO CVM IMPERIO
IOACHIMVS HENRICI SWARTE-
HONTIVS, ANNO MDCCXXII.*

REx Hispaniarum, cum non ignoraret, quantum negotii contra Batavos sustineret, qui commerciorum flagranti cupidine concitati maria constraverant, acer-

rimè adnitebatur, uti suis, id est maritimis artibus potestatem illorum frangeret, itaque turbandis commerciis in Freto Gaditano classem, quæ viginti quatuor navibus constabat, expediverat. Caterum iis vim majorem intentare, quibus suo veluti elemento vincere consuetudo erat, quique naturam horridi & efferati maris, cui innutriti, obnoxiam habebant, longe opinione asperius erat. Namque Fœderati Proceres ex bellicis & mercatoriis navibus impediendo huic molimini classem coëgerant, qua impetum hostilem antevortere in proprio solo consilium erat. Namque prior insultus animis suorum fiduciam parit, & victoriam promittere videtur, contra hostibus terrorem incutit. Classi nostræ cum summo imperio præerat Ioachimus Henrici Swartehontius, qui omnem ætatem terra marique in militaribus artibus egerat, multis maritimis præliis, quibus interfuerat, laboribus & periculis suis gloriam ingentem quæsierat, vitam atque mortem juxta æstimaverat. Deductis mari interno onerariis navibus, confestim, (namque periculum in morâ erat) expansis velis quinque bellicis & compluribus mercatoriis navigiis columnas Herculis petit, uti Herculeum aliquod & memorabile facinus tentaret. Inprimis, ubi ad Gades perventum, Heemskerckiana victoriæ gloriæ flammam incitabat, quietisque impatientem in transvorsâ rapiebat, sicuti Themistoclem trophæa Miltiadis excitabant. Iuxta promontorium, quod Molle vocant, sibi invicem utræque classes occursant. Ceterum hostes non tam sanguinis, quam opum cupidine flagrant, mercatoriis magis navibus imminere videbantur. Cum enim majoribus tormentis ulterius Nostris globos

bos jacularentur, confertasque naveis certis ictibus quassarent, ipsi extra principia nullo suorum incommodo Federatos despectabant. Verum Praefectus noster, ipse & imperator & socius periculi, lanceam manu vibrans, corpore inquires, oculisque ardens, paucis suos hortatus, postquam omnium animos arrectos videt, plenis velis ingenti impetu hostem adoriri tentabat, ceterum adverso vento obniti, propiusque accedere nequibat. Tormentorum utrinque missilibus armamenta pertusis velis admodum quassabantur. Lacerato Praetorie Neapolitanæ sanguineo vexillo, siparioque rupto, Nostri superioribus velis, minorique ad proram dimissis, hostem opperiebantur. Neapolitana, quod velis mutilis commode pro lubrico vento uti nequiret, paulatim invita versus nostram Praetoriam fluitabat. Quam occasionem nactus Imperator Noster, Praefecto tormentorum edixit, ne prius machinas vibraret, antequam propinqua certis impeti posset verberibus. Interea hostis ducens & quinquaginta tubis militaribus in Nostros missilium procellam effudit. Verum ubi propius accessum, Batavi ad omnem audaciam furoremque militarem prorumpere, graviores machinas certis ictibus excutere, adeo ut Neapolitana navis miserum in modum perforaretur, morientium vulneratorumque clamor horribilis exaudiretur, hostis fugæ proximus cum sex septemve navigiis septentrionem versus deflecteret. Dehinc Noctiluca Hispanica propius fluitans, ab Imperatore cæterisque centurionibus, inprimis Alterassio, qui inter fistularum glandes ferali globo percussus, animam Patriæ Deoque immortalis imperterritus devovit, ita excepta, ut infecta sanguine, polluta cadaveri-

daveribus, & fatiscens in latus inclinaret, atque imperioso æquori cedere videretur, denique inter hosteis precariam veluti animam traheret. Neapolitana interea, cum aliis navibus cursu iterum versus austrum flexo, inserere se iterum nostræ classi tentabat, innexaque uni mercatoriæ, cui præerat Iacobus Salius, ab eadem duodecim à latere tormentis tam graviter pressa, ut vela vorteret, & hinc undique iterum à Nostreis impetita, uti responsare machinis nequireret. Pleræque quoque aliæ naveis laceræ, quassæ, expedire se amplius, ordinemque suum obtinere non poterant. Inter centurionem Liefhëbberum, qui superiori vento utebatur, & duas Hispanicas certamen quoque ortum, sed illæ tenebrarum præsidio evasere, & nisi iniqua fortunæ nostræ nox adventasset, omnes ad internecionem deletæ fuissent. Ita postridie, cum tenebris tectæ quam occultissimè evasissent, exemptæ conspectui nostro scædâ fuga vix portum receperunt. Ex Nostreis quatuordecim tantum occubuerunt, neque ultra quindecim sauciati, præ cæteris navibus inprimis Prætoria cunctis velis laceratis, triginta juxta aquas foraminibus hiscens ægre ferventibus operis fabrilibus restituta fuit.

CAPUT XLVIII.

*CENTVRIONIS IACOBI STENBACHII
PRÆLIVM CVM HISPANICA
CLASSE, ANNO. 1715 c. XXIII.*

IMPERIO Præfecti Swartehontii, Iacobus Stenbachius imperterritus centurio complures onerarias naves Genuam,

nuam, Liburnumque deduxerat, atque iterum cum quatuor mercatoriiis in altum profectus circa Gibraltaram cum hostili classe acriter certamen conferuit. Proprefectus Ioannes Fachardus, virtute nobilis, in quinque navibus summum imperium obtinebat : quarum princeps quadraginta octo æneis machinis, quingentis militibus stipata, horrorem mari incusserat, treis galeones triginta sex æneis tormentis, una Gallica viginti duobus, militum complures centurias vectabant. Quibus unâ bellicâ, & quatuor onerariis navibus, resistere difficillimum factu videbatur. Cæterum ubi ad prælium ventum, generoso pectore in immensum fortitudo crevit. Martius undique tumultus, & machinarum sonitus mentes conciverat, ingenti spiritu pectus concutiebatur, & præulciscendi cupidine totum corpus fluctuabat, horridus clamor & furiosa vocis eruptio colla distenderat, manus & pedes inquieti, atque ad perniciem intentandam hostibus celeres. Inter Prætoriam dein hostilem, & nostram bellicam acerrime, si unquam, dimicatum fuit. Cum enim hostis propius adventasset, verberibusque machinarum nonnullos ex sociis è mediò sustulisset, Nostri undique supra & infra tormentis explosis ita Prætoriam dedolarunt, ut ingenti foramine ad proram compages laxarentur. Ita invicem lateribus junctis ferociter per integram horam pugnatum fuit, donec vento mutato (ante enim caurus, tunc euronotus surgens vela impleverat) prætoria hostilis fluitans puppim præ nostræ infereret. Tum demum juvenus nautica non votis tantum, vel suppliciis muliebribus auxilia calicem implorare, sed laborando, enitendo, effervescente circa cor sanguine, omnem

Cc

ope-

CAP. XLIX.

DE ILLVSTRI EXPEDITIONE SVB

PRÆFECTO JACOBO WILLEKENO,

ET VICARIO PETRO HEINIO,

ANNO CLIO CXXIII ET XXIV.

SOCIETATE Indiæ occidentalis edicto Procerum, stabilita, intima perrumpere novi orbis penetralia Directoribus visum fuit. Magnis facinoribus prima initia constant, & prima fama in mentibus mortalium validissima esse solet. Jacobo Willekeno Præfecto militiæ maritimæ veteri illa Provincia mandatur, uti instructissima classe viginti sex navium fortunam experiretur. Militaribus copiis præerat Tribunus Ioannes Dorthius militiæ expertus, consiliorumque sagax. Classis illa partim anno millesimo sexcentesimo vigesimo tertio mense Decembri, partim sequenti Januario vela ventis dederat. Secunda navigatione Promontorium viride, insulasque, quæ veterum Gorgones sive Hesperides esse creduntur, quæque à Ludovico Cadamusto anno CLIO CCCC XL, decem numero inventæ sunt, Imperator obtinuerat, ibique juxta insulam S. Vincentii opperiundis cæteris commorabatur. Sola navis, cui Hollandiæ insigne erat, qua Tribunus Dorthius vectabatur, ventorum fluctuumque impetu usque ad Serram Lionam abrepta, quæ à Promontorio ultra centum leucas, Oliviera teste, dissita est, classi non nisi expeditione consummata juncta fuit. Interea dum cæteros opperitur.

C c 2

Impe-

Imperator, nauticam & militarem pubem ignavia & fo-
cordia torpescere non permisit, continuis exercitiis mili-
tariis animos fatigare, atque uti otii adjumenta tollerentur,
cymbarum partes, quas nondum compaginatas secum
sumpserat, adaptare, corbes munitorios omni opera
nectere, denique quicquid usui militari excogitari poterat,
præparare jussit. Deinde cum cæteræ omnes naves sæliciter
eodem jam diu appulissent, Imperator frustra tribunitia
navi expectata varius agitabatur, an itineri se daret, an lon-
giorem moram institueret, tandem è re esse judicavit, ne
agendi tempus transmitteretur, & prolatando tempus
bona occasio perderetur, vela totius classis intendere.
Simul literas arcanas Concilio secreto militari aperit, quibus
ex mandato undeviginti virum continebatur, uti civitatem
S. Salvatoris adoriri, atque expugnare omnibus viribus ni-
terentur. Cuncti admodum Præfecti militares patrando
tanto facinori sacramento se invicem adegere, & quæ ex-
peditioni conficiundæ necessaria consiliis junctis constitue-
runt. Neque enim res tam ardua & difficilis sola virtute
militari, verum & prudentiæ ingeniique viribus potissimum
sustentari poterat. Ad quartum demum Maji Brasiliæ ora
in conspectum venit, adversoque vento, namque status,
quod insolens illis regionibus, non flabat, & malacia disten-
ti, octavo demum ejusdem mensis die ad ostium sinus San-
ctorum anchoras jecerunt. Imperator negotio tam arduo
intentus, quique præclari facinoris famam quærebat, com-
muni Præfectorum consilio ita constituit, divisis copiis ter-
ra marique hostem adoriri. Quatuor nauigiis unique ce-
loci militem imponere, & cymbis septem juxta munimen-
tum.

tum S. Antonii fyrti arenaceę committere, atque ita urbem invadere, reliquis navibus intima sinus penetrare, hostem utrinque fatigare, omnium federat sententia. Neque vero talibus viris ullus labos insolitus, sed utrinque glorię maximum certamen erat. Eodem enim tempore medio diei miles fyrtim arenaceam ascendit, & pubes nautica in ipso sinu urbi terrorem injecit. Adventante classe ex valido munimento Tapesipe, & castello S. Philippi, imprimis ex arce valida, quę rupi imposita, aquisque circumflua urbi imminabat, tam horrenda & feralis tempestas ingruit, uti tormentis undique sævientibus, densissimę fumitenebrę, perpetuus ignium intermicantium splendor, machinarum non secus atque tonitruum continens mugitus, globorum violenti turbines, confundere elementa, & cælum ipsum terrę miscere vidēretur; denique ad terrorem extremę calamitatis cuncta composita essent. Verum Nostri, qui vitam ac mortem juxta æstimabant, nullus locus asper & inaccessus, atque extrema pericula virtus imperterrita domuerat. Petrus Heinius classis vicarius, virtutis nobile exemplum, intra ictum sclopetorum junctis navigiis, Geldria, Groninga, & Nassavia, contra suggestum tormentorum, propinquasque naveis Lusitanas quindecim numero, incredibile facinus patrare properabat. Neque hostis, ubi ferox prælium sævire ac miscere omnia cepit, quicquam pensi atque moderati habuit. Usque ad septimam horam vespertinam atrociter pugnatum, quisque labores, pericula, ipsam mortem facile tolerare, prorsus in vultu facieque ingens vincendi cupido flagrabat. Cæterum Propræfectus, ubi nequicquam densis tormentorum

Attoniti illi, qui infederant, turbatique, fugiendo festinare, neque nostrorum insultum expectare, per aquas plurimis interfectis in urbem contendere. Post tubicinem primus Petrus Heinius murum ascendere, hostem ferire, ferrum vibrare, adversus omnes difficultates luctari, quis accensa nautica pubes, animosa gens & casibus infracta, se post Præfectum transiliisse veluti indignabatur. Caterum quia interius nullâ loricâ petra illa munita erat, continuis fistularum globis Nostri impetebantur, quanquam duobus illic tormentis positis, nudum quoque hostium latus gravi damno quassaretur, summusque terror consternatis pavore incuteretur, tenebris tamen appetentibus recipere se Præfectus consultum censuit, inprimis quia pugnando juvenus lassata, neque pulveris pyrii copia suppetebat: tormenta hostilia perforata, ne ului postmodum forent. Postridie, resectis somno viribus, classarii iterum urbi incumbebant, verum comperto Nostros, qui terrâ fortunam experti fuerant, urbe potitos, cuncta munimenta deserta, nisi quod primâ luce in Tagasipe aliquotiens tormenta excussa forent, quam celerrime iis se Vicarius junxit. Terrestris namque miles, quæ pridie per syrtim arenaceam se terræ commiserat, angusto tramite, ubi facile ab hoste sisti potuerat, primo excubias, dein urbem tentaverat. Oppidani quidem primo impetu graviter nostros sauciabant, adeo quidem ut Allardus Scoutenus, qui pro tribuno militari Dorthio absente imperabat, disiectum jam militem suâ autoritate sisteret. Noctis tenebræ prælium hoc non incruentum diremerunt. Verum caligine hostilis terror geminatus, tantaque repente concitam civitatem consternatio
inva-

invasit, ut sibi suisque diffiderent. Suo quisque metu pericula metiri, cunctari, atque iterum festinare, inconsulte omnia agere, vacuam denique civitatem opesque per summam vecordiam relinquere, maximoque tumultu vicinis sylvis nemorumque secretis se abdere. Inter primos Marcus Teixeira Episcopus cum sexcentis se subduxit. Ceterum Præfectus urbi Didacus Mendoza de Furtado, ne tam sædæ fugæ perfidiæque, ut loquebatur, consors esset, cum filio familiaque in urbe extrema expectavit. Miles noster natura ferox, manu promptus, prædæ avidus, quique inceleritate omne momentum ponebat, crepera luce levioribus tormentis frangere portæ obices in animum induxerat suum, verum Lusitani indicio, qui candidum pacis velum extra muros ostentans desertam urbem monebat, insidias primo metuens, apertis portis, compositis ordinibus urbem ingressus, nihil hostile reperiens in opulentissima civitate prædæ effreni licentiæ se dedit, fana atque domos mercatorum spoliare, argenti pretiosarumque mercium immensam vim trahere, atq; pari luxu prodigere, disciplinæ omnis exortibus insolitis lubidinibus se mancipare, tam improbam aleam exercere, ut non numerarent, sed metirentur argentum. Et quanquam post tantam licentiam Imperator classis modum imponere tentaret, nihil tamen pensi habitū. Sericæ aliæque pretiosæ merces, quæ occultari ab effrenato milite nequibant, in plateis pedibus calcabantur: quæ postmodum composita in Iesuitarum collegium delata sunt. In urbe vicinisque munimentis tormenta ærea viginti & tria, ferrea viginti & sex reperta. Interea oceano vagus Tribunus Dorthius, frustra quæsitâ classe, ostium Bahiæ penetravit,

vit, urbem captam, cui destinatus fuerat Gubernator, com-
perit, nihil prius agendum ratus, quam ut autoritate sua
disciplinam militarem restitueret, effrenem juventutem
coërceret, quæ luxu perdita præceptis lubidinibus suis mo-
rem gerebat. Erat tribunus prælio strenuus, & autoritate
severus, qui ubi licentia militum maximis se circumveniri
difficultatibus vidit, rigida edicta proposuit, sine quibus
perdita pubes in ordinem redigi nequibat. Et jam immu-
tata rerum facies erat, cum tribunus ad decimum & septi-
mum diem Maji stipatus quinquaginta sclopetariis non pro-
cul ab urbe à Brasiliensis, qui tesquis & saltuosis in locis se
occultaverant, ex improvviso telis confossus occubuit. Cor-
pus sectum, projectum, caput amputatum, ludibrioque
habitum; cæterum Æthiopes, qui nostrarum partium erant,
pulsis Brasiliensis corpus in urbem retulerunt, cæterisque, quos
eadem fors manebat, subsidio fuerunt. Ingens detrimen-
tum in tanti viri funesto obitu Resp. cepit, rebus adhuc
in civitate fluctuantibus. Namque & peritia militari & au-
toritate pollebat, consiliorumque prudentiam cum invi-
ctâ fortitudine junxerat, multi laboris & solertiæ, & quod
difficillimum esse solet, illibata autoritate summæ apud mi-
litem gratiæ & favoris, cujus morte cuncta postmodum
licentiâ negligentiaque pessum iere. Magnum alioum
momentum societati in hac victoria fuit, quippe capta fuit
urbs nobilis, Præfecturæ Brasiliæ metropolis, commercio-
rum, divitiarumque horreum, aqua tenus inaccessa, edito
enim colle posita (construxerat illam Thomas Souza gu-
bernator) centum ulnis majoribus, quantum inter exten-
sas manus continetur, ardua, vepretis & tesquis invia: ex
qua

qua navigatio in Orientem, (insula enim S. Helenæ tribus tantum gradibus distat) & Peruviana impediri poterat. Quæ uti gloriose victa, ita sæde perditâ, opprobrium Nostris fuit. Quippe uti in occupanda urbe majores fuerunt, quam viri, ita in tutandâ minores, quam fœminæ. Et qui ante vitam atque mortem juxta æstimaverant, victi fœdis voluptatibus, fractis socordia & luxu Imperatorum & militum animis, urbem nobilissimam perfida deditione Francisco Toletano, classis Hispanicæ Præfecto, tradidere, antequam ferme ad arma ventum esset: & quanquam suppetias in propinquo esse non ignorarent (ad octavum enim Decembris nuntium acceperant) scelera sceleribus auxerunt. Ita cassâ classis nostræ potentissimæ fuit expeditio, quæ octodecim majoribus navigiis, & septem liburnicis constabat, quæque classiarios mille sexcentos nonaginta, mille trecentos quinquaginta milites vestabat. Et quanquam adversa tempestate jactata serius adventaverit, nullum tamen grave periculum eos urgebat, uti mortis metu nutantes, sicuti Toletano lubuerat, conditiones acciperent.

CAPUT L.

**EXPEDITIO NAVALIS SVB PRÆ-
FECTO JACOBŌ HEREMITA, ET RES
GESTÆ, ANNO MDCCXXIII.**

ET SEQUENTIBUS.

IACOBUS Heremita classis Imperator novem probe instructis navibus, celocibusque duabus, mari se anno MDCCXXIII.

cloſo cxxiii commiſerat , uti in India Occidentali nervos potentię Hiſpanicę contunderet , frangeretque , regiſque theſauris immineret. Hęc classiſ mille ſexcentis , & quod excurrit , viris reſerta , ducentis nonaginta quatuor æreis ferreisque tormentis horribiliſ , impenſis Procerum ſocietatiſque Indicę conſtructa , omnia magna promittebat. Non tam juſta prælia , quam poſt crebras velitationes compluribus onerariis navigiis direptis (inter quę quatuor Hiſpanica ſaccharo onuſta) opima ſpolia non ignobilem hanc expeditionem fecêre. Sequenti dein anno , cum ſuperato freto Auſtrali juxta Limam inſulam ventum , naviculâ , quam Prorex Peruvianus exploratum miſerat , interceptâ , ex captivo centurione Martino Del Rea compertum , treis naves argentiferas probe onuſtas cum duabus bellicis Pantamam vorſus velâ direxiſſe , Prætoriam navem , cum galeone quadraginta æneis machinis munita , onerarias ſupra quadraginta juxta tormentorum tria ſuggeſta , quò ſecuritati ſuę conſulerent , ſe recepiſſe. Erant hęc ſuggeſta lapidea ſex vel ſeptem tormentis inſtructa , cætera enim quinquaginta majori violentię arcendæ vicino litore expoſita fuerant. Metuebat enim Prorex , ne claſſis noſtra , quam præcipiti cupiditate circa omnes terras , omnia maria ſpes lucri duxerat , urbi inſulæque hoſtilia intentaret. Neque animus Noſtris deêrat pulcherrimi patrandi facinoriſ , jamque adeo quinque militum centurię , & quinque claſſiariorum cymbis impoſitæ , uti Callao & flumen inter vicinam tellurem arriperent , cæterum concitus fervor aquarum circa litora , profluentemque , ſpem omnem acceſſus interciderat , denſataque Hiſpanorum agmina tel-

luris extima circa ipsa maris æstuaria infederant. Cum reluctantibus itaque aquarum vorticibus, & hoste simul velle pugnare, multum se fatigare, neque quicquam proficere, verum sibi ipsis certum exitium properare, ea demum dementia videbatur. Cum hæc itaque expeditio injuria loci ægre procederet, in alias arteis versare se animus Imperatoris cepit. Jussum, uti centuriones aliquot duodecim cymbis armatis, quibus ærei dracunculi, ignivomeque machinæ, ad incendia hostilibus navibus immittenda abunde suppetebant, intempesta nocte classem adorirentur. Et prospere ex voto cessit Fortuna: quadraginta circiter naveis vel nostris ignibus, vel sparso vicino incendio concremabantur, pulcherrimo nocte spectaculo, cum veluti festivus & triumphalis dies mari incubuisse videretur. Et hæc opportuna nobis res cecidit, quod, Martio tumultu ad aliam partem urbis septentrionalem concitato, perculsi oppidani illac, ubi nullum periculum erat, concursarent. Dein ubi cymbis nostris ex ordine Hispanicæ naves ignem concepissent, & calum antè nocte atque nubibus obscuratum haud suis ignibus late fulgeret, periculum anceps periculi metu augebatur. Interea animo confirmato hostes ex propinquis tormentorum suggestis, galeone binisque navibus, quas patachas vocant, vicinoque litore machinas omnes torquere, Nostri dracunculis missilia spargere, & post principia Hispanicarum navium (quædam enim inermes, & forte non exarserant) latitare, postremo cum illic manere tutum non foret, se classem vorsus iterum recipere. Ita totam ferme classem furor ignium consumpsit, paucarum incendium ab Hispanis, Barbarisque ægre extinctum. Audax hoc faci-

infestasset, plureis naves superasset, fugasset, vel in arenarum vada adegisset, Loandam Africę insulam, quę ad quinque miliaria patet, aggredi in animum induxit suum. Cæterum classe undecim navium secundo vento hosti, quam primum Nostri occurrere, consultum videbatur, cum avortere, quam, ubi visceribus alicujus regionis infederit, disjicere victorem magis proclive sit. Quo comperto Præfectus levatis anchoris, plenis velis, animi immodicus in hostem ferebatur. Acerrime utrinque pugnatum displosis continuis tormentorum globis, cæterum hosti virtutis nostrę inexperto primus fervor, atque impetus subito liquecebat, & in torporem solvebatur. Animosę incipere prælium multorum, sed per cædes & igneis ad victoriam grassari illorum est, qui nihil metuunt, nisi ut vincantur. Neque diu pugnatum, cum quatuor hostiles naves feralibus conflagnarunt ignibus, prætoria & vicaria cum noctiluca litorebus ultro allisę, una fugiendo vadis adacta. Duę alię occupatę, quę & postmodum redemptę. Postridie Prætoriam, duasque reliquas, quę fixę hærebant, Nostri propius accedentes tormentis ita quassarunt, uti tandem ignem conciperent, quanquam ex iisdem, quandoquidem desperatio ultimum necessitatis telum virtutem illorum acueret, creberrimos globos ejacularentur. Postquam pulcherrimum hoc facinus bene cecidisset, ne quid reliqui victis facerent Nostri, ubi medium diei processit, aliam navem vadis impactam impetere tentarunt. Conferta pubes in treis cymbas jussu Præfecti insiliit, atque ipse, quo animos adderet, in vicinum lembum se permisit. Cæteri omnes, viri strenui, virtute Imperatoris accensi, summa celeritate foros

foros transilire, ferro iter aperire, denique audaciam promunimento habere. Caterum virtuti illorum Fortuna postmodum invidit, cum ex vicina tellure tam acriter globis impeterentur, ut necessitudo gravis se recipiendi eos premeret, adeò quidem ut neque ignem injiciendi copia daretur. Nonnulli occisi vulneratique, inter quos & ipse Præfectus vulnere advorso saucius. Victoria tamen eò non minor fuit, cum per omnes asperitates eluctari, ne quidem ipsa virtus permittat. Ex hostibus summa cum turpitudine plerique ex navibus se terrę dederant, cæsi nonnulli vel submersi, pauci capti. Tres ex nostris modica navi, quam paracham vocant, in litus adacti, in hostium manus pervenerant. Quibus permutandis cum tertia parte plureis ex captivis Lusitanis hosti offerrentur, Gubernator atque Episcopus Loandę sædam & indignam conditionem proposuerunt, uti pro tribus captivis omnes admodum Lusitani & Æthiopes dimitterentur, binæ superatæ naves restituerentur. Quæ intoleranda conditio ludibrio Nostri habita, cum victi victoribus summo cum opprobrio insultarent, neque captivorum ea habita ratio, ut alienæ & impotenti superbix obnoxii forent. Naves integræ immensa postmodum pecunia redemptæ. Neque multo post Nicolaus de Sosa, qui imperium urbis & insulæ recens obtinebat, treis captivos obtulit, pro quo officio humanitatis viginti Lusitani vinclis exoluti. Juxta urbem Loandam, atque intra sinum viginti admodum naves, inter quas & actuariæ, stationem fixerant. Et si autem Nostri neque consilii, neque audacię unquam eguere, tamen in certum periculum velle incurrere, inconsultum videbatur. Deerat

rat locorum peritus nauta, qui vada & sicca arenarum exploraret, sine quo ab illis caveri nequibat: duoque in litore suggestus tormentorum arcere adventantes poterant. Cæterum non tam tormentorum ictus, quam breviametuebant, quæ si hærent, in extremo Fortuna illorum sita fuisset. Itaque providebat Præfectus, ne tale quid eveniret, vincendique cupiditate, ipsi vincerentur. Audacia quidem propior fortitudini est, cæterum temeritatem nemo unquam sapiens laudavit. Ostio quidem australi Loandæ, Præfectus urbis cum tribus se ostentaverat navigiis, verum nihil ibi virtus vel audacia poterant, quia periculosa itidem vada imminabant, atque suggestus decem tormentorum capax introitum prohibebat. Neque à peritis locorum facile illa cæca arenarum vitabantur, cum ipsa illa tria navigia remulco difficili nisu inter syrtes veluti, & charybdes attraherentur. Ne itaque hic tempus frustra consumerent, iterum pelago incumbere, incerta casuum, quæ mare volvit, tentare, Fortunam in diripiendis hostilibus navibus experiri. Atque adeo virtute, & Diis volentibus, prospere omnia cessere. Victæ plures circumcirca naves mercibus divites. Terror ubique hostem prostraverat, dum per ignaviam & inertiam magis incurrerent in manus nostras, quam armis vincerentur.

CAP.

CAPUT LII.

ACERRIMUM PRAELIUM INTER
LUSITANICAM CLASSEM, ET HOLLAN-
DICAS ANGLICASQUE NAVES.

ANNO CLD ID C XXV

HOC anno inter Lusitanos, qui antea à Britannis Ormo insula pulsi fuerant, & Anglicas, Hollandicasq; naveis juxta Persiæ oram longe acerrima fuere prælia. Hostes, præter quatuordecim minores naves (Fregattas vocant) octo galeonibus, & quingentis æreis tormentis terribiles erant. Nostræ naveis quatuor numero, uti & Britannicæ, humiles præ magnitudine hostilium navium liburnicarum speciem ostentabant. Undecimo Februarii die cruento admodum prælio mare per quatuor horas efferbuit, dum antea Britanni Hollandique usque ad extrema vitæ se invicem sacramento devovissent. Memorabilis inprimis navis Hollandicæ, cui Virginis Dordracenæ nomen, virtus exarsit, quæ oneraria & octodecim tantum machinis instructa, medio hostium fluitans, per integram horam cum quinque galeonibus invictas manus conferuit. Neque súdo mari suppetiæ in promptu. Hostibus cupidine victoriæ flagrantibus, animus supra modum accrevit: Nostris omnem violentiam ipsa etiam morte vincere, quam cum opprobrio vinci, satius videbatur. Surgente leni vento ab hostibus non tantum, verum etiam ab amicis divisi, pelago agitabantur. Virtute itaq; æquabili & inviolata per medios hostes ruere, su-

E c

rioso-

rioloque insultu ad suos reverti, audax consilium sedit. Et Fortuna illis quanquam gravi & ancipiti periculo concessit : ipsa tamen navis bis ignibus incensa confestim iterum extincta fuit. Neque minor interea alterius navis nostræ (Wesopum indigetabatur) fortitudo glisccebat, quæ vicariæ hostili innexa (& prætoria cæteræque naves hostiles in propinquo erant) tam cæuo certamine dimicavit, uti harpagonibus disiectis ægre se vicaria reciperet, cum omni apparatu bellico & sexaginta tormentis instructissima esset. Interea concito vento Nostri quinque junctis navibus hostes fatigando vincere summo studio adnitebantur. Neque illi impotentes & lassæ pugna reluctari amplius quibant, cadaveribus continuo in mare volvendis intenti. Nox atrox prælium diremit : Lusitanique juxta insulam Kismisium, Nostri prope Ormusium anchoras fixerunt. Secundo post hoc prælium die multo adhuc atrocius dimicatum est, adeo ut anceps utrinque victoria esset. Arborea hostium passim mutilæ vel fractæ, autennæque gementes jactabantur, Virgo autem Dordracena ita velis pertusa fuit, ut nec ullus quidem integer nauticus funis esset. Navicula quoque incendiaria in hostem missa, sed frustraneo nisu. Tracto per integrum diem prælio noctis præsidio tuti hostes prope Ormusium, Nostri juxta Gameraona oppidum subsederunt. Postridie Lusitani prope Larequam insulam, quam infida vada prætexunt, se recepêre. Compertumque post modum, nigris vexillis erectis, Præfectum classis Alphonsum Boutelium filium Proregis extremum diem clausisse. Post aliquot dies, cum Surattam versus iter instituere, ex sententia omnibus rebus paratis compositisque, Nostri decrevissent, Lusitani metuen-

metuentes, ne iterum præliandi difficultate circumvenirentur, quantum possunt celerrime fugiendo patentia æquora secant, & versus oram Persicam Muscetum oppidum petunt. Postridie, quod hostium naves arboribus antennisque mutilæ tam propere expedire iter nequirent, tanto horrore iterum certamen captum, uti pratoria incensa vix extingueretur, tres aliæ sibi invicem innexæ hæsitarent. Obscuro noctis evasere, & propter arcem oppidi stationem securam elegerunt. Tam cruentis & atrocibus præliis ex Britannis Hollandisque octuaginta cæsi, complures vulnerati, ex Lusitanis præter faucios ultra mille necati, sola calamitate nobiles.

CAPUT LIM.

*PRÆLIVM INTER VVIBRANDVM
SCHRAMMIVM PRÆFECTVM CLASSIS
INDICÆ, ET PRÆDONEM NICO-
LAVM COMPANVM, ANNO
c1010 cxxvi.*

WIBRANDUS Schrammius Præfectus classis Indicæ novem navigiis anno c1010 cxxvi mense Maio mari se commiserat, duobusque postmodum mensibus portum Sierræ Lionę petebat. Caterum conspectis quatuor navigiis, dum in dubio mens hærebat, an hostes an amici forent, ubi propius accessum, compertum famosum esse prædonem Companum, qui fœdis rapinis ubique maria infestabat, complurium mercatorum nostrorum for-

tunas affligerat, & homo profanus scelera sceleribus cumulaverat, multorum quoque facinororum catervas tanquam stipatas circa se habebat. Quanquam autem ille amicitiam obtenderet, tamen Imperator noster omnia ad prælium composuerat, quod prædonis animus subdolanus, cujuslibet rei simulator ac dissimulatio, ardens prædæ cupiditate, unicuique pateret. Diſſimulabat ille se priorum facinorum peractum codicillos veniales expectare, postulabatque simul uti cymba nostra vicinæ telluri, ubi vultu facieque ignotus erat, exponeretur. Quod cum negaretur, quaesita hac occasione hostilia animo volvere cepit, sanguineoque erecto vexillo in principem navium Hollandiam solita animi ferocia præceps ferebatur, verbisque tumidis se contumeliam manu vindicaturum affirmabat. Responsum à Nostreis, se verba incruenta non metuere, si pugnandi consilium esset, experturum, quibus cum viris manus confereret, eligeret nunc, an pacem an bellum cuperet. Cæterum ille animi impotens, tormentis excussis, junctisque aliis navigiis navem nostram undique premere, illique se innectere tentabat. Verum pubes nostra nautica, incredibile memoratu est, quantum virtutem intenderit, quantaque vi tela majora minoraque torserit, adeo ut promiscuè cadaveribus tabulata tegerentur, cæterique metu perculsi carina se recipere cogerentur. Ipse Companus, qui gladium vibrans ferociam in vultu ostentabat, ubi telorum iterum nimbus ingruerat, pronus in ventrem se misit, brachioque saucius ad inferiorem recessum proreptavit. Cum cominus res non procederet, eminus tormentis navem undique fatigare, atque ad deditionem cogere, constituit. Sed Hollandia navis præcipiti

cipiti insultu in hostem ferebatur, fistularumque militarium certis ictibus continuo ita illum impetebat, uti casorum cruor horribili specie passim in mare funderetur. Vicaria hostilis admodum dedolata, multisque foraminibus pertusa ac dilacerata, fugæ propior, ne vis aquarum illam opprimeret, paulum secessit. Non procul una ex liburnicis nostris machinas quoque torquebat, quam adoriri primum hostis non affectabat, quod principe navi, uti sperabat, superata, illa se subducere nequiret. Cæterum cum illam debellare, longe opinione asperius acerbiusque foret, mutato consilio liburnicam adoriuntur, verum omnibus expansis velis illicet suppetias ferebat Prætoria nostra, omnibusque ex latere machinis explosis, superiore vento usus, tanto horrore omnes territavit, ut nemo supra tabulata se sistere auderet, vel vela majora intendere, uti præsentem se subducerent periculo. Itaque Companus, uti in rebus adversis fieri solet, consiliorum expers in vicina vada impegit, ne Nostris insectandi copia vel facultas esset. Interea prætoria & liburnica nostra in altum profectæ, reliquos prædones cingere nitebantur, sed elapsi in fuga salutem quæsi verunt. Tanta jam illos incesserat consternatio, uti postmodum comperitum fuit, ut deditionem agitaverint. Pauci ex Nostris fuere vulnerati vel cæsi, sed princeps navis nostra admodum fuit quassata, ita ut triduo vix se expedire iterum potuerit. Virtus quoque & prudentia prædonis hoc prælio emicuit, quippe pollebat magna vi animi & corporis, rerum maritimarum vetus, animus, supra quam cuiquam credibile est, audax, subdolanus, cædibus & rapinis innutritus. Eundem postmodum Nostris, prædonesque portum tetigere, metu

piratis perculsis, ne manus nostras iterum violentas experirentur. Imperatum, ut prædo stationem suam desereret, quod post multas contentiones detrectare nequivit.

CAPUT LIV.

MEMORABILIS PRÆTORIÆ HISPANICÆ CLADES, A NOVEM CLASSIARIIS PERPETRATA, ANNO EODEM.

CUM mare nostrum hostium damna non caperet, complures Belgæ, qui Regias partes sectabantur, in Hispaniam migraverant, societatemque inierant, uti cunctas naveis, quæ Hollandica commercia vectabant, intercepterent. Unusquisque nulla gentis habita ratione ducere, trahere, rapere, sine modo modestiaque polluere, vastare omnia, donec brevi societas ita adolevit, uti quinque naves in mare ducerent, cujus Prætorię Busencolius Dunkerkanus summo cum imperio præerat. Hæc navis, quæ à Dantiscanis capta fuerat, quatuor æreis, triginta ferreis machinis cincta, milite Hispano insidebatur, pubes nautica variarum gentium militia atque inopia urgebatur. Inter illos novem classiarii Belgæ, qui occupata Bahia captivorum numerum auxerant, servitutis impatientes, quovis modo navem vincere, injustę potentię obviam ire, victos acerbius ulcisci, quanquam mortis periculo, in animum induxerunt suum. Per duos menses cunctando, opportunum tempus opperiendo, res ex voto non succedebat. Sed quia magna facinora ægre differuntur, & celeritate constant, conju-

conjuracionis Princeps cum sociis concubia nocte, Hispanos, qui excubias agitabant, cum Præfecto, magno & feroci animo trucidat. Plerique cæsi ex Hispanis, antequam insolitus tumultus classarios alios somno pressos excitavit. Qui periculi magnitudine commoti, uti rebus trepidis fieri solet, consiliis fluctuare, concursationibus periculum anceps augere, neque armis obniti, neque conjuratos adjuvare. Quæsiti, an partium suarum studia sectari cuperent, an potius ferro decernere, in partes pedibus secesserunt. Electus in centurionem conjuratorum primus, cæteri in sacramentum militare acti. Inveni postmodum quindecim Hispani, quos fortuna occultaverat, quorum supplicum sanguini parcere, victoribus clementia videbatur. Abducta navi in Texeliæ stationem, centurio Hispanico vestitu tanquam triumphali amictus Hagam magnis itineribus contendens, ab Auriaco, laudata ejus sociorumque virtute, Præfecturam navis impetravit.

CAPUT LV.

*DE EXPEDITIONE ET PRAELIO PETRI HEINII CVM CLASSE HOSTILI IVX-
TA VRBEM S. SALVATORIS IN BRAS-
SILIA. ANNO CLIO LXXXVII.*

IN partes nunc veniat virtus incredibilis Petri Heinii, qui obscuris majoribus genitus, maris non tam hospes quam indigena, inter ferocientes tempestates enutritus, horrore efferati elementi animum quoq; exasperaverat, quin-
imo

imo ipse horror & tempeſtas Oceani, ad quoscunque caſus induratus, nullibi hoſti quietem permittebat. Præter odium Hiſpani ex inviſa dominatione, quo nautica plebes etiam domi armatur, accedebat & privata cauſa. Captus ab Hiſpanis una cum patre, ſervilem in modum habitus, flagris ac verberibus caſus, poſtmodum triremi impoſitus, cum cæteris, quos Spinola ea tempeſtate habebat, Sluſam Flandriæ advectus, libertati demum reſtitutus, quo tempore Mendoza Arragonius ex convento captivos reddi ſuis impetraſſet. Iterum in India ad Occidentem captus, poſt biennium dimiſſus, nullis periculis territus, vitæ prodigus ubique ſe hoſti objectabat. Jam ante vicariam poteſtatem ſub Præfecto Willekeno nomine ſocietatis Indicæ obtinuerat, atque urbem S. Salvatoris in Braſilia aggreſſus, inter primos murum ſuperaverat, ſtipatam hoſtium multitudinem in fugam egerat, deniq; urbem opulentiſſimam, ut ſuperius commemoratū fuit, deſertam Luſitanis expugnaverat. Anno demum clō Io cxxvi Præfectum claſſi ſocietas Indica, quæ ad Occidentem, illum communibus votis nuncupaverat. Claſſis conſtabat novē majoribus navigiis, celocibus quinque, quæ viribus modica, ſi Præfecti generalis Balduini Henrici claſſi, quæ maria ſulcabat, jungi potuiſſet, impetendæ hoſtili & Regiæ argentiſeræ æqualis fuiſſet. Sed iniqua nos fortuna preſſit. Noſtri enim fruſtra quæſito Præfecto, multa maria emenſi, multis quoq; difficultatibus agitati, pluribus tamen interceptis navigiis, quæ commercia vectabant, tandem ex captivis intellexere Præfectum generalem Balduinum Henrici diem ultimū prope Havanam clauſiſſe, claſſarios patriā vorſus iter direxiſſe. Inprimis Imperator noſter,

qui

qui ubique ad gloriam virtutis via grassabatur, ereptam sibi classis regię argentiferę invadendę occasionem, non per foecordiam vel ignaviam, sed per infortunium, multum querebatur. Namque illa divitiis onusta, & quadraginta sex velis instructa circa promontoriũ Floridę nono Septembris die in conspectum venerat. Quam adoriri concilio militari inconsultum visum fuit, namq; frustra eniti, neq; aliud se fatigando quã certo periculo se exponere, extremę dementię erat. Per aliquot menses pelago jactatus Kalendis Martii sequentis anni ad portum Bahię delatus, furtim, & per insidias hostilem classem adoriri in animum induxerat suum, cæterum malacia maris impediēbat. Dum cunctantur, non tantum Imperatori, sed & aliis egregiis viris, præfectis simul cum omni militari & nautica pube flamma virtutis glorięque supra modum exarsit, neque prius sedari potuit, quam hostem in propriis visceribus adorirentur. Itaq; Heinius secundo & turgido vento in portum hostilem delatus, classem naviũ viginti & sex, quę propter urbis mœnia suggestumque tormentorum se interius receperat, animo militari invadi imperat. Naves hostiles propriis tormentis munitę, etiam urbis atque arcis, quę valida urbem prætexebat, machinis defendebantur. Primus huc cursum intendit Archithalassus, ut qui primus auctoritate etiam virtute esset. Cumque se classi inferuisset, medius inter Prætoriam vicariamque hostium, jaci anchoram & sisti iubet, attonitisque oppidanis, quo tam audax facinus abiret, cruentam pugnam inchoavit. Binę nostrę naves, quibus Geldrię & Hollandię insigne erat, eodem animo adoriendo hosti anchoram fixerunt, reliquę non confestim, inferiori vento agitatę,

Ff

præ-

præsto fuerunt. A tribus itaque nostratibus navibus tam acriter impetite dedolatæque hostiles, ut deditionem sub conditione vitæ sponderent. Sed continuo tormentorum fragore non audite postulantium voces. Neque abstinit Heinii vicarie affixus, donec illa ita perfoderetur, ut fundum peteret, atque tres tantum ex militari manu superstites reciperentur. Interea dum ex urbe, cui Præfectus erat Didacus Ludovicus Oliverius, impiger militiæ & vetus, dum ex classe hostili terribilem in modum tormenta undique tonabant, incredibile dictu, cymbis socii navales cum sclopetariis se dederunt, & contra densissimam globorum ingentium procellam insultarunt, audacia & celeritate admiranda foras hostiles transgressi tanto impetu se in naves effuderunt, uti confertus hostilis miles ex navibus se in mare præcipitem daret, atque enatando agere se reciperet, cunctæ admodum naves intra teli jactum abducerentur. Quanquam autem ex omnibus munimentis, tam majoribus, quam manuariis tormentis, instar grandinis densi globi torquerentur in Nostros, tanta tamen fortitudine & virtute cuncta expedita fuerunt, ut intra tres horas victoriam hostibus extorserint, summo Lusitanorum opprobrio atque contumeliâ. Et major hostium clades, quam nostra, quæ tamen se defensantibus omnia prona, nostris adeo ardua & difficilia, ut veluti cum morte colluctandum, atque ex cymbis in fastigia navium enitendum esset. Abductæ tamen viginti & duæ naves ex portus intimis penetrantibus. Cæterum dum Nostri revocare gradum ab urbe & suggestu tormentorum cupiunt, navem Prætoriam victricem, aliamque Geldrie nomine insignem, mare niquum

iquum deseruit, ita ut utraque vadis hæreret. Geldria summo nisu laxata, Prætoria altius fixa, etsi omni ope succurreret pubes nautica, liberari nequibat, & cum postridie omni molimine à cæteris navibus, quæ propius adventarant, frustra idem tentatum esset, ita hostium tormentis perfossa fuit, ut ne quidem navis speciem referret. Et cæteræ quoque naves, inprimis Geldria, continuis globorum ictibus nonnihil quassatæ fuerunt. Dum Martis hæc horribilis tempestas ingruit, dubiū an negligentia an casu incenso pulvere pyrio navis, quæ malus Auriaca indigetabatur, unà cum sexaginta viris dissiliit, ex quibus quatuordecim superstites, miserè ignibus ustulati, recepti sunt. Imperator itaque classis, comperto navem Prætoriam abduci non posse, atque ita undique trajectam, ut navigationibus inutilis futura esset, prædam tolli, perfossisque tormentis ignem injici, atque concremari mandat. Quanquam autem horribile, atrox & diuturnum illud fuerit prælium, ex Nostreis tamen pauci quinquaginta circiter adversis vulneribus cæsi, Imperator classis sinistro brachio fistulæ militaris globo vulneratus, aculeoque ligneo tibia tenus adactō saucius, ejusdemque vicarius manuario tormento sub costis spuris, non letale vulnus accepit. Prædam omnem quatuor delectis navibus, inter quas & Prætoria hostilis, ad suos propere dimisit, cæteras expeditas maxime refici, reliquas exuri jussit.

CAPUT LVI.

*DE EIVSDEM PRÆFECTI PRÆ-
LIO, ET VICTORIA, EO-
DEM ANNO.*

VICTOR hostium Heinii multa iterum cum animo suo volvebat, novamque victoriam meditabatur maria lustrans: neque præceps animi cupido debilitando hosti expleri ullo modo poterat, sed inquietus cum inquieto elemento huc atque illuc fluctuabat. Nonnullæ minoris pretii naves interceptæ vel incensæ. Juxta Bahiam vela intendens, ex Lusitanis captivis intellexit, quinque vel sex navigia crepidine vicini fluminis confedisſe. Duabus celocibus imperatum, uti cum omnibus lintribus & scaphis manu militum instructis interiora fluminis penetrarent. In cujus ostio vacuum desertumque, neque infimæ magnitudinis, navigium, expilatis iis, quæ fors offerebat, sui juris esse permiserunt. Namque omnium animos spes prædæ transvorſos egerat, studiisque ita accensis pubes nautica, ne qua occasio elaberetur, sollicita summo opere & anxia erat. Aliquantum fluvio proVectis angusto sinu aliquot hostiles naves latitare viſe, quæ omnem operam intendebant, uti conspectui noſtrorum se subducerent. Propius accedentibus Noſtris tanto impetu majoribus tormentis, & manuariis fistulis crudelis inſeſcivit tempeſtas, uti opprimendi inſultandique in naves hostiles nulla spes illos adducere poſſet. Reverſi itaque ad ſuos, cum enarraſſent quibus fuiſſent diſcultat-

ficultatibus preſſi, Imperator tamen, uti erat promptę virtutis & audacię, ſupra modum glorię militaris appetens, magno animo iterum ſtatuit, ſeiſſum cum promptiſſimis quibuſque objectare periculis, atque fortunam experiri. Luce itaque proxima iterum ingreſſi flumen, non eodem loco quo pridie, ſed penitus retrò ceſſiſſe hoſtem comper- tum eſt. Quo investigato repertoque, intonuerunt iterum tormenta tanta ferocia, ut adoriri hoſtiles naves ſupra audaciam cunctorum eſſe videretur. In primis vicaria manu- nariis fiſtulis maximo horrore exploſis ingentem Noſtris terrorem incuſſerat. Præerat illi homo facinoroſus, & pluri- bus criminibus coöpertus centurio, nomine Padilha, qui ſanguine nobiliſſimi & generoſiſſimi Domini Dortæ neſa- rias maculaverat manus, quem Bahię Gubernator cum cen- tum & quinquaginta militibus præſidio navis impoſuerat. Verum Imperator noſter, ſuo adventu ultimo imperio, ne ſe reciperent, impedivit, cui, cum nullum fere conſilium vel inceptum fruſtra fuiſſet, facile obtemperabat nautica pu- bes, & incredibili inſultu navem violenta manu ſuperavit. Nuſquam magis patuit, audacibus nihil invium eſſe, & for- tiſſimo cuique minimum adeſſe periculi. Quippe hoſtili ſanguine præter treis pueros omnibus occiſis fori natabant, & per ſentinam in flumen ſe exonerabant, tredecim tan- tum ex Noſtris deſideratis. Hoſtiles alię duę, inter quas & Prætoria, facile occupatę, dum miles ſe profundo commit- tit, & natando eluctatur. Ulterius adhuc duę vel tres ſub obſpectu arborum latitabant, quę reſluentibus aquis vadis hæſitabant, illoque beneficio ab omni inſultu facile defen- ſabantur. Conſultum viſum Imperatori noſtro in mare

captas naveis cum suis promovere ; namque per quatuor admodum milliaria Hollandica obliquo & tortuoso amne enitendum erat. Rupta per infortunium una captarum navium : præmissisque cymbis uti prospicerent , quidnam interea hostis moliretur , compertum , hostem interea cum præsidio, ex urbe proxima, quæ S. Salvatori sacra, ad ostiū fluvii , qua exitus nostris patebat , vicinum collem munimentis cinctum insedisse. Adhæc navis, quam antea Nostri desertam reliquerant , consilio hostili submersa & vadis impacta viam eximebat. Verum subsidentibus aquis igne injecto flammam concepit, & certantibus duobus elementis, destinata aquis, ignibus periit. Et quanquam fistulis densos globos ejacularentur hostes, qui collem insederant, dracones tamen nostri (tormentorum hoc genus est) ita multifariam suos ignes eruclarunt , ut exiguum inde damnum paterentur. Adversus impetus hostiles ex vicino colle aliud excogitatum præsidium. Boarum tergis naves omnes, inprimis quæ præcedebant cymbæ munitæ ictus crebros fistularum eliserunt. Adverso vento, angusto & vadoso flumine educi naves nequibant , verum à cymbis ex longinquo jactis anchoris attrahi illas necesse erat. Hoc uti multis difficultatibus obnoxium erat , ita Imperator noster non tantum fortitudine , sed & consilio pollebat , quod longe difficillimum esse solet , cum audacia ad temeritatem, prudentia ad timiditatem propius accedat. Verum cymbæ velieribus cinctæ eliso glandium impetu incredibili successu anchoras jecerunt, fluvioque tres naveseductæ, ipse Præfectus classis cum suis postridie sub oculis hostium flumine vadoso elapsus, certa reportavit victoriæ præmia.

CAP.

CAPUT LVII.

*PRÆLIVM ACRE INTER TRES NO-
STRATIUM NAVES, ET PRÆTORIAM VI-
CARIAMQVE HONDVRENSSEM,*

ANNO CLD ID CXXVII. VIII JULII.

QUINQUE liburnicas sub Præfectura Joachimi Gyſii Batavi Zelandique expeditaverant, ut diripiendis hoſtilibus navibus ad occidentem maria metirentur. Cum immenſo & inquieto mari huc atque illuc fluctuantes, multas circumvecti inſulas, modo juncti, modo diviſi, animum tamen hoſtem contundendi non diviſerant. Cum jam antea Hiſpanicam fregattam prope Maracaibo igne corrupiſſent, mare ubique infeſtantes, inter inſulam de Vaca, & Hiſpaniolam excepta una navi frequentes ſimul convenerant. Hinc iterum fluctibus divorſi poſt menſem exactum promontorium Corrientes tetigerunt. Poſtridie una Hollandica, & duæ Zelandicæ juxta promontorium S. Antonii modicis tantum velis movebantur. Ubi dies proceſſit, vela peregrina conſpectui ſe dederunt, ſed quod compoſitum & tacitum ventis mare ſternere- tur, nulla infeſtandi copia fuit. Cum ſecundo dein- die ſuppara velorum iterum paterent, lembo armatis vi- ris reſerto adnitente remige facile navis ſuperata, quæ ex nova Hiſpaniola curſum huc intenderat. Poſtero die emi- nentem regionem Cubæ oculis uſurpabant, eoque diſtri- ctu uſque ad octavum diem Julii curſus huc atque illuc re-
liſtos

lietos iterabant. Appetente die conspecta duo vela, quod omnibus expansis linteis vento secundo Nostri ferebantur. Propinquantibus duo esse majora Hispanica navigia intellexerunt. Ardorem pugnandi prædæ quoque cupido acerrime instigabat, quæ prima esse mortales censent, & præcipue militarem pubem trahunt, quorum animus nulla magis tuba quam spoliis accenditur. Cum itaque omnes labores atque pericula consueta haberent, sibi ipsis incalcescente sanguine temperare nequibant, acerrimeque explosis omnibus tormentis in hostem tonabant, verum innectere se hostilibus navibus absente Prætoria nostra non consultum judicabant. Signo dato & illa præsto fuit, atque tormentis omnibus hostem impetiit, quod & reliquæ ex ordine factitarunt. Iteratis dein ictibus, Prætoria nonnihil cedente, reliquis dubitantibus, ecquid rei esset, cymba centuriones se Imperatori sistunt. Ibi, quia globos & jacula eminens in hostem torquere frustraneum videretur, impetu atque insultu hostiles naves debellare commune consilium fuit. Virtus nullam longiorem moram ferebat, sed cominus prælium conferere, Archithalassum adoriri, hostem ferire, fatigare, nihil metuere quam turpem famam illos edocebat. Dum ita feruntur colloquia, nostris navibus vento ulterius actis, consternatis, uti credebat, & fugientibus imminere summa ope adnitebatur hostilis Imperator. Neque enim credebat (inauditum antea facinus) liburnicas cum galeonibus periculum virium experturas. Supremo itaque ex apice vexillo tormentique ictu, signum pugnandi dedit. Cæterum procul à nostris tanta turpitudine atque ignominia abfuit, quæis mortis jam ante victoribus, nihil aliud quam hostis

hostis quærebatur. Adversum ventis mare, obliquando vela, superare, Pratorię hostili se implicare, summum illorum votum fuit. Cæterum illam iniquo mari, tum quod expeditior princeps hostiũ navis in omnes partes se vorteret, adoriri Fortuna non permittebat. Vicariam itaque adorti ab utroque latere: verum suppetias Pratoria hostilis tulit, atque principi navium nostrarum, cui Leænę nomen erat, se implicuit, quæ vicariæ latere eminentiori, quod vel & ventis non deprimitur, prælium jam concitaverat. Ita illa media inter duas hostiles utrinque atrociter impetebatur. Tum subito cõorta globorum tempestas cum magno fragore, densusque fumi nimbus intermicantibus ignibus visum impediabat. Duæ dein aliæ naveis vicariam summo impetu adoriuntur. Foros transilire Nostri tentabant, cæterum hoc longe difficillimum erat, cum ex sublimibus navium tabulatis hostes Nostros fessos, confectosque lanceis deprimerent. Cum neque ita belli alea procederet, ignitis jaculis (malo punico in militia nomen est) quæ manu atrociter spargebantur, terror hosti incuriebatur. Nihil crudelius repertum, ex quo in terminis mortalitatis properandis ingenium hominum laboravit. Hoc jaculum quicquid obvium convellit, ita ut ipsum Acheronta perrumpere videatur. Terrâ ædes uno impetu disjicit, ipsa telluris viscera atque intima penetralia pandit, ut cuncta misceri videantur elementa: mari atrocius sævit, ubi in naves conjectum, angustia loci tabulata hominesque misere collidit. Qua procella miles hostilis laceris navis asseribus misere saucratur, adeò ut nullibi refugium foret, cum ubiq; furiosum illud jaculum vim suam horrendam exerceret, horribiles ejula-

G g

tus,

tus, clamoresque morientium exaudirentur. Dehinc incendio navis corripiebatur, neque militem nostrum ignis suus deseruit transiliendi. Tum totius negotii fœda & miserabilis facies fuit, passim pecudum more hostis obtruncari, cadavera in mare volvi; sanguine denique aspersæ aquæ fluitabant. Pauci Hispani furori militum exempti. Incendium navis summa cura extinctum. Interea prætoria hostilis calamitati se subducere nitebatur, quanquam & nostræ naves, inprimis Læna, quæ inter duas hostiles media jacuerat, ita exceptæ, perforatæque essent, uti fessæ laceraque infectandi animum ponerent. Contenti itaque hac victoria, simul cum superata navi in sinum (Canalem vocant) Bahamæ se receperunt, & circa oram Floridæ exoneratis mercibus opulentis, Hispanos, quorum vitæ pepercerant, incolumes Havanam dimiserunt. Ita demum pluribus direptis navibus classis hæc Indica quinto Septembris die fœliciter in patriam appulit, luculentis spoliis turgida, quæ duodecim auri vasa superabant. Præfectus torque aurea in præmium virtutis donatus, nauticæ juventuti tredecim mensium stipendium præter solitam mercedem ab Indicæ societatis Curatoribus persolutum, ne virtus sine præmio flaccesceret, quæ per se dura & amara est, nisi largitione sustentetur. Liberalitas & fortitudo ultro citroque ire debet, & hic est quæstus Reip. maximus, de fructibus nonnihil impartiri, qui vitam pro commodis Reip. impartiantur. Et hoc Proceribus nostris semper curæ fuit, uti in virtutis præmiis magnifici essent, neque ullis meritis manum clauderent. Ita Deo juvante, nihil quoque clausum & invium fortitudini Batavorum fuit.

CAP.

CAPUT LVIII.

DE PRÆLIO NAVALI INTER CLASSEM HOLLANDICAM NOMINE SOCIETATIS INDICÆ OCCIDENTALIS, CUI PRÆFECTVS ERAT PETRVS ADRIANI ITA, ET PRÆTORIAM, VICARIAMQVE HONDVRENS-

*SEM, ANNO CLC LXXXVIII,
MENSE AUGUSTO.*

SOCIETAS Indica spoliorum cupidine ulterius flagrans, cujus potissimum causâ & bella geruntur, & maria sulcantur, ipsâ hyeme mense Februario fatigandæ America, quæ nervos regiones sustentabat, classem instructam sex majoribus navigiis, celocibus tribus, sub Imperio Petri Adriani Ita mari commiserat. Post multa maria emensa, vagasque navigationes fluctuantes, mense Augusto Prætorix vicariæque navi classis Hondurensis circa Havanam occurrerunt. Utrâque viginti tormentis bellicis munita, hæc ducentis quinquaginta, altera ducentis viris stipata. Hostes perterriti fugiendo versus litora Havanz portum, quæ ad duo tantum miliaria versus orientem aberat, attingere omni ope laborabant. Cæterum una navium nostrarum concitior velocitate sua cursum hostilem interceptit, ita ut ferro iter aperiundi, configendique illis gravis necessitas incumberet. Vicaria primum insultum tulit animosè admodum, & cum nostris harpagones, quæ se innecèrent, decessent, elapsa vadis hæsit. Non semper virtus Fortuna pensatur, & incerta casuum, si uspiam, indomito maris ele-

Gg 2

mento

mento dominantur. Quippe navis nostra prædę avida, dum non contractę satis se vortit, ex imperitia locorum, cæcō vado itidem adhæsit. Quo in loco immobilis, continuis tormentorum verberibus à matutino tempore usque ad horam secundam post medium diem, ita impetita est, ut major malus medius dissiliret. Neque illa impatiens sui in hostem sui vibrare fulmina quibat. Prætoria hostilis versus litus itidem adacta, & cæcis syrtibus fixa. Nostra inter duas hostiles media ita densatis ictibus globorum perfossa fuit, ut sui impotens animum sponderet, undique circumventa de deditione cogitaret. Ita lacera navi, quæ vel ignibus vel Oceano ludibrium debebat, integra quidem fortitudo emicuit, sed contra extrema Fortunæ, cum nihil amplius possis, eniti ne quidem ipsa virtus potest. Dum ita non tam cum hostibus quam iniquitate loci luctabantur, Princeps classis nostræ diu ventis fluctibusque adversis jaçtatus, cum infensum mare suppetias nostris prohiberet, paulum septentrionem vorsus inclinans, à meridie, statis illic ex eadem plaga spirantibus ventis, turgidis velis in hostem fertur. Duabus aliis navibus, Vicariæ, & Fortunę, quas penes se habebat, quid faciendum injungit. Ipse consilio & virtute validus advorsa Fortunę superavit, quæ brevi momento huc atque illuc se flectit. Quanquam diu dubia quò se inclinaret, cum & nostra & hostilis virtus utrinquē illam prensaret. Quippe ita acriter vicaria Nostris restitit, ut majora quoque tormentorum verbera, quīs horrendum in modum à fronte lacerabatur, contemneret. Sicut densa grando tectis illisa dissilit, ita supra cladem est robustus fortitudine animus. Nostri immixtis ignitis focus, terrorem

rem incutere , atque ita in tabulata eniti tentaverant , verum æquè animose pulsi fugatique. Naveis deinceps duæ , quæ Delphinis & Fortune nomina erant , cum in Prætoriam hostilem simul globos misissent , præsidio Nostris fuerunt. Fluctivaga Delphin propius accedens à tergo vicariam hostilem premebat , Fortuna certo omine victoriam spondens promptissimum quemque & maxime strenuum militem in Prætoriam traduxerat. Tum demum conferta pubes incredibili insultu in vicariam se præcipitem dedit , atque invictus animus non tam in audaciam , quam in furorem prorupit. Flagrabant & micabant oculi , exæstuabat in facie sanguis , concutiebatur crebro spiritu pectus , citatus gradus , manus inquietæ , corpus denique in exitium hostium instar maris fluctuante gressu attollebatur. Pro ingenio quisque glande vel ferro pugnare , atque acriter resistente hoste modò eniti in adversa navis , modò concidere , modò lapsantem iterum gressum firmare , donec pertinacia & horribilis insultus hostilem navem superaret. Tum promiscue sanguine hostili imbuti enses , omnia , quæ visus se extendebat , constrata telis , armis , cadaveribus , inter ea tabulata infecta cruore fluitabant. Ex trecentis viris , dimidia pars ferro fatum invenit , reliqui , qui natando per aquas ferebantur , vel iisdem mersi , vel pauci admodum evasere. Commemorant nonnulli inter præliandum , cum jam vicaria navis superata esset , hostisque confectus , igne illam conflagrasse , quam cum pubes militaris & nautica obflammarum violentiam desereret , Præfectum stricto gladio rutilantibus ferocem oculis fugienteis prohibuisse , atque hæc verba addidisse , ut aut ignes extinguerent , aut iisdem perirent , me-

tuentem nimirum, ne ingentes opes, simul cum devicta navi concremarentur. Quod quidem ab aliis silentio transmissum pro comperto dicere nequeo: hoc constat mercibus, quis stipata erat, exoneratis, cum ad quinque pedes navis aqua premeretur, atque humentia terga bouum fœdum & intolerabilem odorem spargerent, postmodum ignibus subjectam fuisse. Interea, uti ad institutum revertar, treis aliæ Nostorum naves, fixis anchoris, Prætoriam hostilem adoriuntur, & continuis tormentorum ictibus fatigant, cæterum hosti perculso tam fœdo & horribili suorum spectaculo, animus timore obstupuit, consilia præpedita turbabantur. Ubi enim metus dominatur, etiam fortissimis viris subito omnis mens cadit, neque quicquam pensi habetur. Fuga itaque iis potior fuit, & infido mari vitam suam crediderunt. Ex promptissimis tamen quinquaginta extrema expectarunt, qui tamen mox eadem sorte effugium morti quæsiere. Ita post acerrimum conflictum superatæ prima & vicaria classis Hondurensis naves; singulæ ducentis & ultra inesse fuerant militibus, qui militiæ veteres ad nutum monentis intenti, arma armis conferere, obistere, circumire, discurrere, mutare pugnandi vices, virtutem virtute tegere cum peritissimis noverant. Ex quibus ultra ducentos obruncati, præter illos qui miserabili fato mari sibi mortem properaverant. Nostre tantum duodecim vel tredecim cæsos numerabant, quibus recens occisis vultus adhuc ferociam animi & vindictæ studium ostentabat. Majoris sæpe virtutis est victoriâ prudenter uti; quam hostem vicisse. Plures sæpe quæ ferri virtute quæsiervunt, per fastidium & contemptum hostium perdiderunt. Hanc itaque

For-

Fortunę indulgentiam, qua etiam optimi Imperatores in-
solescunt, periculo committere, modicisque intentus im-
modica affectare noluit prudentissimus Imperator. Opu-
lenta alioquin classis, qua ex Terra Firma immensę divitię
vectabantur, propinqua censebatur: ceterum incerta pro
certis captare noluit Archithalassus, cui fatales rerum vicis-
situdines, & incerta maritimę militię in promptu erant:
inprimis quia pleręque naves sicco arenarum fixę, atque
excita illarum moles ægre moveri poterat. Vicaria itaque,
quę tām alte syrtibus federat, uti nullis laboribus iterum
fluctuare posset, exemptis mercibus, aquis exitium mini-
tāntibus, contrario ignis elemento periit. Prætoria quoque
hostilis, atque Leæna, quę vehementer pertusa erat, à vicinis
navibus trahebantur. Ventis itidem silentibus maris æstus
ad ostium Havanę classē nostram abripuerat. Et nisi la-
cerę naves summo nisu Oceanum versus à cymbis impulsę
fuissent, ab hostilibus munimentis, quę nondum tormen-
tis pertingere classē nostram quibant, periculum ingens
incubisset. Maxima igitur difficultate eluctati, expansis se-
cundo euro velis per fretum Bahamę propter oram Floridę
vias maris tentarunt, Prætoriaque hostilis, quę rimis fa-
riscens seipsam supra aquam tueri non poterat, sublatīs
paulatim mercibus ignium violentia combusta. Ita junctis
velis Imperator maria feliciter emensus circa finem Septem-
bris, atque ineunte Octobře in Patriam revorsus, summo
omnium studio exceptus fuit.

CAPUT LIX.

DE CLASSE ARGENTIFERA A PETRO HEINIO DIRECTA.

ANNO MDCCXXVIII.

ANNO hujus sæculi vigesimo octavo sub Imperatoris Heinii auspiciis ad Septembris nonū diem sole oriente classis argentifera ex nova Hispania in conspectum primo venit. Nonnullæ naves ex Nostreis, vento diutius divulsæ, suas iterum vires commodum junxerant, ut tanquam numinis decreto victoria sponderetur. Quanquam Havanz litora premerent Nostri, æstuante & rapido fluxu versus Matanzam delatis opportunus hostium occursum fuit, quo & ipsos rapidius mare impulerat. Ita benignitas fluctuum spolia sui Oceani nobis obtulit. Laurentius quidem de Cabrera Havanz gubernator omnem curam intenderat, celocemque miserat monitum suos, classem Hollandicam viginti circiter & trium navium in propinquo esse, verum illa sex admodum diebus per fluctus varie agitata, intercepta spem atque fidem Nostreis intendit. Ad octavum Septembris nuntiato navem hostilem, quæ ex novâ Hispania adventabat, ab una nostrarum occupatam, totamque classem non procul abesse, supremus præfectus opulentissimam classem jam animo invaserat, viceratque. Et focii navales spe accensi prima luce in corbem supremum eniti, & tanquam ex speculâ quaquavorsum prospectu suo Oceanum metiri. Primo decem naves eminus oblata, quò cum cursum flexisset Im-

set Imperator, haud difficulter ferme omnes (una enim forte evaserat) debellavit. Quippe nihil hostile cogitantes, sub obscurum noctis igneis nostræ classis secuti, prius senserunt Fortunas suas in extremo sitas, quàm se expedire ullo modo possent. Lintribus & scaphis armato milite munitis, quod majora navigia sudo maris impedirentur, primo insultu facile oppressi. Verum illis navigiis non congesta argenti pondera laminæque, neque pretiosæ admodum merces vestabantur. Ubi medium diei processerat, novem aliæ sublimes naves tanquã fluitantes turrès in mari spectabantur, quas galeones esse argento stipatas dubitatum non fuit. Quis necessitas tam diu cunctandi in novæ Hispaniæ portu incubuerat, quod unius ruptæ carinæ eximenda fuissent onera. Ita fortuna, quæ in rebus humanis dominatur, vel fatum patriæ nostræ immensam gazam obtulit, quæ si hostilis classis celerius mari se committere potuisset, manibus elapsa fuisset nostris. Citato cursu velis omnibus expansis infectatus Imperator summa ope enitebatur, ut classem hostilem, sinu Matanzæ prohiberet. Verum illa, velis turgentibus hosteis fugiendo, cæcis vadis in ipso portu allisit, uti crebro una calamitas alterius prænuncia esse solet. Subito tumultu, dum animus timore obstupescit, atque opum custodiendarum cupido incessit, cymbis ultro citroque pretiosissima quæque auferre in vicinam tellurem nitebantur. Obscurum noctis timorem auxerat, circumspectare omnia & omni strepitu inhorrescere, multum properando parum promoveret. Nostris spe immensæ prædæ accensi, cui nunquam satis festinatur, post ridie nacti hostilem classem syrtibus hæsitantem, non tam vocibus Imperatoris

H h

ratoris

ratoris, quàm proprio ardore abripiebantur. Imperator ferro toto corpore munitus, militaris & horridæ abruptæque facundiæ, non tam speciosis verbis quàm ignibus oculorum, ignes sociorum inflammabat. Ipse imperterritus, promptæque audaciæ, in proximum lembum se permittit, ex quo complures sclopetis instructi ex mandato insultum in hostes parabant. Nunquam socordia atque ignavia hostium minus pugnatum, majorque victoria obtigit. Postquam in vicariam armatis validam fistule militares aliquotiens displosæ, & si se dederet vitæ incolumitas sponderetur, victa, antequam se ad certamen fere componeret. Memorabilis hic classarii audacia silentio obliteranda non videtur. Cum enim ex humili cymba in fastigium Hispanicæ navis eniti nequiret, fune forsân pendulo se ipsum spectantium hostium ingenti opprobrio in superiora attraxit, quæsitisque subito restibus, projectisque, ad eandem audaciam reliquos navales confirmavit. Eadem sorte vitæ conditione Prætoris aliisque oblata, ubi classis Hispanicæ Præfectus Franciscus de Beunavida illam accepit, vinci quoque cæteras non puduit. Ita immani præda, nullo nostrorum, vixque ullo hostium sanguine, potiti sumus, commissis ad Mantancæ sinum non consilio, sed æstus marini impetu classibus. Ipse quoque Imperator non fortitudini suæ, vel præsidii humanis, sed soli divini numinis benignitati tam ingentem victoriam tribuit. Prædam trecentorum auri vasorum capacè fuisse à nonnullis annotatum invenio. Compertum quoque ita argenti facti atque infecti pretiosisque mercibus stipatas naveis fuisse, ut pleraque tormenta flecti agitarique nequiverint. Interea ne militaris & nautica pubes rapaces laxaret

manus,

manus, in tempore provisum. Neque severe inquisitum in eos, quos argenti lucrique cupido in transvorsum abripuerat. Qui nescit tempori velificari, nimiumque rigorem licentia temperare, inutilis est Imperator. Ignoscendum, saepe vel connivendum iis, quæ corrigere est nefas, modo non velut excusso cupiditatis freno in nervum erumpat publica licentia. Exonerandis hinc mercibus quinque dies consumpti, una mercatoriarum velleribus onusta fundo mersa. Quatuor galeones cum una mercatoria Bataviam, vorsus destinata, ceteræ ignibus consumptæ vel depressæ. Inter galeones uni, ne rimis fatiscens in itinere aquis periret, mercibus transportatis, ignis injectus fuit. Ceteræ naves, etsi nonnunquam ventis disjectæ, mense Decembri & Januario sequentis anni incolumes appulerunt, una tantum Hispanicarum galeonum per diversum (ut loquuntur) canalem adacta versus Hiberniæ litora periit. Plures quidē ferociente hyberniā tempestate in portu Britannorum, quem Fal-mudam vocant, subsistere coactæ, verum ipse postmodum Imperator stipatus undecim navibus Goedereā, aliæ ad alios portus stationesque delatæ. Quo adventu omnium ordinum homines lætis faustisque vocibus indulgere, præcipue lucri participes, ne sibi quidem ipsis temperare, occurssare Imperatori, dexteras porrigere, incondita plebes premere illius latus, lætitie tumultu implere vias, fortitudinem Imperatoris extollere, ipsum esse maris scopulum, novi orbis domitorem, ignavia & socordia aliorum nihil ibi bene gestum. Hoc esse demum incidere venas Regis Hispaniarum, si argenti commercia ex Peru & terrâ firma intercipientur. Remotiora terrarum terribili nostrarum classium super-

H h 2

ventu

ventu facile labefactari. Hisce nervis Belgis, aliisque nationibus, Hispanum terribilem esse, qui si deficiant, etiam exangue corpus fore. Quæ quidem uti verè ex parte dicebantur, ita virtutem Imperatoris in immensum extollere, cum nullo fere sanguine parta esset victoria, insolens & immòdicum fuit. Ipse Imperator non ambitiosus sui ostentator, non virtuti suæ, sed cœli indulgentiæ tribuit. Et ipse multo augustiora nullo fere populi applausu patraverat, luculento exemplo divitias privatas maximum momentum, atque auctoritatem victoriæ addere. Quam immensæ autem hujus classis opes fuerint, inde liquet, quod dimidium sortis societatis consortibus distributum, septendecim mensium stipendia classiariis persoluta fuerint.

CAPUT LX.

*PETRI HEINII ARCHITHALASSI
HOLLANDIÆ CUM TRIBUS DUNKER-
KANIS ACERRIMVS CONFLICTVS,
EIVS QVE INFAVSTA MORS,*

ANNO CLD MDCCXIX. 17 JUNII.

HACTENUS Batavi maris domini, ubique, etiam qua sol oritur, caditque, late terrorem hosti incusserant, famam autem cum utroque orbe terminaverant. Virtus humanum fastigium excefferat, & perdomito fine terrarum rerum humanarum terminos superaverat. Caterum summa turpitudine mare, quod propriis nostris visceribus imminet, hostis infestabat, an socordia, an rerum quadam vicissi-

vicissitudine haud facile dixerim. Victores foris, domi victis similes: divitiæ mercatorum, quo nervo Respublica fulcitur, rapinis continuis atterebantur, hinc juxta querimoniam in nervum erumpebant. Mortuo Gulielmo Nassovio Archichalasso, qui multis virtutibus decorus obsessâ Grolla infelici glande transfossus mortalitatis leges impleverat, Triumviri maritimi Wemmerus Berchemius, Hillebrandus Quastius, & Guilielmus Melcinannus partito tribus classibus imperium maris obtinebant, qui ducendis onerariis navibus egregiam operam intenderunt. Caterum postmodum Patriæ Patres viro fortitudinis invictæ, Petro Heinio, quem tanquam maris scopulum, terrorem Indiæ, Hispaniæ procellam etiam hostes admirabantur, partes tutandi maris cum summo imperio obtulerunt. Ille autem evestigio terrore nominis vicinum mare implevit, & ne hostem valentiolem negligentia faceret, navibus suis ostia Dunkerkæ, quæ opportuna rapinis magnum mari excitaverat incendium, obturavit. Verum filæ noctis tenebris, juxta syrtes arenaceas, quibus Dunkerka obtenditur, Prætoriam & vicaria hostilis cum altera elapsæ, certas nostri Imperatoris manus non effugerunt. Ille imperterritus diri fulminis instar, quod durissima quæque frangit vel penetrat, non tantum adversus hostium vires, verum etiam adversus ipsas calamitates, atque adeo ipsam mortem infractus contendit. Ipse inter utramque navem medium se stitit, ne non nisi vincendo elaberetur. Dum inter horrendos tormentorum ictus dextra gladium vibrans socios militari facundia accendit, ipse Imperatoris & militis munere fungens, machina majori humero tenus convulsus, subito oc-

H h 3

cubuit,

cubuit, atque immortalem spiritum cælo dedit, nomenque æternum per totum terrarum orbem diffudit. Occiso tanto herœ, Martinus Trompius, amplius memorandus, qui centurionis titulo in Prætoria navi virtutem exerebat, diu cælata ejusdem morte ita instigavit classarios, ut extra se rapti, non tantum pro vita, verum etiam pro gloria, quam ipsi vitæ præponebant, extremis se exponerent periculis. Perrupit tandem, liceat ita loqui, Acheronta Hercules labor, nihil enim audentibus invium est. Et fortitudo hostium, quamquam partes suas impigre impleverit, tandem tamen ubi, omnem impetum effudit, elanguit. Ita Prætoria cum Noctiluca invalæ miserum humanæ sortis spectaculum præbuere. Furore militari cæsi fere omnes inferias veluti occiso Imperatori nostro obtrulere. Tam breves & mutabiles rerum vices sunt, ut qui modo maris domini, nunc jactati varietate fortunæ subito cum vita eodem imperio turbarentur. Perterritus tam cruento Martis speculo Michaël Romboutus, qui vicaria potestate classi hostili imperabat, in fuga omne præsidium posuit, neque experiri pugnandi aleam sustinuit. Insectabatur illum Iacobus Vinkius, & obscuro noctis incerta tormentorum verbera infligebantur. Cæterum ubi prima lux appetebat, tum primum geminari machinarum tonitrua, certisque ictibus ita quassata hostilis navis, ut disjecto malo, antennisque gementibus, injectisque pedicis, post sesqui horæ acerrimum prælium virium impotens, & exhausta sub sponsione vitæ se suæque omnia arbitrio victoris dederit, quanquam usque ad extremum virtus illorum nihil inexpertum omiserit, & mitiores vices versabilis fortunæ expectaret. Victoria quidem

dem hæc gloriosa, sed eo minor, quod in morte tanti herois ingens detrimentum Respublica cepit. Quippe vir virtute sua nobilis, etsi majoribus obscuris genitus, tumido mari inter scopulos ac cautes enutritus, artes nauticas omnes à parvo edoctus, ab infimis nautarum vilissimisque ministeriis ad supremam maritimam dignitatem fuerat provectus. Neque unquam illi aut ab infenso mari, aut ab hoste quies. Animus illi ingens, Martius oculorum vigor, sermo rarus, illustribus facinoribus intentus. Nauticæ pubi carus acceptusque, etsi disciplinæ strictæ ac contentæ. Casuum incerta providentiâ ac cura moderabatur, ita tamen ut à temeritate vel timore intactum nomen tueretur. Idem occasionum momenta captare solers & industrius. In periculis nemo animosior, eadem neque provocare, neque oblata detrectare solitus. Postremum quatuor summi imperatoris virtutes in illo elucebant, militiæ maritimæ scientia, virtus, autoritas, & felicitas. Defunctus est summo omnium mœrore, cum maritimæ dominationis restaurandæ unica spes in illo sita esset, cum magnis facinoribus patrandis intentum, ipso admodum initio fati iniquitas rapuit, an invidit. Lugebant hunc casum Patres, qui maritimam securitatem nervos & opes Reip. esse noverant, atque imperium iis artibus fulciri debere, quibus initio partum fuerat. Publicis impensis sepultura, æternumque illi monumentum decreta fuerunt. Sepultus magnifice Delphis Batavorum, funusque centurionum humeris elatum. Exequiis maritimi Imperatoris spectandis circumfusi civium veluti fluctus attollebantur. Omnium clamor & gemitus, præcipue nauticæ pubis. Una omnium vox erat, cecidisse Oceani invictam
rupem,

rupem, hostium terrorem ac formidinem, cujus trophæa cum occidente sole terminum invenirent. Hæc Nostri, contra hostis lætitiâ fremere, & sicut patientia gaudiorum difficilis est, vix se ipsos capere, hætenus Dunkercæ faucibus clausis nunc iterum apertum mare jactare: In morte unius personæ veluti triumphum prostrati devictique Oceani sibi polliceri. Ita varîe ab amicis luctus, ab hostibus gaudium agitabatur: sicut ita compositæ sunt res mortalium, ut unius calamitas alteri sæpe in gaudium cedat.

CAPUT LXI.

*NOBILIS EXPEDITIO SVB IMPERIO
HENRICI LONGVII, ITEM PERICULOSA
VELITATIO INTER EVNDEM ET IMMENSAM
CLASSEM FREDERICI DE TÔLEDO. OLINDA
PRÆFECTVRÆ PERNAMBVCII OPPIDVM
TERRA MARIQVE OCCVPATVR.
ANNO clō Id cxxix.*

CUM ex argentifera & Hondurenfi classe opes Societati Indicæ cumulatae essent, & Fortuna ubique ad Occidentem indulgeret, extremum solem potentissima classe fatigare Directoribus visum fuit. In ipso limine victoriæ ulterius tendere, neque occasiones intermittere, atque hosti in ipsis faucibus spiramentum intercludere, summa votorum erat. Quænam novî orbis pars petenda, qui per immensa spatia se diffundit, dubiis consiliis agitabatur. Destinata demû expeditioni fuit in Brasilia nobilis Præfectura Pernambuci, quæ propter fertilitatem inprimis cannarum, quâs

quis saccharum coagulatur, paradifus Brafiliz censeatur. Quam ulterius postmodum describemus, cæterum nunc in instituto pergimus. Expeditæ itaq; classi, quæ quinquaginta & tribus navigiis, & triginta lembis, novem & ultra millibus militaris & nauticæ juventutis constabat, cum summo imperio Præfecti Generalis titulo præficitur Henricus Loncquius, virtutis & expeditionis Petri Heinii nuper socius, cum classis hostilis ex Hispania, quam novam dicunt, quæ fortunam opesque Regias continebat, Cubâ Insula haud procul, ad Matancæ sinum, in Batavorum potestatem concessit. Cum ipse sibi exemplum fuisset virtutis, exemplum tamen Petri Heinii supra omnem virtutem erat. Ipsius animum & vultum semper præ se ferebat, illum semper sibi ostentabat. Militiæ præerat Didericus Wardenburgius, qui ad omnia præclara magno cursu ac totis viribus tendebat. Cæterum dum summa omnium consternatione hostili tumultu in patria cuncta flagrarent; cæde, incendiis, cruore atque luctu, postremum vastitate atq; fuga Velaviam vicinaque loca late hostis impleret, inter ancipitia fluctuantis patriæ diutius retentus miles, quem per sedecim hebdomadas impatiens moræ Loncquius ad insulam S. Vincentii, ubi conventui locus destinatus erat, expectaverat. Antequam autem Promontorium viride tetigisset Imperator, inter magnam Canariam & Tenariffam insulam, Regiæ classi, quæ sub summo Imperio Frederici Toletani non tam navigiis quam castellis & propugnaculis maris constabat, occursans, periculo certo se subducere omni ope nitebatur. Quippe partitis navibus, octo tantum penes illum erant navigia, quæis belli aleam experiri non tantum te-

meritas, verum & dementia videbatur. Neque enim minus laudis est, ubi necessitas incumbit, prudenter se recipere, quam fortiter pugnare. Omni itaque studio contendit-ventum superiorem captare, atque extrema Canariæ superare, cæterum circa flexum insulæ, ventis cum velo luctantibus, flectere naveis & in altum proficisci cogeatur, atque ex parte mediis se immiscere hostilibus navibus. Medio diei septentrionem versus navigatum fuit, & quanquam hostis in idem incumberet, & perdendarum navium lubidine summopere agigaretur, turpi tamen metu percussus ipsas aquas laxabat. Treis tantum naves captato superiori vento, quibus non labos insolitus, non armatus hostis formidolosus erat, inter quas & Archithalassi, qui post Generale prima autoritate pollebat, in quatuor nostras hostilia cuncta moliebantur. Machinæ majores, fistulæque militares undique pilas suas ejaculabantur tanto horrore, uti furiis illis cælum intonare videretur, incendioque veluti mare arderet, & densissima fumi nubes aërem obduceret. Una navium ad proram implicare se prætorix nostræ tentaverat, sed cum in eo frustra fuisset, versus inferiora fluctuans, ita ex sinistra parte explosis omnibus machinis à Prætoria nostra excepta fuit, ut clamor cum morte luctantium, vulnerorumque, late se diffunderet. Dum Nostri ulterius versus septentrionem tendunt, summus classis Regiæ imperator admodum propinquabat, & quia inferius vias maris tentabat, obliquato cursu, rectà impetum in nostros facere in animum induxerat suum, cæterum deceptus regione viarum prætergressus adoriri nostra navigia, quæ se in unum cōartabant, nequibat. Postridie, ubi primum lumen
aurora

aurora spargeret, undecim tantum regiæ naves se ostentabant, treis à latere ventum superiorem naclæ, reliquæ septem, inter quas & ipsa prætoria suprema Generalis locum tenebat, vestigia nostra insectabatur. Ceterum cum hostis globum junctarum navium Nostros pro munimento habere cerneret, ne divisæ circumvenirentur, Imperatorem nostrum magna prudentia cuncta ad pugnam composuisse, difficillimumque esse eos insultare, qui vitæ prodigi labores omnes, pericula, dubias atque asperas res, denique ipsam mortem facile toleraturi videbantur, adoriendi consilium omisit. Ita immensa illa regia classis, horror Oceani, sylvæ aquis innatantis ingens spectaculum, ludibrio Nostris se exposuit, & quæ invicta videbatur, ne quidem ausa victoriam periclitari. Porro nunc cætera breviter expediam, quæ classis nostra junctis navibus & militaribus copiis Wardenburgii patnaverit, imprimis quia terrestris hæc magis quam maritima fuit expeditio, etsi infracta robore sociorum navalium pectora lacertos quoque suos moverint, quos & horror efferati maris ad quoscunque casus asperârât, ita ut neque terrâ neque mari superiorem admitterent. Regio, quam petebant, erat Brasilia, cujus Pernambucum nobilis est præfectura, commerciiis sacchari admodum opulenta, quæ ad sexaginta miliaria extenditur, namque versus austrum usque ad flumen S. Francisci excurrit, quo à præfectura Bahiæ separatur, versus septentrionem Itamaracam Provinciam attingit. Vere perpetuo luxuriant agri, montes vallesque arundinibus sacchariferis consistæ, sylvæ Brasiliano ligno horridæ. Quotannis nonaginta naves mercibus stipatas in Lusitaniam appulisse memoriæ traditum.

est. Plures molas trusatiles, quas Ingenios appellant, mancipia, quæ ex Angola ingenti numero huc traducuntur, immodicis laboribus versant. Caput regionis Olinda civitas, quæ sparsim editis collibus sita in vicinum mare prospectat. Non procul Reciffa pagus flumine Biberibi & Oceano cingitur, vecturis navium destinatus locus. Ubi ad tertium Februarii diem anno sequenti Brasiliæ ora primum se aperuit, divisis copiis terra marique hostem invadere consilium fuit. Caterum aquis non prospere cessit expeditio, namque ostia rupis, qua Brasilia obtenditur, merlis navibus præclusa introitum impediabant. Barletta, ubi mare quoque rupem interluit, extensis catenis obturata, omnem intrandi spem ademerat. Tormentorum quoque ictus, quod mare modò attolleret, modo deprimeret navigia, incerti & vagi in extrema munimenta mittebantur, contra ab hoste pilis grandioribus Nostri ita impetebantur, ut non nihil retrocedendi incumberet necessitas. Caterum quam victoriam mare invidit, terra suppeditavit. Namque Didericus Wardenburgius, militiæ Præfectus impiger & militiæ vetus, cum militem ad septentrionem Olindæ terræ exposuisset, latè omnia terrore implevit. Ipse primus, quò cæteros virtutis exemplo traheret, atque adeò quo adversum hosteis expeditior alacriorque esset, saltu vicinam tellurem pressit, simulque genium loci amplexus, aut hic, inquit, moriar, aut victor evadam. Vos autem, milites, me non tam Imperatore quam milite utimini. Spes jam magna dominationis in manibus nostris sita. Caterum non opus est, ut animum vestrum accendam, qui jam generoso æstu flagrat. Ite alacres & spe pleni, dum hostium imperpetus cunctatione

tione languescit, dum metus & fuga illos affligit. Neque vero Deus sinit, ut quod sponte nobis offert Fortuna, metu aut ignavia cujusquam elabatur. Tutissimus quisque est qui mortem contempsit, timidissimum quemque invadit. O-
lindam civitatem videtis? (distabat illa à litore ad duo circiter miliaria) hic hodie trophæa nostra figemus, aut honesta morte defungemur. Caterum quid odiosum mortis nomen propono? Prohi Deum atque hominum fidem! victoria in proclivi est, audere modo vincere, cætera res ipsa expediet. Concitata hinc pubes militaris tripartitis copiis ad urbem tendit. Ubique fuga & solitudo hostis, nisi quod primum impetum ad modicum amnem, quem dulcem (Rio dulce) Lusitani appellant, aggesta ex cespite lorica, contra nostros effuderit. Octingenti milites munimentum illud trans amnem insederant, qui ibi Nostros machinarum ignibus sistere tentabant, cæterum avida spes victoriæ ibi conatus suos sisti indignabatur, & præcipitem animum ad extrema impulit. Neque igneis neque aquæ sistere audaciam quibant, cum enim machinæ campestris in hostem intonuissent, per amnem vadosum tranicurrentes, tanto insultu in hostes irruerunt, ut sua deferentes vicinis se receperint nemoribus. Hinc Nostri campo victores tribus partibus animose admodum ipsam urbem invadunt. Et quamquam acriter resisterent hostes, sicuti fieri solet, quando pro aris & focis opibusque privatis, quæ prima mortales putant, pugnatur, postremum tamen vicit Batavorum virtus, contra illis, quod plerunque in atroci negotio solet, insolito metu omnia trepidabant, neq; consilii, neq; virium copia, cum illæ alterius ope destitutæ mole sua fatiscant.

Itaque passim festinare, consultando nihil definire, modò infra fortunam se deprimere, modo vano nisu iterum se erigere, ingenti metu sua pericula metiri, omnia pavere, denique sibi suisque diffidere, mulieres quoque afflictare se, atque ad Deum immortalem supplices manus tendere. Ita capta feliciter urbe cum vicinis munimentis, Reciffam vorsus expeditio se contulit. Matthias Albukerkius Olinde gubernator natura ferox & vehemens, cum retinenda Reciffa diffideret, viginti naves igni subjecit, mercium horrea, quibus sacchari & ligni Brasiliani ingens vis stipata erat, flammarum quoque injuriis reliquit. Ad vicies centena millia ducatorum hoc damnum aestimatum fuit. Primo munimentum S. Georgii duce Steincalfeltio sub obscurum noctis milites sexcenti irruperant, verum irritò molimine. Quaquam autem omne discrimen spes uberioris gloriæ vinceret, cum tamen scalæ nimis humiles celsiori muro non responderent, nulla eo virtus potuit eniti, inprimis quia pars missilibus ex alto turbabantur, pars machinis majoribus impetebantur. Terrorem augebat nox obscura, tanto facinori destinata. Hinc novi animorum motus indignatione concitum militem agitabant. Post properatos evestigio accessus, ex suggestu tormentorum continuo globi majores munimentum ita pressere, ut tandem jussa facere hostes cogerentur. Miles sine ullo vexillo, fistulis manuariis atque ellychniis, gladiis tantum à latere cinctus, egressus, sacramentoque adactus, ne intra sex menses apud hostem stipendia mereretur. Quia conditione etiam iis, qui munimentum aliud extrema supe vorsus mare situm defendebant, etsi tridui primo moram stipulati essent, donec ab

Albu-

Albuquerque certiores facti essent, tandem tamen, cum frustra obluſtarentur, se arbitrio victoris dederunt. Inſula Antonii Faazii milite vacua ſponte ceſſit, neque impetum expectavit. Spei inopes extrema experiri, & Fortunam laceſſere, lateque victori reſiſtere, inconſultum videbatur. Ita ingens victoria, paucis noſtrorum amiſſis, incredibili hoſtium damno procurata, nervos hoſtileis ſuccidit. Hinc à parte hoſtium geminatus luſtus & maror, à noſtrâ lætitia & gaudium varie agitabantur.

CAPUT LXII.

*PRÆLIUM INTER TRES DUNKER-
KANOS, ET UNAM CELOCEM, CUI NA-
VARCHVS ET PRÆFECTVS ERAT
IOANNES CORNELII LICHTHAR-*

TIVS, ANNO 1615 CXXX,

Menſe Novembri.

IN NOTUIT quoque incredibilis Lichthartii virtus, qui cum anno 1615 CXXX ineunte Octobri Pernambuco celocem ſolviſſet, ſequentique Novembri ſecundâ navigatione Fretum inter Britanniam Galliasque tetigiſſet, primo à Cantabricis quinque navibus, qui ſe Gallicas fingebant, fruſtra dolo impetitus, dein cum tribus Dunkerkanis, quâs ſub ſpecie amicitia Noſtris imponere, & imprudentes ſuperare in animo erat, pugnandi gravis incubuit neceſſitas. Præfectus ubi ſe dolis circumveniri videt, (namque hoſtes ita propinquo inſultu noſtræ navi imminabant,

nebant, ut anterioris veli antenna speculo, ut vocant, se implicaret) convocata pube nautica, tormenta omnia evestigio & quicquid prælio usui esse poterat, expediri iussit, simul orare, hortari militem, ne nunc deficerent, ne numerum metuerent navium, virtutem omni numero potiozem, sæpe exigua manu victores fuisse, vinci non posse ab hostibus, modo mortem non metuant, se certum esse, antequam se dedat, ignem navi injicere, atque ita post mortem hostes quoque vindicare. Pluribus opus non erat, facile enim juvenis accensa, quæ ferocia maris & frequentibus periculis indurata mortem contemnebat. Hinc apertis fraudibus hostis imperat, uti Præfectus pro Rege Hispaniarum vela dimitteret, responsum se nullum nisi Principem agnoscere Auriacum. Dein undique tormenta hostium circumtonare, atque ita mediam navem quassare, Nostri quoque expedite admodum non frustrancis ictibus hostiles naves fatigare: etsi impar omnino congressus esset, nostra enim navis quanquam celeritate in omnem partem mobilis esset, magnitudine longe hostilibus inferior erat, cui cum tribus confligendum erat, quarum una triginta sex ænea tormenta, altera viginti octo, tertia duodecim vectabat, quæ lacerare & deprimere navem ingens hostem cupido agitata. Lichthartio tamen animus belli ingens, periculorum victor, tantummodo gloriæ supra modum avidus erat. Neque insultare in navem hosti fiducia erat, metuebat enim ne Præfectus, vitæ prodigus, sicut ante prædicaverat, ignem pyrium accenderet, atque ita seipsum cum hostibus certo devoveret exitio, igneisque ferales in pestem suam converteret. Hoc prælium per octo horas tanto horrore agitatatum

tatum fuit, ut nostra navis undique hostibus cincta infra aquam septendecim, superius ad quadringentos ferme ictus exceperit, malus major in aquas dissiluerit, minor non in totū fractus titubans nutaret, vela omnia essent disiecta, divisumque gubernaculum: spumante quoque impetu aperta navigii latera urgebat infensum mare, foraminibus tamen, obstruendis summa adhibita fuit industria. Ita fluctuabat lacerum navigium vel potius truncus, & cum hoste atque aquis colluctabatur. Lassus tandem hostis neque indemnus, cum foros transilire non auderet, celocem dimisit, ratus ita dedolatam, uti mari suas deberet inferias. Verum Præfectus sentinam continuo movendo, inter Koxbrotium & Goudtstartium periculoso sinui eam commisit, atq; succurrentibus Britannis summo periculo maris subduxit, Pleimuthæq; portui incolumem stetit. Ita Lichthartius resecta navi, summo cum hostium opprobrio, post tantas rerum asperitates, (quippe non tantum hostilem terribilem impetum, verum etiam naturam elementi cæteris imperitantem industria vicerat) in patriam appulit, & ab undeviginti viris torq; aurea virtutis præmio donatus est.

CAPUT LXIII.

PRÆLIUM NAVALE INTER HOSTES ET FOEDERATOS AD SCALDIM FLUVIUM. ANNO C D I D C XXXI.

MAGNO paratu expediverat hostis classem ex l. ingentibus cymbis veliferis, decem pontonibus, o-
K k Etode-

etodecim. planis navigiis, pluresque alii lembi aderant, qui remigio agitabantur. Ne in hostico penuria annonæ premeret, cibaria ad quatuordecim dies sumpta, machinæ majores decem, ultra quadringentæ leviores, quatuor ignitorum missilium millia, undecim vasa argento, tria funibus stipata: præter nauticam juventutem, quæ ex omni Brabantia Flandriaque huc frequens confluxerat, quinque millia militum, septem Ceurlingorum, quos barbara crudelitas nobiles fecit, millia in universum lustrati fuere. Joannes Nassovius, & Princeps Barbanconius summâ præfecturam obtinebant. Ubi hæc classis ad octavum Septembris Antverpiâ, Archiduce Isabella, & Maria de Medicis præsentibus, se Scaldi commisit, tota civitas commota gaudio exultare, certam sibi victoriam polliceri, concursare plebes, lætis auguriis indulgere. Sacris initiati, postquâ religiosa voce fausta omnia vovissent, etiam post mortem virtutis æterna & indubitata præmia largiri. Constat Legatum Pontificis in hæc verba erupisse: Ite sacrata cælo pubes, & execratos cædite usque ad interfectionem. Quanquam autem inde tympanorû ac tubarû horror, hinc victoriæ concentus etiam ignavum quemq; accenderent, nunquâ tamen efficacius quam adhortatione sacra mors suaderetur, quæ etiâ tyrones in arma, imo cum multis pereundi lubricinè rapit. Die jam ad vesperam inclinato primo ad Perlanum munimentû decessi, atq; hinc Doulam ponè per Saftingen se ostium, præter propugnaculum Hogeverfam & Bergam ad Zomam, Romersvaliam contenderunt. Pars navium vadis fixa crescentibus aquis iterum fluitans attollebatur. Naves nostræ, quæ excubias agebant ad Saftingen se ostium, paulatim Bergam
vorsus

vorſus ceſſere, ubi claffis noſtra in procinctu, quæ præter ſolitam ſociorum navalium multitudinem mille admodum & quadringentis militibus aucta fuit. Auriacus, cui arcana hoſtilium conſiliorum patebant, ſumma celeritate ditionem Tolanam quatuor millibus militum infederat, atque inter hanc & Gulielmopolin, omnes marinas ſpeculas, & doliâ, quîs vadorum brevîa & crebræ ſyrtes monſtrantur, tolli imperavit. Ita una aquæ ſpecies circumfuſa ubique obductis vadis, quæ indies mutantur, etiam peritis locorum facile imponit. Dum Marchio de Sanctacrucẽ in ditionem, quæ à Principe nomen accepit, contendit, uti, ſi res proſpere ceſſiſſet, conſilio & ope ſuos juvaret: claffis hoſtilis, quam Noſtri ſub imperio Hollardi, qui abſente Præfecto maris, vicaria in claſſe autoritate fungebatur, & tribuni militaris Maiſonneuſii infeſtabantur, iterum cæco arenarum hæſitans pugnandi initium dedit. Horridum hic & cruentum fuit Martis ſpectaculum, dum denſa nebula, qua tanquam nocte cælum obducebatur, pavorem ſubitum & incompoſitum hoſti incuteret. Diſperſis quippe hoſtilibus navibus, ſors cuncta turbabat, hinc aquæ, illinc ignes ſumi tenebris cincti, ſuorum atque hoſtium ignoratio, denique ſecuta quarundam deditio, vel fœda vorſus novam Voſſemariam fuga. Hinc clamor virûm, clangor tubarum, fragores & ſtrepitus tormentorum, Noſtris in audaciam, illis in formidinem opportuna erant. Fugientibus omnia advorſa, & quod extremum eſſe ſolet, confuſis ordinibus, nulla ſupererant calamitatis remedia. Pavidis omnia conſilia in incerto fluctuabant. Certis interea tormentorum iſtibus naves lacerabantur, vel violentis ignibus conſumebantur:

mali & antennæ disjectæ profundo agitabantur: alii vadis insultabant, ut caperentur, alii ignes fugiendo, aquis peribant: mare fervebat incendiis, neque suis sed factitiis tempestatibus horrebat: tabulæ cum hominibus sparſæ vasto gurgite jaſtabantur, cuncta denique præſentem mortem: viris intentabant. Diverſa pereuntium facies, certa tamen plerisque mors imminebat, qui capti non fuere. Plures ruptis navibus in profundum tranſilientes enatare nitebantur, ſed laſſatis tandem brachiis aquis abſorbebantur. Ita inſtructiſſima classiſ, brevi tempore fuſa, merſa vel ignibus fœdata peſſum ivit, an ſocordia & ignavo metu, an quod, ubi fata nutant, conſilia cuncta turbantur, diſtrahunturque. Princeps Barbanſonius, Comites, Joannes Naſſovius, Boſſuvius, Freſenus, Willervallius, & Meganus circa territorium, quod à Principe nomen accepit, cymbâ ſibi ſalutem pepererunt. Captivorum quatuor millia, ſexcenti, & ſexaginta quatuor numerabantur, inter quos plurimi primæ autoritatis & dignationis. Decem tantum cymbæ tantæ calamitati fugâ ſe ſubduxerunt. Cæteri omnes (præter pubem nauticam decem millia militum claſſem impleverant) igne, mari, paludibus fœdâ admodum ſtrage occubuerunt. Diu mare & Scaldis laceras tabulas, puppeis, arma, viroſque volvebat, & in vicina litora vel vada tanquam purgamenta Oceani eructabat. Ita tumidi & præferoces hoſtium ſpiritus, qui ante prælium certam ſibi ſpoſponderant victoriam, ſubito collapſi ludibrio Fortunæ fuerunt, & quod proprium eſt arrogantiæ, ante pugnam victores, & ſupra modum glorioſi, victi infra omnem humilitatem abjecti. Inprimis hoc in Hiſpanica gente compertum. Victores immodici

modici fastu, hostium contemptores, imponere felicitati frenos nequeunt, humanæ denique sortis obliviscuntur, victi muliebrem animum induunt, servilem humilitatem, non natura sed extrema necessitas extorquet: cum hoc demum sapientis sit, neque rebus secundis insolescere, neque adversis dejici, & tranquillo animo affectus freno rationis regere.

CAPUT. LXIV.

PRÆLIVM NAVALE INTER ANTONIVM D'OUENDO, CLASSIS REGIÆ SYMMVM PRÆFECTVM, ET ADRIANVM PATERVM, GENERALEM CLASSIS HOLLANDICÆ, ANNO

MDCCCXXXI.

MISSA erat in Bahiam Regia classis navibus & milite valida, sub imperio Antonii D'Ouendo, quo crescenteis vires Batavorum contunderet, eoque magis prosperatum, quod Bahiam obsidione cinctam rumor in Hispania increbuerat. Noster Generalis obviam eundem hosti ratus, atque mari debellandum, antequam terrâ ditio nem invaderet, Fortunis cervicibusque cunctorum immi neret, assentiente senatu Indico Reciffa solvit, Bahiam vòsus expeditionem fecit, uti vel in ipso sinu, vel quocunque alio modo classi tantæ virtute resisteret. Undecimo Septembris die, cum sol jam præceps occidentem peteret, immensa classis in conspectum venit. In quam rem vexillo

K k 3

Impe-

Imperator signum dedit, tum celo ce nunciavit, uti reli-
 quæ naves in propinquo se sisterent, ineundo prælio cun-
 cta instruerent. Post transactam noctem primo lumine,
 quinquaginta & treis velivole naves mari se ostentarunt,
 tanquam si integrum nemus mari incumberet. Comper-
 tum postmodum duodecim Castiliæ, quinque Lusitanie ga-
 leones, duas Patachas, (ut vocant) cunctas simul quadringen-
 tis æreis tormentis onustas, ultra tria hominum millia ha-
 buisse, præter mercatorias, vel acturias naves milite stipa-
 tas, ita ut quinquaginta tria vela numerarentur. Nostra
 classis sedecim tantum naves, inter quas & celoces, præter
 juventutem nauticam, novem militum cohortes, queis im-
 perabat Engelbertus Schuttus, summus vigilum Præfectus,
 numerabat. Ubi hostis in propinquo, Imperator milita-
 ris gloriæ appetens, generoso spiritu ardens, militari facun-
 dia omnes ad pugnandum hortari, monere ne Remp. ne pri-
 stinam virtutem desererent, se nunc decus, gloriam, Indicæ
 Societatis salutem in dextris suis portare, sin victores præmia
 certa, sin fortuna victoriam inviderit, ne se inulti pateren-
 tur trucidari, vel capti sædam servitutem servirent, & mor-
 te gravio rem vitam exigerent. Neque fugam decoram,
 contra hostem vici solitum. Fugiendo pericula sæpissime
 incutiri, audacissimum, tutissimum esse. Simul imperat, ut
 binæ quæque naves galeones singulas adorirentur, quas
 octo tantum numero esse falso certior factus fuerat. De
 quinque Lusitanicis galeonibus, aliisque navigiis nihil con-
 stabat. Cuncti admodum promissis virtutem ostentabant, ex-
 terum; ubi ad prælium ventum, plerisque fides, decus, ho-
 nestas, postremo divina atque humana omnia contemptui
 fuerunt.

fuere. Nonnulli navarchi animum despondebant, ubi instructissimam classem tot majoribus tormentis horrendam oculis suis usurparent. Imperator tamen, etsi serò se impari hostibus, periculoque ingenti exponi videret, fortunam tamen suam, quæ adversa nutabat, invicto animo tentavit. Circa horam decimam navi Prætoris Generalis Occidendo se implicuit, quæ instar arcis maritimæ quadraginta octo anea tormenta vectabat, cui & aliæ galeonæ suppetias ferebant. Horribile tum spectaculum in patenti æquore, tormentorum horrendus strepitus ad caelum ferri, ardentia utrinque tela, glandesque majores & minores instar densæ grandinis utrinque volare, adversis vulneribus acceptis contra mortem luctari, eniti atque iterum concidere, vindictam hostium avidius quam vitam suam estimare. Animosè Nauarchus Walachriæ navis Prætoris circumventæ succurrebat, & pugnare pares erant, & respondere parati, nisi adversâ fortunâ, quæ in præliis ut plurimum maritimis dominatur, Prætoris ignem in puppi concepisset, qui nulla cura extinguî poterat. Interea ardentibus tabulatis in prora adhuc pugnabant, frustra suppetiis expectantes, donec colluctante cum ignibus navigio, ingens vorago faucibus vastis patuit, crepantibusque flammis late se expandit, donec laxata tota compages hîsceret, atque seipsam præcipitaret. Pauci qui evasere ab ipsis Hispanis recepti sunt: plerique ex sociis aquis submersi, atque adeò ipse Imperator, perfide à suis desertus, diu fune apprehenso tandem lassitudine confectus animam Oceano dedit, fluctuansque elementum pro vasto sepulchro accepit. Præfectus, cui secunda post Generalem erat auctoritas, Martinus

tinus Thyfenius, junctâ bellica navi, cui Ultrajectinæ Provincie nomen inditum fuerat, Proprætoriam Hispanicam eodem impetu adortus, adversus omnia pericula ipsamque ad eò mortem invictum animum gerebat: post dimidium horæ tormentorum valida procella Ultrajectina navis eminentem mælum antennis gementibus fregit, eademq; post geminatam horam feralibus quoq; ignibus, qui extingui nequibant, exarsit, duplicesque fluctus hinc aquarum, illinc ignium atrollebantur. Juvenis ancipiti periculo commota, ne aquis periret, in vicariam hostilem navem se præcipitem dedit, ex desperatione victoriam sperans, verum ingenti impetu expulsa partim aquis, partim ardenti suæ navi se dedit, quæ tandem & ipsa tota concremavit. Cæterum plures quam ex Prætoria, ab Hispanis recepti. Interea rebus suis non diffidebat Martinus Thyfenius, verum galeonem præcipuè post Prætoriam dignitatis, cui præerat Franciscus de Valleilla Admirantis Hispanici titulo, ita perforavit, ut immenso specu alyeo navis hiscente, mare admitteret. Ex duabus galeonibus altera quoque depressa, altera devicta fuit, cum ducentis quadraginta captivis, qui plerique erant Castiliani. Utrunque plures obtruncati vel ad voris excepti vulneribus, ita ut neq; hostes neq; Nostri victores vel victi viderentur. Hispanica tamen classis victoriæ nomine tumida mare tenuit, nostra, præter illos qui non pugnant, admodum lacerata quam celerrimè Reciffam Pernambuci contendit. In locum defuncti generalis suffectus est Martinus Thyfenius vir impiger, & vitæ pro patria & Societate contemptor.

CAP.

CAPUT LXV.

PRÆLIVM NAVALE INTER NAVEM PRÆFECTI CORNELII IOANNIS HANII, ET DVAS DVNCKERKANORVM NAVES BELlicas, ANNO

c 1 5 1 5 c xxxiii.

IMMENSAS opeis mare Batavis aperuerat, ita ut in puncto & spithama terræ, quæ quotidie furore aquarum, exeditur, totius terrarum orbis commercia stringerentur. Altera manu Orientem, alterâ Occidentem navibus nostris contigeramus, ubi rebus humanis terminum voluit esse natura, & quasi unus non sufficeret orbis, extra solis pene vias emensi mari congelato non amplius cum hominibus, sed bellis pugnaveramus: cæterum prope nostra litora ab infenso hoste opes mercatorum flagellabantur, Dunkerka modicum oppidum, & rapinis suis infame, mare nostrum infestabat. Itaque à Directoribus opprimendæ piraticæ auctoritate publicâ novæ bellicæ naves constructæ: queis strenuissimi quique & virtutis spectatæ præficiébantur. Præ cæteris conspicua erat virtus imperterrita Cornelii Hanii, qui nihil inexpertum atq; inausum contra hostem reliquerat, septies victor superatis navibus ovans in portum revorsus fuerat. Totiens victorem fati necessitas vicit, quanquam & illam contemnendo de ipsa morte magno animo triumphavit, & sanguine suo posteritati æternum nomen reliquit. Quippe, cum forte duabus Dunkerkanis navibus

Ll

occur-

occurrisset, medium se tanto impetu ingessit, ut prompta ad omne discrimen audacia hosti terrorem incusserit. Illa enim demum inceprabat invictus ejus animus, quæ ardua factû magnitudinem ejus capiebant. Cito gloria obsolescit in iis patrandis, quæ proclivia sunt, difficillima quæque virtus sectatur, quam decus, æternitas nominis comitantur. Post horrendum trium horarum prælium una hostilium navium ita crebris tormentorum ictibus perforata fuit, ut hausta aqua profundum peteret, classarii fere omnes mergerentur. Altera tam sædo spectaculo territa, expansis velis in fuga sibi præsidium quæsivit. Victoria incredibilis fortissimi herois morte tristitiam peperit, cujus virtuti publicum monumentum Amstelodami erectum intuentium oculos pascit, quo memoria tanti viri posteris consecratur.

CAPUT LXVI.

*PRÆLIUM NAVALE INTER COM-
MENDATOREM JOANNEM EVERARDI, ET
ARCHITHALASSVM HOSTILEM CO-
LARDVM, ANNO MDCCCXXVI.*

IOANNES Everardi Præfectus aliquot navium ducendis onerariis Galliam versus operam suam intendebat, cæterum nonnullæ tum Texelia, tum ex Mosæ alveo sine ullo præsidio mari se commiserant, inter quas duæ legatos Fœderatorum Procerum in Britanniam vectabant, aliæ equis onustæ Galliam petebant. Colardus quatuor regiis navibus, quæ ad omnem incursum validæ solidæque erant, for-

fortunam maris experiri iussus fuit. Cæterum dum Dunckerka solvit, Prætoria vadis fixa hæsit, certo veluti calamitatis omine. Advorsa sorte non fatigabatur ejus virtus, verum, uti in generosis spiritibus solet, imperterrita, potiundæ alicujus insignis victoriæ immenso desiderio flagrabat. Illuxerat decimus & octavus Februarii dies, cum quatuor vela Nostrorum suum duobus inde milliariibus expansum tumorem ostentabant, alterum litoribus Galliæ circa Diepam vicinum, propius & opportunum injuriæ videbatur. Illuc itaque propere flectendum cursum ratus, unam bellicarum nostrarum navium, cui præerat centurio Petrus Adriani, præternavigando crebris tormentorum ictibus verberabat, atque insecutæ duæ aliæ hostileis eadem sorte gladium furiosam procellam ejaculabantur: neque infirmi animi noster centurio, qui in hoc navium insultu securus, fortitudinis inexpugnabili munimento se circumdederat, etiam suis machinis hostem territabat. Sicut autem uno momento vagum & fluctuans mare vortitur, ita subita à prædialiis nostris navibus coërta fuit tempestas. Audito enim tormentorum sonitu, Ioannes Everardi, quatuor suis bellicis navibus propinquans acriter prætorix hostili insultavit, ut speculum, uti vocant, navis rumperetur, tota puppis fœde lacera ingenti se aperiret hiātu. Itaque dum metuit Imperator classis hostilis, ne unico impetu Nostri illac transilirent, jactis anchoris, lanceis gladiisque defensandi se necessitas incubuit. Figere contra anchoram Præfectus noster tentabat, sed casu funibus ictu machinæ ruptis, vento impellente disjectus divulsusque fuit. Interea temporis maritimus Heros Justus Trappenus, qui & Bancerdus appellabatur, à prora

prætoriam hostilem ita dedolavit, ut profundum jam petere inciperet. Præfectus Colardus, qui maritimis præliis suetus, adversa quoque juxta secunda sæpies expertus, supra casus ac vicissitudinum incerta, imo ipsam mortem animum erectum gestabat, infractâ voce iterum atque iterum clamabat, uti ignem nitrato pulveri injicerent, atque cælo potius viam affectarent, quam turpi deditione ignominia hostili se exponerent. Verum pulvis bellicus ad duos pedes aquis immaduerat, itaque frustrato extremo consilio, cum neque navigio dehiscenti ulla ope succurri posset, quod pluribus locis laxari, & aquis cedere ceperat, simul omnes importuno gurgite mare hausit, cujus tamen inclementia plures simul cum ipso Archithalasso Nostri eripuerunt. Præterea ex sorte tam funesta altera hostilis nata fuit calamitas. Binæ namque aliæ Hollandorum rostratæ naves, quibus suppetias ferebat Præfectus Petrus Adriani, ita superstites duas Dunkerkanas dedolarunt, ut una identidem aquis sorberetur, altera omne in fuga præsidium poneret. Ita duas ingenteis regias naves cum ducentis hominibus Oceanus tot cadaverum insolens volvit, & præter eos qui aqua vel ferro perierunt, centum & quinquaginta captivitati astrikti, inter quos dignitate primus Colardus, cujus tamen animus in quacunque conditione supra fortunam assurgebat.

CAP.

CAP. LXVII.

PVGNA NAVALIS INTER CORNELIUM IOLUM HOUTEBENIUM, PRÆFECTVM CLASSIS BELGICÆ, ET ARGENTIFERAM CLASSEM HISPANORVM,

ANNO MDLXCVIII.

SOCIETATIS Indiæ Occidentalis Proceres classem Expediverant validam, quâ maria fatigare, atque ad Occidentem Regias opes succidere, Heinianæque prædæ memores argentiferam classem pari audaciâ opprimere constituerant. Classi Præfectus Cornelius Iolus, qui à teneris mari innutritus, cum horrore Oceani animum quoque efferatum contra hostes induerat, laborum supra modum patiens, cui sanguinolenta prælia ferales epulæ videbantur, neque unquam quietus, nisi impetu vehemens victoriam hosti extorsisset. Egressus ille Tesseliæ portu decima quarta Aprilis die, Anni MDCXXXVAT, & cum in Brasiliam appulisset, collatis cum Mauritio Nassavio Brasiliæ Præfecto consiliis, navibus, militumque sexcentorum, qui promptissimæ ad omne facinus erant audaciæ, manu, & commeatu in septem menses auctus, fortunæ maris iterum se commisit. Quatuordecim instructæ navès vela intenderant, & quærendæ hostili classi mare iterabant. Divulgatâ fama Hispaniæ & Occidenti ingens metus & consternatio incubuit, cum inconcussa & terribilis viri virtus omnia magna etiam supra sortem humanam polliceri videretur. Neque mortis contemptori quicquam invictum futurum censebatur.

tur. Rex Hispaniarum nihil cunctandum ratus, quatuor liburnicas præmiserat, uti portuum omnium, arciumq; Præfectos præmonerent, hostilem classem adventare, omni ope suam, quæ ex Terra Firma, tutarentur, neque eam quæ Novæ Hispaniæ est, incerto maris nisi insequente anno committerent. Cæterum classis Terræ Firmæ jam ante obfirmato animo se pelago dederat, atque ex speculatoriis suis, quæ ad Promontorium de Corrientes in extimis Cubæ oberrabant, intellecto visas duodecim Hollandorum naveis, cæterum modicas, à quibus certaminis adversa metuenda non essent, Cubam versus & Havanam vela direxit. Iolus longis erroribus actus tandem cognovit, argentiferam classem circa Cubæ portum, juxta scopulos, qui Organes indigetantur, æquor navigare. Constabat illa galeonibus octo, aliisque minoribus navibus sex, quibus summo cum imperio præerat Carolus de Ibarra. Imensas illa opes stipabat, namque millionibus novem æstimatam captivi affirmabant, aliorum diaria viginti numerabant. Opeis præcipuas Prætoria Hispanica veſtabat. In quam Iolus, cum antea nautica facundia suos accendisset, acerrimo insultu pro-ram vortit, atque harpagonibus validissime se implicuit: quanquam prætoria hostilis ingenti mole castellum aliquod maris, nostra liburnicæ speciem præ se ferret. Secundæ & tertiæ dignitatis naves eodem impetu Proprætoriam & Noctilucam adortæ. Ternæ itaque cum ternis atrociter dimicabant, reliquis nostratibus contra sacramentum militare extra discrimen pugnam aspectantibus. Exiguus limitibus sanguinolenta belli arca claudebatur: &, uti in extremis fieri solet, quando non tantum pro victoriâ verum-

etiam

etiam pro salute dimicatur, hinc fori utrinque constrati cadaveribus, illinc Oceanus humanas inferias captabat. Hinc ignes, illinc aquæ ingenio loci exitium minabantur. Morientium vulneratorumque ingens clamor, horrida machinarum tempestas, piceâ caligine aërem obducebat, favillæ fumo tetrico mixtæ, cineresque, undique volitabant. Neque tantum majores pilæ glandesque, verum & festucæ tabulatis excussæ dimicantes interimebant, aut vulnerabant. Et quanquam ad duas clepsydras varia & anceps prælii facies esset, Prætoriam tamen nostræ milēs, ingens virium atque animi, foros & Hispanicæ Prætorie tabulata, pulsas ad inferiora hostibus, victor obtinuit. Ex corribus enim nostris, qui jaculatoribus referti erant, pilæ igneæ ad XLV & XLVIII pondō certis ictibus in tabulata immixtæ tantum terroris iniecere, ut vacuum aream relinquerent, atque infra cancellos in interiorem navis alveum præcipites sedarent. Ita suo carcere clausi jam victi erant, nisi Prætoriam & noctiluca Hispanicæ suppetias ferendo fortunam mutassent. Ferme ademptum à gregario milite, cui mille florenorum præmium promissum fuerat, aplustre, cum fulminanti procella hostium ingruente, eadem, qua per funes enixus fuerat, celeritate vix incolumis evasit audax ille funambulus. Interea reliquæ hostium naves plenis velis in Prætoriam nostram tendunt, quæis junctis, metuens ne circumveniretur, resistere maritimus noster Hercules nequibat, quod cæteri centuriones ingenti perfidia prælium detrectarent. Hoc conflictu secundæ, tertiæque dignitatis præfecti, cum quinquaginta sociis navalibus, violento fato cessere, centum & quinquaginta vulnerati. Interea solus iracundia

cundia oestro concitus, exastuante ex imis prae cordis sanguine, flagrantibus & micantibus oculis, fortunam tot mensibus quaesitam, socordia & perfidia sibi eripi crebris & vehementius actis suspiriis indignabatur. Minax illi vultus, torva facies, color varius, inquieti pedes manusque, sermo prae ruptus, denique totius corporis fluctuatio. Convocatis Ducibus, qui foedâ ignominia pugnam aversati fuerant, rupti sacramenti, militaris socordiae ignaviaeque acerbæ, uti meruerant, exposulavit, unum ex centurionibus, qui superbe & indigne Imperanti responderat, baculo percussum exautoravit. Cæteros hortatus ne vincere assueti occasionem optimam corrumperent, ipsam fortunam decus, gloriam, divitias ultro polliceri, totiens hostium perniciæ ac sanguine ostendisse, se invictos esse, modo vincere cupiant. Hos esse nervos regios, quibus bellum in Belgio alitur, quis succisis domi impotentem inopiam esse. Neque navium mole terreantur, sæpe minores cum majoribus conflixisse, & victoriam reportasse. Illas immobiles mobilitate Nostrarum debellari posse. Pervenimus ad occiduum solem, non ut cadat nobis lique scatque virtus, sed ut excitetur. Ex ultimo terrarum fine victores reverti in patriam in manu vestra situm, nisi obster ignavia. Meticulosos hostes suis incumbere thesauris, & cum argento suo expalluisse. Non tam ad pugnam quam ad prædam vos duco. Virtus ipsa vos vocat, monetque ne per inertiam tantam victoriam amittatis è manibus, dignos vos judicat, qui immensas opes in patriam referatis, si experiri cupitis. Per divina humanaque omnia vos oro quæsoque, ne Imperatorem vel potius commilitonem deferatis. Ipse primis periculis

periculis me offeram, vos modo sequimini. Caterum cum praelii iterum signum dedisset, frustra omnis fuit adhortatio. Alios formido vel pervicacia, alios hostiam potentia in transvorsum rapuerat. Postera die, tertium singulos duces & navarchos novo obstrinxit juramento, qui syngrapha vitam se ante cum morte commutatuuros esse, quam praelium defererent, polliciti fuerant. Verum experiri tunc virtutem vix licuit, cum mari & vento iniquo nostra classis ad inferius latus fluitaret, ictibus hostilium tormentorum, exposita continuo quassaretur. Et superare gradus, & præter classem hostium eniti iniqua tempestas non permittebat. Neque fecere officium, qui sacramento se obstrinxerant. Die decimo & septimo Septembris certior factus Præfectus, juxta vada Cubæ, atque scopulos Organes, Hispanicam classem iter tenere, fortunam iterum tentare voluit. Veterum nautica pubes, quæ socordia & ignavia ducum in partes quoque divisa erat, incusando simul illos, nequicquam ad pugnam incitabatur. Tunc solus, quinque Ducibus abdicatis suffectisque aliis, omnium animis accensis, hostem jam animo & spe victor obtinebat, verum jam ante ex statione sua hostes elapsi in Novam Hispaniam abierant. Ita paucorum socordia & perfidia tam illustis evanuit occasio, quæ lubrica, neque invita tenetur. Hujus perfidiæ, præter plures alios sequaces, duo fuere antesignani, qui, cum solus illis ætate minor esset, obtemperare illi opprobrio ducebant. Simulatibus itaq; privatis collisa Ducis autoritas, infamia & dedecus potiora fuere commodis patriæ. Adeo infita mortalibus imperandi profunda cupido, ut difficulter iis, quos pares vel minores dignitate habuere, morem gerant.

M m

CAP.

PRÆLIVM NAVALE INTER MARTINUM TROMPIUM ARCHITHALASSUM, ET MICHAELEM DORNIVM PRÆFECTVM CLASSIS HOSTILIS.

ANNO MDCCCXXXIX.

DUODECIM navigiis fauces Dunkerkæ obsederat invictus Imperator Martinus Trompius. Invisum hoc hosti, quem maria deprædandi cupido ingens incefferat, tum etiam destinatus Hispaniæ miles arcebat. Injunctum ab Hispanico concilio Præfecto classis hostilis Michaëli Dornio, Batavos portu suo & litoribus pelleret: non tolerandū Regiam classē tam modicis viribus obsideri. Animata quoque pubes nauticā à gubernatore urbis Fuentefio, cui persuasum quinque tantum bellica nostra navigia pugnæ idonea, reliqua numerum tantum implere, cæterum invalida, neque ullum insultum ferre posse. Affirmabat ille, licet felicitas hosti aspirare videretur, temeritati tamen non semper fortunā indulgere. Audeant modo vincere, victoriam in promptu. Nunc maris cubili pulsandum hostem, quem valentiorē, audacioremq; propria negligentia faceret. Ingenti animorum motu læta suis periculis juvenus perstrepebat, qualis solet esset multitudinis, maxime militaris, quando à primoribus incitata cæco studio agitur. Decimo & octavo Februarii die prima luce appetente, commeatu, milite instructa classis, quæ viginti naves, quibus regiæ majores duodecim continebantur, numerabat, Dunkerka solvit. Marchio

chio Fuentefius Præfectus urbi in litore caruca veſtabatur, qui jam ſucceſſus magnitudinem animo metiebatur, fiduciaque victoriæ inflatus, tumida cervice, more gentis Hiſpanicæ, ſpectandæ cladi Batavorum, oculos in vicina maris circumjectabat. Inconſulta quoque civium multitudo ejuſdem voti conſors per univerſum litus diffundebatur, atque augurio læta utramque clāſſem oculis uſurpabat, promiſcuo errore vulgi, ne quidem ſuos ſine crimine vinci poſſe. Cum hoſtilis clāſſis primo vela intenderet, centurio Hollardus, qui excubias agebat, exploſo tormento ſignum hoſtilis adventus dedit. Quo audito Imperator noſter expediri cuncta ad prælium juſſit, ipſe circumſpectus, acer, indefeſſus, auctoritate, ubi neceſſitas indicit, aſtrictus, & ſimul, quod longe difficillimum, proluxa & effuſa in ſocios navales humanitatis, qui illum identidem optimum parentem indigebant, vitam mortemque ſimul cum periculorum ſocio (namque dignitate Imperator, etiam cum gregario milite eadem munia obibat) dividere parati. Velificari noverat ingeniis noſtratum prudentiſſimus Imperator, quos ſi nimis dure & ſerviliter exceperis, irritantur, ſi ſalva auctoritate mitigentur imperia, plura præſtant quam promittunt invicti robore & audacia. Tales viros, quibus decretum erat aut vincere aut mori, nulla virtus frangere poterat, cum ipſi virtutis modum omnem excederent. Rectâ itaque in hoſtem vela tendunt tanta alacritate, tanquam ſi ad epulas invitarentur. Primum initium hoſtilis calamitatis binæ regiæ naves dederunt, quæ interceptæ & à noſtris cinctæ, laceratis malis, pluribus caſis, facile eorum ſuperatæque ſunt. Interea Martinus noſter, Martis illa vera

loboles, cum quinque Regiis navibus solus inaudito successu tam fortiter per treis horas dimicavit, ita armis & constantia prætoriam navem contra omnem hostilem impetum tutatus est, ut summa infamia atque opprobrium hostes proram avorterent, & tam cruentæ prælii tempestati se subducerent. Pulcherrimum hoc virtutis spectaculum ingens ludibrium hosti debuit, qui ante victoriam victor, veluti certo successu exultaverat, qui nihil modicum locutus in nostri contemptum, ne quidem quinque navibus contra unam Nostratum se sustentabat. Neque hic substitit virtus Imperatoris nostri, verum Prætoriam hostilem adortus, per dimidiam horam acrem conflictum exercuit. Jamque illa propemodum victa, lanceisque duabus minoribus singulari audacia Hispano creptis, cominus res agebatur, cum levi momento, uti in rebus maritimis solet, fors mutata extremum insultum inhibuit. Flectendo namque navim, quo acrius hostem premeret, tumidiore vento vela inflante, præterlapsa prætoria hostilis turpi fuga terga dedit. Imperatoris exemplo, ingenti undique trepidatione atque consternatione, ceteræ quoque fuga sibi consulere non erubuerunt. Nunquam in solido stetit vana superbia, & ingentium conatuum fastigia, nisi virtute verâ nitantur, irritò molimine collabuntur. Præterquam quod mortaleis curas suis viribus trans fines præfixos expediri non permittit supremum numen. Neque fugiendo satis tutæ hostiles naves fuere, nonnullæ enim tellurem vorsus flexo itinere, vadis hæsitantes auctis demum aquis Dunkerkam petiere. Non eadem fuit victricis hostilis foelicitas, quæ itidem, cum ostium urbis, quam Scheurtiam appellant, velis attingere non posset, quia

quia alte arenis federat, (dubium an rupta, an ita tormentis dedolata esset, ut ultro deprimeretur) fluctuare nequibat. Cui superandæ cum duæ nostrarum navium immitterentur, milite vicino litori exposito proprio igne conflagravit. Magna hæc & inexpectata calamitas vires maritimas hostium plurimum turbavit, præcipue quia & difficile erat attritas opes subito recolligere, & spes fractas novare, vel tanto vulnere consternatum cum socio navali militem in melioris eventus fiduciam erigere. Namque ad mille & sexcentos, (alii adhuc centum addunt) vel cruento fato occubuisse, vel vulneratos, vel captivos fuisse ipsi hostes non diffitebantur. Subito quoque permota civitas, atque immutata facies urbis erat, namque ex summa lætitia, quam fiducia victoriæ pepererat, repente incredibilis tristitia invasit, neque lachrymæ sanguinem casorum extinguere quibant: inprimis mulieres, quarum pectora in dolorem facilius liquefunt, affligere se, manus supplices ad cælum tendere, aliæ maritum, aliæ patrem vel propinquum ingenti ejulatu lugere, quædam misertæ parvorum liberorum, fati iniquitatem accusare, & prout cuique dolor verba dictabat, effunderent. Archithalassius, cum ipsa clades crimini duceretur, in carcerem conjectus, ubi tempestas indignantis plebis deferbuerat, rationibus redditus iterum exemptus. Imperator noster non immodicus lætitia, vel fortunæ suæ prædicator, vigesimo & primo Februarii die Hellevoetam appulit, duabus laceris attractis Dunkerkanis navibus, quæ quingentis antea viris stipatæ, cæteris captivis, ducentos amiserant. Eo quidem hæc victoria majori lætitia excepta, quod procella illa ingens, quam hostis nostris

minabatur, tanquam nimbo undique effusa prope in eundem vorteretur, quod iterum infestum, haftenus mare commerciis laxaretur, quod destinatus Hispaniæ miles impediretur. Præmia quoque virtutis insignia Patriæ Patres Imperatori reliquisque Præfectis largiti sunt, prout cujusque merita & dignitas postulabant. Præter torquem auream, quâ Proceres illum ornarunt, Regis Galliæ & Cardinalis Richelivii effusa in illum fuit liberalitas, quæ alibi recitata, cum luctuosæ ejus morti verborum impari strepitu justa solveremus, nunc repetere visum non fuit.

CAPUT LXIX.

*PRÆLIVM CELEBERRIMVM DV-
NENSE INTER POTENTISSIMAM HI-
SPANICAM CLASSEM, ET FOEDE-
RATOS, ANNO MDCCXXXIX.*

INGENTIBUS impensis, regnis omnibus, quam late se diffundit Hispana potentia, nervos opum fabrilesque operas tribuentibus, vix annuo tempore expedita classis incunte Septembri Corunna Galliciæ oppido mare elegerat, cui tanquam alter Xerxes Hispaniæ Rex imperium minabatur. Sexaginta septem navigia, vel potius immensæ molis castella; tanquam insulæ natantes profundo incubabant, quibus virorum viginti quinque millia stipabantur. Inter quos prima Nobilitas sponte nomina dederat, tum ut fidem suam atque animum Regi probaret, tum ut gloriose victoriæ consortes forent, cujus certam conceperant fidu-

fiduciam. Quamquam enim plerisque & gloria, & opes atque alia optanda domi superabant, tamen hanc militiam reculare, etsi maris insolitis, ingens probum ducebatur. Supremum classis imperium obtinebat Antonius D'Oquendo, militiæ maritimæ vetus, probatæque jam ante in Brasiliâ virtutis. Cujus Prætoria navis, octingentarum vehium, sexaginta & sex majores machinas vectabat. Archithalassus Castiliæ erat Andreas de Castro, Regni Neapolitani Petrus Quaderonus, Galliciæ Franciscus Feyus Sottomajor, Lusitaniæ Lópezus Docias, qui navigio omnium maximo præerat, quod tabulatis firmisque compagibus impervium, mille ducentarum vehium, sexaginta octo majoribus tormentis terribile erat. Dunkerkanis imperabat Michaël Dornius. Qui rationes accuratius exegerunt, mille septingenta circiter tormenta majora fuisse referunt. Quibus integra regna & ditiones contra impetum hostium sustentari posse videbantur. Principes terrarum Regesque in suspenso hæsitare, quo tam immensa classis ferretur, neque quisquam tamen secretorum adyta penetravit. Hispani, quod laudandum, nihil minus quam arcanorum prodigi sunt, & interius premunt omne secretum. Taciturnitas optimum rerum administrandarum vinculum, sine quo nihil recte in Rep. sustinetur. Consilia sæpe vulgata hostem instruunt, uti artem arte eludant. Plurimum illa fuit sententia, Amasin vel Fretum Danicum turbandis Hollandorum commerciis peti. Alii alia, neque verisimilia variis sermonibus jactabant. Præsertim inconsulta plebes avida futuri in rimandis arcanis ingeniosa sibi videbatur. Nobis certum arcana Principum difficulter penetrari, & qui

qui maxime se nosse existimant, inprimis falli. Nam Principes ipsi alia sæpè promunt, aliud pectore clausum tenent. Cæterum longius abiit nostra dictio, nunc ad institutum revertimur. Præfectus classis Trompius circa Bevesham duodecim navigiis mare tenebat, certior factus classem Hispanicam Corunnæ portu solvisse. Decimo quintò Septembris die ingentis hujus classis vela conspecta omnium oculos præstringebant. Non tam viribus atque apparatu quam virtute animi res militaris procedit, potentia fortitudine destituta, ubi primum impetum effudit, collabascit. Ut plurimum modicis copiis victores fuimus, ubi viribus propriis nitēbamur, magnos apparatus fortuna destituit. Neque tamen calamitatem provocare, ubi subsidia præsto sunt, boni Imperatoris est. Displosis itaque per intervalla tormentis accessum hostilis classis indicavit. Audito signo Propræfectus Witto Wittenius animi acer, qui spiritu excelso & erecto omneis motus fortunæ, omnia humana infra se despectabat, ex loco, quæ Cingula appellant, quam celerrime, cum omnis mora periculosa esset, quinis navibus se proripuit. Insequenti die, cum primum sol surgeret, utramque & hostilem & nostram classem oculis usurpans, diu cum advorso vento luctabatur, ad horam tandem undecimam ægre se Nostris junxit, cum per horæ spatium acres cum hoste incidissent velitationes. Ita septendecim navigiis decretoriis armis contra hostem itum est. D'Oqueindo, qui per contumeliam navigia nostra depressas gallinas indigebat, & tam exiguis viribus fortunam Regis ludibrio exponi indignabatur, primum impetum in Prætoriam effudit tanta ferociâ, uti evestigio eam superare posse falsa opinio-

opinione sibi persuaderet. Uti non naturalis tumor noxam sæpe corpori intentat, ita hominis Hispani, etsi rerum maritimarum periti, ventosa arrogantia nihil nisi opprobrium sibi ingens peperit. Quippe periculo & negotiis compertum fuit, in suo maris elemento Batavos virtute neque velle, neque posse superiorem admittere. Acerime quidem usque ad horam quartam utrinque pugnatum, donec Prætoria hostilis admodum fatigata, languente impetu, septentrionem versus ad angulum loci, quæ Cingula appellari diximus, se recepit. Sicut vastum animal ægre se movet, ita magnitudine sua torpida illa mōles difficulter se pugnando flectere quibat; atque mobilitate nostræ navis, quæ huc atque illuc se vortens certis iētibus tormenta verberabat, admodum fessa, lassata, dedolataque fuit. Hoc tamen inter Hispanos & Baravos prælio, non, virtute hostium, sed fati iniquitate dura Nobis sors obtigit. Proprio enim pulvere tormentario forte fortuna incenso unastrarum navium horrendum spectaculum præbuit; cuncti, præter unum in suprema aëris jactati miserabili morte perierunt, laceri artus, & trunca cadavera primò in sublime rapta, dein insolenti veluti nimbo in profundum marisolvebantur. Vespera appetente à Concilio militari constitutum, exiguis velis juxta classem Hispanicam morari, atque ita hostibus obviam ire. Postridie celum densa nebula obducebatur, adeò ut prospectus impediretur, ceterum fulgore solis discussa, versus occasum æstivum juxta castellum Ydam & Folkstonum ad oram magnæ Britanniæ classis se ostentabat, quò ingenti velocitate properatum. Verum sub meridiem silenti æquore propinquare.

N n

veti-

vetitum fuit. Cum dies cecidisset, militaribus suffragiis visum post mediam noctem lucente luna hostem ex improviso adoriri, qui relabente mari æstum opperiens anchoras jecerat, uti opportune postmodum in stationem Dunensem se reciperet. Et si autem, an consultum videretur nocte intempesta per incerta maris, quo nihil æque fortuitorum capax est, hostem laceessere, fluctuarent primo animi, tamen mari nostro suctis minus periculum videbatur fortunam experiri: contra noctis horror, locorum imperitis infestum vadis mare, subitum prælium, magis iniqua hostibus videbantur. Quò autem naves dignosci possent, neque amici in amicos incurrerent, tum geminatis in Prætoria, tum alibi singulis accensis ignibus, aliisque indiciis significatum fuit. Junctis quoque navibus pressa navalis acies, ne multitudine hostium circumvenirentur. Ita, euronoto modice vela inflante, fiducia pleni præcipites Nostrî in hostem feruntur, sicut in rebus asperis fortissima consilia tutissima sunt. Quinet animo jam superiores videntur, qui ipsi licet validioribus pericula inferunt, cunctatio deses timori atque ignaviæ propior videtur. Hostilis classis, quæ Doveram petens vela quoque jam ventis dederat, secundâ post mediam noctem horâ tormentorum verberibus graviter impetitâ, simul cum nostrâ vorsus promontoria fluctuabat. Postridie Bancardus Commendator duodecim navibus suppetias Imperatori ferens adventabat: hostis teritus in stationem Dunensem cursum flectebat. Hoc conspectu duæ primum hostileis naves superatæ, quarum uni, quæ Galeo erat, dum prædandi avida nautica pubes incumbit, atque omisso hoste pravum inter ipsos certamen gliscit spolia

spolia consecrandi, ab hostibus recuperata fuit. Ceterum, plureis aliæ, dum cedendo salutem suam committunt fluctibus, ab insectantibus certis & continuis machinarum ictibus, summopere quassatæ, ægre in stationem Dunensem se receperunt. Tanta ardentis pulveris cum feralibus globis emissæ fuit copia, non secus atque si fulminantis cæli trucem atque horrendam faciem quis aspiceret. Deficiente pulvere & militaribus pilis, Caleto vicino Gallie oppido quadraginta millia pondo nitrati pulveris, quatuor millia globorum, atque aliæ necessitates bellicæ confestim accersitæ fuere. Revorsus Imperator ad austrum classis Hispanicæ anchoras jecit, ita ut hosti gravis pugnandi necessitas incumberet, si mare eligere cuperet. Ita cincta modicis viribus immensa classis, & quam ante vix laxitas Oceani capiebat, nunc arctata angustiis premebatur. Verum si statim manus conferendi fiducia hosti adfuisset, dubia forsan fortuna pugnatum fuisset, ceterum moram nectendo, sicut Hispanorum ut plurimum lenta solent esse consilia, dubium an contemptu hostium, an metu, an quod sub præsidio Regis Britannicæ latitaret, neque conflictum ausuros sub litora Angliæ Batavos crederet, certe temporis diuturnitate copias nostras validissimas effecit. Nobis sedet sententia, invisam potentiam exiguis admodum momentis à supremo numine pessum trahi, mortalesque curas inter se fluctuantes tandem collidi, atque in arctum redigi, unde pedem referre nequeant. Interea Patres Patriæ, Princeps Auriacus, summo studio naves bellicas expedire, agendo, vigilando, publicæ utilitati velox remedium adhibere, nauticam & militarem juventutem, cujus animosa & ingens subito

confluxerat multitudo, ad sacramentum cogere, omnia denique providere, ne quid detrimenti Resp. caperet. Intra menstruum spatium centum naveis majores in mare deductas attonitus hæsit orbis, vix posterius credent. Et nos ipsi vix fidem adhiberemus, nisi factum constaret. Innatabat subito pelago instructissima classis, qualem per annos aliquot vix expedire potentissimus Rex potuerat, qui solem Orientem cum Occidente junxerat, cujus veneratio & majestas per cunctas nationes latissime diffusa fuerat. Jacent Carthaginienſes, Phœnices, Rhodii, & rerum domini Romani immensam maris potentiam, in spithama terræ arctata tanta maritima potentia omnibus terrarum Principibus formidabilis visa fuit. Nam quid ego hic primum commemorem, an celeritatem expeditæ classis, an multitudinem navium, an nauticæ juventutis ingentem turbam, quæ ferociam & robur ex mari contraxerat, atque hostis proſligandi, patriæ armis tegendæ immensa cupiditate flagrâbat, quibus corpus agile & expeditum, vastus & immensus animus, mortis hostiumque contemptor inerat? Neque verò in unum contracta erat maritima potentia, cum duplo major expediri necessitate urgente potuisset, cæterum sufficere illæ copiæ proſligando hosti videbantur. Ita circumventa hostilis classis omni ope elabi, atque in libertatem se vindicare nitebatur. Tredecim Dunkerkanis navigiis res opportuna cecidit, ut sub obscurum noctis Goyingam vorſus, ubi nullæ positiæ erant navales excubiæ, elaberentur. Neque vero hoc socordia & negligentia Imperatoris contigit, cæterum fides Anglorum, qui majora illic navigia fluctuare non posse asseruerant, hæc laborabat. Eorundem ope

ope scaphis velivolis, quæ simul huc atque illuc remis torquebantur, transmissio in naves hostiles noctu Hispanico milite, & magno vulneratorum numero, omnis fere pedes, qui recens ex Hispania advenerat, incolumis Dunkerkam venit. Quo comperto, ad illud latus à Bancardo excubiæ actæ, ne plures clanculum in posterum elaberentur. Interea Patres primo dubiis agitabantur consiliis, an in statione Britannica adoriri hostem consultum foret. Neque tamen cunctationi locus erat: decretum itaq; sin hostis non prodiret, pulcherrimum patrare facinus, ut contra eundem junctis copiis fortunam maris experirentur. In sex ordines divisa navalis acies. Prima octo velis constabat sub Præfectura Dionysii centurionis, secunda octodecim, ductore Archithalasso, tertia viginti & novem, sub imperio Propræfecti Wittonis Wittenii, cui illa cura incumberebat, ut ex adverso Anglicæ classis consistens prospiceret, ne quid Britannus, qui Hispanis clanculum favebat, in prælio rerum novarum moliretur, quarta tredecim, sub vicario imperio Ioannis Everardi, quinta decem navigiis movebatur, quibus imperabat Prætor, ut vocant, nocturnus Catsius, sexta totidem, Commendatore Houtebenio. Quatuor naveis recipiendo militi, si fatalis aliqua necessitas ingrueret, treis annonæ vestandæ destinatæ erant. Constitutum, uti Trompius Prætoriam supremi Præfecti D'Oquendi, Ioannes Everardi Lopezii Docia Lusitani, Catsius Dunkerkani Præfecti Michaëlis Dornii, Dionysius australem, Houtebenius Septentrionalem partem Hispanicæ classis uno impetu adorirentur. Vigessimus & primus Octobris illuxerat dies, cum horrenda prælii tempestas Oceano incubuit, tantaque calamitas

tas visceribus adaëta Hispaniæ, ut ægrum Reip. corpus extremum ferme spiritum traheret, neque ullis ferme fulciri iterum sustentaculis posset: non secus atque navi, quæ sentinam trahit, compagibusque solutis laxari pluribus locis cepit, nequicquam succurritur, ita ubi in totum collabi fortuna ceperit, frustra quis remediis obnitiatur. Antequam ad prælium ventum, Martinus Trompius ad Præfectum Anglicæ classis Penningtonum, qui iniquior Batavis videbatur, has literas conscripsit, quarum hæc fere summa erat: Certiorem se factum à Penningtono, illi se hostem fore, qui primus in statione Anglica hostilia intentasset, securitatem regionum portuum primum violasse Hispanum. Quid contumeliosius viris ad arma natis, quam hostili se lubricini obnoxios, inferiores & pene victos victoribus insultare, celocem aliasque naves tormentorum ictibus verberari, etiam unum globo transfixum? omnia incitamenta victoriæ pro nobis sunt, neque Deus siverit, ut Batavorum gloria & virtus ludibrio exponatur. Rogamuste, ut juxta fidem datam suppetias nobis læsis feras, vel, si illud displiceat, neutiquam advorseris. Omnium jam æstuant præcordia pugnandi immenso desiderio. Iussu Procerum, quibus obsequi prima semper nobis cura fuit, manu nostra, si prodire nolit, ex suis latebris tanquam septo clausos hostes ejiciemus. Certam autem fiduciam habemus, Regem judicio & sapientia pollentem, qui etiam D'Ouendo indixerat, uti statione Dunensi discederet, approbaturum, vel saltem vitio hoc versurum non esse, quod cædendi hostis publica necessitas extorsit. Hæc vel similia cum rescripsisset Imperator, pubem nauticam jam sponte accensam hortari,

tari, ut venienti fortunæ, quæ non simpliciter fortioribus jam indulserat, occurrerent, hunc magnum diem victoribus decus atque immensam gloriam polliceri, neque vanum hostium aspectum recessu suo metuendum, fugienteis in illum se recepisse sinum, nunc cinctos undique obsideri, atque suo quoque metu in extremam perniciem agi. Infestum semper Hispanis mare fuisse, virtutem Batavorum maritimam, quæ soli via esset, Orientem & Occidentem perripisse, circa punctum hoc terræ mari dominationem Hispanicam primum retusam, & vexilla libertati erecta. Multitudinem militarem hostium inertem, & jussu Regio ex opificum tabernis, & agrestibus casis extractam armis imparrem esse, illos vero in mari inter sanguinem ac sævas tempestates educatos, quicquid recte fieri vellent, propitio numine etiam prompta manu efficere posse. Ita inflammata juvenus præceps in hostem ruit, & periculis admodum suis lætabatur. Hispanus ubi serio rem agi videt, & aquilonare classis latus peti, improvise tumultu excitatus, anchoris se-ctis dum pericula fugit, in multo gravius incidit. Nebulis enim cælum regentibus, viginti duæ naves Hispanicæ vorsus litus vadis allisæ hæsitæ, quanquam jam ante monuisset Franciscus Fejus, ne illac ulterius cursum flecterent. Ita dum probis consiliis non obtemperant, cum importuno & vadoso mari luctabantur. Neque evadendi ullum præfens remedium fuit. Luce enim nebularum caliginem perumpente, pressæ sicco arenarum naveis evestigio invadebantur. Et tanto furore missilia mittebantur, uti fixis navibus nullus exitus daretur. Certis glandiû iactibus, nullo refugio, tantum mare hostibus patebat. Itaq; milites & socii navales
peri-

periculi novitate exterriti, alii in cymbas, alii in profundum se præcipites dederunt, quorū pleriq; misere perierunt. Immissis dein incendiariis ignibus, hostiles naves flammis consumptæ. Interea ne litori nimis Batavi propinquarent, ex castellis & munimentis Angliæ aliquotiens displosa tormenta. Reliqua Hispanica classis in diversas acies partita, ad interiora maris se proripiebat, quem insectabatur Trompius, successui insistendum ratus, cum ex primis eventibus ultima quæque ut plurimum cedant. Archithalassus Cantabriæ, quam nunc Biscaïam vocant, implicitus galeonis alterius velis dum ipse partem aquilonarem classis suæ turbat, se cæterasque ejus ordinis ingenti præcipitavit infortunio. Turbatis enim semel ordinibus, cuncta admodum nutabant consilia, festinare, trepidare, suo quisque metu pericula æstimare, modo obniti, modo iterum relictis armis fugæ se dedere, nihil denique consulti aut pensî habere. Ita desperatio ac terror, ad afflictos ulterius obsessosque opprimendos multum valuit. Interea Prætoria Lusitanica nâvis, cui Præerat Lopezius Docias, quæ mater Teresa indigebatur, Ioannis Everardi sociorumque vehementissimum insultum patiebatur, cæterum cum invictum illud maris castellum, nullis perforari posset tormentorum verberibus, & densato militum agmine, qui ad octingentos numerabantur, nullum accessum admitteret, atque adedò in Nostros incredibili ferocia continuos ignes cum missilibus omnibus machinis vomeret, Trompio, Galioque adventantibus consultum visum, quòd immensa illa moles nullo alio modo debellari posset, duas incendiarias immittere. Quæ cum prætervectæ frustra fuissent, treis aliæ denuo immissæ horrendum

rendum , atque adeò mirabile ignium spectaculum edidère. Ubi enim incendio pulveris nitrati receptaculum dissiliit, tanto fragore cælum intonuit, ut vicina litoris tanquam terræ motu trepidarent , atque densa ignium fulmina veluti per attonitas nubes agitantur , inprimis quia tenebris cadentibus eo magis flammarum violentia in oculos incurreret. Tum incendio navis , inprimis verò ubi discusso in aërem pulvere pyrio cuncta in aërem raptarentur , occingenti homines perierunt , inter quos Lopezius quoque Docias , cui ante brachium quoque machina ablatum fuerat , ingenti virtute fato functus est. Cæterum varia erat passim mortis species & imago, alii ferro trajecti, alii ignibus consumpti vel semiuustulati , alii profundo merisi , aliorum laceri artus simul cum pulvere in sublime rapti huc atque illuc volvebantur. Navis ipsa in partes collisa hac tempestate non amplius in mari , sed in ipso aëre varie jactabatur. Incredibile dictu unam ex majoribus machinis candefactam , tanto impulsu in sublime jactatam fuisse , ut instar teli ipsis admodum se nubibus immiscere videretur. Neque iniquitas sortis uni Nostrarum navium defuit , cui præerat centurio Muschius , quæ antenna pergulæ hostili implicita , cum forte per errorem incendiaria , quæ vicinam hostilem petebat , in illam ferretur , ignibus quoque violentis consumpta periit , cæterum juvenus pleraque recepta navibus nostris incolumis evasit. Jam antea D'Oquendus, & Franciscus Fejus Lusitanicæ navi periclitanti suppetias ferre omni ope annexi fuerant , cæterum tantæ tempestati se obijcere inconsultum censuerunt. Fejus dum modicis velis operitur, à Præfecto & vicario cinctus obsessusque, cum etiam

O o

incen-

incendiarias in se ferri videret, periculi jam antea monitus arbitrio victoris se permisit. Eodem die quinque aliæ Hispanicæ naves superatæ. Neque Magnus Alexander invitatus stetit, quem centurio laarsveldius in suam potestatem redegit. Plures alias non virtus, non arma, sed noctis simul atque nebularum densæ tenebræ texerunt, quibus cum accessisset violentior ventus, D'Oquendi & Michaëlis Dornii Prætorix naves cum nonnullis aliis necessitati se subdixerunt. Petrus Quaderonus Neapolitanæ classis princeps ad Goëngam fœdâ calamitate navem fregit, pleraque cum eo juvenus aquis merfa morti cessit. Luctantium cum, morte miserabile erat spectaculum, modo natando obniti, modo fessis manibus cedere calamitati, ad extremum, sicut morientium acerrimus esse impetus solet, validissimo robore emergere, & tandem præcipiti fato succumbere. Postridie Batavorum classis vehementi vento, & densis tenebris à se invicem divulsa, neque usquam Hispanica apparuit. Una hostilium navium ventis undisque jactata cum Prætorix nostræ occurreret, etsi centum armatis hominibus præter nauticam pubem insideretur, duodecim æreis totidemque ferreis stipata esset machinis, à novem sociis navalibus, qui jussu Imperatoris se cymbæ commiserant, superata fuit. Dubium, an magis incredibilis tam paucorum hominum virtus, an hostium ignavia & socordia fuerit. Secunda post prælium die juxta Cingula mari iterum Hispanicæ quædam naveis vela sua ostentabant, cæterum commoto mari nancisci illas Imperator nequibat. Itaque modicis velis Angliæ oram prætervectus, galeonem obviam, quæ metu territa, quod dux bellicæ cum incendiaria immit-

immitterentur, & ultro se arbitrio victoris permiserat, facile oppressit. Plureis aliæ circa promontoria & alibi interceptæ, vel ad Gallica litora juxta Calerum allisæ. Ita victo profligatoque hoste, qui tanquam alter Xerxes immensa classe maria intraverat, qui ambitione & cupiditate distentus, quarum causa pleraque inter mortaleis agitari solent certamina, faucibus patriæ imminebat, vindex maritimæ libertatis, infractus fortitudinis scopulus Imperator noster cum classe sua in statione Dunensi anchoras jecit, honori- que Pennigtoni Britannicæ classis supremi Præfecti, & circumjacentium munimentorum, machinas omnes festivo sonitu circumstrepere jussit. Cæterum Britannus, cujus animus haud dubie jam ante ad Hispanum inclinaverat, ne quidem ullo signo explosæ machinæ, sicuti inter militariis gratulationes fieri consuevit, respondere dignatus fuit. Ex viginti tribus Hispanicis navigiis, quæ primo insultu litoribus Angliæ adacta fuerant, cum sex iterum fluctibus attollerentur, ne in jus atque potestatem Fœderatorum cederent, quandoquidem neque fugæ neque præsidii ulla reliqua spes foret, Penningtonus Anglo milite insidendi jussit. Quis invadendis cum se eludi sentiret, jam ante monitus Imperator noster, ne quid hostile Britanno intentaret, **Col- stero demandavit**, uti viginti quatuor navibus duplices cursus iterando, mare lustraret, ipse Goeream, & confestim Hagam Comititis petiit. Quacunque iter faceret, vel incederet, plebs avida videndi gloriosissimi Imperatoris latera ejus premebat, ita ut immensi concursantium fluctus pone attraherentur. Nonnulli ex primoribus prehensare dexteram, nullum officii genus intermittere. Ille singulari mo-

rum comitate omnium obsequi studiis, etiam pluribus ignotis eâdem affabilitate respondere, quippe ipse Batavus Batavorum ingenia noverat, quibus pressa pectore taciturnitas contemptus & superbia appellatur. Immenso gaudio cuncta perstrepebant, nonnulli publice acclamabant, hunc esse immortæ libertatis scopulum, Indiæ Hispaniæque procellam, pridie nihil mari recte gestum, illi Provinciam maritimam mandandam, qui inter tempestates atque sanguinem hostium educatus, totam ætatem in mari egerat. Alii, ut judicio suo nimis quam indulget inconsulta plebes, affirmabant, non tantum classem immensam domitam prostratamque, sed in una classe universam debellatam Hispaniam. Cæterum uti magnitudo victoriæ omnia præconia exuperat, ita ipse multo majora jam pridem gesserat. Ita nimirum cum populo comparatum est, ut ea quæ in oculos incurrunt, ac victoriæ præsentem magnitudinem tantum cogitent, cætera etiam pulcherrima facinora negligant. Interea Patres, excepto summo honore invictissimo nostro Imperatore, supplicationes publicas, uti Deo immortalis auctori supremo & unico tanti triumphus debitas grates persolverent, & simul cum campanarum sonitu festivos igneis per totam suam ditionem decreverunt. Nunquam majori studio ad sacras preces concursum fuit, quibus peractis campanis continuo pulsantibus urbes pagique facibus picatisque doliis ardere videbantur. Plureisque accensæ in turribus laternæ stellarum subito fulgentium speciem jucundissimam referebant. Artificiosi ignes in altum jactati, nubibusque immixti, perpetuos cælestis quoque ignes æmulabantur, quibus lapsantibus stellæ cadentes, uti vulgus loqui

con-

consuevit, ad inferiora volvi videbantur. Longe pulcherrimum Hagæ comitis in vivario Principis editum navale spectaculum, cum enim sexaginta tormenta ex vicino colle iterum atque iterum explosa forent, in aquis navicula ad exemplum Prætorix Lusitanicæ incendiariis immixtis conflavit, atque in sublime rapta imaginem horrendi atque funesti exitus dedit. Ita immenso gaudio omnium laxabantur pectora, neque tantum externi ignes, verum etiam interni in omnium oculis præcordiisque flagrabant. Et revera longe augustissima hæc fuit victoria, quæ totum terrarum orbem fama nominis implevit. Ultra enim quadraginta naveis depressæ, captæ, incensæ, vadis allisæ. Ferro, igne, aquis ad septem millia perierunt. Mille & ultra septingentos captivi carceribus stipabantur: vulneratorum numerus subduci nequibat. Pluribus quoque tempestatum ac sentinæ insueti, salo nauseaque confecti, in graveis morbos inciderunt, cæteri ferme, inter quos plurimi inviti ad sacramentum militare coacti, militiæque insolentes, Regi inutiles fuerunt.

CAPUT LXXX.

PRÆLIUM NAVALE INTER REGIAM CLASSEM ET SOCIETATIS INDICÆ OCCIDENTALIS IN BRASILIA.

ANNO MDLX.

SICUTI regis classis in Fretto Britannico miserabilis & fœda admodum fortuna fuit, ita circa Occidentem mari

mari quoque infesta fuit. Omnem simul Hispanus intendat maritimam potentiam; qua superba cogitatione Belgium invadere, Occidentem recuperare, sine modo modestiaque invadere, polluere, vastare omnia, nihil denique pensi vel sancti habere, in animum induxerat suum, ceterum prævalere fata consiliis, potentiaque humanâ opemisa raro sempiterna semet ipsam præcipitavit. Primo ipsum cælum turbatumque mare classi iniquum eandem violentâ tempestate circa Promontorium viride disjecit. Accessit & alia extrema calamitas, quod quando mare omne cum aëre in turbines cessisset, & simul variis undique procellis incerti fluctus agitantur, miles ferme omnis maris bellicque insolens (plerique enim ab aratro ad sacramentum militare adacti) tempestatibus fœdis agitatus, simul diutina navium conclusionis tetra odore, pestilenti quæ Africæ ora confectus, ærumnis & miseriis coopertus extremum spiritum dedit. Volvebantur aquis cadavera, & vel immanium belluarum rictibus relinquebantur, vel respuente mari in vicina litora ejectabantur. Classis itaque militibus & classariis defecta in sinum omnium Sanctorum se recepit: ubi per integrum annum firmandis copiis navibusque resarciendis subsedit. Interea Mauritius Nassovius Indiæ Occidentalis Supremus Imperator certior factus classem ingentem expediri, omnem operam consiliis hostium turbandis intendere, vigilare, neque insomniis laboribusque fatigari, classem præparare, juventutem militarem & nauticam cogere, jubere, hortari, ut semper intenti paratique essent, virtute & diis volentibus omnia prona fore, hostem vinci assuetum, & militiæ insolentem, rusticam plebem non ita fulcare

fulcare maria atque agros, classem incredibilem in Fretò Britannico deletam, jam ipsis vitalibus vulnus afflictum, illud reliquum esse, ut vastum illud animal nervis succisis venisque conficiatur. Exarsit nautica pubes, quibus ætas, animusque ferox erat, & immensa cupidine gloriæ aestuabat. Nostri classis rerum omnium ferme indiga sub Præfectura Gulielmi Cornelii Lozii tredecim navigiis constabat, quibus commodum accessere è Belgio novendecim, animosque nostratibus auxere. Ea tum erat belli necessitas, ut nondum exoneratis navibus, fatigatus maritimo itinere, miles fortunam maris experiri cogeretur. Adortus Imperator noster ingenti spiritu duodecimo Ianuarii die intra Tamaricam & Guaianam hostilem classem, quæ sexaginta sex navigiis, (adeo enim numerus excreverat) quindecim millibus hominum constabat, cui summâ cū maritimâ potestate præerat Fernandus Mascarenga, Comes Torrensis, supremus Brasiliæ Regius Imperator. Potior ille erat numero militum, cæterum paucitas nostrorū virtute & disciplina prævalebat. Non idem vigor corporibus, ardor animis, impatientes illi maris; tempestatum, & ad sustinendum laborem inhabiles; Nostris salo innutritis omnis labos in naturam vorterat, neque unquam ab hoste vel tempestate quies, & ut paucis absolvam, horror efferati maris, præliorum consuetudo animos quoque ferocientes asperaverat. Juxta Pámorellam hostis militem septem millium terræ committere constituerat, cæterum conspectâ nostra classe, quæ venti superioris præsidio illum premebat, quantum poterat profundo se dedit. Insectantibus Nostris tribus circiter à litore milliaribus post medium diem usque ad seram noctem

Item acre prælium commissum est. Imperator Noster, quod maritima prælia ut plurimum impetu valida esse, atque insultanti omnia prona, cedenti adversa esse plerunque noverat, militarem hostilem aciem perripit, cæterum Prætoriam invadendi supra modum cupidus, à quatuor galeonibus circumventus, per treis horas dimicando, invicta quidem virtute navem explicuit, verum ipse gloriosæ mortis necessitati, verbis extremis igneam adhuc fortitudinem spirantibus, imperterritus succubuit. Verum una ex Nostriis navibus adeo tormentorū ictibus quassata, ut aquam hauriens præsentem se subduceret periculo. Neque damni expers classis hostilis fluitabat. Nox superveniens prælium non animos militantium fregit. Surgente iterum sole, nova surrexit Nostratium virtus, suffectoque in defuncti Præfecti locum Iacobo Hugenio, ingenti ardore nervos contra hostem intendit. Guaianam inter, & Promontorium Album tanto horrore pugnatum, uti confundi cuncta admodum elementa viderentur, sulfurea & crassa fumi nubes igneis intercurrentibus radiis cælum & mare obduceret. Tormenta undique & militares tubi insonabant. Volitabant majoribus machinarum ictibus rapta in sublime corpora, laceri artus sanguine tabulata cœdaverant, densa hostium cadavera per transfennas spargebantur. Æquior nostris pugna, quod hostiles naves mole sua immobiles flectere se nequirent, nostræ celeres mobilesque modo puppeis, modo proras, modo concussis lateribus compages certis ictibus lacerarent. Neque enim innectere se hostilibus navibus Nassovii consilium fuerat, ne militum numero obruerentur, sed crebris accessibus recessibusque hostem fatigare. Usque ad seram
vespe-

vesperam prælium hoc exarsit, pauci ex Nôstris pro pugnae atrocitate cæsi vel vulnerati. Navium tamen nostrarum, una, cujus compages valido machinarum hostilium impetu pertusa, quod irrumpentes aquæ sisti nequirent, cum Duce Mortamero & XLIV militibus, fluctibus urgentibus cessit, reliqui præter cæsos in scapham desilientes necessitatem ultimam superarunt. Sequenti die tertio ad Paraybam prælio uno à litore miliari usq; ad fugientem solem atrociter dimicatum. Una nostrarum navium, cui Oloris insigne erat, cum rupto minori malo difficulter se expediret, ab duodecim hostilibus cincta jacta anchora extrema expectabat. Cæterum ab unâ Prætoriâ nostra profligatæ sex, reliquæ innectendo se omnem impetum effuderunt: Iamque trecenti circiter foros transiliverant, Nostri imperterriti adversis telis in confertissimos hostes incurrunt, pro se quisque edit, ferro ferit, cominus acriter instat, utrinque imbuti sanguine enses, tandem fortuna nostra vicit, pulcherrimoque facinore hostes ejecit, quorum plures, cum arma, quibus corpus tegitur, avertissent, atque in sola fuga salutem ponerent, cæsi, alii, qui dissectis anchorariis funibus ad suos reverti nequibant, itidem vel obtruncati, vel aquarum violentiâ perierunt. Ita victoriæ fiducia initium hostilis calamitatis fuit, Nôstris propemodum victis virtus laceßita omnem modum excessit, fortunæ infestæ contumaciter restitit, donec illam expugnaret. Neque insectari clapsam navem, sine periculo hostiles quatuor poterant, quod dedita opera vadis se præcipitem dedisset. Cæterum alia hostilis, quæ suppetiarum insularium Prætoria erat, ignara periculi, cujus Præfectus erat Ioannes Andrada de Cunha, fortunam cum

illâ experiri tentavit : verum cum jam lateri immineret , cæco arenarum hæsitans flecti nequibat , utrinque tormentorum fragores densatque ictus inevitabiles erant , itaque cum hostis extremam necessitatem effugere non posset , animum despondit , & vitæ incolumitatem pactus arbitrio victoris se permisit. Trīginta antea , qui mari se præcipites dederant , ut à Nostris reciperentur , efferatis pugnandi ardore navalium animis , vel mare vel ferrum consumpsit. Accepta demum conditione milites ducenti trīginta cymbis telluri expositi , Andrada in Belgium missus. Hæc duobus conflictibus decimo tertio ad Promontorium album , & sequenti Januarii die juxta Paraibam obtigere. Interjectis duobus diebus , silenti æquore , cum appropinquare hosti tranquillitas vetaret , etiam prælia conticuerunt. Postridie vento se attollente multo acrior pugna recrudit. A nona matutina usque ad seram vesperam utrinque ferme pari nisu pugnatum. Tandem verò consummata hostis fuit infelicitas , Prætoria enim ita dedolata , ut fessa & languida suppetias postularet , & fuga sibi consuleret. Treis caravellæ à celocibus nostris in littus actæ , ex quibus trecenti admodum Hispani , qui se telluri dederant , à centurione Toulonio cæsi. Tota classis versus septentrionem vela tendens pone rupes , quas Baxos Rochi indigetant , se recepit. Locus ille victoriæ conficiundæ propter difficiles accessus importunus erat , eò quod majora navigia inde cursum repetere advorsi continui venti fluctusque impedirent. Interea quædam naves hostiles duo millia militum telluri exposuerunt , uti difficillimo per tesqua & sylvas itinere centum & quinquaginta miliarium Bahiam con-

contenderent: aliæ in Lusitaniam, vel ad insulas, nonnullæ lineam æquinoctialem secantes itidem Bahiam profectæ. Ita irritò rursus molimine, disjecta, fusa, dissipata potentissima classis fuit, quæ Occidenti ingentem terrorem incusserat. Ita nobiles illæ maritimæ Hispanorum expeditiones potentiam, atque existimationem Regis multum detrivērunt, exiguo Nostri detrimentò, sibi ipsi summopere calamitosæ fuere. Calamitas calamitatem trudebat, vastumque illud imperii corpus lacerum undique discerpebatur: sicuti difficile est continere, quæ vix ullo limite stringuntur. Inprimis infestus Hispano Oceanus, & Nostri non simpliciter indulgebat. Et quidem deleta fuisset hæc tota classis, nisi quorundam nauarchorum ignavia vel perfidia pulcherrimam impeditisset victoriam. Quippe duodecim tantum vel ad summum quindecim naveis vires suas profligando hosti intenderant, cæteri sacramenti immemores fœdo flagitio optimam occasionem corrupere. Quos, ubi Recitam ventum fuit, frequens senatus judicavit contra Rempublicam fecisse. De nonnullis more majorum extremum supplicium sumptum, quibusdam, prout diversa meritorum ratio postulabat, mortis pœna remissa, & vibrato supra caput à carnifice gladio extrema imposita est infamia, cæteri exuti dignitatibus suis minore ignominia, vel etiam pecuniaria pœnâ multati. Quorum socordiâ & perfidiâ cæterorum virtus eo magis emicuit, qui seipsos non deseruerant, & experiendo exiguis admodum copiis classem, uti ipsi postmodum Hispani testati sunt, x c i i i navium, inter quas viginti quatuor galeones, profligaverant, fuderantque, quibus & integer honos, illibatusque stetit.

CAP. LXXI.

*EXPEDITIO NAVALIS SVB PRÆ-
FECTO HOUTEBENIO VERSUS ANGO-
LAM, ATQVE IN SVLAM SANCTI
THOMÆ, ANNO 1651 c. XLII.*

PRAEFECTUS classis Houtebenius simul atque in Brasiliam venit, nobili alicui expeditioni ingenium intendit, neque obvia sed summa quæque affectabat. Generosi spiritus labore, & quæ cum sequitur gloriâ, nutriuntur. Non est quicquam tam arduum, quod virtute expugnari nequit. Neque ignorabat quanto major illi Provincia demandata, tanto majore cura administrari debere. Ipse mari innutritus omnes labores & pericula consueta habebat, adversa & secunda expertus, eoque imperterritus nihil nisi turpem famam metuebat. Classis in procinctu erat viginti navium, militibus bis mille, classiariis nongentis, & ducentis Brasiliensis cum tribuno militari Hinderfonio insidebatur. Trigesimo Maji die Reciffa mari se committens, vigesimo demum & quarto Augusti sitientem & nimium propinqui solis fervoribus adustam Africam oculis usurpavit. Prope mare Africanum Angolæ regnum, & in eâ Loandæ civitas non ignobilis ab hostibus possidebatur. Incolæ asperi, incultique, vagi palantesque, soli servituti utiles, pecorum instar conficiendo saccharo in molis agitantur. Quorum ingens quoque numerus in Brasilia iisdem laboribus summa severitate destinatur. Sin mitigentur imperia, insolescunt, sin durius habeantur.

beantur, in officio retineantur. Ad horæ spatium ab urbe sub strenuissimo Præfecto Hinderfonio telluri expositus miles, qui supra ardorem regionis suo æstu agiturus, impiger, avidus gloriæ, prædæ, quæ maxime militaria pectora accendit, cupidus, contra ipsa tormenta munimentorum, quæ litus circumjacent, magno animo insultabat. Caterum Nostri ex navibus continuis machinarum ictibus ita præfidiarios fatigarunt, uti invadentibus vacua loca relinquerent. Hinderfonius opportunum ratus ulterius occasionem prensare, eâdem vespere magnis passibus ad urbem contendit. Contra præja Nigritarum millia, qui in armis ætatem egerant, primo acerrime dimicatum. Quorum virtus, etsi diu adverso corpore pugnarent, tandem elanguit. Quippe corpora illorum primo impetu valida, si diutius urgendo presseris, fluxa tandem cum mollitie sui cæli liquescunt. Cedentibus Nigritis, Lusitanus gubernator Petrus Cecerra Menesius consilii inops cum nongentis militibus indigenisque, qui in subsidio erant; in fuga præsidium omne sibi quæsivit, urbem vacuum victoris arbitrio reliquit. Inventâ in urbe præter cibaria & annonam militarem, viginti novem ærea, sexaginta novem ferrea tormenta, naves majores, minoresque triginta. Urbs ipsa edito colle sita nequaquam munita, portum ipsum, qua introitus ex mari, munimenta prætexebant. Hinderfonus urbem ipsam atque ædificium, cui nomen Bengo erat, flumini inherens, quod ille locus aquationi opportunus esset, muniri jussit. Lusitani validâ manu impedire nova opera tentabant, ceterum prælio aspero repulsi centum ex suorum & Nigritarum numero fato occubuerunt. Prospere hic cesserat Fortuna

belli,

belli, verum ne tempus huic occasione se subduceret, insistere ulterius novis patrandis facinoribus Houtebenio consilium fuit. Insula S. Thomæ ejusdemque nominis oppidum sub nimium propinquo sole radiis verticalibus exusta proventu tamen sacchari fertilis est. Hanc petere, ipsumque veluti Phœbi cubile invadere Houtebenius constituerat. Victoria successit, (unâ tamen nostrarum navium incensa plerique perierunt) verum Nostreis propter aëris intemperiem infauusta. Debellato hoste nova victoribus morborum incubuit cohors, quibus plurimi aëris ferventissimi insueti conficiebantur, atque ipse quoque Præfectus mortalitatis leges implevit. Regionem ipsam torridis vaporibus exitialem malignus admodum aër infestat, quique ibi habitant Lusitani vix quinquagesimum annum attingunt, indigenæ longævi sueti tam maligno aëri inde nullam noxam ferunt.

CAP. LXXII.

*PRÆLIUM ACRE INTER CENTURIONEM VELDMUSIUM, ET QUATOR DVNKERKANOS, ANNO
CLO ID C XLIV.*

CIRCA Flevolandiaë litora se diffuderant quatuor. Dunkerkanorum naves, qui spe potiundæ prædæ mercatoris inprimis navibus insidias tendebant. Occursantem centurionem Veldmusium, simul junctis viribus expugnare tentabant. Cæterum ille extremam necessitatem
plus

plus quam virili audacia superavit, cum nihil enim reliqui esset, quam imminentem hostium ferociam contundere, aut mori per virtutem, simul militari, & horridâ facundia suos affatus, ne Deus, inquit, siverit, uti prope litora nostra hostium violentiæ pateamus, mori mihi ante quam fœda deditione me prostituam, constitutum est, vos quoque qui virtute humanum fastigium excessistis, oro quæsoque, ne me non tam præfectum, quam commilitonem vestrum, deferatis. Cætera vobis totiens imperavi, nunc etiam rogo, etsi imperio uti possim. Neque multitudo vos moveat, plerunque parva manu victores fuimus. Ite alacres & spe pleni, me vel virtutis vel ignaviæ exemplum sequimini. E continenti sex & viginti ferreis machinis ita intonuit, uti Prætoria hostium navis viginti & octo tormentis gravis immenso hiatu aquam hauriret, profundoque absorberetur. Tres aliæ adeo laceræ, ut vix portum attingerent. Nostra tamen navis etsi virtute superior, ita undique quassata erat, ut intra aquam octodecim ictibus lacera rimisque fatiscens, ægre attracta, juxta locum, qui indigenis Robbega appellatur, pessum iverit. Cæterum Neptuni illos indigenas, ne quidem ipsum mare deseruit. Omnes enim, uti meruerat illogum virtus letho erepti, perennem cum vitâ gloriam junxerunt. Neque ulla erit tam surda posteritas, quæ tantos similesque heroës non in cælum debitis laudibus ferret.

*LICHTHARTII ARCHITHALASSI
CLASSIS INDIAE OCCIDENTALIS VIRTVS
EXPVGNATIS TREDECIM LVSITANORVM
NAVIBVS. ANNO CIO I D C XLV.*

LUSITANI, postquam Dux Bragançæ ejecto Castiliae Rege regiam auctoritatem arripuisset, Nobis foedere nexi erant. Cæterum in Brasilia gens hominum mobilis & rerum novandarum avida, multa nefanda facinora per occasionem agitabat. Et nova pacis necessitudo facile illorum scelerata consilia tegebat, Magnitudo sceleris, quâ molitus fuit Antonius Cavalcantelca, Mauritiopolis senator, omnium ingenia exuperabat. Quippe feralibus filia nuptiis invitatos, Præfectos militareis atque urbanos confodere immane ejus erat consilium. Aperto facinore ab uno ex consortibus, quem conscientia tanti criminis agitabat, Principes conjurationis fugientes manum militarem cogere, agros incendio fœdare, postremo crudelissimi mortales cruore atque luctu omnia complere. Multa alia aspera & fœda evenerunt, quæ, quia extra institutum nostrum, dicere piget tædetque. Cæterum uti terra potiores, ita mari tamen vicit fortuna Reip. nostræ. Strenuissimus Præfectus Lichthartius, cujus & alibi virtus memorata fuit, maria lustrare, surgentem potentiam Lusitanicam collidere, omnia boni imperatoris munia exequi. Lusitanica classis fluxâ fide ad rivum formosum centum & quingentos armatos homines

nes rebellibus junxerat, quibus Serinhaimum ad deditio-
nem coëgerant. Tredecim ibi hostiles naveis octo suis ma-
gno impetu adortus Lichthartius, facile illas fudit, dele-
vit, perfidiam virtute vindicavit. Neque verò levis illa
belli tempestas fuit, ita tormentis horrendum in modum
sævientibus, ut confundi elementa viderentur, perpetuus-
que ignium fulgur, mugitus continuus machinarum, pi-
larumque violenti turbines cuncta turbarent: denique
omnia ad terrorem ultimæ calamitatis composita videban-
tur. Quatuor naves superatæ, ceteræ incensæ, vel in litus
adactæ pulcherrimum Nostris spectaculum præbuere. Vir-
tute & confidentia ut plurimum victores fuimus, insidiis
tantum & perfidia à Lusitanis circumventi. Nihil sanctius
fide colunt Batavi, perfidia enim vincere magnum jure
opprobrium est. Non quod eadem artes iisdem in promp-
tu non sint, sed quod tale crimen candor Batavorum non
admittat.

F I N I S.



Qq

IN-

INDEX CAPITUM.

C A P U T I.

DE expeditionibus antiquis tempore Romanorum. fol. 2

C A P. II.

De pugna circa Damiatam Ægypti urbem. Anno 1218. 9

C A P. III.

Praeliū inter Hollandos & Flandros. Anno 1295. 13

C A P. IV.

Praeliū inter Hollandos & Frisios Orientales. Anno 1298. 15

C A. A. V.

Praeliū inter Hollandos & Flandros. Anno 1304. 17

C A P. VI.

Praeliū inter Margaritam, Filiumque Gulielmum. Anno 1351. 26

C A P. VII.

De Praeliis tempore Iacobi. Anno 1426. 30

C A P. VIII.

Bellum maritimum cum Osterlingis. Anno 1439. 33

C A P. IX.

*De maritimo bello inter Gallos & Hollandos, Anno 1471. & seq.
sub Carolo Burgundo, & Maria.* 37

C A P. X.

Bellum inter Flandros & Hollandos. Anno 1483. & seq. 42

C A P. XI.

De Geldro-Frisico bello, Praeliisque maritimis. Anno 1504 & seq. 45

C A P. XII.

Praelia Gallica, precipue Anno 1554. 56

C A P. XIII.

*De expeditione Geusiorum, ut vocant, Aquatiliū, ejusque successu.
Anno 1569. & seqq.* 59

C A P. XIV.

INDEX CAPITUM.

C A P. XIV.

Prelum cum classe Ducis Medinaceli, & cum classe Lusitanica, Anno
1572. 64

C A P. XV.

Prelum inter Sancium Avilam & Zelandos. Anno 1573. 68

C A P. XVI.

Velitationes navales inter Bossuvium & Hollandos in lacu Harle-
mensi. Anno 1573. 71

C A P. XVII.

Prelum inter Comitem Bossuvium & West-Frisios in sinu Australi.
Anno 1573. 75

XVIII.

Prelum navale juxta Romerswaliam inter Hispanos & Fœderatos.
Anno 1574. 85

C A P. XIX.

Prelum navale inter Zelandos, & classem Antverpianam. Anno
1574. 91

C A P. XX.

Expeditio navalis liberandæ obsidioni urbis Lugduni Batavorum, cum
ab Hispanis undique premeretur. Anno 1574. 95

C A P. XXI.

De classe Hispanica profligata, vel tempestate perditâ. Anno 1578. 101

C A P. XXII.

De expeditione Britannica Hispaniam versus, quibus junctâ 24 Fœ-
deratorum naves. Anno 1596. 108

C A P. XXIII.

De prima versus Indiam navigatione, præliisque navalibus cum Lus-
itanis & Barbaris, Anno 1595. & duobus seqq. 117

C A P. XXIV.

Expeditio navalis, qua ab Anno 1598 usque ad 1601 Oliverius de
Noort, totum terrarū orbē triennii spatîo circumnavigavit, ejusq;
conflictus cum duobus Hispanorū corbitis juxta Manillas. 125

Q 9 2

CAP. XXV.

I N D E X

C A P. XXV.

Pralia & velitationes inter nonnullas naves classis Hispanica, Hollandicaeque. Anno 1598. 129

C A P. XXVI.

De nobili, sed non felici expeditione navali 80 navium, sub Petro Douza Praefecto maris. Anno 1599 & seqq. 130

C A P. XXVII.

Legierii praelium cum sex Spinolæ longis navibus, item alie velitationes, Anno eodem. 135

C A P. XXVIII.

Conflictus Hispanica classis cum nostris Societatis Orientalis navibus. Anno 1601. 137

C A P. XXIX.

Praelium Volphardi Harminii, qui Anno 1601. cum summo classis imperio in Indiam missus fuerat, cum classe Lusitanorum. 139

C A P. XXX.

Varia velitationes Spilbergii cum Lusitanorum navibus. A^o 1601. & seqq. 141

C A P. XXXI.

De octo longis hostium navibus depressis vel corruptis. Anno 1602. 144

C A P. XXXII.

De pretiosissima Lusitanorum navi, quam Caracquam indigetant, à Batavis superata. Anno 1602. 148

C A P. XXXIII.

Frederici Spinolæ cum Zelandis navale praelium, Anno. 1603. 151

C A P. XXXIV.

Iacobi Heemskerckii cum Lusitanorum pretiosissima corbita praelium. Anno 1603. 153

C A P. XXXV.

Stephani Verbagii praefecti in India cum Lusitanis praelia. Anno 1604. & seqq. 154

CAP.

C A P I T U L U M.

C A P. XXXVI.

*Paelium navale inter Petrum Cubiarram præfectum classis Hispanice,
& Haultainum Zelandie Archiebalassum. Anno 1605. 159*

C A P. XXXVII.

*Lamberti Pulchri cum prætoria Dunkerkanorum memorabilis confli-
ctus. Anno 1605. 161*

C A P. XXXVIII.

*Malacca obsidio, & prælium navale inter Matelvium & Lusitanos.
Anno 1606. 162*

C A P. XXXIX.

*Gemina expeditio Gulielmi Hautainii, & Proprefecti Reineri Nicolai
memorable prælium. Anno 1606. 168*

C A P. XL.

*De nobilissima victoria Iacobi Heemskerckii in Fretò Tartessico circa
Gibraltam. Anno 1607. 170*

C A P. XLI.

*Expeditio infælix sub præfectura Petri Gulielmi Verboevii versus In-
diam. Anno 1607. & seqq. 180*

C A P. XLII.

Conflictus classis Batavica cum Hispanica, Anno 1612. 183

C A P. XLIII.

*Acerrimum prælium Georgii Spilbergii classis Indica præfecti, cum classe
Roderici Mendozæ. Anno 1625. 185*

C A P. XLIV.

*Melchioris Kerchovii præfecti classis Batavica cum Hispanis prælium
navale. Anno 1618. 192*

C A P. XLV.

*Prælium classis Batavica cum Hispanica juncta contra Turcas prædo-
nes,*

M I U N T D I E I X

nes, sub Praefectura Hautainii, & Lamberti Pulchri Vicarii. Anno
1618. 193

C A P. XLVI.

Praedium Hermannii Cleuteri cum duabus hostibus navibus Anno 1622.

in mense Augusto: ejusdem cum Ioanne Michaelis acerrimum certamen, eodem Anno, mense Octobri. 195

C A P. XLVII.

Praedium acre prope Gades, inter Hispanicam classem & Nostram, cui praerat. summo cum Imperio Ioachimus Henrici Swartehontius.
Anno 1622. 197

C A P. XLVIII.

Centurionis Iacobi Stenbachii praedium cum Hispanicam classe, A° 1623. 200

C A P. XLIX.

De illustri expeditione sub praefecto Iacobo Willekeno, & Vicario Petro Heimo. Anno 1623 & 1624. 203

C A P. L.

Expeditione navalis sub praefecto Iacobo Heremita, & res gesta. Anno 1623. & sequentibus. 210

C A P. LI.

Praedium inter praefectum Philippum De Zuilen, & undecim naves hostiles circa Loandam, Anno 1624 mense Iunio, nomine Societatis Occidentalis. 213

C A P. LII.

Acerrimum praedium inter Lusitanicam classem, & Hollandicas Anglicasque naves. Anno 1626. 217

C A P. LIII.

Praedium inter Wibrandum Schrammum praefectum classis Indicae, & praedonem Nicolaum Companum. Anno 1626. 219

C A P. LIV.

Memorabilis praetoriae Hispanicae clades, à novem classariis perpetrata. Anno eodem. 222

CAP. LV.

C A P I T U M.

C A P. LV.

De expeditione & praelio Petri Heimii cum classe hostili juxta urbē S.
Salvatoris in Brasilia. Anno 1627. 223

C A P. LVI.

De ejusdem praefecti praelio, & victoria, eodem Anno. 228

C A P. LVII.

Praedium acriter inter tres Nostratum naves, & praetoriā Vicariamque
Hondurensē. Anno 1627. 8. Julii. 231

C A P. LVIII.

De praelio navali inter classē Hollandicā nomine Societatis Indicae
Occidentalis, cui praefectus erat Petrus Adriani Ita, & praetoriā,
vicariamque Hondurensē. Anno 1628, mense Augusto. 235

C A P. LIX.

De classe argentifera à Petro Heimio directā, Anno 1628. 140

C A P. LX.

Petri Heimii Archithalassi Hollandiae cum tribus Dunkerkanis acerrimus
cōflictus, ejusque infausa mors. A^o. 1629. 244

C A P. LXI.

Nobilis expeditio sub Imperio Henrici Longuini sitē periculosa velitatio
inter eundē & immensam classē Frederici de Toledo. Olinda praefectura
Pernambucci oppidū terra marique occupatur. A^o. 1629. 248

C A P. LXII.

Praedium inter tres Dunkerkanos, & unam celocē, cui Navarchus &
praefectus erat Ioannes Cornelii Lichthartius. A^o. 1630. Mense
Novembri. 255

C A P. LXIII.

Praedium navale inter Hostes & Federatos ad Scaldim fluxium. A^o.
1631. 257

C A P. LXIV.

Praedium navale inter Antoniū d'Oquendo, classis Regiae summū praefec-
tum, & Adrianum Paterum, Generalem classis Hollandicae. A^o.
1631. 261

CAP. LXV.

INDEX CAPITUM.

C A P. LXV.

*Prælium navale inter navem præfecti Cornelii Ioannis Hanii, & duas
Dunkerkanorum naves bellicas. Anno 1633.* 265

C A P. LXVI.

*Prælium navale inter commendatorem Ioannem Everardi, & Archi-
thalassum hostilem Colardum. Anno 1636.* 266

C A P. LXVII.

*Pugna navalis inter Cornelium Iolum Houtebenium, præfectum classis
Belgicæ, & argentiſeram classem Hispanorum. Anno 1638.* 269

C A P. LXVIII.

*Prælium navale inter Martinum Trompium Archithalassum, & Mi-
chaëlem Dornium præfectum classis hostilis. Anno 1639.* 274

C A P. LXIX.

*Prælium celeberrimum Dunense inter potentissimam Hispanicam clas-
sem, & Fœderatos. Anno 1639.* 278

C A P. LXX.

*Prælium navale inter Regiam classem, & Societatis Indicæ Occidentalis
in Brasilia. Anno 1640.* 293

C A P. LXXI.

*Expeditio navalis sub præfecto Houtebenio versus Angolam, atque
Insulam Sancti Thome. Anno 1641.* 300

C A P. LXXII.

*Prælium acre inter centurionem Veldmufium, & quatuor Dunkerka-
nos. Anno 1644.* 302

C A P. LXXIII.

*Licheharti Archithalassi classis Indiæ Occidentalis virtus expugnatis
tredecim Lusitanorum navibus. Anno 1645.* 304

F I N I S.



